







LE ROMANT

SATYRIQUE

DE IEAN DELANNEL,
Escuyer Seigneur du Chaintreau
& du Chambort.



A PARIS,
Chez TOUSSAINT DU BRAY,
rue Saint Jacques, aux
Epics-meurs.

M. DC. XXIII.

Avec Privilege du Roy.

LE

ROMAIN

SATYRIQUE

DE LEAN DE LA NIVE

à l'usage de la Cour

de la Chambre

de la Chambre

de la Chambre

de la Chambre

de la Chambre

de la Chambre

de la Chambre

de la Chambre

de la Chambre

de la Chambre

de la Chambre

de la Chambre

de la Chambre

de la Chambre

de la Chambre

de la Chambre

de la Chambre

de la Chambre





A TRES-HAVT ET
TRES-PVISSANT PRINCE

MONSEIGNEVR

LOVIS DE LORRAINE,
Prince de Phaltzbourg, Comte
de Boulay, de Bitsche, & d'Hon-
bourg, Baron d'Aspremont, de
Neufchasteau, & de Champi-
gny, &c.



ONSEIGNEVR,

*L'un des plus signalez
aduātages que les hom-
mes tirent de la Vertu,
quand ils sont montez à quelque émi-
nent degré de perfection, c'est à mon
aduis d'estre connus non seulement de*

Epistre.

tous ceux de leur pays, mais encores des nations estrangeres qui reuerent leur nom, combien qu'elles n'ayent iamais veu leurs personnes. L'effort des plus grands Capitaines tend là, le desir des plus doctes personnages s'y arreste, les sciences & les arts n'ont point d'autre but; & les desseins d'un chacun s'esleuent à cet inexprimable bon-heur. Et à n'en point mentir, que peut-on desirer, de plus honorable? que peut-on treuver de plus utile? & que peut-on s'imaginer de plus illustre, que de voir son nom cher-ry dans son pais, & passer glorieusement les montagnes inaccessibleles, les mers orageuses, & les deserts inhabitables, pour estre reueré, que ie ne die adoré de tout le monde, voire mesme des peuples les plus barbares de la terre? Certes l'experience nous monstre tous les iours que c'est vne honte si insupportable de ne connoistre point

Epistre.

ceux, qui par de loüables & presque diuines qualitez surpassent tous les autres hommes, & sont comme les vniques merueilles de nostre siecle, que quand nous en entendons parler, tant s'en faut que nous osons faire paroistre que nous ne les connoissons pas, qu'au contraire la vanité nous pousse bien souuent à nous vanter d'estre de leurs intimes amis. Mais il est certain que la gloire est plus grande de connoistre, & d'estre connu d'un personnage de qui les loüanges s'espandent par tout où le Soleil se fait voir, que non pas d'estre estimé d'une infinité de gens, qui au lieu de connoistre ceux que la vertu comble d'honneurs, ne se connoissent pas eux-mesmes. C'est icy, Monseigneur, la principale raison qui a fait desirer à ce braue & inimitable Ennemidor, qui iusques icy n'a voulu estre connu de personne, de se faire connoistre à vostre Excel-

Epistre.

lence, qui assurément ne luy refusera pas vn favorable accueil, quand elle aura sceu sa fortune & ses exploits genereux, puis que vous faites estat de tous ceux qui le meritent, & qui implorent vostre faueur. Et comment pouuoit-il mieux perdre le nom d'Agnotos, qui est le premier qu'il a eu, & qui signifie inconnu, qu'en se faisant connoistre à vous, que toute la Chrestienté connoist pour estre pieux, liberal, vaillant, courtois, genereux, & doiüé de toute autre sorte de vertus autant que Prince qui viue? Pouuoit-il prendre vn meilleur conseil que de se donner à vous, Monseigneur, à qui tous les gens de bien donnent leurs vœux, leurs pensees, leurs cœurs, & leurs affections? Il est vray qu'il eust esté bien receu en France parmy cette prodigieuse multitude de tres grands Princes, & de tres-puissans Seigneurs qui esleuēt la pompe & la magnificen-

ce de cette Cour-là, par dessus toutes celles des plus superbes Monarques de la terre. Mais y ayāt ouy publier vos loüanges par la bouche de la Renommée, qui raut tout le monde en les racontant, il a voulu tesmoigner, en se venant ietter à vos pieds, qu'il est impossible de vous connoistre, & de viure sous d'autres loix que celles de vostre volonté. Aussi est-ce pour ce subiet qu'on dit par tout, que ce tres-Auguste & tres-sage Duc de Lorraine, qui est les delices de son peuple, & l'image viuante de la Divinité, ne pouuoit faire vne plus iudicieuse, ny plus iuste eslection que celle qu'il a faite de vostre personne, à qui son Altesse peut seurement confier ses pensees, & sur le soin de qui elle se peut heureusement décharger d'une partie de tant de soins, qui sont inseparables de la vie des Princes Souuerains. A la verité si les particuliers font estat d'un fidelle amy, cōme d'un thresor inestimable, avec combien

plus de raison les grands Monarques, qui sont environnez de flatteurs, & accablés d'affaires, doiuent-ils s'efforcer d'obliger par toute sorte de moyens vn personnage de merite, en qui ils se puissent fier cōme en eux mesmes? N'est ce pas pour cette consideration que tous les Roys & tous les Empereurs, qui ont le mieux gouverné leurs peuples, & le plus estendu les limites de leurs Estats, ont tousiours eu vn soin nonpareil d'esleuer quelqu'un de leurs subiets aux plus hauts honneurs & aux plus éminentes charges de leurs Empires? Ne fut ce pas cette forte raison qui poussa Auguste, qui a esté l'un des plus iudicieux, & des plus aduisez Princes du monde, à honorer de son alliance Agrippa, qui estoit l'œuvre de ses mains, & le confident de ses plus secretes pensees? Mais qu'est-il besoin d'estendre davantage ce discours, puis qu'il n'y en a point de plus ordinaire en la bouche des hommes, ny de plus

agité par la plume des *Escriuains*, que
celuy qui fait sçauoir à toutes les na-
tions du monde, que la fortune n'a point
assez de faueurs pour recompenser vo-
stre merite, & que son *Altesse*, de qui
les magnificences, aussi bien que les ver-
tus sont incomparables, ne sçauroit pas
comment il faut aimer, si elle ne vous
aimoit infiniment. O qu'*Ennemidor* se
doit doncques estimer heureux, s'il a le
bon-heur de tomber entre vos mains, qui
sont vrayment dignes de tenir les res-
nes du plus grand *Empire* du monde.
Ce seroit aussi là, *Monseigneur*, où se
termineroit vostre gloire, si les vœux
estoiient accomplis de celuy qui a l'hon-
neur d'estre,

MONSEIGNEUR,

Vostre tres-humble &
tres-obeissant seruiteur
DE LANNE L.



LE SECRET DV ROMANT
Satyrique.



N s'imagineroit peut-estre en ne lisant que le premier & le second Livre de mon Romant, que mon dessein n'est que d'offenser quelques particuliers, dont les actions peuvent auoir quelque rapport avec celles que ie descrits. Mais la suite & la fin feront voir le contraire, & que si en la vie des hommes & des femmes qu'on soupçonneroit que i'eusse voulu blasmer, il se treuve quelque chose de semblable dās les mœurs des personnes de mon Romant, on y remarquera aussi tant d'autres circonstances différentes, qu'on iugera bien qu'il n'y peut auoir aucune cōparaïson. Ou

bien on pourra d'ocques dire qu'un bœuf & un cheual font vne mesme chose, parce qu'ils ont tous deux vne queue. Car quelle extrauagance seroit-ce à un homme de se plaindre d'un discours, qui reprenant vne infinité de vices en general toucheroit peut-estre quelqu'un des siens en particulier? Est-ce à dire que Plutarque en blasme ce qu'il y auoit de reprochable en Alexandre, ait blasme Iule Cesar, parce qu'il a appris l'excès de l'ambition d'Alexandre, qui n'estoit pas moindre en Cesar qu'en luy? Non non, tous les hommes ont tant de deffauts, qu'il est impossible de représenter au vray le naturel de l'un, que les autres n'y remarquent plusieurs de leurs imperfections. Toutesfois il n'y en a point qui soient tellement priuez de iugement, que pour reconnoistre en vne histoire

quelqu'une de leurs mauvaises habitudes, vueillent s'attribuer tout le reste, & dire que c'est contre eux qu'elle a esté descrite. Les liures sont des miroirs, où nous pouuons voir les soüilleures de nostre ame pour les nettoyer. Nous fascher de ce qu'ils nous les representent naïuement, & les condamner, c'est imiter ceux qui rompent vne excellente glace, parce qu'elle leur fait voir trop clairement les rides & toute la laideur de leur visage, quoy qu'elle soit faite pour tous ceux qui s'en voudront seruir, & non point particulierement pour ceux qui la mettent en pieces, parce qu'elle est veritable, & qu'elle ne deguise rien. Quant à moy, ie ne pretends diffamer personne en particulier, & n'ay point d'autre dessein que de représenter le dereglement des passions humaines sous des noms supposez,

comme dans vne fable pleine de plusieurs agreables diuersitez. C'est pour ce subiet que i'ay intitulé mon Liure, Le Romant Satyrique, qui a neantmoins toutes les apparences d'une histoire veritable, ou pour le moins vray semblable. Si on y treuve les noms vn peu desagreables, on doit considerer qu'ils signifient tous neantmoins quelque chose, & qu'ordinairement de vingt hommes, difficilement s'en treuve-t'il quatre qui n'en ayent de si rudes & de si difficiles à retenir, qu'on est bien souuent contraint de les faire pronócer plusieurs fois. Si on m'objecte que puis que ie descris vne histoire d'un stile, qui peut faire croire qu'elle est du temps des anciens Payens, ie ne deuois point parler de pistolets, de carabines, de canons, ny de plusieurs autres choses, qui ne sont inuentees que de-

puis peu de siècles. Je respons que la plus - part des personnages dont ie represente les actions, ne sont pas de ces vieux Payens qui viuoient il y a dixsept ou dixhuiet cens ans. Ce sont Payens nouueaux, Payens à la mode, Payens d'Estat, Payens de ce temps, Payens de tous les diables, qui les payeront quelque iour en enfer. Parmy ces Payens-cy, les pistolets, les carabines, les canons, les temples, les sacrifices, les Dieux, les demy Dieux, & vne infinité d'autres merueilles sont en vsage. Si on dit, que ie ne sçay pas l'antiquité, puis que i'appelle Preteurs ceux qui en Galatie sont Iuges de l'honneur des Gentils-hommes & Generaux des armées; Je maintiens que Preteur en langage Galatien, veut dire Mareschal de France en langage François. Si on dit, qu'il n'y a point d'Empire de Galatie, & qu'on ne con-

noist ny Galates ny Galatiens, i'anonce que c'est vn pays nouuellement descouuert, le plus beau & le meilleur qui soit au monde, & que pourueu qu'on y porte assez d'or & d'argent, on pourra acheter tout ce qu'on voudra, car tout s'y vend. Si on treuve estrange la naissance de mon Heros, on se souuiendra que plusieurs grands Princes l'ont eue semblable, & qu'entre autres, Guillaume Duc de Normandie a conquis l'Angleterre, & a esté l'un des plus genereux, des plus vaillans, & des plus heureux monarques du monde. Si enfin on me reproche que mes discours ne sont pas assez coulants, que mes paroles ne sont pas assez belles, que mes conceptions ne sont pas assez releuees, que mes poinctes ne sont pas assez subtiles, que mes inuentions ne sont pas assez gentilles, que mes

Au Lecteur.

periodes ne sont pas assez bien
tournees ou mesurees , que mes
rencontres ne sont pas assez admi-
rables , que mon stile n'est pas assez
fleury , que mes diuersitez ne sont
pas assez ioyeuses , que ma veine
n'est pas assez égalle , que mon Ge-
nie n'est pas assez puissant , que ma
doctrine n'est pas assez parfaite , &
qu'enfin tout ce qui rend vn liure
digne des beaux esprits de ce
temps, n'est pas assez curieusement
ny assez soigneusement obserué
dans mon Romant; On se represen-
tera, que puis que les hommes ne
parlent que pour se faire entendre,
on doit estre content, si on m'a bien
entendu.



LE ROMANT SATYRIQUE.

LIVRE PREMIER.



LE Soleil palissant cō-
mençoit à se cacher à
nos yeux, & ses rayons
ne se voyoient plus
qu'à grand peine sur le sommet
d'une montagne, qui bien-tost
les deuoit couvrir, quand Enne-
midor poursuivant son chemin
vers la grande ville de Sirapis,
descouvrit sur le bord d'un fleu-
ve qui passe au milieu, trois hom-
mes, dont il y en avoit deux à
pied tenans leurs espées nuës à la

main , & l'autre qui estoit monté sur vn bon cheual , sembloit les vouloir empescher de se battre. Ennemidor estoit sur vn petit bident las & recreu, & auoit en croupe vne malette qui estoit cause qu'il marchoit au petit pas: Neantmoins estant poussé d'une extreme ardeur de se rencontrer aux occasions, qui font trouuer dans les plus grands dangers les plus grands honneurs , fit tant qu'à force de coups d'esperons il s'approcha de ceux qu'il voyoit , & ouït que celuy qui estoit à cheual disoit aux deux autres. Messieurs, ie ne souffriray iamais que vous en veniez aux mains, si ie ne suis de la partie: Boittantual contre qui ie dois auoir affaire ne peut desormais beaucoup tarder à venir. Voire mais, luy respon-

dit l'un de ceux qui estoient à pied, s'il est arresté, & qu'il ne puisse se rendre icy, voulez vous m'empescher de contenter vostre amy ? Tenez, voila vn Cavalier qui vient vers nous (monstrant Ennemidor qui s'approchoit d'eux) si vous voulez ie le prieray de me servir de second. Il ne disoit cela que pour se moquer, ne croyant pas que ce fust vn homme que le desir d'acquiescer de l'honneur deust porter à se battre pour des gens qu'il ne connoissoit point. A la verité, outre qu'il estoit mal monté, & en assez mauvais equipage, son ieune âge qui n'arriuoit point encores à seize ans, sembloit l'exempter du combat: Toutefois le Prince Voltandon qui estoit à cheual, & le Duc de Meuridas son frere, plu-

stoit pour auoir moyen de rire attendant Boittantual, que pour aucun autre sujet, dirent qu'il falloit sçauoir si ce beau ieune homme auoit du courage, surquoy Voltandon print la parole des deux autres, qu'ils ne viendroient point aux mains qu'au parauant il n'eust parlé à luy. Apres cela il poussa son cheual, & ayant atteint Ennemidor, luy dit: Monsieur, ces deux Gentils-hómes que vous voyez là dans ce pré, s'y font rendus pour terminer par la voye des armes quelque different qu'ils ont ensemble: Mais parce que ie les y ay fait treuuer sur la promesse que Gardenfort qui se doit battre cõtre mon amy m'auoit faite d'y faire venir Boittantual pour auoir affaire à moy, & qu'il n'est

point encores venu, quoy qu'il y ait plus de deux heures que nous l'attendons ; ie viens vous demander si vous ne voudriez point estre en sa place. Encores que ie n'aye point le bien de cognoistre Gardenfort, ny aucun de vous autres (respondit Ennemidor) il me pourroit neantmoins prier de si bonne grace, que pour rien du monde ie ne voudrois manquer à luy rendre ce seruice. Voltandon n'eust pas si tost ouy ceste responce, qu'il couru la faire entendre à Gardenfort, qui au mesme temps s'enuint à Ennemidor, & luy dit de la plus gracieuse façon qu'il luy fut possible. Monsieur, si vous auez iamais eu desir d'obliger vn Gentilhomme en vne occasion autant iuste qu'honorable, ie vous sup-

plie me faire ceste faueur que de m'assister en vn combat pour lequel on m'a fait venir icy. Ennemidor qui estoit si desperduëment espris du desir de signaler son courage, que ny la rigueur des Edits contre les duels, ny le danger de la mort ne pouuoient empescher d'en rechercher les occasions, respondit: Monsieur, ie suis tout prest d'employer ma vie pour vous, en vn sujet que ie ne puis refuser, sans renoncer aux avantages de ma naissance, qui m'oblige à mourir plustost que de cōsentir à aucune lascheté, ou de faire la moindre action cōtraire à la profession d'un Gentilhomme. En disant ces paroles il mit pied à terre, & attachâ son bidet à vn saule qui estoit sur le bord de la riuiera, demandant

puis apres à Gardenfort ; qui estoit celuy-là contre qui il devoit avoir affaire. C'est moy, répondit Voltandon. Ne perdons donc point de temps, dit Ennemidor, qui mit aussi-tost l'espee à la main, & en s'esloignant de Gardenfort & de Meuridas, qui estoient desia en presence l'un de l'autre, s'approcha de Voltandó, & à la deuxiesme estocade qu'il luy porta, luy passa son espee au trauers du ventre, dont il tomba roide mort. Aussi-tost apres il courut vers Gardenfort, qui auoit rompu son espee & estoit en grand danger. Puis Ennemidor criant au Duc de Meuridas, luy dit; M^osieur, nous sommes maintenant deux contre vous, si vous ne rendez les armes, & si vous ne demandez la vie, il faut vous re-

foudre à la perdre. Si vous me faites quelque courtoisie, répondit Meuridas, ie la publieray par tout. Rendez donques vostre espee, dit Ennemidor, & nous donnez vostre parole d'auoüer par tout où ce Gentil-homme voudra, qu'il vous a donné la vie. Voila mon espee, dit Meuridas, & si Gardenfort outre cela desire encores quelque chose de moy, ie m'oblige à le contenter. Ennemidor ayant pris l'espee de Meuridas la donna à Gardenfort, & luy dit : Monsieur, vous puis-je rendre quelque autre seruice ? Vous m'auez tant obligé, répondit Gardenfort, que ie chercheray toutes les occasions de m'en reuencher. Mais ce n'est pas assez, ie vous supplie de me dire vostre nom, afin que ie sçache à

qui i'ay l'obligation de la vie & de l'honneur. Monsieur, respondit Ennemidor, mon nom est si peu de chose, & si peu cognu dás le monde, que quand vous le sçauriez vous n'en seriez pas plus sçauant, & en disant cela courut reprendre son bide, & monta dessus sans se faire cognoistre en sorte du monde, quelque instáte priere que luy en fit Gardenfort. Continuant donques froidemēt son chemin, comme s'il ne se fust rien passé, à peine auoit-il fait trois cens pas, qu'il vid venir de loing vn Gentil-homme fort bié monté, qui venoit vers luy au galop, & aussi-tost qu'il l'eust attrappé, luy demanda s'il n'auoit point treuüé trois Gentils-hommes là aupres dans vn pré sur le bord de la riuere. Ennemidor

luy dit qu'il les auoit treuuez, & luy raconta de poinct en poinct le suceez de tout ce qui s'estoit passé, dont le Gentil-homme fut tellement en colere, qu'il luy dit: Vous m'auez fait vn extreme des- plaisir, car c'est moy qui m'appelle Boittentual; & qui deuois seruir Gardenfort, si ie n'eusse point esté arresté par de mes amis, qui m'ont retenu iusques à cest' heure, que ie me suis desro- bé d'eux. Vous vous pouuiez bié passer de me faire vn si grand affront, puis qu'on vous auoit dit que ie me deuois treuuer là: C'est pourquoy ie desire que vous me fassiez raison, & que nous ayons presentement affaire ensemble, afin de tesmoigner que si ie ne me suis treuvé pour seruir mon amy, ce n'est point faute de cou-

age. Monsieur, repartit Ennemidor, ce que j'ay fait ne vous doit point offencer, puis que ie n'en ay point eu l'intention, & que ie n'auois pas mesmement l'honneur de vous cognoistre: le n'ay rien fait pour Gardenfort, que ie ne voulusse faire de tres-bon cœur pour vous, si l'occasion s'en offroit. Cela ne me contente pas, dit Boittentual, il faut que vous mettiez l'espee à la main, & au mesme temps descendit de cheual, & dit à Ennemidor qu'il le tueroit s'il ne se deffendoit. Monsieur, respódit Ennemidor, considerez qu'il est nuict, & que ce n'est pas maintenant l'heure de chercher sa satisfaction, quád l'obscurité no⁹ oste presque tout moyen de nous voir: C'est pourquoy il vaut mieux differer ius-

ques à demain, & cependant vos amis vous diront si vous avez sujet de vous plaindre de moy. Je n'ay que faire de prendre en cela conseil de mes amis : car si ie ne me sens moy-mesme satisfait, ie ne puis estre content, resolvez-vous donques ou à mourir, ou à vous deffendre. Ennemidor se voyant en ceste extremité, descendit de cheual & mit l'espee à la main, puis parant vn coup que luy auoit porté Boittantual, luy en donna vn au trauers du ventre, dont il le ietta estendu sur la place.

Le bruit de la querelle de Gardenfort & du Duc de meuridas, qui estoient Seigneurs de qualité, s'estoit espandu par toute la ville de Sirapis, & estoit mesmement arriué iusques aux oreilles

de l'Empereur de Galatie, qui par les excez d'une prodigieuse faueur auoit esleué Gardenfort du moindre rang des Gentils-hommes, aux plus hauts degrez d'honneur de son Estat. Toute la Cour estoit diuisee à cause de ceste broüillerie, qui tenoit l'esprit d'un chacun en vne extreme inquietude de sçauoir ce qui en succederoit. La plus grande partie se declaroit pour Gardenfort, à cause de sa faueur, *qui a accoustumé d'attirer les cœurs & les volontez des Courtisans, avec plus de puissance que l'ambre n'attire la paille.* Néanmoins Meuridas étant l'un des plus puissans Princes de Galatie, & descendu de ceste illustre maison qui a si long-temps possédé le Royaume de Miraculalem, ne manquoit pas d'amis &

de seruiteurs qui embrassoient son party. D'ailleurs, il auoit encores quatre autres freres les plus genereux Princes qu'on eust pû treuuer, de qui le pere auoit avec vn pouuoir absolu gouuerné plus de vingt ans l'Empire de Galatie, dont on croyoit qu'en fin il se fust rendu maistre, si la foudre qui luy osta la vie, ne luy en eust osté le dessein.

Plusieurs n'estimoient pas que ceste affaire deust passer si auant, & disoient que les Princes & les Seigneurs de si grande qualité qu'estoit Gardenfort, ne se battoient iamais en duel, mais qu'il se treuuoit tousiours quelque lieu d'accommodemēt. Ce n'est pas, disoit-on, qu'ils n'ayent assez de courage pour cela : mais ils sont tousiours accompagnez d'v-

ne si grande suite de seruiteurs,
qui ne les perdent presque point
de veüe ; qu'il leur est bien diffi-
cile, voire mesmes presque im-
possible de faire aucune action
qui n'ayt plusieurs tesmoins.
*Cruelle & tyrannique condition des
Grands, qui parmy l'excessiue licence
qu'on croit qu'ils ont de contenter
leurs passions, sont tellement impor-
tunez du grand nombre de seruiteurs
& d'amis qui les suivent par tout,
qu'ils ne peuvent pas mesmemēt obeir
à la necessité de leurs plus secretes
affaires sans estre veus de quelqu'un!*
Boittantual cognut ceste verité,
quand apres auoir essayé toute
vne apresdinée de tromper ceux
qui estoient avec luy: il fut en fin
contraint de se faire descendre
avec des cordes par la fenestre
d'une garderobe, où il auoit

feint d'estre contraint de demeurer quelque peu de temps. Parmy tout cela, neantmoins il ne peut si bien faire que Gardenfort, apres l'auoir si long-temps attendu, n'entraist en quelque deffiance de son courage: Et certes s'il n'en eust rendu des preuues indubitables par le combat qu'il eut, quoy qu'iniuste avec Ennemidor, son honneur y fust demeuré grandement engagé. Mais ayant esté rencontré par plusieurs Cheualiers qui couroient de toutes parts, pour empescher que des personnes de si grande qualité ne vinssent aux mains: l'on ne blasma plus en luy que l'excez de son courage. Il estoit estendu au milieu d'un ruisseau de sang, qui estoit coulé de sa blesseure: de sorte qu'on eust

eust dit qu'il s'estoit noyé dedans
tant il en auoit perdu. Quelques-
vns descendirent de cheual aussi-
tost qu'ils l'eurent aperceu, puis
le prenant entre leurs bras, virent
qu'il n'auoit plus aucun signe de
vie. A ce mesme instant vn car-
rosse passoit par là, & deux Pages
vestus de veloux violet chamarré
de passement blanc & noir, mar-
choient deuant avec deux flam-
beaux, & estoient suiuis de plu-
sieurs autres Pages & laquais.
L'une des plus belles Dames du
monde, qui estoit à la portiere,
voyant vn si triste spectacle, com-
manda à son carrossier d'arrester,
& aussi-tost s'estant fait mettre
pied à terre, s'approcha de Boit-
tantual, de qui on essuyoit le vi-
sage couuert de poussiere & de
sang. Mais elle ne l'eut pas plu-

stost recognu, qu'elle s'escria avec beaucoup plus de douleur que de voix. O Cieux me contraindrez vous tousiours de viure pour estre l'objet de vos iniustes rigueurs ! A peine oüit-on la dernière parole, car elle ne l'eut pas plustost prononcee, qu'elle se laissa tomber éuanoüie entre les bras du Comte de Stratebout qui la menoit par la main, & sur qui elle se soustenoit. Tous ceux qui estoient là presens furent autant estonnez que cét accident leur sembloit estrange, car ils reconnurent que c'estoit la Reyne de Regnautchanfort qui estoit sœur du Duc de Meuridas, & vefue depuis cinq ou six mois. Il n'est pas croyable combien cette inopinée aduventure apporta de confusion. Les vns estoient bien em-

péschez apres celuy qu'ils cro-
yoient estre mort , & les autres
s'efforçoient de secourir celle qui
ne sembloit plus estre en vie. L'on
employa pour la faire reuenir de
son éuanoüissement tous les re-
medes dont on a accoustumé
d'vser en de semblables occa-
sions. On luy deserra sa robbe de
peur qu'elle ne la suffoquast, on
luy ietta de l'eau fresche sur son
visage, qui estoit capable de brus-
ler tous ceux qui le voyoient, en-
core qu'il fust plus froid que de
la glace, on luy frota de vinaigre
les yeux, le nez, les temples & les
levres , où estoient toutes les
graces avec leurs douceurs , on
luy pinça les mains , qui arra-
choient les cœurs sans faire mal,
on luy tira mesmement des che-
veux, que quelques vns referre-

rent comme des reliques précieuses. En fin on pratiqua soigneusement & tout ce que purent inventer l'industrie & l'affection de ceux qui l'assistoient, & tout ce que peut fournir la nécessité de ce lieu là: Mais ce fut en vain, car elle ne monstra aucun signe d'en recevoir du soulagement: de sorte qu'on croyoit qu'un si beau corps, qui sembloit n'estre fait que pour estre idolâtré, estant insensible à tant de tourmens, fust aussi abandonné de l'ame, qui l'auoit fait admirer. Ainsi au lieu de plaindre seulement la perte de l'un des plus accomplis Caualliers du monde, on regretoit encores la mort de l'une des plus belles Princesses qui fust en l'univers: Et chose estrange! on ne pouuoit cōpren-

dre comment vn homme priué de vie, eust pû la faire perdre à vne femme capable, quoy que morte, de resusciter les morts par son attouchement. Mais l'erreur & l'ennuy où estoit la compagnie ne durerent pas beaucoup, car le temps s'estant vn peu changé, & la pluye qui auoit commencé à tomber aussi-tost que la nuit estoit venue, se renforçant de plus en plus, on se resolut de mettre la Reyne de Regnautchanfort, & Boittantual à couuert de cette inclemence du Ciel. Et parce qu'il n'y auoit point d'autre lieu que le carrosse qui estoit là, on les porta tous deux dedans, ayant auparauant bouché la playe de Boittantual, afin qu'il ne souïllast rien de son sang. Comme on le portoit avec peu

de soin, croyant qu'il fust mort, sa teste panchoit en bas, ce qui fut cause que ne prenant pas garde à luy, on le blessa vn peu au visage contre vne fouche de bois qui estoit dans le chemin. Cela luy fit reuenir les esprits qui estoient assoupis, il remua les iambes, & estendit les mains, iettant quelques petits sanglots. Ceux qui virent & ouïrent cela en furent infiniment ioyeux, connoissans qu'il y auoit encores en luy quelque estincelle de vie, & qu'avec vn prompt secours elle se pourroit fortifier & reluire encores dans le monde par l'éclat de quelques genereuses actions. On le coucha dans le carrosse qu'on auoit accommodé avec les coussinets le mieux qu'on auoit pû. Aussi-tost il ouure les yeux, il re-

garde d'un œil presque mourant ceux qui estoient autour de luy, il se plaint & iette plusieurs souspirs sans pouuoir neantmoins parler. On fut par necessité contraint de coucher aupres de luy la Reine de Regnautchanfort, qui ne fut pas plustost dans son carrosse, qu'elle reuint du long éuanoüissement où la rigueur d'un extreme ennuy l'auoit precipitée. Elle auoit bien reconnu que pour l'amour d'elle ses cinq freres estoient en quelque froideur avec Gardenfort, mais elle ne croyoit nullement que leur jalousie fust si grande, qu'elle les deust porter à exposer leur vie au hazard des armes, sous le malheur desquelles le Prince de Voltandon son frere estoit succombé. Elle estoit seule à la Cour qui ne sçauoit encore

rien de leur combat, quoy qu'il n'eust esté entrepris que pour l'amour d'elle, & qu'elle y eust vn double interelt. Ainsi bien souvent les Roys & les grands Princes sont les derniers aduertis de ce qui leur importe plus qu'à personne, & d'ordinaire tout le monde ne s'entretient que du discours des desordres qu'ils commettent & qui ternissent la gloire de leur nom, sans qu'ils ayent aucun seruiteur que la crainte de leur déplaire, & le soin particulier de leur interest ne retiennent point de leur représenter fidelement la honte où ils s'exposent par la licence de leurs mauvaises actions. La Reine de Regnautchâfort experimēta ce que ie dis, avec des regrets qui ne se peuuēt imaginer: Car venant d'oüir Vespres d'un Temple qui est hors de la ville de Sirapis, dedié à la Deesse

Ifis, & ne sçachât point que Boittantual eust esté blessé pour la querelle que Gardenfort son frere auoit contre le Duc de Meuridas, mais bruslant d'amour pour luy, & le voyant dans son carrosse à demy reffuscité, quoyqu'un peu auparauant elle l'eust creu mort, elle luy prit la main & luy dit. Certes Boittantual, si vous n'estiez vn peu mieux que tantost, que ie ne vous ay pû regarder sans auoir mal au cœur, car ie n'ayme point le sang, ie ne croy pas que ie ne mourusse à cette heure, me treuuant sans sçauoir comment, si près de vous que ie suis. Mais puisque cet amendement nous en promet encores vn meilleur, il ne faut pas perdre icy le temps qu'on doit employer à donner promptemēt ordre à vo-

stre santé. En disant cela, elle cō-
manda qu'on marchast droit au
logis de Boittantual, qui estant
encores si foible qu'il ne pouuoit
parler, à cause de la grande quan-
tité de sang qu'il auoit perdu, ne
luy respondit que des yeux qu'il
ietta lentement dessus elle, avec
vn regard remply de tant de dou-
ces & pitoyables attaintes, qu'il
sembloit qu'en aduoüant tenir
d'elle la vie, il la faisoit mourir.
En fin comme l'on fut arriué au
logis de Boittantual, on le porta
dans son liēt, la Reyne le suiuit
iusques en sa chambre, & le laissa
voyant que les Chirurgiens luy
alloient mettre le premier appa-
reil. Estant retournée chez elle,
elle treuua tous ses seruiteurs tri-
stes & plorans comme s'ils eus-
sent esté condamnez à la mort, ce

qui luy ietta vne telle frayeur en l'ame, que sans sçauoir ce que c'estoit, elle demeura froide & immobile, comme vne statuë de marbre. Mais ce fut bien pis quād l'Escuyer du Duc de Meuridas, qui arriua sur cet instant, luy eut donné vne lettre de sa part, & qu'elle y eut leu ce qui s'ensuit.

LETTRE DV DVC DE
Meuridas à la Reyne de Re-
gnaut-chanfort sa sœur.

L*Es flammes qui brulent vostre ame se ralument donques dans le sang du Prince de Voltandon nostre frere, qui a esté tué pour vostre sujet? Vous voulez donc que cet impudique feu consume toute nostre maison, ou la remplisse de honte &*

d'horreur ? Que ne demeuriez-vous à
coucher avec Boittantual , puis que
vous auiez aidé à le mettre au liét ?
Vous vous hastiez assurement de
chercher Gardenfort son frere , qui se
porte mieux, & que l'iniustice du Ciel
a garanty de mon espee, qui auroit de-
sia par sa mort & marqué vostre in-
famie & tesmoigné mon iuste ressen-
timent. Mais le Ciel & la terre qui
se sont vnis ensemble pour me faire
mourir de desespoir , ont destourné ce
coup , ou plustost le Genie de vos a-
mours , qui est si puissant que rien ne
luy resiste, m'a arraché la victoire des
mains pour la mettre entre les vostres :
Vsez-en donques puissamment , aua-
lez à longs traits les douceurs qui vous
enyurent, ne vous souuenez de vos fre-
res que pour les immoler , comme des
viétimes à la rage de leurs ennemis
pour augmenter vos contentemēs. Ne

vous souciez point du rang que vostre naissance vous a donné parmy les plus grandes Princesses du monde, puis que vous faites plus d'estat de celuy que vous tenez auprez des hommes. Ne regardez le lustre & l'esclat de nostre maison que pour les obscurcir, & enfin n'en mesurez la grandeur que pour vous esleuer par vos lascives actions au dessus de la Royne des voluptez, afin d'estre honnoree des vœux & des services d'un chacun, fors du Duc de Meuridas & de tous ses freres dont vous ne devez plus faire d'estat.

Comme elle commençoit à lire cette lettre, & qu'elle fut arriuee à ces paroles qui luy apprennoient la mort du Prince de Vol-tandon, elle s'escria regardant Hippophilon, ainsi s'appelloit l'Escuyer du Duc de Meuridas. O

Cieux est-il vray que mon frere Voltandon est mort ! Madame, luy respondit ce Gentil-homme, acheuez s'il vous plaist de lire tout. Mais en lisant chaque ligne elle jettoit tant de sourspirs , & pleuroit si amerement, qu'il sembloit qu'elle envoulust effacer les caracteres par ses larmes. Et certes peu s'en falut qu'elle ne finist sa vie avec cette lecture , car elle tomba esvanoüie entre les bras d'Hippophilon , qui se treuvant infiniment empesché, cria qu'on accourust promptement au secours de la Reyne, qui se treuuoit mal. Toutes ces Dames vinrent au bruit, & firent si bien qu'à force de remedes sa Majesté reprit ses esprits. Elle estoit dans son cabinet où elle auoit entré seule avec Hippophilon pour lire la

lettre qu'il luy auoit apportee. C'est la liberté des femmes de Galatie, qui peuuent sans interest de leur honnesteté discourir seules dans vne chambre avec vn homme seul. Il y auoit dans ce cabinet vn petit liect où la Reyne passoit quelquefois la nuict, afin qu'estant plus esloignée du bruiet, elle peust mieux prendre son repos. On la coucha dedans, mais incontinant se trouuant mieux elle commanda à ses gens de la laisser seule, & ne retint qu'Hippophilon, de qui elle apprit particulièrement tout ce qui s'estoit passé, le desespoir de son frere, & les plaintes qu'il faisoit contre elle. A quoy elle respondit en ces termes. Hippophilon, ie veux que Iupiter lance son foudre sur moy, & que toutes les Furies, sans estre diuerties

ailleurs, ne soient employees qu'à
me bourreller incessamment, si
ie sçauois aucune chose de tout
ce que vous me venez de dire,
quand i'ay treuue Boittantual e-
stendu comme vn mort au mi-
lieu d'un ruisseau de sang. O
astres inhumains qui sçauiez cer-
te verité, & qui cognoissez mon
innocence! (l'escria-t'elle en es-
leuant en haut ses yeux tous no-
yez de larmes) pourquoy faut-il
que celuy que i'ayme de tout mō
cœur, & qui m'est beaucoup plus
cher que ma vie, trouble mon
ame avec les plus insupportables
ennuys que i'aye iamais resenty?
Monsieur, continua-elle, ie me
plaints extremement de vostre
Maistre, qui entre si legerement
en deffiance de mon honnesteté,
au lieu qu'il est obligé d'en auoir
meil-

meilleure opinion que personne
du monde. Il est vray que j'ay
montré bon visage à Gardenfort,
& que j'ay resmoigné estre fas-
chee du malheur qui estoit arriué
à Boittantual son frere, n'en sça-
chant point l'occasion: Mais que
ne fais-je point pour luy acque-
rir, & à mes autres freres le plus
d'amis & de seruiteurs qu'il m'est
possible? D'ailleurs j'ay veu que
c'estoient des personnes qui pou-
voient tout aupres de l'Empe-
reur, & que luy-mesme pour le
bien de ses affaires en recher-
choit les bonnes graces avec tou-
te sorte de soin. N'eusse-je don-
ques point eu grand tort, de ne
contribuer pas de ma part à son
dessein tout ce qui en dépendoit?
N'a-il pas experimenté que les
grandes Princesses à qui la nature

a donné de puissans charmes de beauté, peuuent quelque-fois beaucoup plustost gagner par leurs attraits les cœurs de ceux qui leur sont necessaires, que par leur autorité, & que l'esclat de leur visage force bien souuent dauantage les volonteés des hommes, que la splendeur de leur couronne. Si i'ay employé quelques heures à deuiser avec Gardafort, n'a-ce point esté pour le lier estroittement d'amitié avec luy, dont ie ne doute point qu'il n'eust resenty les effets, s'il eust autant eu de prudence que d'indiscretion. D'ailleurs si on m'a veu rire avec luy, cela doit-il estre capable de donner à vn frere de la jalousie de sa sœur? Outre tout cela m'aymant comme il est obligé, deuoit-il auoir le dessein de

faire appeller Gardenfort, & d'en-
treprendre vne affaire de si gran-
de importance que celle là sans
me la communiquer ? S'il m'en
eust donné aduis, il ne me repro-
cheroit pas maintenant ce que
i'ay fait pour Boittantual, de sorte
que s'il va en cela quelque chose
du mien, il en est seul la cause, &
ne me dois plaindre que de luy.
Car quant à moy, ne sçachāt rien
de ce qui estoit passé; ie n'eusse
pas pū quand i'eusse voulu em-
pescher qu'on ne l'eust mis en
mon carrosse, m'estant esuanouie
aussi-tost que ie l'eue veu en l'estat
où il estoit. Mais il y a encores
vne autre chose dont tous nos
parens & tous nos amis le blas-
meront. Pourquoy a-t'il souffert
que mon frere de Voltandon se
soit battu contre vn ieune hom

me qu'il ne cognoissoit point, qui portoit vne malette derriere luy ainsi qu'un postillon, & qui peut-estre n'est pas Gentil-homme? Quel honneur eust-il acquis en ce combat quād il l'eust tué? Les Princes ont-ils accoustumé d'en user de la sorte? Madame, respondit Hippophilon, ils estoient si eunuyez d'attendre Boittantual, ils auoient si grande enuie de vuidr cette broüillerie, & le Prince de Voltandon estoit si genereux, que quand il ne se fust présenté qu'un soldat, il ne l'eust pas refusé. Cela fut cause que voyant ce ieune homme qui ne les cognoissoit point, & remply d'autant de courage que de ieunesse & de beauté (car il n'a pas seize ans, & est le plus beau & de la meilleure grace, à ce que dit Monsieur vo-

stre frere, qu'il se puisse voir) le Prince de Voltandon fut aussi tost qu'il l'eust veu, espris d'un extreme desir de sçauoir s'il auoit autant de valeur que de bonne façon. Cela fut cause qu'il luy fit l'honneur de le receuoir au combat, s'asseurant que c'estoit non seulement quelque Prince de bonne part qui alloit incognu, mais encores il croyoit que c'estoit le Dieu mars, qui enuieux de sa gloire auoit pris la ressemblance d'un homme pour s'esprouuer avec luy. Hippophilon, respondit la Reyne, ces fables là sont bonnes pour entretenir un esprit moins affligé que le mien; en un mot, mon frere de meuridas a eue tort de souffrir que la chose se soit passée de la sorte, & ne s'en sçauroit iamais excuser : Mais

quand il a fait des fautes, il les veut rejeter sur moy, qui ay l'ame outrée d'assez d'ennuys, sans qu'il les augmente d'auantage. Je vous prie de le luy dire, & de luy faire particulièrement entendre tout ce que vo⁹ auez ouy de moy. Là dessus Hippophilon prit cōgé d'elle, mais à peine estoit-il hors de son cabinet qu'elle le r'appella, & luy dit qu'elle vouloit escrire au Duc de Meuridas vn petit billet dont voicy la coppie.

LETTRE DE LA REYNE
de Regnaut-chanfort au Duc
de Meuridas son frere.

LEs iniures que vous m'escriuez sont irreparables aussi bien que la mort de mon frere de Voltandon,

que vous avez ietté dans le tombeau
avec la perte de mon hōneur, qui m'est
mille fois plus cher que ma vie. Que
croira-t'on de moy quand on verra
que la ialousie que vous en avez, vous
fait à yeux clos precipiter dans des
abysmes de rage & de folie ? ma re-
putation me peut-elle demeurer en-
tiere, si mon propre frere la deschire ?
Ha ! quand il n'y eust eu que cette cō-
sideration, vous deviez mieux vous
esclaircir de la verité, & ne prenant
pas les simples apparences pour des
effets certains, moderer vostre iniuste
ressentiment ! Celuy que j'ay & que
la raison veut que j'aye, m'empesche
de vous en dire davantage, & la dou-
leur me ferme tellement la bouche,
que ie ne puis rien adiouster sinon que
le plus grand malheur qui vous puisse
arriuer, apres celuy que vous avez
desia receu, c'est que ie ne fasse plus

d'estat de vous : Car quant à mes autres freres, ils treuveront tousiours que la Reyne de Regnaut-chanfort est leur bonne sœur.

Après qu'elle eut donné ce billet à Hippophilon, elle deffendit à tous les gens d'entrer dans son cabinet iusques au lendemain, ne voulant pas estre diuertie des diuerfes pensees dont son esprit estoit agité. L'Amour, la colere & le desespoir s'en estoient rendus maistres, & combattoient à qui auroit le dessus : Elle aymoît passionnément & plus que l'honnesteté ne permettoit, le Duc de Meuridas son frere, mais il l'auoit si cruellemēt offencee, qu'elle se resoluoit de n'en faire iamais d'estat ; D'ailleurs la mort du Prince de Voltandon auoit plon-

gée son ame dans vn abyfine d'en-
nuys, car elle ne l'aymoit pas
moins que luy, & disoit-on qu'elle
pouuoit bien iuger des ince-
stueux embrassemens de tous ces
cinq freres, mais qu'elle eust eu
bien de la peine de dire pour le-
quel elle auoit plus d'affection.
Outre tout cela, le danger où elle
auoit laissé Boittantual la tenoit
en des inquietudes, qui luy es-
toient autāt insupportables que
les apprehensions de la mort, car
elle brusloit pour luy d'un feu
plus violēt qu'aucun autre qu'elle
eust iamais ressenty. La honte
l'empeschoit d'enuoyer sçauoir
de ses nouuelles; & neantmoins
elle estoit en vne extreme impa-
tience d'en apprendre, croyant
qu'à tout moment on luy venoit
dire qu'il estoit decedé. *C'est vn*

effet de la foiblesse de nos esprits, qui nous pousse à nous informer aussi bien des choses dont nous apprehendons l'euenement, que de celles dont nous desirons le succez. Mais ce qui l'affligeoit plus que tout le reste, c'estoit que le Duc de Meuridas auoit fait esclatter la ialousie qu'il auoit de Gardenfort & d'elle, car elle croyoit que sa reputation auoit receu en ce combat vne si mortelle blesseure, qu'il luy seroit desormais impossible de viure en honneur à la Cour.

Comme elle s'entretenoit de tant de differentes imaginations, qui luy desroboient le repos, & qui l'auoient empeschee de fermer l'œil, quoy qu'il fust minuit, elle ouït dans le profond silence qui a accoustumé d'estre à cette heure là, vne voix si triste, que les

seuls accents eussent pû esmouvoir les plus cruels hommes du monde à pitié. Elle presta l'oreille pour ouyr ce que c'estoit, mais il y auoit vn peu trop loing : c'est pourquoy la curiosité la fit leuer pour aller à la fenestre qui respondoit sur son iardin, d'où il luy sembloit que venoit cette voix, qui s'esleuant vn peu plus haut dit. O Dieux, m'avez-vous preserué de tant d'extremes dangers pour me faire dauantage languir ? Faut-il que la fin d'vn ennuy soit le commencement d'vne nouvelle peine ? & qu'en sortant d'vn peril vous me fassiez entrer en vn autre plus grand ? Quoy est-il possible qu'vn homme de mon aage puisse supporter tant de traux ? & que vous ne vous lassiez iamais de décocher sur moy les plus ri-

goureux traits de vostre colere? La Reyne ouyt ces paroles entrecoupees de tant de sanglots, & fuiuiues de tant de souspirs qu'elle en eut de la compassion, aussi estoit-elle de son naturel infiniment humaine, & ennemie de toute sorte de cruauté. Elle appella l'une de ses Damoiselles, en qui elle auoit vne entiere confiance, & luy commanda d'aller à la porte du iardin voir qui estoit celuy-là qui s'affligeoit si fort. Rosane, ainsi s'appelloit cette fille, prit vne bougie allumee & s'en alla à la porte du iardin, qui estoit dans vne petite ruë escartee. Elle demãda qui y estoit, c'est vn pauvre Gentil-hôme, luy respondit-on, qui est tout transy de froid, & qui estant poursuiuy de ses ennemis qui le cherchent par tout, ne

ſçait où ſe retirer. Si iamaïs vous futes touchez de pitié, ne ſouffrez pas ſ'il vous plaïſt que ie ſois icy miſerablement aſſaſſiné, ou que i'y periffe par l'injure du téps. Ces paroles toucherent tellement l'eſprit de Roſane, qu'elle luy euſt ouuert la porte ſi elle en euſt eu la clef; & afin de luy reſmoigner que ce n'eſtoit pas faute de bonne volonté, elle luy dit qu'elle alloit la chercher, & taſcher de faire en ſorte que ſa Maiſtreſſe treuuaſt bon qu'elle le fiſt entrer d'as quelque chambre de l'un des pavillons du iardin. La Reyne en fit de tres-grandes difficultez, neâmoins eſtant vaincuë par les raiſons de Roſane à qui elle ne pouvoit rien refuſer, elle y conſentit; mais elles eſtoient toutes deux tellement troubles du malheur

qui estoit arriué, qu'elles ne pou-
uoient treuuer la clef, quoy qu'el-
les eussent accoustumé de la gar-
der avec beaucoup de soin, com-
me vne chose dont elles auoient
souuent affaire, & qui leur seruoit
infiniment. Elles la chercherent
par tout, & mirent mesmes plu-
sieurs fois la main dessus sans s'en
appercevoir. Mais en fin Rozane
l'ayant prise, elle courut ouurir à
celuy qui la voyant creut que c'e-
stoit vn Ange qui estoit venu à
son secours. Elle le mena dans vn
cabinet où il ne manquoit que
du feu, car il y auoit vn liét & tant
d'autres precieux meubles, qu'on
ne les pouuoit voir sans estre ra-
uy d'admiration. Rozane le re-
gardant attentiuellement, luy dit
qu'elle luy apporteroit inconti-
nant du bois: Mais luy ne se pou-

uant assez estonner du lieu où il
estoit, & la voyant si ieune, si bel-
le & si bien vestuë, s'imagina qu'il
estoit en quelque palais enchan-
té, & ne luy pût presque rien res-
pondre. Neantmoins ayant vn
peu repris ses esprits, il luy dit:
Mademoiselle, les paroles sont
trop foibles pour vous remercier
de tât de biës qu'il vous plaist me
faire, la perte de ma vie, dont ie
vous suis redeuable, ne suffiroit
pas pour satisfaire à la moindre
des obligations que ie vous ay.
Ne prenez donques pas dauan-
tage de peine pour vne personne
qui ne la merite pas, faites-moy
seulement s'il vous plaist cette fa-
ueur, que de me faire auoir vn
peu d'huile & du vin pour estu-
uer quelques blesseures que i'ay,
& s'il y a ceans quelque autre pe-

tit endroit moins chery que cē-
luy-cy, ie vous supplie que ie m'y
puisse retirer, car ie suis bien re-
solu de ne me coucher point dās
vn liēt de si grande valeur que
celuy-là. Non, non, respondit
Rozane, il n'est fait que pour ser-
uir, & quant à la peine i'en vou-
drois bien prendre dauantage
pour vostre seruice, *sçachant qu'il
ne faut perdre aucune occasion de fai-
re plaisir à ceux qui le meritent, puis
qu'elle ne se rencontre pas souuent, &
qu'il n'est pas tousiours en nostre pou-
voir d'obliger ceux qui en sont dignes,
estant tres-certain qu'un bien fait ne
se perd iamais.* Ie m'en vais treu-
uer ma maistresse, & iusques à ce
que ie reuienne voila vn peu de
ma bougie. En disant cela elle
sortit sans qu'il luy pust respon-
dre. La Reyne la voyant de re-
tour,

tour, luy demanda ce qu'elle avoit fait: Madame, luy respondit-elle, i'ay mis dans vostre cabinet qui est dans le grand pavillon du iardin, le plus beau & le plus agreable Gentil-homme que i'aye jamais veu. En verité ie ne croy pas qu'on le puisse regarder sans l'aymer, sa taille, son action, sa parole, & son ieune aage qui est de quelques seize à dix-sept ans au plus, ont des charmes inevitables. Il a esté à ce qu'il dit longtemps poursuivy par ses ennemis, qui le cherchent partout, & qui l'ont mesmemét blessé: C'est pourquoy il demande vn peu d'huile & de vin pour se penser, & qu'on le mette en quelque autre endroit moins precieux que le lieu où il est. A chaque parole que Rozane prononçoit, la Rey-

ne sentoit entrer en son cœur vn air qui la remplissoit toute d'amour. O admirable puissance d'une ieune beauté, dont mesme le seul recit empoisonne les ames, & produit des effets si estranges ! L'on dit qu'il n'y a que les aueugles qui s'en puissent garantir, mais certes il faut donques qu'ils soient aussi priuez de l'ouye, car qui est-ce qui seulement à ce mot de beau, puisse demeurer insensible ? La Reyne n'eut pas plustost entendu ce que luy auoit rapporté Rozane, qu'elle dit avec beaucoup plus d'amour que de charité, Vrayement ce seroit vne tres-grande cruauté que de ne secourir pas, quand on en a le moyen, ceux qui ont recours à nous. I'ay de cet onguent que vous sçauiez qui est si excellent pour les bleffeures, tenez

portez-en à ce pauvre garçon , & luy dictes qu'il s'en ferue sans crainte , comme de la meilleure chose du monde. D'ailleurs, s'il ne veut demeurer où il est, mettez-le où vous voudrez, car il ne m'importe pas où il soit. Rozane prit vne petite boëte de cristall où estoit cet onguët , mais elle n'eut pas descendu cinq ou six degrez, que la Reyne qui brusloit desia d'un feu secret, & qui vouloit que ses yeux iugeassent de ce que ses oreilles auoient ouy , la r'apella, & luy dit. Certes ma chere amie, i'ay peur que vous ne scachiez pas bien comme il faut accommoder ce baume que vous emportez, & puis ie desire voir ce ieune homme , c'est pourquoy ie vous prie de le faire venir icy. Elle prenoit vn excessif plaisir à regar-

der ceux que la nature auoit favorisez d'une exquisite beauté, & n'eust point crainct de faire vingt lieues pour aller voir vn beau visage. Rozane obeit à sa Maistresse, qui voyant aupres d'elle le plus beau, le mieux nay, & le plus accompli Gentil-homme qu'on se scauroit imaginer, fut surprise d'un si grand estonnement, qu'il ne se peut représenter. Rozane s'apperceuant que l'admiration ou elle estoit luy ayant faisi tous les sens, l'empeschoit de parler, luy dit: Madame, voila cette personne affligee dont vous auez ouy les plaintes, & dont vous auez eu pitié, encorés que vous ne la visiez pas. Au mesme temps ce Gentil-homme s'approcha du liect pour faire la reuerence à la Reyne, qui estoit couchée, mais il la treuua

environnée d'un si grand esclat de Majesté, & accompagnée d'une si parfaite beauté, qu'il ne luy resta en l'ame aucune autre faculté que celle de l'admiration. Aussi est-il certain que cette Princesse estoit si accomplie, qu'il ne luy manquoit rien sinon d'estre sage. En fin apres qu'elle se fut un peu recognüe, & qu'elle se fut apperceuë de l'esmotion de celuy qui estoit à genoux aupres de son liët, & pour qui elle n'en sentoit pas une moindre, elle luy dit en le faisant relever. Vos plaintes m'ont fait tant de pitié, que ie n'ay pû m'empescher d'enuoyer sçavoir qui vous estiez, & cette fille m'en ayant dit quelque chose, & que vous estiez blessé, ie vous ay fait venir icy pour vous donner du meilleur baume du monde, afin

qu'à faute d'estre promptement
secouru, vous ne tombiez pas en
quelque grand danger de vostre
vie. Madame, respondit le mala-
de, puisque par l'excez de vostre
grande bonté il vous plaist de
me la sauuer, ie ne craindray ia-
mais de la perdre pour vostre ser-
uice, qui me sera tousiours aussi
cher que mon propre salut. Mon-
strez-moy donques, luy dit elle,
vostre blesseure, car il faut que ce
soit moy-mesme qui y mette le
baume. Madame, repartit-il, le
respect que ie porte à vostre Ma-
jesté, me deffend d'estre si indis-
cret que cela; Non, non, adiousta-
elle, ie ne veux point de ceremo-
nies, ce seroit estre indiscret que
de differer à faire ce que ie dis,
monstrez-moy donques prom-
ptement où est vostre mal. Luy

se voyant ainsi pressé, luy dit: Madame, la vraye obeïssance est aveugle, c'est pourquoy si elle peche en quelque chose, elle n'a point d'autre excuse que les commandemēs qui luy ont esté faits, à l'obeïssance delquels elle se porte à yeux clos. En disant cela, il despoüilla vn pourpoint de bure qu'il auoit, & fit voir deffous vne chemise de la plus belle & de la plus fine Holande qu'on eust pû treuuer, mais toute sanglante par deuant, dont la Reyne fut fort effrayee: Neantmoins ayant regardé la blesseure qui estoit dans le bras, elle cognut bien qu'elle n'estoit pas dangereuse. Elle y mit de son baume, puis fit quelques signes dessus, & prononça d'une voix basse cinq ou six paroles, afin qu'on creut que

la Damoiselle n'eust pû faire cette cure, couurant de cette sorte la curiosité qui l'auoit portee à voir ce malade. Apres auoir accommodé sa playe, elle luy ayda à remettre sa chemise, estant toute rauie de la blancheur de son estomach, & de la delicateffe de sa peau, ce qui luy donna encores plus d'amour qu'auparauant; *Et comme nous auons tousiours bonne opinion de ce que nous aymons*, elle s'imagina aussi que ce Gentilhomme, quoy que vestu assez modestement, estoit sans doute de quelque grâde & illustre maison; C'est pourquoy elle le pressa de luy dire son nom, qui il estoit, & comment il auoit esté blessé. Madame, respondit-il, arriuant en cette Ville, i'allay descendre dans vne Hostellerie, où ie don-

nay au Maistre vne petite malette que i'auois à garder. A ce mot de malette la Reyne changea de couleur, & peu s'en falut qu'elle ne s'esuanoüit. Il vouloit continuer, mais elle luy dit qu'elle se trouuoit mal, & qu'il se retirast. Rozane le mena dans vn cabinet qui estoit tout aupres de la chambre de la Reyne, qu'elle vint re- uoir aussi tost apres, & qui luy dit: Ha! ma fille, sans doute ce Gentil-homme est celuy qui a tué mô frere de Voltandon, car on m'a dit qu'il auoit vne malette en croupe, & me la t'on dépeint tel qu'il est. Si c'est luy, i'aymeroie mieux mourir qu'on sceust ce que ie viens de faire: & d'ailleurs il faut que ie te confesse qu'il est si fort selon mon cœur, qu'il est hors de mon pouuoir de luy de-

firer du mal. Regarde ie te prie comme les Dieux se ioüent de nous autres, & nous astreignent à la rigueur de certaines loix, sans nous donner les forces necessaires pour y obeir. Ils nous ordonnent de perdre plustost nostre vie que nostre hōneur; & neantmoins ils nous font naistre avec tant de foiblesse, qu'il nous est impossible de resister aux continuels assauts de nostre propre nature qu'ils nous ont donnee. Ils nous prescriuent assez ce qu'il faut fuyr, mais ils ne nous en donnent pas le moyen; nous voyons le mal, & nous ne le pouuons éuiter. Je sçay que ie suis obligee de vanger la mort de mon frere; mais quoy ie sens vn feu qui me consume d'amour pour celuy qui en est coupable. O Dieux, pourquoy m'avez-vous fait voir tant de puissans charmes, si vous voulez que ie n'en

sois point touchée? Il est vray mō
enfant, ie suis enchantée, ie ne
puis hayr vne personne qui est si
aymable, & mon amour est plus
forte que ma hayne. Toute cette
affaire n'est point arriuee fortui-
tement, puisque rien ne se fait
sans l'ordonnance du Ciel, qui n'a
point conduit icy ce ieune hōme,
si ce n'est pour me faire esprou-
uer la force d'une beauté diuine;
Qu'on ne m'allegue point le ra-
finemēt de cette explication, Ju-
piter permet bien le mal, mais il
n'en est point auteur, & ne l'em-
peschant point, c'est vn tesmoi-
gnage qu'il veut qu'il se fasse
pour des fins qui nous sont inco-
gnuës, car qui peut penetrer dans
les conseils secrets? Certes cet
Ancien parloit proprement de sa
puissance sous le nom de la for-

tune, quand il disoit : Que lors qu'elle a resolu de faire quelque chose, elle aveugle les hommes de peur qu'ils ne luy rompent son dessein. Ah ! ma chere amie, que ie souffre vn cruel martyre ? Helas ! ie brusle d'amour pour ce gentil Cauallier, & neanmoins l'image de mon frere couuert de sang, me presse de tremper mes mains dans celuy de son meurtrier. Sans doute c'est la raison qu'il meure, & puis qu'il est venu comme par miracle en ma puissance, c'est vn tesmoignage infaillible que le Ciel veut que i'en prenne la vengeance. Rozane, ma chere amie, il faut que tu m'assiste en cette entreprise. Mais, luy repartit-elle, ce n'est peutestre pas celuy que vous pensez : *Il n'y a rien de si soupconneux que la*

peur, & nous croyons tousiours que ce que nous craignõs doive arriuer, comme au contraire nous apprehendons bien fort, que ce que nous desirons ne reüssisse iamais. Il faut que vostre Majesté s'informe particulièrement de la verité, auant que prendre vne si cruelle resolution. Et d'ailleurs, quand ce ieune Gentilhomme seroit celuy-là mesme qui a tué le Prince de Voltandon, voudriez-vous bien vous souiller de son sang ? Et quand vous luy auriez osté la vie, la vostre en seroit-elle plus glorieuse ? Au contraire, ie ne croy pas que vous voulussiez vous en vanter ; Car que ne diroit-on point, quand on sçauroit qu'en sanglantant vostre chambre & vos mains, vous vous seriez portée à vne vengeance autant barbare & inhumaine,

que pleine de trahison? Croyroit-on iamaïs qu'il se fust venu rendre luy-mesme entre vos mains? & quand on le croyroit, ne treueroit-on pas fort mauuais de ce que vous en auriez vſé de la sorte? *Madame croyez moy, nous ne deuons pas auoir tant de ſoin de noſtre contentement, que de noſtre reputation; & puis que nous auons à viure dans le monde, nous ne deuons pas nous faire hayr au monde. Certes ie ne croy pas que ſi vous auiez exercé vne ſi extraordinaire cruauté que celle-là, vous en parlaſſiez iamaïs, & que vous n'en vouluſſiez vous-mesme perdre la memoire, comme d'une action dont le ſeul ſouuenir répliroit voſtre ame d'horreur, d'ennuys & de regrets.*

Rozane pour garentir de la mort celuy qu'elle ayinoit deſia

autant que la vie, representoit toutes ses cōsiderations à sa Maistresse, qui ayant plus d'amour que de hayne, fut bien ayse de les entendre, parce qu'elles flattoient sa passion, & que nous approuuons fort facilement tout ce qui s'accorde à nostre desir. Elle fit doncques r'appeller ce pauvre Gentilhomme, qui s'occupoit à considerer les richesses de son cabinet, qui estoit le plus enrichy de belles & excellentes peintures qu'on eust pû treuuer. Entr'autres, tous ses freres, son pere & tous ses ayeuls y estoient extremement bien au naturel. Il y auoit vn petit liēt verd fort molet, & au dessus vn daiz de satin blanc en broderie d'or & d'argent, quoy qu'il y en eust vn autre de toille d'or sur la cheminee. Au dessous de

celuy-là qui estoit sur ce petit liect, la Reyne auoit fait mettre le pourtraict du Marquis de Filinde, qui estoit le plus ieune, le plus beau, & le plus genereux de tous ses freres. Les bordures du tableau estoient toutes d'or enrichies d'un grand nombre de perles, de diamants, de rubis, & de turquoises, pour tesmoignage de l'extreme affection qu'elle luy portoit, quoy qu'il fust mort depuis cinq ou six mois par vn coup de tonnerre, qui luy emportant la teste, l'auoit rauy à ses amis en la fleur de son aage. Dans ce mesme tableau on auoit curieusement dépeint tous les beaux exploits de ce genereux Prince. La mer estoit couuerte d'une infinité de Vaisseaux, dont il l'auoit chargée pour remplir de crainte & de

& de terreur les barbares infidel-
les qui occupoient le Royaume
de ses predecesseurs. La terre e-
stoit jonchee de corps morts a-
battus sous les pieds, les villes &
les forteresses d'un costé estoient
reduites en poudre, & de l'autre
elles luy presentoint à genoux
les clefs de leurs portes. Le Pein-
tre n'auoit pas oublié le cruel cō-
bat qu'il eut contre le vieux &
l'effroyable geant Camelontidi-
nero, & la victoire qu'il remporta
sur luy, avec plus d'adresse neant-
moins que de force. On voyoit
puis-apres le fils du Geant, qui
outré d'une iuste douleur vint
aux mains avec Filinde, lequel
apres auoir receu quelques lege-
res blesseures, luy fit vomir l'a-
me avec le sang, quoy qu'on le
creut inuincible, estant ieune &

66 Le Roman
fort, & ayant le courage enflam-
mé d'un ressentiment plein de
piété. Après tout cela, on voyoit
la tante du ieune Empereur de
Galatie, dont elle gouuernoit
l'Empire & la personne, peinte
au naturel avec toutes les plus
belles Dames de la Cour, qui te-
nans en leurs mains leur cœur
navré de fiesches amoureuses le
luy apportoit à ses pieds. Enne-
midor, car c'estoit luy-mesme
qui estoit dans ce cabinet, estant
attentif à considerer toutes ces
belles peintures enrichies des ar-
mes de la maison, *qu'on n'oublie ia-*
mais, vid en fin Rozane qui luy
dit que la Reyne le demandoit, &
luy donna conseil de ne se faire
cognoistre que le moins qu'il
pourroit. Il fut fort estonné de
cela, neantmoins il se rassura un

peu, quand il vid que sa Majesté ne luy faisant paroistre aucune sorte de mescontentement, luy dit: l'estime que vous avez plus de besoin de repos que d'autre chose, allez vous-en dormir, & vous me raconterez demain ce qui vous est arriué. Il ne repartit rien à cela, mais faisant vne humble reuerence avec vne grace qui rauissoit la Reyne, il suiuit Rozane dans vne chambre qui estoit dans le mesme appartement de sa Majesté, où il y auoit vn bon feu, & où Rozane auoit accoustumé de coucher. Comme ils furent entrez dedans, le ne puis, luy dit-elle, m'arrester avec vous, parce qu'il faut que ie retourne treuuer la Reyne, sur tout si vous estes celuy qui auez aujourd'huy tué le Prince de Voltandon, don-

nez-vous garde de vous faire cognoistre. Il se vouloit dauantage esclaircir, mais elle qui estant habile cognoissoit l'humeur de sa Maistresse soupçonneuse & impatiente plus qu'il ne se peut dire, s'en alla promptement aupres d'elle, qui luy demanda aussi-tost qu'elle la vid; Et bien ma mignonne où l'as-tu mené? Madame, respondit-elle, ie l'ay mis dās ma chambre où personne ne va; car ie craindrois que s'il estoit dans le grand pauillon du iardin où toutes les chambres de vostre logis regardent, quelqu'un me voyant y aller souuent, ne soupçonnast quelque chose de mauuais. Mon enfant, luy dit laReyne, tu as bien fait, accommode-toy le mieux que tu pourras là dans mon cabinet, le liēt en est fort bon. Apres

cela, au lieu de donner à son esprit le repos dont il auoit aussi grand besoin que son corps, elle le trauailla de cent mille différentes pensées. La mort du Prince de Voltandon, qu'elle regrettoit infiniment, les injures que luy auoit escrites le Duc de Meuridas, la crainte que sa reputation ne fust interessée en toute cette affaire, l'apprehension que Boit-tantual, qu'elle aymoit esperduëment, ne mourust, & sur tout le desir de iouyr des embrassemens de son ieune hoste, luy firent passer la nuit avec des inquietudes si estranges, qu'elles ne se peuuent représenter. Ce qui fut cause que s'estant seulement endormie à la pointe du iour, elle ne se leua qu'après midy. Cela toutefois luy estoit assez ordinaire, ayant ac-

coustumé, aussi bien que toutes les Dames de Galatie, de passer toutes les nuits entieres à se faire faire la Cour, à deuiser, à ioüer, ou à quelque autre agreable diuertissement. C'est pourquoy le lendemain elles ne sortét du liét que pour se mettre à la table, si quelquesfois elles ne vont au Tēple, plustost pour voir & pour estre veuës, que pour assister au sacrifice, qui le plus souuent est acheué quand elles y arriuent, si elles ne l'ont fait retarder pour le moins d'une bōne heure de plus qu'il n'est permis par les Saints decrets.

La premiere ouuerture que la Reyne fit de la bouche apres s'estre esueillée, ce fut pour commander à Rozane de luy faire venir Ennemidor, à qui elle dit dès

qu'il fut entré dans sa chambre, qu'elle vouloit qu'il racontast les accidents qui luy estoient arriuez , & qui auoient arraché des plaintes de luy aussi grandes, que s'il eust esté condamné à perdre la lumiere du iour. Madame, luy dit-il, apres que i'eus donné mes hardes à garder à mon hoste, ie m'en allay à la ville pour voir vn Gentil-homme de mes amis , & pour apprédre ce qu'on disoit de nouveau. En allant le treuuer, & passât parvne petite ruë pour éuiter l'importunité des carrosses & des cheuaux , qui couroient de toutes parts comme si l'ennemy eust esté dans la ville, i'oüy vne voix qui crioit. Hé ! Messieurs ne me tuez pas , prenez mes perles & tout ce que i'ay, & me laissez la vie. A ce bruit ie couru l'espee à

la main pour sçauoir que c'estoit, mais trois hommes vinrent au deuant de moy , & me tirerent chacun vn coup de pistolet, dont ie ne fus point blessé. Aussi-tost ie me meslay parmy eux , & en ayant ietté vn mort par terre, les deux autres s'enfuirent , & donnerent vne telle espouuante à leurs compagnons, qui croyoient que ie fusse bien accompagné, qu'ils laisserent vne belle ieune Dame qu'ils voloient, & qui me croyât estre de leur suite, me dit: Hé! Monsieur, ayez pitié de moy. Madame, luy respondis-je, n'ayez point de peur, i'ay si bien donné la chasse à ceux qui vous vouloiēt faire du desplaisir , que ie ne croy pas qu'ils retournent, & ie mourray plustost auant que vous receuiez aucune iniure : Mais dites-

moy, que vous demandoient-ils? Ah! monsieur, me respondit-elle, mon mary & moy avec deux seruiteurs, dõt l'vn portoit vn flambeau alumé, allions souper à trois pas d'icy avec de nos plus proches parents, quand nous auons esté attaquez par cinq ou six de ces voleurs, qui nous ont arrestez: Ils me vouloient oster mes perles & commençoient à me fouïller par tout à l'heure que vous estes arriué. Et vostre mary, luy demãdis-je, & vos deux seruiteurs, que sont-ils deuenus? Monsieur, me respondit-elle, ie croy qu'ils se sont sauuez, & aussi que ces meschans hommes n'en vouloient à mon aduis qu'à mes perles & qu'à mes bagues. Comme elle acheuoit de me dire cela, l'on mit quelques chandelles à vne fene-

stre qui estoit vis à vis de nous, dont la lumiere me dóna moyen de voir la femme à qui ie parlois; & qui ie vous assure, Madame, estoit la plus belle, apres vostre majesté, que i'aye iamais veu. Elle estoit donques bien fort laide, respondit la Reyne, avec vne façon la plus gracieuse qu'il est possible: Car ie ne croy pas, adiousta-elle, qu'on me puisse regarder sans auoir mal au cœur, aussi fais-je peur à tous ceux qui me voyét. Acheuez, acheuez de nous dire le reste. Madame, dit Ennemidor, comme i'estois attentif à considerer vne si parfaite beauté, ie vis venir vingt-cinq ou trente hommes avec l'espee nuë à la main qui crioient tuë tuë. I'allay au deuant d'eux pour dóner moyen de se sauuer à celle que i'auois

desia commencé d'obliger: Mais ie fus incontinent porté par terre d'un coup de pertuisanne que ie receus sur la teste, & qui me l'eust mise en deux s'il ne m'eust frappé du plat sur le haut de mon chapeau, qui rompit la violence du coup. Quatre ou cinq se ietterét sur moy pour me tuer, s'ils n'eussent esté empeschez des autres, qui dirent que la mort n'estoit pas vn assez cruel supplice pour me chastier. C'estoient les parens & les amis du mary de cette ieune femme, lesquels estoient venus à son secours, & qui m'emportoient tout évanoüy à leur logis, où elle se rendit presque aussi-tost qu'eux. Mais incontinent qu'elle me vid, elle me reconnut, & croyant que ie fusse mort, s'escria. O Cieux, quel grād

malheur est-ce là ? Ah ! que j'ay de regret qu'un si vaillant & si courtois Cavalier ayt esté ainsi misérablement tué : En parlant ainsi elle m'arrousoit de ses larmes, & s'affligeoit si fort que tous ceux qui la voyoient en demeurerent estonnez. Mais quand elle leur eust dit ce que j'auois fait pour elle, & l'obligation qu'elle m'auoit, il n'y en eust pas un qui n'y prist part, & qui n'eust un extreme regret de me voir en l'estat où j'estois. Ils s'efforcèrent tous de me faire reuenir à moy, & firent si bien qu'à force de bons remèdes ie repris mes esprits. Certes, Madame, ie croyois fermement auoir esté enchanté, me voyant au milieu de tant de gens que ie ne cognoissois point, & ne sachant en aucune façon comment

cela estoit arriué. Je me treuuois assez bien, & ne sentoie aucun mal, sinon vn peu à la teste que i'auois aucunement estourdie du grand coup que i'y auois receu. Ils s'efforçoient tous à me rassurer par les honnestes offres qu'ils me faisoient, & par les tesmoignages qu'ils me rendoient de leur bonne volonté. La viande estoit sur la table il y auoit plus d'un gros quart-d'heure, ils me contraignirent d'y prédre la plus honneste place, n'y ayant forte d'honneur qu'ils ne me rendissent. Je ne croy pas que les Princes pussent faire de plus somptueux banquets qu'estoit celuy-là, & encores que le Maistre de la maison ne fust qu'un des moindres d'entre les Questeurs, on n'y auoit neantmoins rien espargné.

Il ne se peut voir ny de plus beau linge, ny de plus belle vaisselle d'argent qu'il y en auoit là. Le grand nombre de seruiteurs tous bien vestus & en bon ordre, les precieux meubles dont la salle estoit paree, les peintures exquises, la dorure des lambris & de la cheminee, & vne infinité d'autres profusions que ie remarquay là dedans, tesmoignent assez que l'or & l'argent n'y coustent pas beaucoup. Mais tout cela n'est rien au prix des riches perles & des diamants, qui accabloient de leur poids la Maistresse du logis, que i'auois tiree d'entre les mains des voleurs. Tant que le souppé dura elle ne repût presque ses yeux que des regards, dont elle me fauorisa avec autant de douceur qu'ils estoient pleins d'attraits.

Comme l'on commençoit à
desferuir, i'ouy frapper fort rude-
ment à la grand' porte du logis,
& au mesme temps ie vis les fene-
stres de la salle toutes remplies
de la lumiere de plusieurs flam-
beaux, qui entroient dans la cour
avec quatre ou cinq carrosses.
Nous nous leuasmes tous de ta-
ble, & allasmes au deuant de ceux
qui arriuoient, dont le premier
qui entra dit, apres auoir fait les
complimens accoustumez, que
le balet ne tarderoit plus gueres
à venir. En disant cela, nous al-
lasmes dans vne autre grande sal-
le qui estoit preparee pour le re-
cevoir, & dans laquelle il y auoit
aupres de la cheminee vn Thea-
tre, que des Comediens auoient
fait dresser pour entretenir la cõ-
pagnie, apres que le balet auroit

danfé. Car quelle sorte de plaisirs y a-il en ce monde que ne se donnent ceux qui sont de l'ordre des *Questeurs*? Il y auoit aupres de la salle vn grand cabinet, où ie vy la plus belle & la plus superbe collation dont i'aye iamais ouy parler. L'on fit tout ce qu'on pût pour me retenir, mais à quelque prix que ce fust ie voulois aller voir mô ainy, pour luy demander des nouuelles de quelque affaire qui m'importe infiniment. Je ne le treuuay pas chez luy, & me dit-on qu'il n'y reuiendrait qu'il ne fust plus de quatre heures apres minuiet. Cela fust cause que ie m'en retournay à mon logis, où mon hôte me fit la plus mauuaise mine du monde, de ce que ie n'y estois pas allé souper. Il m'auoit donné la clef d'une chambre, & neant-

moins

moins i'y en treuuay vne autre à la porte qu'il y auoit oubliee par mesgarde : Estant entré dedans, ie m'apperceueu qu'on auoit fouillé dans ma malette, & qu'on m'auoit pris entre plusieurs autres choses vne petite boëte, que ie tenois aussi chere que ma vie. Je m'escrié qu'on m'auoit volé, mais luy se scandalisant de ce que ie parlois ainsi, me dit en colere, qu'il n'y auoit dans sa maison que des gens de bien, & fit tant d'horribles sermens que personne n'estoit entré en ma chambre, que ie creu fermement que c'estoit luy qui m'auoit desrobé ce que ie cherissois si fort; Car c'est vne maxime, qu'il ne faut iamais croire les larrons & les menteurs, quand ils iurent librement. Je le pris par le bras, & luy dis que ie le

tuerois s'il ne me rendoit ce qu'il m'auoit desrobé. Il cria au meurtre, & en vn instant ie vis venir tous les valets du logis, qui accoururent pour deffendre leur Maistre. Je mis l'espee à la main, pour empescher que ces gens-là ne me fissent quelque outrage, ainsi qu'ils s'y preparoient: mais en ayant ietté vn mort par terre, les autres prirent la fuite, & coururent dans la ruë crier à la force. Je descendis en bas pour me sauuer, me souuenant d'auoir ouy dire que les habitans de Sirapis sont fort seditieux, & qu'ils ont accoustumé de prendre les armes aussi-tost qu'il se fait quelque rumeur. Je ne pû neantmoins si bien faire, que ie ne rencontraffe en sortant du logis trente ou quarante hommes avec des halebardes & des per-

cuisannes, qui estoient accourus au bruit. Tant s'en-faut qu'ils me cognussent, qu'au contraire ils ne se cognoissoiét pas eux-mesmes, à cause de l'obscurité de la nuit, à la faueur de laquelle ie ne fus poursuiuy que iusques au bout de la petite rue, qui est au coin de vostre iardin. Voila, Madame, le conte que ie vous puis rendre de ce qui m'est aduenü depuis que ie suis en cette Ville. Vrayement, dit la Reyne, voila vne grande suite d'estranges accidents qui vous sont arriuez en fort peu de temps. Mais auant que d'entrer dans cette Ville, n'auiez-vous fait aucune rencontre. Non, Madame, respondit Ennemidor, qui se souuenoit de l'aduis que Rozane luy auoit donné, encores qu'il ne sceust point si c'estoit le Prince

de Voltandon, contre qui il s'estoit battu. La Reyne qui auoit vn peu de ialousie de cette ieune femme qu'Ennemidor auoit secouruë, dit : Et bien cette belle Dame que vous auez tant obligee, ne vous a-t'elle point rendu amoureux ? *Madame*, respondit-il, *l'amour n'entre iamais en vne ame remplie d'ennuis comme la mienne; Il n'y a que les esprits vuides de soins, qui en puissent estre atteints.* Mais neantmoins, dit la Reyne, vous mistes vostre vie en danger pour la secourir. *Madame*, repartit-il, tous les gens de bien sont obligez de mourir plustost, que de perdre l'occasion d'acquérir de l'honneur en assistant ceux qui ont besoin de leur ayde. Et quoy, repartit la Reyne, est-il possible qu'il y ait ainsi du danger la nuit

par les ruës en cette Ville ? O Cieux ! respondit Rozane, vous ne croiriez iamais, Madame, les meurtres & les voleries qui s'y cōmettent. L'on n'oseroit sortir de sa maison dès ce que le iour est finy, c'est le plus grand desordre qu'il est possible, & il n'y a point de Ville au mode où l'on y pouruoye moins qu'en cette-cy. Ce n'est pas faute neantmoins d'Archers, de Sergens, d'Huissiers & d'autre sorte de gens semblables; mais quoy ils s'entendent tous avec les voleurs, & en tirēt pensió. Il seroit necessaire de les obliger à marcher la nuict bien armez & en bon ordre, pour empescher les excez qui se commettent, & de rendre responsables les Commissaires des quartiers de la Ville, de tout le mal qui arriueroit

en l'estendue de leur Iurisdiction. Certes Rozane, dit la Reyne, tu ne parle pas en fille, & à t'ouïr on te iugeroit capable de reformer tout vn Estat. Madame, respondit Rozane, ie ne vous dy pas cela de moy-mesme, ie l'ay appris des personnes qui n'ignorent rien. Mais vostre majesté sçait-elle biē qu'il est quatre heures apres midy, & que n'ayant rien mangé depuis hier à pareille heure, il est temps qu'elle disne? Tu as raison, dit la Reyne, va ma fille fais moy apporter quelque chose, & donne ordre que si quelqu'un me demande, qu'on die qu'on ne me void point. Apres cela, elle entra dans son cabinet, & y appella Ennemidor, à qui elle fit cognoistre la passion qu'elle auoit pour luy, & en tira, auant que sortir de là,

tout le soulagement qu'elle desiroit, & dont la pratique est beaucoup plus agreable que le recir; aussi en continua-elle l'usage durant sept ou huit iours qu'elle retint Ennemidor enferm  avec elle, noyant dans vne mer de delices tous les ennuys qui la pouvoient affliger.

Parmy l'excez de ses contentemens, elle le conjuroit souuent de luy confesser s'il ne s'estoit pas battu contre le Prince de Voltandon son frere : mais luy qui ne s'abandonnoit pas tant au transport de ses plaisirs, qu'il ne se souuint tousiours *que l'homme sage ne dit iamais rien qui luy puisse nuire*, tesmoigna sans cesse qu'il ne s auoit que c'estoit. Quelques priuetez qu'il eust avec la Reyne, il ne voulut neantmoins pas laisser

tellement captiuer sa raison, qu'il n'eust assez de force pour tenir vne chose secrette, dont le recit ne luy pouuoit apporter aucun aduantage, & luy pouuoit peut-estre quelque iour infiniment nuire, puis qu'il n'y a rien au monde de si variable que l'affection des femmes, ausquelles il est dangereux de confier vn secret important. Aussi n'y a-t'il point d'hōme prudēt qui vueille achepter leurs bonnes graces au pris de sa seureté, & du repos de sa vie.

Vne infinité de gens de qualité qui venoient pour consoler la Reyne, crurent ne pouuans auoir le moyen de la voir, que son affliction estoit extreme, puis qu'elle se priuoit de toute sorte de compagnies; Mais celle d'Ennemidor luy estoit plus chere & plus agreable, que de toutes les per-

sonnes du mode. Toutefois *comme il n'y a point de roses sans espines, ny de iour si clair qui ne soit suiuy des tenebres de la nuit*, sa Majesté fut aussi contrainte de se priuer de la veüe d'Ennemidor, qu'elle ay-
moit si esperduëment qu'elle le portoit en ses yeux. Car la Princesse de Gonzanuert sa sœur, luy ayant mandé que l'Imperatrice la vouloit aller voir, elle creut qu'il y auoit du danger de le re-
tenir dauantage. Cela fut cause qu'elle luy donna congé, apres luy auoir tesmoigné par vn present excessif, l'excez de son affection. Il se retira donques avec cinq cens pistolles, & vn diamant qui en valoit bien autant. Le marquis d'Argentuare estoit son oncle, & ne l'aymoit pas moins que s'il eust esté son enfāt: aussi estoit-

il resolu n'en ayant point, & estât hors de l'esperance d'en auoir, de l'adopter & de luy faire porter son nom. Ce Marquis, quoy que de naissance n'eust pas de grands biens, s'estoit neantmoins fait excessiuelement riche au seruice du Duc de Cossantroc, le party de qui il auoit tousiours suiuy durant la guerre des Nouates en la prouince de Tissambrize. Mais son auarice s'augmentoit tousiours avec sa bonne fortune. Il iouyssoit des biens d'un homme riche, & il auoit l'esprit d'un pauvre, se comportant comme s'il n'eust eu autre dessein que de viure avec necessité, pour enrichir ses heritiers, qui peut-estre s'en mocquerót au lieu de luy en sçauoir du gré, & dissiperont prodigusement les grandes richesses

qu'il acquiert avec tant de peine. Avec tout ce qu'il a, il leur laissera encores ce qu'il n'a point; c'est assauoir, la ioye, le contentement, & le repos d'esprit, dont il n'a iamais gousté: car les richesses qui luy sont suruenues ne sont pas la fin, mais seulement le changement de ses miseres; & la pauvreté l'ayant autrefois incommodé, les biens luy donnent maintenant du trauail. Cette diabolique auarice qui tyrannise son ame, l'empesche de s'employer pour l'aduancement d'Ennemi-dor son nepueu, encores qu'il aye de l'inclination à l'aymer. *Mais quel effect peut-on attendre de l'amitié d'un auaricieux, qui ne s'ayme pas luy-mesme, & qui volontiers diminueroit le nombre de ses iours, pour augmenter ses tresors? O peste du*

genre humain qui glace l'amour
des parens , qui brusle iusques
aux os ceux que tu empoisonne,
qui violéte les ames , qui dissouls
le nœud de toute sorte de société,
qui force la nature & ne pardon-
ne pas mesmes à celuy qui en est
l'autheur, estant presté de le ven-
dre & le trahir encores de nou-
veau à beaux deniers comptans
pour assouvir tes insatiables de-
sirs ! Qui peut dire, mais qui peut
penser combien ton venin est
dangereux & mortel ? Ennemi-
dor voyant que l'esprit du Mar-
quis d'Argétuarre en estoit cruel-
lement infecté, n'en faisoit pas
tant d'estat, & ne s'en tenoit pas
si pres qu'il eust fait s'il ne l'eust
point veu souillé de l'horreur de
ce vice qu'il detestoit plus que la
mort. C'est pourquoy encores

qu'il ne sceut où aller, il ne se fust pas neantmoins retiré en son logis, si en sortant de chez la Reyne de Regnaut-chanfort il ne l'eust rencontré dans la rue. D'Argentuarre fut extremement estonné quand il le vid, car il croyoit qu'il fust en la ville de Darderoy, où il auoit esté enuoyé depuis quatre ans, pour y apprendre tout ce qui est de la profession d'un Cavalier, comme en la meilleure Academie qui soit en tout l'Empire de Galatie. Ennemidor y employa si soigneusement le temps, qu'il surpassoit l'esperance de ses Maistres, aussi bien que le desir de ses parens, & se fit admirer de tous ses compagnons. Son oncle luy demanda qui l'auoit fait venir à Sirapis; mais en luy cachant le sujet de son voyage, il luy respon-

dit. Monsieur, rien ne m'ameine icy que l'extreme desir que j'ay d'estre aupres de vous, & de vous servir. D'Argentuarre qui estoit ray d'aïse de le voir si beau & de si bonne grace, & iugeant d'ailleurs qu'il estoit temps de le tenir à la Cour, se contenta de cette raison, plus pleine de respect que de verité. Il l'emmena donques à son logis, où il passa douze ou quinze iours sans oser presque sortir, tant parce qu'il estoit mal vestu, que parce qu'il craignoit d'estre reconnu avec l'habit qu'il auoit quand il entra dans Sirapis. Mais apres ce temps là, voyant que son oncle ne parloit point de faire venir des estoïffes pour le faire habiller: qu'au contraire, il fermoit la bouche à sa femme quand elle en vouloit dire quelque cho-

se, il se fit faire, sans luy en dire rien, deux habits complets tous couuerts de passemés d'or & d'argent. Le Marquis voyant son neveu si bien couuert, ne luy demanda point où il auoit pris de l'argent, car c'estoit la chose du monde dont il s'informoit le moins, pourueu que ce ne fust pas à ses despens : Mais aussi-tost il cōmença à luy faire vne grande reprimende, & à luy prescher l'espargne, l'entreprenant depuis la teste iusques aux pieds. Aussi ne prenoit-il point vn plus grand plaisir qu'à reprendre vn chacun, ce qu'il faisoit tousiours en public, croyant que c'estoit le moyē de se faire admirer. Et quoy mon nepueu, luy dit il, ie croy que vous vous mariez, puisque vous estes si bien paré. Ce n'est point cela,

respondit Ennemidor, mais c'est pour me rendre plus digne d'estre auprès de vous. Et quoy, repartit d'Argentuaire, croyez-vous ne valoir que ce que vos habits vous font valoir ? Voulez-vous vous glorifier de la despoüille des bestes ? Toute cette foye qui est sur vous, est-ce autre chose que la baue des vers ? cet or & cet argent ne sont-ce pas des excremens de la terre ? & ces plumes qui sont sur vostre teste, n'ont-elles pas esté arrachees du plus lourd & du plus pesant oyseau qui se puisse voir ? Toutefois ceux qui se voudront mocquer de vous, ne diront-ils pas que la teste qui les porte est pleine de legereté, d'ot elles sont la marque & le symbole ? Ne diront-ils pas encores, qu'il n'y a point de crocheteurs qui portent

de si

de si pesants fardeaux que vous, qui avez sur vos espaules vn manteau qui a peut-estre cousté quelque metairie, ou quelque moulin à vent? Non, non, croyez-moy, mon nepueu, il se faut faire cognoistre par vne longue suite de genereuses actions, & non par vne multitude de somptueux habits, qui ne seruent qu'à faire remarquer les deffauts qui sont en nous; car ceux qui sont bien vestus sont regardez d'un chacun, & le sot paroist dans ses riches habits, ainsi qu'une chandelle de poisraisine dans vn chandelier d'argent. Monsieur vous me faites beaucoup de faueur, respondit Ennemidor, de prendre la peine de me représenter tant de belles & curieuses considerations. Il est vray que les habits ne font pas l'homme meil-

leur , mais ils le rendent plus venerable , non pas plus venerable, dit d'Argentuaire, mais plus vain. Ouy, celuy qui n'a pas l'esprit bien fait, repartit Ennemidor, car toutes les meilleures choses du monde peuvēt estre employees à mal-faire , par ceux qui sont priuez de raison. L'espee en la main d'un furieux est tres-dangereuse , mais estant en celle d'un homme rempli d'autant de sagesse que de valeur, sert à maintenir l'innocence du foible contre la violence du plus fort. La Philosophie pour la conduite de la vie est le plus excellent tresor qu'on puisse acquérir ; & neantmoins quand on en veut abuser, il ne se peut dire de combien de maux elle est cause. Les habits sont de mesme, les uns en tirent vne insupportable vani-

té, & les autres vn legitime aduantage. Je confesse que c'est vne honte que de se vouloir seulement faire estimer par ses habits, puis-que les estoifes sont venuës des bestes, ou de la terre, & que la façon part de l'industrie des Artisans qui en meritent l'honneur. Mais vous m'auoüerez aussi, si vous plaist, Monsieur, qu'en la corruptiõ du siecle où nous sommes, il faut estre par necessité bien vestus, si l'on ne veut estre mesprisé de tout le monde. C'est pourquoy nous voyons les plus grands personnages auoir soin de s'habiller richement & proprement, pour estre distinguez d'avec le menu peuple. Les principaux ministres de l'Estat ne veulent-ils pas faire cognoistre la difference de leur charge par celle

de leurs habits ? Ne remplissent-ils pas leur dignité d'esclat & de Majesté par la pourpre, le satin & le velours ? Nos souverains Sacrificateurs & leurs principaux Collegues qui nous doiuent servir d'exemple, ne se rendent-ils pas venerables par les precieux ornements dont ils esbloüissent les yeux ? Mais outre tout cela, l'experience ne nous apprend-elle pas tous les iours que le plus vertueux, & le plus habile personnage du monde, sera mesprisé dansvne compagnie s'il est mal vestu ? & que le plus vicieux & le plus impertinent homme de la terre sera honoré s'il est richement habillé ? On ne regardera celuy-là que comme vn valet, & on ne l'oyra qu'à regret : mais celuy-cy attirera les yeux & les cœurs d'un

chacun. D'ailleurs, ayez affaire à vn Consul ou à vn Questeur, ses gens ne daigneront pas ouurir la porte, s'ils vous voyēt en mauuais ordre; mais si vous estes biē couuert, aussi-tost ils vous feront entrer, & aduertiront leur Maistre, qu'il y a en bas vn homme de bōne façon qui veut parler à luy. Incontinent on vous fait monter, on vous rend de l'honneur, on vous escoute & vous donne t'on contentement; non selon le merite de ce que vous demandez, mais selon la valeur de vos habits, & la bonne grace que vous auez. L'entree chez les Roys & chez les Princes, n'est point si facile aux hommes vertueux, qu'à ceux qui sont bien parez. Certes, il n'y a pas deux iours que ie treu-
uay aux prises parmy dix ou dou-

ze valets, l'un des plus hommes de bien, & des plus vaillans Capitaines qui soit en cet Empire. Je le dégage de là, & luy demanday ce qu'il y faisoit. Je payois, me respondit-il, les interets de ma mauuaise mine. S'il eust esté vestu de satin au lieu de bure, & qu'il n'eust point esté borgne comme il estoit, ce malheur ne luy fust pas arriué.

Ennemidor mit fin à ce discours, pour faire la reuerence au Duc de Cossentroc, qui venoit communiquer quelque affaire d'importance au Marquis d'Argentuaire. Ce Duc auoit accoustumé lors qu'il voyoit quelque beau ieune homme de luy demander tousiours d'où il estoit, & de luy faire plusieurs autres questions, afin d'auoir plus de

moyen de le regarder , prenant vn extreme plaisir à considerer attentiuement tous ceux que la nature auoit gratifié de quelque insigne trait de beauté. Aussi tost qu'il eust ietté ses yeux lascifs sur Ennemidor, il creut que c'estoit la plus belle creature qu'il eust iamais veüe, & demeura surpris d'estonnement. Le Marquis pour auoir esté nourry & esleué petit enfant aupres de luy, lisoit dans ses pensees, & cognoissoit les secrets mouuements de son cœur, ausquels il auoit luy-mesme souuent obey, afin de faire sa fortune, qu'il n'auoit esleuee que sur des fondements pleins d'horreur & d'abomination. Et parce que son incroyable auarice luy ostoit toute sorte de desirs de contri- buer quelque chose pour l'ad-

uancement de son nepueu, il eust esté bien ayse, ô Cieux, i'ay horreur de le dire! qu'il l'eust recherché par les mesmes voyes qu'il auoit suiuiues, violant les loix de la nature, & luy faisant vne infinité d'outrages. Voulant donques continuer à complaire au Duc, & commencer à engager Ennemidor, il dit: Monsieur, c'est mon nepueu que i'ay fait venir icy, afin qu'il vous puisse rendre quelque bon seruice. Vrayement, respondit le Duc, il est de fort bonne façon, & serois bien ayse qu'il s'offrist occasion de luy tesmoigner combien ie l'estime, & l'estat que ie fais de tout ce qui vient de vostre part. Il ne sera point si bien receu en quelque lieu qu'il aille, & n'y aura point tant de puissance que là où ie seray. En disant cela, il

embrassa Ennemidor, & avec des yeux pleins d'amour & de sourris, s'efforça de luy faire paroistre par la plus gracieuse & attrayante action qu'il pût, la bonne volonté qu'il auoit pour luy. Puis sans se retirer à part, car il sentoit desia vne force secrette qui l'empeschoit de s'esloigner de celuy qu'il regardoit avec vn incroyable contentement, & qui luy remplissoit l'ame d'autant de desirs que d'admiration; Il dit au Marquis d'Argentuaire avec vn visage ioyeux, *car c'estoit sa coustume aussi bien que de tous les amoureux, de tascher à se rendre agreable en la presence de l'objet qu'il aymoit.* Marquis, n'as-tu point vû la fille du Comte de Ber-tonchant ? Elle n'est pas belle, mais ie t'asseure que ie l'ay treuue aujourd'huy de fort bonne

grace, elle est haute & de belle taille, & croy qu'elle fera de beaux enfans. Je voudrois bien que mon fils la voulust rechercher, & se despoüiller de cette vaine ambition qu'il a de ne vouloir espouser qu'une Princesse. Les grandes alliances de nostre maison y ont apporté assez d'honneur. Les Empereurs de Galatie, leurs freres, leurs enfans, & les plus grands Princes de l'Europe se sont alliez avec nos ancestres. L'occasio n'est pas tousiours auantageuse de prendre de ces grands partis là, *qui d'ordinaire sont bien autant à charge qu'honorables*; car s'estans ioints d'alliance avec les grands Princes, il faut espouser leurs querelles & leurs passions, qui bien souuent vous engagent en des guerres injustes, & vous

precipitent en vn abyfme d'incommoditez & de dangers. Avec tous ces inconueniens qui font infaillibles, adiouftons encores la feruitude infupportable, où fe fousmet celuy qui prend vne femme d'une maison beaucoup plus illustre que la fienne. Quand mon fils se fera lié pour iamais avec la fœur du Roy de Britambrize, qui est le plus remuant Prince & le plus impatient de repos qui soit au monde. Il faudra qu'il soit sans cesse à cheual pour courre sa fortune, qu'il y embarque ses parens & ses amis, qu'il soit continuellement au hazard d'estre déclaré par l'Empereur criminel de leze-Majesté, de voir cōfifquer ses maisons, d'estre depouillé de ses charges & réduit en chemise. D'ailleurs cette ieu-

ne Princeſſe eſt ſi ambitieufe & ſi vaine, que tous les reſpects que mon fils luy pourra rendre ne l'empêcheront pas de faire paroître tant de meſpris, qu'il n'y a rien qu'un cœur genereux ne tente pour ſ'en affranchir. Et puis le Comte de Bertonchant eſt ſorty de l'une des plus illuſtres maiſons de la Treſmanie, & ſes anceſtres qui ſont venus en Galatie ont eſté honorez des plus grands honneurs & des plus importantes charges de l'Empire: de ſorte que le rang que celui-cy y tient aujourd'huy eſt ſi releué, qu'il n'y a Prince ny grand Seigneur en cet Eſtat, qui doiue faire difficulté d'entrer en ſon alliance. Je ne diſ rien des belles maiſons qu'il a, & des grands biens qu'il poſſede, dont ſa fille peut un iour heri-

ter, puis qu'elle n'a qu'un frere qui est à mon aduis fort incommodé en sa santé. Et bien Marquis, que t'en semble-t'il ? Monsieur i'estime, respondit-il, que toutes les raisons qu'il vous a pleu me faire l'honneur de me communiquer, sont tres-excellentes, & qu'il ne s'y peut rien adiouster. Toutefois, puis que le mariage n'est pas vne resolution pour un iour ny pour deux, mais pour toute la vie, dont le repos & le bon-heur dépendent entiere-ment de la bonne amitié, & de l'estroite vnion des cœurs & des volontez du mary & de la femme : Il me semble qu'il est non seulement à propos, mais encores necessaire, de sçauoir bien veritablement si Monsieur vostre fils, & Mademoiselle de Berton,

chant auroient de l'inclination l'un pour l'autre: Car si leur humeur estoit si contraire qu'ils ne se peussent aymer, quelle apparence y auroit-il de les ioindre d'un lien qui ne se peut rompre que par la mort? Les grandes alliances, les biens & les honneurs sont fort considerables en cette affaire-cy, mais toutes ces choses ne destournent pas vne infinité de malheurs infaillibles, quand la bonne intelligéce y deffaut. C'est pourquoy ceux qui ont des enfans ne les doiuent iamais contraindre, ny violenter leur sentiment en vne action qui doit estre pleine de liberté: Ceux qui font autrement experimentent d'ordinaire, que de tous les tourmens qu'on se peut imaginer, *il n'y en a point de si insupportable, que ceux qu'il*

faut souffrir dans vn mariage, que le Ciel n'accompagne pas de ses benedictions. Combien de diuorces, d'adulteres, d'incestes, de meurtres & d'empoisonnemens voyons-nous arriuer tous les iours par cette voye là? Combien voyons-nous de grandes maisons renuersees, & de riches familles entierement ruinees par ces desordres-cy? C'est ce que les peres doiuent preuoir, au lieu de ne fonder leur esperance & la fortune de leurs enfans, que sur les biens qui sont si legers & si variables, qu'ils s'escoulent de nos mains, quelque effort que nous fassions de les retenir? Certes c'est vne folie de vouloir contraindre deux ieunes personnes de passer toute leur vie ensemble, & leur humeur est peut-estre

si contraire , qu'elles aymeroient
autant mourir que d'estre seule-
ment vn mois l'une avec l'autre.
D'ailleurs n'est-ce pas vne honte
de desirer plustost vne femme ri-
che que vertueuse , sage , agrea-
ble & de bonne grace ? N'est-
ce pas estre injuste de vouloir
rendre son fils riche & non pas
content ? de luy vendre des biens
au prix du repos de son ame , &
en fin de le faire entrer en des
grandes possessions pour le com-
bler d'ennuys , qui luy feront
peut-estre mille fois le iour de-
tester sa vie , & desirer la mort ?
D'Argentuarre eust encores con-
tinué ce discours, si vn Huissier
du cabinet de l'Empereur ne fust
point venu dire au Duc de Cos-
sencroc que sa Majesté le deman-
doit. Il s'en alla promptement la
treu-

treuver, & mena avec luy l'oncle
& le nepueu, deuant lequel il
auoit familierement discouru &
ouy discourir de ses plus impor-
tantes affaires, afin de l'obliger
dauantage, & luy tesmoigner qu'il
se confioit en luy. Apres qu'ils fu-
rent entrez chez l'Empereur, ils
le treuverent repetant vn balet
qu'il deuoit danser ce soir là mes-
me. Sa Majesté dit au Duc de
Cossantroc, monsieur de Cossan-
troc, ie vous ay enuoyé querir
pour vous dire que ie desire que
vous traueilliez à terminer la
broüillerie qui est entre le Duc
de Meuridas & Gardenfort. Tout
ce qui me déplaist en cette affai-
re-cy, c'est la mort du Prince de
Voltandon, & de ce qu'on ne co-
gnoist point celuy qui l'a tué.
Certes, Sire, c'est bien la plus

estrange affaire dont i'aye iamais ouy parler; car quoy qu'on ayt pû faire, l'on n'a sceu sçauoir qu'estoit deuenue ce ieune homme qui suruint si inopinement en ce combat, & qui s'y porta avec tant de courage. Qui que ce soit il n'est pas moins remply de discretion que de valeur, puis qu'il ne s'est point fait cognoistre, & qu'il n'y en a gueres en toute cette Cour qui ne se fust vanté plusieurs fois de cette action, quand mesmes il eust creu se mettre en danger d'en perdre la vie. Car que ne peut point la vanité sur l'esprit de la plupart des Gentils-hommes? Et bien, luy dit l'Empereur, pensez vn peu comment on peut accommoder ce differend, car ie n'en veux plus ouyr parler, cependant ie m'en vays repeter mon balet, si vous le

voulez voir danser ce fera pour cette nuit. Sire, luy respondit le Duc, i'aymeroïs mieux la passer dans vne tranchee pour vostre seruice, & puis mes iambes ne sont plus bonnes pour la danse, mais voila vn ieune Cauallier qui à mon aduis s'en acquitteroit fort bien. En parlant ainsi, il s'approchoit avec l'Empereur des violons auprès desquels estoit Ennemidor, de qu'il parloit & qu'il presenta à l'Empereur, luy disant que c'estoit le nepueu du Marquis d'Argentuarre, qui estoit venu treuuer sa Majesté, pour luy rendre tout le tres-humble seruice à quoy sa naissance & sa profession l'obligeoient. Aussi-tost Ennemidor fit la reuerence à l'empereur qui luy fit fort bon visage, & dit en le regardant.

Voila iustement vn homme tel qu'on m'a dépeint celuy-là qui a tué le Prince de Voltandon , & qui a si fort blessé Boittantual : Ces paroles firent rougir Ennemidor , qui en fut treuvé plus beau , & le Duc de Cossantroc le voyant vn peu estonné , repartit pour luy , qu'il estoit bien capable de venir à bout de toutes sortes de genereuses entreprises . L'Empereur n'entendit qu'à peine cette repartie , parce que sa Majesté qui estoit extrêmement attentiue à son balet parloit desja avec les violons . Le Duc de Cossantroc faisant semblant de se desrober , quoy qu'il n'en fust pas besoin , car personne ne prenoit plus garde à luy , s'en retourna à son logis , & fit demeurer Ennemidor pour voir danser le

balet. Et parce qu'il ne deuoit pas encores arriuer de long-temps, il eut moyen d'entretenir vn Gentil-homme de fort bonne mine qui s'estoit approché de luy, & à qui il demanda quelle querelle le Duc de Meudas auoit. Portchanron luy dit, ainsi s'appelloit ce Gentil-homme, qu'on ne sçauoit pas bien le sujet de la dispute, mais qu'on en estoit venu si auant, que le Prince de Voltandon y auoit esté tué, & Boittantual extrêmement blessé, ayant tous deux eu affaire à vn ieune garçon incognu, dont on n'a ouy depuis aucune nouuelle. Me ferez-vous l'honneur, adioustâ Ennemidor, de me dire qui estoit ce Prince de Voltandon, & qui est Boittantual? Le Prince de Voltandon, respondit Portchan-

ron, est frere du Duc de Meuridas, qui est le plus puissant Prince de tout cet Empire; ils estoient cinq freres, mais ils ne sont plus maintenant que trois : Car cinq ou six mois auant la mort du prince de Voltandon, Filinde son ieune frere auoit esté tué par vn coup de tonnerre. Il n'y a donc plus que le Duc de Meuridas, le Comte de Charamanc, & le grãd augure avec la Reyne de Regnaut-chanfort, & la Princesse de Gonzanuert leurs sœurs. Et Boittantual qui est-il, demanda encores Ennemidor. C'est bien, respondit Portchanron, le plus gentil, le plus courtois, & le plus braue Cavalier qui se puisse treuer. Il est frere de Gardenfort, qui dispose entierement des volontez de l'Empereur, & n'y a ia-

mais eu en Galatie vn si puissant fauory que luy. Il oste & accorde les pensions à qu'il veut, il approche & esloigne de sa Majesté ceux qu'il luy plaist, il donne audience aux Ambassadeurs, il leur fait response, & resoult tout seul les plus importantes affaires de l'Estat. En fin, Monsieur, il est Empereur en effect, & l'Empereur ne l'est plus que de nom. Parmy les Galatiens & parmy les nations estrangeres on ne parle que de luy, & il n'y a plus d'entree aux charges & aux hōneurs que par son moyen, aussi dir-on hautement; O Cieux qui peut croire cela ? qu'il vaut mieux auoir sa parole, que d'estre asseuré de la promesse de l'Empereur. Le bruiet est qu'il a fait empoisonner la mere de sa Majesté, afin de faire tomber la Re-

gence entre les mains de la Duchesse de Conforliche, sœur du deffunct Empereur qui gouverne aujourd'huy l'Empire, & la personne de ce ieune Prince son nepueu, se laissant elle-mesme entierement gouverner par Gardenfort. Rien ne s'oppose à ses desseins: car si la Duchesse qui est Regente luy veut du bien, l'Empereur ne luy en desire pas moins. Les Princes, les officiers de la couronne, les ministres de l'Estat, & generalement tous les Ordres de l'Empire s'eschissent sous sa volonté sans murmurer, & s'il se treuve quelqu'un qui soit si hardy que de s'opposer tant soit peu à ses entreprises, il n'est plus en seureté de ses biens, de sa vie, & de son honneur. Vous le verrez cette nuit plus paré de pier-

rees que l'Empereur, à qui d'ordinaire il parle ayant son chapeau sur la teste, ce qui ne s'est jamais veu en Galatie qu'à cette heure. Il ne contente personne, & ne fait rien que pour ceux qui dépendent absolument de luy. Tout le monde s'en plaint, & sans son frere Boittantual qui est autant courtois & gracieux, que Gardenfort a de gloire & de vanité, ie ne croy pas que tous les Gentils-hômes Galatiens ne missent volôtiers leur vie au hazard, pour se rendre maistres de la sienne. Voila, Monsieur, ce que ie vous puis dire pour satisfaire à ce que vous m'avez demandé. Je ne voudrois pas parler si librement à toute sorte de persônes, de peur de me mettre en peine; car encôres que ce pais-cy soit libre,

la parole neantmoins ne l'est pas, & punit-on bien souuent les discours, comme des crimes irremissibles. Certes, repliqua Ennemidor, vous m'obligez infinimēt de m'apprendre des choses que ie suis bien ayse de sçauoir. Mais comment est-ce que le Duc de Meuridas a eu la hardiesse de faire appeller Gardenfort, puisque son autorité est si grande ? Il faut, respondit Porchanron, qu'il en ayt eu quelque grand sujet, & de fait on croit que Gardenfort iouyt des bonnes graces de la Reyne de Regnaut-chanfort, qui est sœur du Duc de meuridas, & qu'il estoit sur le poinct de l'espouser s'il ne s'y fust opposé, encores dit-t'on qu'il faudra qu'il y consente bon gré mal gré, puisque l'Empereur & la Duchesse sa

tante veulent que cela se fasse. Et de vray, i'ay ouy dire que sa Majesté est resoluë de les mettre d'accord pour faciliter le mariage. Il n'y a que la mort du Prince de Voltandon qui y apporte de grandes difficultez, combien que luy-mesme soit cause de son malheur, ayant forcé vn ieune homme qui passoit, & qu'il ne cognoissoit point, à se battre contre luy. Ne sçait on point qui il est, dit Ennemidor: L'on n'en a sceu autre chose, respondit Porchanron, sinon qu'apres auoir tué le Prince de Voltandon, & defarmé le Duc de Meuridas, il remonta sur vn meschant bidet qu'il auoit attaché à vn saule, & reprit son chemin vers cette Ville. Mais cõme il estoit prest d'entrer dans le fauxbourg, il rencontra Boittan-

tual contre lequel il se batit encores, & le laissa pour mort sur la place: neantmoins il commence à se porter mieux, & croit on qu'il est entierement hors de danger. Ennemidor entendit tout cela sans se descouvrir & sans parler, *sçachant que le silence n'a iamaismis personne en peine, & qu'au contraire il n'y a rien de si dangereux, que de dire librement ce qu'on pense à celuy qu'on ne cognoist point.* Mais quoy, il y a des hommes qui prennent tant de plaisir à discourir, qu'ils aiment mieux courre fortune d'estre repris, que perdre l'occasion de raconter tout ce qu'ils sçauent. Outre qu'Ennemidor ne disoit rien qui luy pust nuire, il estoit encores resolu de se retirer, & de ne voir point danser le balet, de peur que Gardenfort ou

le Duc de Meuridas ne le reconnussent, & ne luy fissent quelque déplaisir : car encores qu'il eust seruy le premier, il apprehendoit toutefois qu'il ne luy voulust du mal, à cause de la blesseure de Boittantual. Mais comme il vouloit sortir, il rencontra à la porte vne si grande foule de Gentils hommes qui entroient, qu'il fut rejezté malgré luy iusques au milieu de la salle. C'estoit Gardenfort qui venoit treuver l'Empereur, pour repeter le balet qui n'auoit esté fait que pour son sujet. Sa Majesté courut au deuant de luy, & luy dit en l'embrassant & le baisant, qu'elle auoit commandé au Duc de Cossentroc d'aduiser aux moyens d'accommoder la querelle qu'il auoit cōtre le Duc de Meuridas. Vraye-

ment, adiousta l'empereur, il m'a ameiné le nepueu du Marquis d'Argentuarre, qui a aussi bonne façon qu'hóme que ie cognoisse, ie veux que tu le voye & qu'il soit de tes amis ; car i'estime qu'il a du courage. En disant cela, il le prit par la main, & le mena vers le lieu où il auoit remarqué qu'Ennemidor auoit pris sa place ; mais ne l'y treuuant plus, il demanda au Gentil-homme avec lequel il l'auoit veu discourir ce qu'il estoit deuenue. Sire, respondit Porchanron, il faut qu'il soit encores dans la salle, parce qu'il n'a pû sortir, à cause de la presse de ceux qui sont entrez avec monsieur de Gardenfort. Là dessus on appelle tout haut le nepueu du Marquis d'Argentuarre, & crie-t-on que l'Empereur le demãde.

Ennemidor qui entend cela croit estre descouvert, & qu'on luy veut faire quelque mauuais traitement. Ceste creance le fait resoudre de s'approcher doucemēt de la porte pour se sauuer, mais les Gardes ne la luy veulent pas ouurir, parce qu'il y auoit trop de monde qui vouloit entrer. Il les presse de le laisser sortir, & eux disent qu'il faut auoir vn peu de patience qu'on ayt fait retirer ceux qui en ouurant se ietteroiēt dans la salle, & feroient que l'Empereur les gourmandroit. Au lieu de se contenter de cette responce il la prend pour vn refus, & le desespoir le mettant en colere, il fit quelque menasse à l'vn des Gardes, qui se sentant fort en ce lieu là, *comme d'ordinaire ils y sont insolens*, le repoussa rudement. In-

continent il se fit vne grande rumeur où tout le monde courut, & où plusieurs gentils-hommes se mirent du costé d'Ennemidor le voyant bien vestu, de bonne façon, & mal traité. L'Empereur demanda le sujet de ce bruit, les Gardes luy rapportent que c'est vn Gentil-homme qui a voulu par force faire ouurir la porte. Les Gentils-hommes disent au contraire, que c'est vn Archer insolent qui l'a offensé sans sujet. Sa Majesté cōmande qu'on les fasse tous deux venir. O Cieux! de combien de frayeurs Ennemidor eut son ame environnée? Neantmoins estant accoustumé de releuer son courage au milieu des grands dangers, il se presenta avec vn visage assuré remply toutefois de tant de douces mer-
ueilles,

ueilles, qu'il estoit bien difficile d'estre en colere en les regardant. *Ce sont les effets de la beauté, qui a vne puissance si grande sur les esprits humains, qu'il est impossible de hayr ce qui est beau* : aussi l'Empereur au lieu de tesmoigner du mescontentement à Ennemidor, luy demanda en riant, pourquoy il s'en vouloit aller à l'heure qu'il le faisoit appeller. Sire, respondit-il, ie n'ay point ouy que vostre Majesté m'ayt tant honoré que de me faire appeller, & n'ay voulu sortir que parce que ie me treuve mal. Comme il disoit cela, Gardenfort le regardoit attentivement, & auoit de la peine à le recognoistre, parce qu'il ne paroissoit plus de crasse sur son visage, & qu'il auoit des habits bien differents de ceux qu'il luy auoit

vûs, lors qu'il luy auoit seruy de de second. L'Empereur confiderant l'estonnement de Gardenfort, dont il tenoit la main entre les deux siennes, luy dit; Vous refusez Monsieur de Gardenfort, (ainsi parloit-il quelque-fois à luy.) I'en ay bien du sujet, respondit-il. En disant cela il tira l'Empereur à part, & luy dit. En verité, Sire, ie croy fermement que ce Gentil-homme que vostre Majesté dit estre le nepueu d'Argenruarre, est celuy-là mesme qui m'a seruy de second, qui a tué le Prince de Voltandon, & qui a mis Boittantual en l'estat où il est; En es-tu bien asseuré? repliqua l'Empereur: Tres-assuré, respódit Gardenfort: mais ie n'estime pas que nous deuions maintenant en ce lieu-cy en faire paroistre aucune

chose, tant pour ne le descouvrir,
que pour aduifer à loisir ce qu'il
faudra respondre. Cependant il
est bien à propos de luy com-
mander qu'il demeure icy, afin
que nous puissions parler à luy
apres que le balet sera dansé.
Ouy mais, respondit l'Empereur,
il prendra l'espouuâte & l'en ira:
c'est pourquoy si vous le treuuez
bon, il faut luy donner deux Ar-
chers pour le garder. L'aduis de
vostre Majesté est excellent, re-
partit Gardenfort, & en disant ce-
la il emmena l'Empereur vers En-
nemidor, à qui cette secrete con-
ference donna des soupçons &
des craintes extremes; mais ce fut
bien pis quand Gardenfort luy
parla ainsi. L'Empereur veut que
vous demeuriez icy iusques à ce
que le balet soit dansé, & que

vous n'en partiez point sans son expres cōmandement. Hola hé compagnons (adiousta-il se tournant vers les gardes) tenez-vous pres de luy, & qu'il y en ayt toujours deux qui ne le quittent point.

Après cela, l'Empereur & Gardenfort commencerent à repeter leur balet, laissant Ennemidor que tout le monde consideroit fort curieusement, & qui n'attendoit rien moins que d'estre mené prisonnier en sortant de là. L'Empereur ayant acheué de danser, monta dans le cabinet de la Duchesse de Confortliche sa tante, & emmena avec luy Gardenfort, qui dit à Ennemidor qu'il le suiuiſt. L'Imperatrice iouïoit à la premiere avec la Duchesse, la Princesse de Gonzan-

uert, & la sœur du Roy de Britambrize. Elles furent toutes estonnees de voir des Archers dans le cabinet de la Duchesse de Confortliche, parce qu'il n'y en entroit iamais : mais elles le furent encores dauantage quand elles eurent remarqué qu'ils gardoient Ennemidor, dont elles ne pouuoient assez admirer la beauté & la bonne grace. Sur toutes, la Regente & la Princesse de Britambrize sentans vne émotion extraordinaire, ne pouuoient retirer leurs regards dedessus luy, & le cōsideroient depuis la teste iusques aux pieds. Elles festoient toutes leuees quand l'empereur estoit entré, qui pour ne les destourner pas dauantage leur dit qu'il s'en alloit souper. Gardensfort l'accompagna iusques dans

sa chambre, puis s'en alla dans la
sienne où la viande estoit desia
sur la table. Il fit asseoir Ennemi-
dor vis à vis de luy, ne se pouuant
rassasier de le regarder, & quoy
que sans cesse il luy chargeast son
assiette de ce qu'on seruoit deuant
luy, Ennemidor neantmoins se
sentoit si mal traité qu'il ne pou-
uoit manger. En fin apres que les
tables furent leuees, Gardenfort
le tira dans son cabinet, où estans
tous deux seuls, il luy dit en l'em-
brassant ; Je ne me promettois
pas tant de bõ-heur, & ne croyois
pas que ma bonne fortune me
deust iamais tant fauoriser, que
de me donner moyen de seruir
celuy à qui ie suis infiniment ob-
ligé. L'Empereur estoit en vne
extreme colere contre vous, à
cause de ce que vous auez dit à

ses gardes, qu'il affectionne particulièrement, & tous ceux qui ont l'honneur d'estre ses domestiques, mais ie l'ay vn peu appaisé, & espere porter son esprit à contenter le vostre autant que vous pouuez desirer. Ennemidor resinoignoit estre hôteux de tant d'honnestes offres, & ignorer le sujet pourquoy Gardenfort les luy faisoit, craignant que ce ne fust vn appas pour le surprendre s'il s'y fioit. Gardenfort s'apperceut aussi-tost de l'inquietude de son esprit, & se doutant du soupçon qu'il auoit, l'embrassa, & luy dit: Monsieur, c'est inutilement que vous vous cachez à moy, qui vous suis trop obligé pour ne vous cognoistre pas; vous m'avez sauué la vie & l'honneur, que ie suis prest d'éployer pour vous

faire paroistre le ressentimēt que
i'en ay , vous protestant que ie
n'ay ny parent ny amy que ie de-
sire seruir de meilleur cœur que
vous. Dieu sçait combien i'ay
voulu de mal à mon frere de Boit-
tantual de ce qu'il a fait, & si vous
mesme ne l'auiez assez chastié de
son audace, & que depuis il n'en
eust fait vne assez longue peni-
tence , ayant esté plusieurs fois
tenu pour mort, ie ne voudrois
iamais le voir. Monsieur en vn
mot, ie vous prie de disposer ab-
solument de moy , & de croire
que si i'ay quelque credit aupres
de l'Empereur, vous y aurez touf-
iours toute la part qu'il vous plai-
ra. Je vous offre mes biens, ma vie
& ma fortune, que i'estimeray in-
finiment si elle me donne le mo-
yen d'acquérir vostre amitié, dōt

ie vous conjure de me fauoriser,
& de faire entierement estat de
la mienne, & de tout ce qui m'appartient. Ennemidor qui ne se
treuuoit plus en peine que de res-
pondre à tant d'honestetez. Mon-
sieur, luy dit-il en fin, avec vne
grande & humble reuerence plei-
ne de soumissions, si ie vous ay
iamais rendu quelque seruice,
i'en suis desia trop dignement re-
compensé par tant de tesmoigna-
ges de l'affection dont il vous
plaist m'honorer, & pour me
rendre digne de laquelle, i'ache-
teray volôtiers de mon sang l'oc-
casion de signaler le zele que i'ay
à vostre seruice. Comme il ache-
uoit de dire cela, on frappa à la
porte du cabinet, c'estoit Halli-
man Capitaine des gardes du
corps de l'empereur, qui dit à

Gardenfort que sa Majesté qui estoit en sa chambre depuis vne demie heure, l'enuoyoit sçauoir s'il n'estoit point empesché. Dites luy, s'il vous plaist, que ie m'en vay la treuuer, & se tournant vers Ennemidor, luy tint ce langage. Monsieur, i'accómoderay vostre affaire avec l'Empereur, laissez-m'en le soin & ne vous en mettez point en peine. D'ailleurs on travaille à terminer la querelle qui est entre Monsieur de Meuridas & moy ; mais ie vous proteste que ie n'entendray à aucun accord que vous n'y foyez compris, tant afin qu'il ne vous en puisse mesarriuer, qu'afin aussi que tout le monde cògnoisse vostre courage, & l'obligation que ie vous ay. Cependant ie vous conjure encores vne fois de m'aymer coin-

me la personne du monde qui
desire vostre amitié avec plus
d'ardeur, & vous offre la sienne
sans faintise & sans reserve quel-
conque. Monsieur, respôdit En-
nemidor, vous ne pouuez faire
eslection de personne plus reso-
luë à courre vostre fortune que
moy, qui vous seruiray fidelemēt
iusques à la mort, & ne manque-
ray iamais à ce que ie vous dois.
Leurs discours & leurs protesta-
tions d'amitié se terminerent par
de longs & reciproques embras-
semens, sur lesquels l'Empereur
les surprit. Et bien, dit sa Maje-
sté à gardenfort, ne voulez-vous
pas que nous allions nous ha-
biller pour danser nostre balet?
Ce fera quand il vous plaira, res-
pondit gardenfort, & en mon-
trant Ennemidor, dit: Sire, voila

l'homme dont ie vous ay parlé,
& qui est bien capable de seruir
vostre Majesté en de bonnes oc-
casions. Je l'aymeray pour son
merite, dit l'Empereur, & en feray
estat pour l'amour de vous. Avec
cela il sortit du cabinet, & entra
dans la chambre où toute la Cour
estoit, fors le Duc de Meuridas &
ses freres, qui n'estoient pas ve-
nus au Palais depuis la mort du
Prince de Voltandon. Garden-
fort entrât dans la chambre avec
l'Empereur, luy dit ; Sire, il n'est
plus besoin que ces gardes se tiē-
nent aupres d'Ennemidor, & sans
attendre le commandemēt de sa
Majesté, Compagnons, adioust-
il, vous n'avez plus que faire icy,
celuy que vous accompagniez
vous remercie du soin que vous
avez eu, & seroit marry que vous

prissiez dauantage de peine pour luy, dont il a la mine de se pou- uoir desormais bien passer. Il se rioit ainsi, regardant ennemidor avec vn œil ioyeux, & vne façon si gracieuse & si obligeante, que tous ceux qui virent cela en soup- çonnerent plusieurs differentes causes : Car il n'auoit pas accou- stumé d'estre si courtois que cela. Les vns croyoient qu'il falloit ne- cessairement qu'il fust son parent, comme à la verité il en auoit fait venir à la Cour vne fourmilliere, qui sembloit naistre de la terre, & qu'il esleuoit iusques au Ciel. Les autres qui auoient desia ouy dire qu'ennemidor estoit nepueu d'Argentuarre, estimoient que gardenfort le traittoit ainsi fauo- rablement pour tascher à le ma- rier avec quelqu'une de ses niep-

ces, afin de se fortifier de son alliance: Car outre que le Marquis d'Argentuarre son oncle, dont il estoit en partie heritier, estoit l'un des plus riches Seigneurs de Galatie, il auoit encores vn absolu pouuoir sur toutes les volonteze du Duc de Cossantroc, qui en biens, en amis, en parens, & en fortes places estoit infiniment puissant. Quelques autres plus malicieux, faisoient vn plus mauvais iugement que cela des sourris dont gardenfort caressoit Ennemidor, de qui ne pouuans voir la ieunesse & la beauté sans admiration, tenoient pour suspects les yeux de tous les autres qui le regardoient. Ma plume ne feroit pas si libre sur ce sujet, si les discours qui s'en firent ne l'auoient esté beaucoup plus, quoy que

neantmoins si fort esloignez de la verité, que le mensonge ne l'est pas davantage. Car outre que gardenfort n'estoit nullemēt enclin aux vices, dōt l'horreur ne se doit expier que par le feu, Ennemidor portoit encore vne haine si extreme aux caresses que la nature n'approuue point, que si quelqu'un luy en eust fait, ils les eust rejettees avec toute sorte de colere & de mespris. *Mais quoy, le iugement des hommes est si temeraire, l'enuie si puissante, & la mēdisance si commune, que les plus gens de bien ne sont pas exempts de la calomnie, & d'ordinaire il y en a qu'on soupçonne de quelque crime dont ils sont entiere-ment innocens; ainsi que gardenfort qui contre toute sorte de verité estoit tenu à la Cour tellement perdu de l'amour qui viole*

les loix de la nature , qu'un ieune homme ne pouuoit sans scandale estre fauorisé de luy.

L'Imperatrice voyant qu'il estoit pres de minuiet , en enuoya aduertir l'Empereur , qui aussitost s'habilla pour danser son ballet, que ie ne représenteray point icy , parce que les particularitez en ayant esté plusieurs fois imprimées , le discours en seroit maintenant importun. Il suffit seulement de dire que c'estoit celuy des enuieux , qui comme des vents impetueux voulans exciter vne furieuse tempeste , & couvrir de nuages vn grand Soleil que gardenfort representoit, furent tous dissipés l'un apres l'autre par les rayons de la grande lumiere qu'il iettoit. L'Empereur puis-apres tenoit vne corne
d'abon-

d'abondance en sa main, dont il
espéroit vne infinité d'excellen-
tes fleurs & de confitures sur tous
ceux qu'il vouloit particuliere-
ment gratifier, entre lesquels En-
nemidor ne fust pas oublié. Apres
que le balet fut finy, qui sem-
bloit n'estre fait que pour hono-
rer Gardenfort, on se mit à dan-
ser des courantes. L'Empereur
ayant osté son masque, commen-
ça la premiere avec l'Imperatri-
ce. Gardenfort & la Duchesse de
Confortliche danserēt apres, puis
on ne garda plus d'ordre & dansa
qui voulut. Ennemidor qui estoit
infiniment attentif à considerer
les Dames, & la Duchesse de Gon-
zanuert sur toutes, qui luy sembla
la plus belle qu'il eust iamais
veüe, fut estonné qu'une ieune
Damoiselle qui partit d'aupres

d'elle le vint prendre pour danser. Il osta son espee & son manteau, que tous ceux qui estoient aupres de luy s'offroient à garder, voyans que l'Empereur luy faisoit bonne chere: *Car qui est-ce qui ne court point à la faueur ?* Mais ayant tout laissé entre les mains d'un ieune Gentil-homme, il suivit celle qui l'estoit venu chercher, & fit de grandes reuerences à l'Imperatrice, deuant laquelle il falloit qu'il passast. C'estoit elle qui par la persuation de la Duchesse de Confortliche, & des autres Dames qui estoient aupres d'elle, l'auoit enuoyé engager à la danse, ayant toutes un impatient desir de l'y voir, & de cognoistre s'il s'en acquitteroit aussi bien que sa bonne façon le faisoit esperer. Auant que cōmen-

ter, il fit à l'Empereur vne reuerence infiniment humble, puis se tournant avec la meilleure grace qu'il est possible du costé de l'Imperatrice, il luy en fit aussi vne autre, & apres s'estre acquitté de celle qu'il deuoit à Callionne, c'est le nom de la Damoiselle avec qui il dança, il baïsa la main pour luy prendre la sienne: Mais il treuua qu'elle y auoit vn billet, qu'elle talchoit doucemēt de luy faire prendre, ce qu'il fit en dansant, lors qu'il changea de main, sans que personne s'apperceut de ce message conduit avec tant d'adresse & de subtilité. Ayant dansé il fit encores vne autrefois les mesmes reuerences qu'il auoit desia faites, & accompagna iusques en la place Callionne, à qu'il dit en la laissant. Je vous suis si

fort obligé ; Mademoiselle , de l'honneur que vous m'auez fait, que ie ne craindray iamais de mourir pour vostre seruice. En se baissant fort bas elle luy respondit seulement des yeux, qui pleins d'un modeste soufrire sembloient sans parler, luy dire beaucoup de choses. Auant que se retirer en sa place, il mena danser vne ieune Damoiselle fort belle & fort gentille ; à qu'il demanda si elle scauoit vne courante nouuelle qu'on estimoit infiniment à la Cour, & qui se nommoit l'abe-brusque. Je ne la scay pas bien, respondit Bellinde, c'est le nom de la Damoiselle : mais ie ne laisseray pas de la danser si vous l'auez agreable, car ie croy qu'il est impossible de faillir avec vous. Ouy assuremēt, repartit-il, quād

i'auray pour guide vne si belle fille que vous, qui remplissez d'amour tous ceux qui vous regardent. En disant cela, il la mena au milieu de la salle, où apres auoir finy la courante de l'abebrusque, il l'esleua entre ses bras pour la faire sauter, ainsi qu'on a accoustumé de faire, & luy arracha si subtilement vn baiser; quelque douce resistance qu'elle y apportast, qu'à peine s'apperceut-elle de l'auoir laissé prendre. Toute la compagnie treuua cette action de si bonne grace, qu'il n'y eut personne qui ne s'en esclatast de rire, & principalement quand Bellinde en fit paroistre vn si grand estonnement, qu'on recognut bien qu'elle n'auoit presque pas la force de s'en mettre en colere. Ceux qui n'auoient

pas remarqué cela, pour s'estre arrestez à regarder trop curieusement, lors qu'elle passoit la capriole, combien elle auoit la iambe bien faite, & estoit mignardement chaussée, furent infiniment faschez de n'auoir pas vû ce qui faisoit rire les autres, dont ils enuierēt le contentemēt quand ils en sceurent le sujet. Parmi le grand bruit qui se fit alors, Ennemidor dit à Bellinde; Vous voyez bien Mademoiselle, que ie n'ay pas mal fait, puisque tout le monde qui est icy le treuue si bon. Le voy bien, respondit-elle en riant, que vous le treuuez meilleur que personne; mais vne autrefois ie me donneray mieux garde de vous, qui sçauiez si bien prendre vos aduantages, & desrober ce que vous croyez qu'on

ne vous accorderoit pas. Je n'ay rien desrobé, repartit-il, puisque ie n'ay rien pris qu'en public. Il est vray, repliqua-t'elle, vous n'avez rien pris en public, que vous ne voulussiez bien encores prendre en particulier. Ce ne seroit pas, adiousta-il, pour aucun mal que ie vous vueille; Non, luy dit-elle, ce seroit pour le bien que vous voulez à vous-mesme: Il luy vouloit encores dire quelque chose, mais elle luy faisant vne grande reuerence s'en alla prendre vn autre Gentil-homme pour danser, & Ennemidor retourna en sa place, où il ne fut pas plustost arriué, que Philanton luy dit, ainsi s'appelloit celuy qui gardoit son espee & son manteau: Vrayement, Monsieur, vous vous estes adressé à la plus belle, la plus

sage & la plus aduisee Damoiselle qui soit dans le bal. La cognoissez-vous ? luy demanda Ennemidor, le la cognois particulièrement, respondit Philanton, pour auoir esté long-temps nourry avec elle. Aussi-tost Ennemidor fut espris d'un violent desir de sçauoir qui elle estoit, estant poussé à cette curiosité là par vne extraordinaire émotion qu'il auoit sentie en dansant avec elle, c'est pourquoy il conjura Philanton de luy vouloir dire ce qu'il en sçauoit. Mais comme il acheuoit de luy faire cette priere, la Princesse de Britambrize le prit pour danser, & depuis il fut si souuent diuertý par vne infinité d'autres pour ce mesme subyet, qu'il n'eut seulement pas loisir de prendre son espee, & de met-

tre son manteau sur ses espaules; de sorte qu'on eust creu que le bal n'estoit fait que pour la consideration, & que c'estoit vne défaveur aux Dames qui ne dansoient point avec luy.

En fin le iour commençant desia à paroistre, & l'Empereur & sa femme estās accablez de sommeil, sa Majesté donna congé à la compagnie qui se separa incontinent apres, & chacun se retira chez soy admirant la beauté, la bonne grace, la gentillesse, & les autres perfections d'Ennemidor, qui impatient de sçauoir qui estoit Bellinde, pria encores de rechef Philanton de le vouloir tirer de cette peine. Mais Philanton luy dit que l'histoire en estoit trop longue, & qu'il en falloit remettre le recit à vne autre occa-

sion: Aussi n'auoit-il garde de s'ar-
rester là dauantage, car Aminte
luy auoit promis de se desrober
de tous ses gens, fors de sa Da-
moiselle suiuiante, pour aller avec
luy dans son logis, qui estoit à
deux pas delà, attendre que l'em-
barras des carrosses fust passé, ce
qui ne pouuoit estre d'une bon-
ne heure. Ils se seruirent de ce
temps là pour contenter leurs a-
moureux desirs, ainsi que firent
plusieurs autres; car les balets, la
comédie, & toutes semblables assem-
blees qui se font en Galatie donnent
toufiours assez de commodité pour
cela, & de vray personne n'en re-
uiuent meilleure, parce que les
yeux, les oreilles & les desirs y
perdent toufiours beaucoup de
leur pureté, & Iupiter sçait, ô
Cieux pouuez-vous sçauoir cela,

& le souffrir ? combien d'adulteres, d'incestes, de sacrileges, & d'autres plus horribles meschancetez s'y commettent impunément. Philanton & Aminte apres auoir enyuré leurs ames des douceurs d'amour, s'en reuinrēt treuuer les gens d'Aminthe qui aydoient à son Carrossier à se desembarasser, & comme s'ils ne se fussent rencontrez qu'à l'heure mesme par hazard, ils se separent l'un de l'autre. Aminthe estoit femme de Sotincourt, qui auoit vne des principales charges qui fust parmy les Questeurs de Sirapis, qu'il exerça peu de tēps, parce que son mauuais genie l'ayant vn iour fait descendre en sa caue, il y treuua Aminthe entre les bras de Philanton, dont il mourut incontinent apres d'en-

nuys. Aminthe du depuis ne pouvant plus rester dans le monde avec honneur, s'est entièrement consacrée au service de Diane, avec la resolution d'y passer le reste de ses iours. De sorte qu'ayant donné ordre à ses affaires, & estant presté de prédre le voile, elle escriuit cette lettre à Philanton pour luy dire vn eternal adieu.

LETTRE D'AMINTHE
à Philanton.

EN fin le Ciel ne pouvant plus souffrir mon aveuglement, m'a desbillé les yeux pour me faire voir l'horreur dont i'ay souillé mon ame, où il n'y auoit rien de gravé que les viues marques de vostre merite. Le

grand Dieu qui m'a créé les a voulu effacer, pour y empreindre celles de son amour, qui comme le plus puissant a rompu la violence de la passion que j'auois pour vous, dont ie preferois l'amitié à toute sorte de contentemens. Je vous renuoye vostre peinture qui me donnoit tous les matins le bon iour de vostre part, & qui me representoit si naïuement l'obiet que j'adorois, au preiudice de mon salut, & du respect que ie dois à sa diuine Majesté. Reprenez ces bagues où nos chiffres estoient entrelassez en tant de mignardes façons; ce sont des liens trop foibles pour retenir plus long-temps mon cœur en vne aussi dangereuse que douce captiuité. Receuez les protestations de vostre seruitude que vous auez escrites de vostre sang, afin que les caracteres estans si precieux, l'assurance en fust inuiolable. Consacrez-les

aux flammes, & que les vostres s'amortissent aussi-tost que celles cy auront consommé vne si prophane escription. Mon bon Genie m'inspire de m'esloigner, Philanton, & de combattre par l'absence les forces d'amour. Il me conseille de rompre les nœuds de nos folles intelligences, & de vous coniurer d'en renoüer de nouvelles, qui separans nos corps, vnissent nos desirs en la poursuite des felicitez eternelles. Je vous absous du serment de vostre fidelité, aussi bien ne puis-je plus le receuoir sans estre moy-mesme infidelle. Perdons pour iamais la memoire des occasions qui rendoient les heures de nostre absence insupportables, & celles de nos visites trop courtes. Ne vous souuenez plus de mes folies, oubliez les transports de ma passion, ne craignez plus ma ialousie, ne pensez plus en mes impatiences : cessez de

vous contraindre pour moy, que le soin de plaire à mes yeux ne desrobe point aux vostres le repos : condamnez mes actions passées, loüez le dessein que ie prends, taschez de l'imiter, & ne reservez plus rien du souuenir que vous pourriez auoir de moy, que ce qui vous peut porter à suiure mon exemple. Adieu pour iamais, Philanton, les murailles d'un Cloistre resserreront bientôt celle qui auoit asseruy vostre liberté. Je change les liens qui vous tenoiēt attaché à mes volontez, avec les cordes dont Diane ceint celles qui se consacrent à son seruice. Vos devoirs amoureux me feront porter vne chemise de poil, vos embrassemens m'obligeront à embrasser de tres-austeres penitences, & au lieu de contenter nos desirs communs, ie m'efforceray incessamment de me despoüiller de ma propre volonté, & faire violence sur mes

affections, conuertissant ma ioye en de continuelles larmes. N'attribuez pas ce changement de ma vie à quelque legereté d'esprit, dont celles de mon sexe sont bien souuent accusees. Je ne viole point la promesse que ie vous ay faite, que mes flammes estinceleroient iusques dans les cendres du tombeau, puis qu'elles s'amortissent seulement apres que ie suis morte au monde.

Il y auoit desia douze ou quinze iours que Philanton n'auoit pû auoir le moyen de voir Aminthe quand il receut sa lettre, dont la lecture luy confirma l'opinion qu'il auoit conceuë, qu'il y auoit du changement en son amour. Ceux qui ont passionnément aimé quelque beauté tres-exquise, & qui en ont perdu la douce possession, peuuent maintenāt, ayant
faite

fait l'experience d'une semblable
peine, se representer aysément
celle de Philanton. Il s'abandon-
na si fort à la douleur qu'il ne pût
parler; mais enfin sa langue apres
auoir esté quelque temps impuil-
lante reprit ses forces, & se rendât
capable d'exprimer son ennuy, luy
donna moyen de remplir l'air de
ses plaintes. O leger esprit, s'es-
cria t'il, est-il possible qu'apres tât
de sermens solemnels que vous
m'avez faits de ne vouloir iamais
que ce que ie voudrois, vous de-
siriez maintenant me donner la
mort en me priuant des douceurs
de vostre compagnie qui ren-
doient ma vie bien-heureuse?
Vous m'auiez ouuert vostre cœur
afin que i'y visse toutes vos pen-
sées, où est-ce que vous avez fait
naistre celles - cy sans que ie les

aye pû voir ? Quel demon en-
uieux de mon bien vous a pû inf-
pirer des conseils si secrets, si con-
traires à vostre humeur, & tant es-
loignez de la raison ? Haïr ce qui
vous ayme, fuyr les douceurs de
la vie, quitter ses parens, s'esloi-
gner de ses amis, trauailler son
corps, gehenner son esprit, forcer
sa volonté, qui est la chose du
monde que Iupiter nous a don-
nee la plus libre, chercher la soli-
tude, & faire la guerre à la nature,
qui vous a donné l'estre, & que
nous deuons suiure en toutes nos
actions comme vne guide, qui ne
peut faillir, ne sont-ce pas des ef-
fets d'une folie enragee ? En quels
termes & en quel lieu est-ce que
Iupiter a cōmandé qu'on se gou-
uerne ainsi ? Au contraire, il a dit
qu'il vouloit que nostre volonté

fust entierement libre : & neant-
moins vous ne serez pas plustost
au seruice de Diane, qu'il faudra
que vous soufmettiez àbsolumēt
tous vos desirs à la discretion de
quelque impertinent superieur.
Si Iupiter ne veut auoir aucune
puissance sur nos volontez, est-il
raisonnable qu'un ignorant au-
gure s'en rende impudemment
& tyranniquemēt maistre ? Non,
non, tous ses déguisemens d'ha-
bits, toutes ses fingeries, & toutes
ses apparéces d'austerité ne nous
rendent point plus gens de bien,
ce ne sont qu'illusions pour trô-
per les foibles esprits.

L'excez de son affliction luy
faisoit dire toutes ses extraua-
gances contre ce qu'il en croyoit;
car en effect il estoit l'un de ceux
qui loüent dauantage le zele des

ames deuotes qui se consacrent
au seruice des Dieu , ayant esté
luy-mesme plusieurs fois atteint
d'une sainte ardeur d'y passer le
reste de ses iours. Toutefois l'i-
mage d'Aminthe reuenant enco-
res deuant ses yeux, luy renouue-
loit son ennuy , & luy remplissoit
l'ame de regrets, de ne posseder
plus celle qui possedoit tant de
graces, de sorte qu'il recōmença
encores à se plaindre d'elle, di-
sant : Helas ! ie ne vous verray
donques plus, cher objet de mon
ame ! Est-il possible que prenant
vne resolution si cruelle , vous
ayez le courage de recompenser
mon amour par tant d'ingratitu-
des ? Que n'ay-je point fait pour
acquérir vostre amitié ? Quels
soins n'ay-je point eu de vous cō-
plaître ? De quelles inquietudes

n'ay-je point eu l'esprit agité pour la moindre de vos jaloufies ? Vn seul de vos regards me faisoit naistre vne infinité de diuerfes pen-
sees , & la moindre crainte de vous auoir esté desagreable en quelqu'une de mes actions, me faisoit languir plusieurs iours de regrets. O Cieux, combien i'ay passé de nuicts sans dormir & sans aucun repos , pour la moindre froideur que ie remarquois en vous ? Que de ioye ie receuois de la plus petite de vos caresses, & que de desespoirs saifissent maintenant mon ame pour vne esperance perduë. Mais quoy, veux-je arrester le cours des destinees, qui ne se peut changer ? Veux-je obstinement m'opposer aux Decrets diuins ? S'il a esté resolu dans le Ciel qu'Aminthe serue les

Dieux sur la terre, c'est en vain que ie tasche d'empescher son dessein; Au contraire, i'y dois cōsenter, puisque ma contradiction ne le peut retarder, & que ie ne puis le trauerser sans me rendre coupable d'autant de sacrileges, qu'il est plein de saincts desirs. Car quel crime est-ce de vouloir retenir au seruice des hommes, ceux dont les Dieux se veulent seruir? Ie serois injuste, ô Aminthe, d'entreprendre de vous destourner d'une si sainte resolution, qui vous esloignāt des creatures mortelles, vous approche du Dieu immortel. Ie louë ce changement qui vous est si aduantageux. *Les inconstances qui apportent de la gloire à celuy qui les commet, doiuent estre mises au nombre des vertus, & l'on est blasmable de n'embrasser pas*

une occasion honorable & aduantageuse quand elle se presente.

Ainsi parloit Philanton, apres auoir surmonté l'effort de ses premiers mouuemés, & que le grand Iupiter, qui dans vn instant amo- lit les cœurs les plus durs, eut en- flâmé le sien de son amour pour le deliurer des gehennes amou- reuses. Ce n'est plus cet Amant dont les larmes faisoient cognoi- stre sa passion, ce n'est plus vn es- claué soupirant dans sa seruitu- de, c'est vn homme qui a recou- uré sa liberté ; *Puis qu'on peut esti- mer libre celuy qui se dégage d'avec le monde, pour s'asservir du tout à Dieu.* Estant donques espris d'une diui- ne ardeur, & resolu de tirer le cō- mencemēt de son bon-heur de la fin de son amour, il luy fit cette responce.

LETTRE DE PHILANTON
à Aminthe.

C'Est vn miracle de ce que ie ne suis point mort en lisant vostre lettre, car ô Cieux, de combien d'ennuys n'a t'elle point rempli mon ame? Autant de paroles ont esté autant de pointes d'afflictions qui m'ont percé le cœur. Chere Aminthe, croyez que iamais beauté n'a esté si passionnément idolatree que la vostre, puisque perdant l'esperance de vous voir dans le monde, ie pers entierement le desir d'y viure dauantage. L'Amour m'y retenoit & l'Amour m'en retire, de ses contraires effects vous avez fourny de differentes causes. Qui eust iamais pû croire que celle qui me tenoit attaché à la terre, eust en fin en-

trepris de me porter dans le Ciel. Aminthe de là vous pouvez voir combien mes affections estoient estroitement liees aux vostres. Tant que vous auez pris plaisir de me laisser adorer les merueilles dont vous estes pleine, ie n'ay point cherché ailleurs d'autre ioye, & si tost que vous prenez la resolution de les cacher à mes yeux, ie suis prest de recevoir vn bandeau au devant, & de me priuer d'une lumiere que ie cherissois beaucoup plus que celle du iour. Ah ! flammes qui brusliez mon cœur, Aminthe vous allumoit & Aminthe vous estaint. Il est vray, belle Penitente, l'amoureux Philanton change sa passion avec vne sainte amitié, & comme vous fustes le fanal qui luy seruiez de guide dans la mer orageuse de l'Amour, vous serez désormais l'Astre qui la conduirez au Ciel où elle doit aspirer. Vous m'auez

osté le verre peint qui me faisoit voir les choses d'une autre couleur qu'elles n'estoient. L'image de vos beautéz, qu'on ne peut regarder sans admiration, est bien encores presente à mes yeux. Il me semble ouïr vostre belle voix qui dérobe les ames par les oreilles, & ie me represente sans cesse tant de charmes dont vous vous serviez pour captiver les cœurs: Mais par le moyen de tant de meruilles, qui vous auoient acquis un Empire sur toutes mes affections, ie découure l'esclat de la dignité de celuy de qui vous les tenez, & m'en sers comme de degrez pour esleuer mon esprit en la consideration de son excellence, admirant l'ouurier par le mérite de ses œuvres. Vous estes pourueüe, ô Aminthe, de tous les traits d'une admirable beauté, & celuy qui ne confesse cette verité tesmoigne qu'il est privé de iuge-

ment : Mais toutes ces faueurs dont le Ciel vous a gratifiée seroient d'autant d'hôteuses reproches, qu'on vous feroit infailliblement vn iour si vous en abusiez, & si vous ne vous en seruiiez pas pour recognoistre la bonté & la puissance de celuy à qui vous en devez rendre compte. Les roses se fanissent en peu d'heure, & les espines qui les ont escloses se maintiennent longtemps : Ainsi la fleur de la beauté se perd incontinant, laissant de poignans desplaisirs à ceux qui en ont peruertiy l'usage. Nostre vie s'enfuit comme l'eau qui coule sous vn Pont, & nos iours passent comme vn esclair ; La mort cependant pleine d'effroy nous vient saisir sans ouïr nos plaintes, & sans auoir aucun esgard à la plus parfaite beauté du monde. Poursuiuez doncques, ô Aminthe, vostre sainte entreprise, qui vous promet vne heu-

reuse fin, & assurez-vous que Philanton vous accompagnera en l'austerité de vostre dessein, puis qu'il n'en a jamais eu d'autre que de vous complaire.

Philanton finissant sa lettre, mit fin à son affection, & suiuant l'exemple d'Aminthe entreprit le voyage de sa conuersion, qui le porta au bout de huit ou dix iours dans la compagnie des Prestres de la deesse Isis, qui demeurent dans les deserts de la Roche celeste, où détremplant l'aigreur de sa penitence dans les douceurs de la solitude, il brusle de l'amour diuin.

Fin du premier Livre du Romant Satyrique.



LE ROMANT SATYRIQUE.


LIVRE SECON D.

A PRES qu'Ennemidor se fut retiré dans sa chambre au logis du Marquis d'Argétuarre, sans avoir pû sçavoir de Philanton qui estoit Bellinde, pour laquelle il sentoit en son cœur d'estranges émotions, il se ressouvint du billet que Callionne luy avoit mis dans la main, & le tira aussi-tost de sa pochette où il l'avoit soigneusement ferré. Voyant qu'il estoit sans aucune adresse, &

qu'il n'y auoit rien d'escrit au dessus, il creut que celle qui le luy auoit donné, l'auoit pris pour vn autre. Il n'estoit pas encores aduerty, que les amoureux ont cette coustume en Galatie d'escire en leurs lettres amoureuses, qu'ils appellent des poulets, quelques chiffres qui seruent d'adresse & de souscription, afin que si elles sont surprises par quelqu'un, il ne puisse non plus cognoistre celuy qui les escrit, que celle à qui elles sont escrites. Outre cette raison, y en a encores vne autre qui les conuie à vser de ce stile, c'est afin de desaduoir les extrauagances qu'ils y couchent d'ordinaire, si on leur en veut faire quelque reproche. Et certes, ie croy qu'il se treuuerait fort peu de femmes, qui voulussent escire, si elles ne

se fioient en cet artifice, par lequel elles se reseruent le moyen de démentir leur main & la bouche des Amants qui les veulent trahir, en faisant voir à plusieurs les follies qu'elles leur ont escrites en particulier, & qu'elles ne peuuent recognoistre sans rougir. Ennemidor auant que lire son billet, ne se pouuoit imaginer qui le luy auoit escrit, car il ne cognoissoit point Callionne qui le luy auoit apporté, & qui estoit partie d'aupres de la Duchesse de Gonzanuert, dont il admiroit la parfaite beauté. En fin combattu de diuerses pensees, & vaincu par son impatience, il coupa la soye noire cachetee avec de la cire de la mesme couleur, où il y auoit des doubles M. & des doubles A. entrelassez, & vne couronne au

dessus qui tesmoignoit la grandeur de celle qui luy escriuoit ce qui s'ensuit.

A Quoy pensez-vous m'obliger mon Page ? Je n'ay point eu de vos nouvelles depuis que ie vous commenday, en vous laissant partir d'aupres de moy, de m'en enuoyer le lendemain, ou de m'en venir dire vous-mesmes. Je ne sçay d'où cela procede, si ce n'est qu'apres que vous sçauiez qui ie suis, vous auez honte de vous treuuer deuant moy, ou de m'escrire de la mesme main qu'on m'a asseuree que vous auez employee cōtre mes freres. Mon Page, ie ne veux pas que cette crainte vous empesche de me voir. Asseurez-vous que i'admire plus vostre courage, que ie ne vous en veux de mal, ne m'ayant point offensee, puisque vous ne me cognoissiez nō plus que ceux pour qui  contre

contre qui vous mettiez vostre vie au hazard. Et d'ailleurs, il est vray que ie vous ayme plus que tout ce qui est au monde. Ne manquez doncques pas aussi-tost apres que vous aurez leu ces lignes à me venir treuver par la mesme porte que vous estes entre & sorty de ceans. Sur tout ne vous engagez pas tant à la faueur que vous y demeuriez plus attaché qu'à ce que vous me deuez, dont ie desire estre promptement esclaircie; car si ce soupçon estoit vray ie ne vous pourrois aymer.

Ennemidor. lisant cette lettre, reconnut incontînét que la Reyne de Regnaut-chanfort la luy auoit escrite; car outre qu'elle luy auoit promis qu'elle l'appelleroit son Page, tant qu'il seroit sans barbe, elle luy parloit encores en termes si clairs, qu'il ne pouuoit

plus ignorer qui c'estoit. Mais il ne pouuoit comprédre d'où Cal-lionne le cognoissoit , & pour-quoy elle s'estoit seruie d'elle pour luy faire entendre sa vo-lonté. Avec tout ce qu'il s'en pou-uoit imaginer , il trauailloit en-cores son esprit d'une infinité d'irresolutions : car il ne sçauoit s'il deuoit retourner la voir, crai-gnant que quelque protestation d'amitié qu'elle luy fist, elle ne luy voulust beaucoup de mal à cause du malheur de ses freres. D'ailleurs il preuoyoit de grands dangers en la continuation de leurs amoureuses intelligences, dont il apprehendoit plus que tout l'insupportable subjection ; parce que desirant faire la fortu-ne qu'il esperoit d'esleuer par la faueur de Gardenfort , elle luy

deffendoit de s'y attacher : En fin l'amour qui veut tousiours estre le maistre , & ne peut souffrir qu'on luy fasse resistance , luy fit prendre la resolution d'obeir à celle qu'il auoit entierement assubjetie. Il part donques de chez son oncle si tost que la nuict fut venuë , & alla voir celle de qui il auoit desia receu tant de graces & de faueurs, que le seul souuenir qu'il en auoit le remplissoit de l'impatience d'estre aupres d'elle. Il se rendit à la porte du iardin par où il auoit entré la premiere fois : mais apres y auoir frappé plusieurs coups, personne ne la luy ouurit ; de sorte qu'y ayant attendu plus d'une grosse heure, il estoit sur le poinct de s'en retourner à deiny mort de froid, quand il entendit marcher

quelqu'un qui venoit venoit vers luy. *Ah ! Amans, à quelles peines, à quels travaux, & à quels dangers ne vous exposez-vous point pour un malheureux plaisir, qui vous eschape aussi tost que vous cōmencez à le goustier ?* Il reconnut incontinent la voix de Rozane, qui demanda qui est là ; C'est vostre seruiteur Ennemidor, respondit-il, qui attend icy vostre secours il y a plus de deux heures. Elle le fit entrer, puis dès que la porte fut refermée il la baïsa, & luy dit, *sçachant combien il faut flatter les servantes pour l'amour des maistresses.* O Cieux ! que pourray-je i jamais faire pour me reuancher de tant d'obligations que ie vous ay ? Rozane qui se-
stimoit plus heureuse d'estre ainsi caressée d'Ennemidor, que si un autre luy eust donné de l'ar-

gent, luy respondit: Monsieur, ie suis bien marrie de ne vous pou-
voir pas rendre tous les serui-
ces que ie vous ay vouez : mais
si mes desirs auoient lieu , les vo-
stres sans doute seroient accom-
plis, & si mon pouuoir esgaloit
mon intention , vous auriez ie
m'asseure dequoy estre content:
Car quant à ma volonté, elle des-
pendra tousiours du tout de vos
commandemens. Ma sœur Cal-
lionne m'a dit qu'elle vous a dō-
né, en dansant avec vous, la let-
tre de la Reyne ma maistresse. Il
est vray, respondit Ennemidor, &
iamais ie ne fus tant estōné d'au-
cune autre chose que de celle-là:
car ie ne pouuois comprendre
d'où vostre sœur me cognoissoit,
ny qui luy auoit dōné cette com-
mission. Monsieur, repliqua Ro-

zane , representez vous , si vous plaist , que la Duchesse de Conforliche , la Princesse de Britambrize , & toutes les autres Dames qui vous virent chez l'Empereur , vous treuverent de si bonne grace & de si bonne façon , qu'elles brusloient d'enuie de vous voir danser . Voyez cōbien vous estes heureux , de plaire ainsi aux yeux de tant de grandes Princeses . Ayant eu congé de voir le baler , ie m'y en allay avec ma sœur , qui est aupres de la Duchesse de Gonzanuert , sœur de la Reyne ma maistresse , laquelle pour tesmoigner son ennuy n'a point voulu sortir de sa chambre depuis la mort du Prince de Voltandon , dont ses freres l'accusent d'estre coupable . La Duchesse de Conforliche voyant donques qu'un

Gentil-homme estoit venu prier ma sœur pour danser, luy commanda de vous prendre puis-apres. Je l'en eusse price, quand elle n'eust point receu ce commandement, afin de vous mettre entre les mains le billet qu'elle vous donna, & que ie luy auois defia dit que la Reyne vous escriuoit. Mais ie demeure trop longtemps à la retourner treuver, allons nous y en promptement, elle est toute seule. Ah! ma chere amie, repartit Ennemidor, i'ay peur qu'elle me vueille beaucoup de mal, de ce qui s'est passé entre Messieurs ses freres & moy. Non, non, ne craignez point, luy dit Rozane, *l'amour est vn puissant mediateur de paix, il ne souffre point de haine entre ccux qui luy obeissent*, assurez-vous que la

Reyne vous porte en ses yeux, & qu'elle souffriroit autant d'estre priuee de la lumiere du iour que de vostre amitié; ne voyant plus riẽ qui luy soit agreable que vous.

Avec ces paroles ils arriuerent à la porte de la chambre de la Reyne, où Rozane entra la premiere tenant Ennemidor par la main, & disant. Madame, voicy vn prisonnier que i'amene à vostre Majesté, qui rait derniere-mẽt au bal, dõt il emporta le prix, la liberte de toutes les Dames qui le regardoient, leur arrachant le cœur par les yeux sans leur faire mal. Ennemidor s'approcha au mesme temps de la Reyne, & se baissant fort bas, baïsa le bout de sa robe. La Reyne qui ne l'auoit point encores veu si bien paré, le treuua beaucoup plus beau & de

meilleure grace qu'elle n'auoit point encores fait. *Et qui doute que les habits, dont l'estoffe & la façon sont d'un prix excessif, n'adiouſtent beaucoup de lustre & d'esclat aux avantages qu'on a receu de la nature?* Vrayement, dit la Reyne à Ennemidor en le cōsiderant, ie m'estimeray infiniment puissante si i'ay assez de force pour retenir captif celuy à qui rien ne peut resister. Madame, respondit Ennemidor, cela ne se peut mieux dire de personne que de vostre Majesté, dont les traits sont tellement inéuitables, que ceux qui en sont atteints, se sentent plustost vaincus que frappez. Comme il acheuoit de dire cela, on ouit du bruit à la porte. C'estoit la Duchesse de Gonzanuert qui venoit voir sa sœur qu'elle surprit

presque avec Ennemidor, qui n'eut le loisir que de se cacher dans le cabinet, où on entroit par la ruelle du liect. La Reyne recueillant ses esprits composa de sorte l'air de son visage, qu'au lieu de la ioye qui y estoit empreinte quād Ennemidor entra, on n'y pouuoit plus remarquer que les signes d'un extreme ennuy. *Qui n'admira les artifices d'un esprit dissimulé, & principalement des femmes espries d'amour ? Leur front, leurs yeux & leur bouche mentent d'ordinaire, & n'y ayant rien en quoy on se puisse asseurer en elles. Qui est l'homme de bon iugemēt à qui toutes leurs actions ne seront point suspectes ? La Duchesse de Conforliche craignant que la melancolie, qui bourrelle les ames & tue les corps, estant la plus dangereuse peste dont nostre vie*

puisse estre atteinte, ne fit tomber en quelque grand & irreparable accident de maladie la Reyne de Regnaut-chanfort, luy dit. Certes ma sœur, vous prenez les afflictions trop à cœur, à quoy seruēt tous ces ennuys qui consomment vostre santé, & engendrent en l'esprit de tout le monde vne veritable opinion de la foiblesse du vostre ? Les malheurs qui ne peuvent estre euités, ne doiuent point estre pleurez, & aux maux où il n'y a aucun remede, il n'y en faut point chercher. Nous auons fait vne grande perte, mais nous ne la repare-rons pas par nos larmes, que la raison doit essuyer, & nous donner la consolation que le temps apporte aux ames basses, qui n'ont aucune impression de la vertu. Souuenez-vous que s'abandonner

aux afflictions , c'est en attirer de nouvelles , & les meriter en les multipliant. L'Imperatrice vous vouloit venir voir, mais ie l'en ay doucement diuertie pour empêcher le mespris qu'elle feroit de vous , si elle n'y voyoit le courage & la constance qui recommandent ceux de nostre qualité par-dessus les autres. Elle presse l'Empereur d'accommoder le différend qui est entre nos freres & Gardenfort, & croy qu'il sera terminé à nostre contentement, ainsi qu'elle me fait esperer , si tost qu'on aura treuvé le nepueud'Argentuarre , qui se battit contre mô frere de Voltandon, & qu'on veut comprendre en cet accord, afin de ne laisser aucun sujet de broüillerie à l'aduenir. L'Empereur a desia commandé au Duc

de Cossentroc de trauailler à cette affaire, & d'aduifer aux moyens qu'il faut suiure pour en sortir. Vous sçauuez les grandes protestations que cet homme là fait tous les iours au Duc de Meuridas, qu'il est son seruiteur & de toute nostre maison: Mais quoy, c'est vn esprit si plein d'artifices & de dissimulation, & qui est si peu religieux de sa foy & de ses paroles, qu'il ne fait aucune difficulté de les violer pour le moindre aduantage qu'il y treuve, *estant tousiours beaucoup moins du party qu'il feint d'embrasser, que de celui contre lequel il s'est déclaré.* D'ailleurs, il se laisse tellement gouverner par le Marquis d'Argentuarre, qui est interessé en cette querelle à cause de son nepueu, & se rend encores outre cela si

fort esclave de la faueur, que ie ne doute point que si l'affaire dépendoit absolument de luy, elle ne se passast à nostre desadvantage.

La Reyne de Regnaut-chaufort tesmoignoit estre bien attentive au discours de sa sœur, quoy que toutes ses pensées fussent dans son cabinet avec Ennemidor : Et pour avoir plustost moyen d'y aller elle-mesme luy tenir compagnie, supportât avec vne extreme impatience celle de la Duchesse de Gonzanuert, elle luy dit que la teste luy faisoit mal, qu'il luy estoit impossible d'estre ioyeuse, & de pouuoir supporter la douleur qu'elle sentoit sans se mettre au liect. En disant cela, elle se plaignoit avec vne voix languissante, qu'elle accompagnoit

si bien de l'action d'une personne malade, qu'il estoit impossible de croire que sa douleur fust legere. En Galatie ceux qui sont de grande qualité, & que l'experience acquise par vn long vsage des affaires du monde a remply d'artifices, ne manquent iamais de feindre quelque incómodité en leur santé, qu'ils appellent entr'eux maladie d'Estat, & à laquelle ils ont recours, ou pour n'aller point à la Cour quand il n'y fait pas leur pour eux, ou pour ne se treuver pas en quelque assemblée, quand ils n'y peuuent tenir le rang qu'ils pretendent, ou pour se deffaire & se dejouer (afin que i'vse de leur terme) de ceux qui les importunent, & dont la presence ne leur plaist pas. La Reyne de Regnautchanfort sceut si bien pratiquer

cette subtilité de Cour, que la Duchesse de Gonzanuert, qui ne s'en doutoit point, craignant de luy empescher son repos, la laissa pour aller faire quelque autre visite. Ennemidor en fut infinimēt fasché, parce que la considerant par le trou de la serrure du cabinet, par où il voyoit aysément, il estoit rauy de ioye en la regardât, & acheua de s'en rendre esperduëment amoureux. *Où se cachera t'on pour euites les traiçts d'amour, puis qu'ils passent au trauers des portes & des serrures, & qu'ils entrent par tout ?*

Lors que les deux Princesses s'entretenoiēt, leurs Damoiselles se retirèrent ensemble dans vne garderobbe, & Rozane voyant que Callionne auoit quelques esleueures au visage, luy voulut ensci-

enseigner la recepte dont la Reyne se sert pour les oster. Il faut, dit-elle, que tu prennes du jus de cinq ou six citrons, que tu feras distiller dans l'alambic, & de l'eau qui en sortira, tu te frotteras le visage le soir & le matin. Et quoy, dit Callione, la Reyne vſe-t'elle de cela? Ma sœur, respondit Rozane, tu n'a iamais vû femme si curieuse de sa beauté qu'elle est; non seulement elle se sert de ce secret, qui est excellēt pour oster les rougeurs, mais il n'y a encores aucun artifice qu'elle n'employe pour paroistre belle. Et pour dieu ma petite sœur ma mignonne, adiousta Callionne, dy moy ce qu'elle fait pour auoir vn teint si beau & si fraiz qu'elle a? Je m'en-uois te querir, respondit Rozane, cinq ou six receptes les meilleu-

res du monde pour cela, & en disant cela elle courut prédre dans vn petit cabinet d'Esbene plusieurs papiers qu'elle apporta, où il y auoit escrit dans le premier.

Pour rendre le teint beau.

Prenez vne poignée de fleurs de febues, vne de fleurs de sureau, vne de fleurs appelée lingua bo-uina , vn pigeon blanc duquel vous osterez les entrailles, vn limon coupé par la moitié avec vn peu de sel commun que vous mettrez sur chacune de ces deux moities , vne once & demie de canfre, & de tout cela vous tirez de l'eau par boze de verre au bain marié, & cette eau sera excellente & admirable. Au dessous de cette recepte cette autre estoit encore escrite.

Pour auoir le teint beau.

Prenez vn pot de terre plom-
bé qui tienne trois chopines,
mettez dedans vne poignée de
racines de guimaues bien la-
uées, que vous couperez par pe-
tites rouelles, & les frotterez auec
vne mie de pain de la grosseur
d'vn œuf. Mettez encores du vert
de gris la grosseur d'vn poix, les
coques de trois œufs fraiz, vn
verre de vin blanc, & remplissez
le reste du pot d'eau de fontaine
qui soit fort claire. Faites bouillir
tout cela à petit feu, iusques à ce
qu'il diminuë de la moitié, & le
passez dans vne chausse dont on
se sert pour faire de l'hypocras,
qui sera fort nette, & apres serrez
l'eau dans vne bouteille que vous

boucherez bien, & vous en frottez le visage le soir en vous couchant, & le matin en vous levant.

Et quoy, dit Callionne, la Reyne se sert-elle de ces receptes? Ouy assurement, respondit Rozane, & c'est moy qui luy prepare tout cela; mais veux-tu sçauoir le moyen pour faire vn excellent blanc, tien, lis cette recepte.

Eau excellente pour le visage.

Prenez dix œufs fraiz, & trois pintes de laiçt fraiz de chevre, rompez les œufs avec leurs coques dans le laiçt, & meslez tout cela fort long-temps iusques à ce qu'il fasse vne grosse escume, puis tirez-en l'eau par l'allambic de

verre, mettant par chaque once d'eau vne scrupule de canfre. Apres cela, ferrez bien soigneusement l'eau de peur qu'elle s'esuente, & vous en seruez au soir & au matin, ce faisant elle vous maintiendra le visage fraiz, blanc & sans ride.

Vrayment, dit Callionne, voila bien des receptes, mais ie voudrois sçauoir laquelle est la meilleure. La Reyne les a toutes experimentees, dit Rozane, & les a treuuees toutes fort excellentes, neantmoins en voicy vne dont elle se sert souuent.

Eau de blancs d'œufs.

Prenez douze blancs d'œufs fort fraiz, vne once de canelle fine, vne grape de verius en grain

si vous en treuuez, sinon vn demy verre d'eau de fleurs de febues, douze onces de laiët fraiz d'asnesse ou de chevre, & faites distiller tout cela par l'alambic de verre, cette eau rend le teint fort beau, & empesche que le visage se ride.

En voila encores, dit Rozane, deux ou trois autres differentes pour oster les taches & les rougeurs du visage: mais il suffit que tu fasses ce que ie t'ay dit. Et à quoy seruent les autres que vous ferrez? dit Callionne, c'est pour plusieurs choses, respondit Rozane. En voila pour auoir la charneure belle, pour faire de beaux rouges, de la poudre de violette, de l'eau d'ange, des sachets de senteurs, des cassolettes, des pastilles, de l'opiatte pour les dents, de la paste pour les mains, des

lessiues pour rendre les cheueux
blonds ou noirs , ou pour empes-
cher qu'ils ne blanchissent. Hé !
mon petit cœur , dit Callionne,
obligez-moy de me dōner celle-
cy, car ie suis desia toute grise , &
ne me refusez pas aussi celle qui
est pour les mains. Tiens, dit Ro-
zane, voila celle-là pour empes-
cher que les cheueux ne blan-
chissent, emporte-la, ie la sçay par
cœur; quāt à ce qui est des mains,
ie te diray ce qu'il faut faire.

*Pour empescher que les cheueux
blanchissent.*

Prenez des vers de terre de
ceux qui sont rouges , & dont on
se sert pour pescher, bruslez les
& meslez la cendre avec de l'huil-
le d'amandes, & en frottez vostre

peigne quand vous vous peignerez, & vos cheveux ne changeront iamais de couleur en quelque âge que vous foyez.

Voy-tu ma sœur, dit Rozane, cette recepte est aprouuee. Quand aux mains on fait pour cela mille fortes de poudres, de pastes, & de fauonnettes; mais il n'y a rien qui y soit si souverain que des amandes pilees, sur tout il ne se faut iamais seruir de fauonnettes, car elles les rendēt rudes. Outre cela, il y a encores plusieurs obseruations dōt il faut se souuenir. Premieremēt, il ne faut estre sans gands que le moins qu'ō peut & ne les faut pas quitter quand on a grand chaud, ny se lauer qu'auparauant les mains ne soient refroidies. Les meilleurs gands sont ceux-là qui sont accommodez avec des iau-

nes d'œufs, qu'on appelle gands clairs, la Reyne en a tousiours, & la nuit mesmemēt si quelqu'un ne couche avec elle. Les gands gras ne vallent riē en tout temps, & principalement en Esté; car ils ternissent la main, gastent les manchettes, sont trop onctueux & deuiennent puants. Ceux qui sont lauez d'huile ou de pommade de iassemin, sont fort honnestes, mais ils ne rendent pas la main si doüillette que les gands clairs. Adieu, ie ne t'en puis dire dauantage, car voila ta Maistresse qui s'en-va.

Après que la Reyne de Regnaut-châfort fut deschargee de la compagnie de la Duchesse de Gonzanuert, elle fit venir Ennemidor en sa chambre, où il passa la nuit avec elle, & se retira sur

la pointe du iour avec cinq cens escus d'or qu'elle luy donna. Estant arriué au logis de son oncle, il treuua que la Marquise d'Argentuarre sa femme se iugeant malade à la mort, dispoisoit de ses dernieres volôtez. Elle l'appella, & luy dit: Mon nepueu, ie vous ay tousiours aymé comme mô propre enfant, & si Iupiter m'eust laissée dauantage au monde, i'eusse fait tout ce qu'il m'eust esté possible pour y establir vostre fortune. Mais i'espere que mon mary, qui vous ayme tendrement en aura soin, ainsi qu'il m'a promis. Je vous donne pour ayder à vous entretenir à la Cour, ma maison de Remudaury, qui vaut douze mille liures de ferme, dont ie feray bien ayse que vous portiez le nom. La plus grande peine que

i'aye à me refoudre à la mort, est de vous quitter mô mary & vous, que i'ay ayez incomparablement plus que tout ce qui est au monde. Au moins mon nepueu, luy dit-elle en le baisant, si tu estois esleué en quelque honnable charge, ie mourrois contente, car ç'a tousiours esté mon desir de te voir à ton ayse. Ennemidor à qui la ieunesse & les diuerses passions ne permettoient pas de rendre son affection esgale à celle de sa tante, fut neâtmoins touché d'une si violante douleur, preuoyant la perte d'une personne de laquelle il receuoit tant de resmoignages d'une parfaite amitié, qu'au lieu de luy respondre pour l'en remercier, il ne pût faire autre chose que de luy prendre la main, qu'il mouïlla

toute de ses larmes en la baissant. Le Marquis qui estoit resolu de se remarier apres que sa femme seroit morte, l'assistoit en sa maladie avec tous les soins dont il se pouuoit aduiser, afin qu'apres auoir acquis vne bonne reputation parmy les femmes, *qui s'in-*
formēt de tout, il en pust promptement espouser vne autre. Voyant donques qu'en cette cy il n'y auoit plus aucune esperance de vie, & qu'elle auoit l'ame sur les levres preste à s'enuoler au Ciel, il imita si bien ce que le desespoir fait faire à ceux qui sont atteints d'une extreme douleur, que tous ceux qui virent les apparences de la sienne, crurent fermement qu'elle ne souffriroit iamais de remede. Qui se voudra fier en vn esprit si dissimulé? & qui s'abstiē-

dra de rire d'une si plaisante farse? Il remplit l'air de cris feints & inutiles, il s'arracha les cheveux & la barbe, il contraignit ses yeux à verser un ruisseau de larmes, il invoqua la mort & detesta la vie, il murmura cōtre le Ciel, & le troubla d'une infinité de plaintes sacrileges, qui au lieu de soulager sa femme luy faisoient plus de mal que son mal mesme. Aussitost que ses amis virent qu'elle s'estoit acquittée du tribut que nous devons tous payer à la nature, ils osterent Argentuarre de la presence d'un si triste objet, & l'emmenèrent en une autre chambre où ils luy représenterent toutes les raisons dont on a accoustumé de se servir pour consoler ceux qui sont accueillis d'une extreme affliction. Mais Archiper-

Uir-

cas en qui il se fioit autant qu'en soy-mesme , voyant qu'au lieu d'adoucir son ennuy , on ne faisoit que l'aigrir , le tira à part & luy dit. A quoy pensez-vous de vous attrister si fort, mesmement pour vne chose où il n'y a point de remede ? Vous avez perdu vne femme , mais vous en pouuez treuver vne autre qui sera plus saine, plus belle & plus ieune que celle que vous auiez. Je sçay bien que quand cet accident ne vous auroit point apporté d'ennuys , il est neantmoins necessaire que vous en tesmoignez ; mais souvenez-vous qu'à force de feindre quelque chose , elle se treuve souvent veritable , principalement en ce qui est de la melancolie, qui nous accable quand nous la flattons. Et certes i'ay moy-mesme quelquefois experimen-

ré, que pour en vouloir trop faire paroistre ie m'y suis insensiblement si fort accoustumé, que i'auois puis-apres de la peine à sortir de cette humeur contrainte, pour r'entrer en mon naturel. Je suis d'auis que vous vous en veniez chez moy, où vous serez plus libre qu'en lieu du monde, car ie n'ay, comme vous sçauiez, ny femme, ny enfans. Je feray tout ce que vous voudrez, mon cher Archipercas mon amy, répondit Argentuarre, & avec cela apres auoir dit adieu à la compagnie, ils se retirèrent au logis d'Archipercas, où apres auoir soupé, Archipercas demanda à Argentuarre s'il auoit donné ordre à ses affaires. Ouy, luy répondit il, i'ay fait en sorte que ma femme vous a donné en ma faueur tout ce

qu'elle peut donner, il n'y a que sa maison de Remudaury, de laquelle elle a fait don à mon neveu Ennemidor, & que ie voudrois bien auoir, car elle vaut douze mille liures de ferme. Quāt à ce qui est en mon nom, repartit Archipercas, ie vous en feray vne transaction toutesfois & quantes qu'il vous plaira. Pour ce qui est de Remudaury, ie ne suis nullement d'auis que vous en laissiez prendre possession à Ennemidor, afin qu'en gardant cette piece vous le teniez en vne plus grande subiection, & qu'il dépende tousiours de vos volontez. S'il n'y veut consentir, il y faut interposer l'autorité de l'Empereur, qui à cause de l'importance de la place, qui est extrêmement forte, ordonnera que vous en aurez le gouuer-

gouvernement. Mais pour le re-
 uenu, respódit Argentuarre, quel
 expedient pourrons-nous treu-
 uer, afin que la iouyſſance m'en
 demeure? Ne vous tourmentez
 point de cela, repartit Archiper-
 cas, i'en viendray bien à bout, &
 vous en diray des nouuelles auát
 que ie me couche demain. Et de
 fait, ſi toſt que le iour fut venu, il
 ſ'en alla treuuer Ennemidor, &
 luy dit. Monsieur, feu Madame
 la Marquiſe voſtre tante ne pou-
 uant rien donner à voſtre oncle
 ſon mary, à cauſe de la rigueur
 des loix qui ſont cõtraires à cela,
 ſ'eſt ſerui de voſtre nom pour
 luy conſeruer ſa maiſon de Re-
 mudaury, & du mien pour vn au-
 tre ſujet. Ie croy que vous ne fe-
 rez point de difficulté de luy tráſ-
 porter voſtre laiz, aiuſi que i'ay

desia fait tout ce qui dépend de moy. Vous deuez attendre de luy beaucoup plus que cela, puisqu'il n'a point d'enfans, & qu'il vous ayme côme s'il estoit vostre pere. Vous sçauiez combien il est riche & puissant, & ce qu'il peut faire pour vous aduancer. Donnez-luy donques, avec ioye, le contentement que vous ne luy pouuez refuser sans vous faire grand tort. Monsieur, repartit Enneinidor, ie suis tout prest d'obeir à Monsieur le Marquis d'Argentuarre en tout ce qu'il peut desirer de moy, qui luy ay toute ma vie porté autant d'honneur & de respect, que si ie tenois la vie de luy : Mais il me déplaißt que vous vouliez me persuader estre obligé à remettre par necessité vne chose qui dépend purement de ma volonté.

Car quelle raison auez-vous de me dire que feu Madame la Marquise d'Argentuarre ma bonne tante, mais plustost ma bonne mere, ne m'a donné la maison de Remudaury par son testament, que pour la rendre puis-apres à Monsieur son mary? Si elle eust eu cette intention, pourquoy m'eust elle dit deuant mon oncle vne heure auant que mourir, que la plus grande peine qu'elle auoit de se resoudre à la mort, c'estoit de me laisser, ma fortune n'estant point establie, mais que Monsieur d'Argentuarre en auroit soin, ainsi qu'il luy auoit promis, & qu'elle me donnoit cependant Remudaury pour m'ayder à m'entretenir à la Cour? Ce sont les propres termes dont elle s'est serui pour declarer sa derniere

volonté. Y a-t'il rien là qui approche tant soit peu de ce que vous me voulez faire croire? Qu'ô regarde, qu'on cōsidere, & qu'on examine tant qu'on voudra son testament, on n'y treuvera jamais rien qui puisse donner aucune sorte de soupçō que le laiz qu'elle m'a fait, soit pour le transférer à mon oncle. Mais si cela eust esté, ainsi que vous dites, pourquoy afin de s'asseurer de moy, ne me rendoit-il capable de ce dessein auant qu'il reüssit? M'en a-t'il jamais rien fait paroistre? & vous, Monsieur, m'en auez-vous jamais parlé? Les premieres nouvelles que i'en ay sceuës, ie les ay apprises de la bouche de feu ma bonne tante, & de celle des luges qui ont escript ce qu'elle leur a dicté. Y a-t'il apparence que cela se fust passé de la sorte, si ce que

vous dites auoit lieu ? Mais pour-
quoy est-ce que feu Madame ma
tante me disoit si souuēt en la pre-
sence de M^r son mary, qu'elle vou-
loit que ie portasse son nó, & m'a-
chepter quelque belle charge à la
Cour ? Sont ce des tesmoignages
qu'elle ne me feroit du bien qu'a-
fin que ie ne m'en ressentisse point,
mais seulement afin d'en accómo-
der Monsieur d'Argentuarre, qui
d'ailleurs en a plus qu'il n'en a-
uoit esperé, & qu'il n'en desiroit
mesmement quand il vint à la
Cour ? Le voy bien, Monsieur, en-
tre plusieurs autres à qui feu Ma-
dame ma tante a tesmoigné en
mourant son affection, ie seray
seul qui n'en recueilleray aucun
fruct. Monsieur, monsieur, re-
partit Archipercas, ne croyez pas
cela, ie vous iure que l'intention

de Monsieur vostre oncle n'est point de vous faire tort. Il vous porte trop d'affection pour en auoir seulement la pensee, & m'assure qu'il ne desire en cette rencontre que cognoistre vostre naturel & vostre bonne volonté en son endroit. Il est si homme de bien, & a la conscience si religieuse, que pour tous les biens du monde il ne voudroit pas faire vne injustice, & moins à vous qu'à personne, vous ayant tout de mesme que si vous estiez son enfant. Monsieur, repliqua Ennemidor, ie sçay bien que Monsieur d'Argentuarre a iusques icy pris plus de soin de moy que ie ne merite, & c'est ce qui me fait treuuer plus estrange ce qu'il demande aujourd'huy de moy: Car qu'est-ce autre chose sinon vou-

loir exiger en vne heure douze cens fois dauantage , qu'il ne m'a donné en huiët ans qu'il m'a entretenue avec mille liures par an aux Academies, où i'ay esté nourry & esleué aux exercices que doit sçauoir vn Gentil-homme? Monsieur, adiousta-il encores, ie croy qu'il est à vostre logis , ie vous y feray s'il vous plaist compagnie, & m'en iray le treuuer pour faire entierement ce qu'il desirera. En disant cela , ils s'en allerent ensemble au logis d'Archipercas, où Ennemidor ayant treuue le marquis d'Argentuarre, luy dit: Monsieur, i'ay sceu d'Archipercas, que vous seriez bien ayse d'auoir la maison de Remudaury , que feu Madame la marquise ma tante m'a fait l'honneur de me donner. Quoy qu'elle ne soit point en-

cores en mon pouuoir , ie suis
toutefois venu icy exprez pour
remettre entre vos mains tout ce
que i'y puis pretendre, & si vous
plaist me donner du papier & de
l'ancre, i'escriray & signeray pre-
sentement tout ce qu'il vous plai-
ra me commander. Le Marquis
d'Argentuarre estant extreme-
ment content de voir si bien
reüssir son auaricieux desir , luy
dit en le baisant, & en luy cou-
urant tout le visage de larmes,
car elles luy sont fort faciles; mon
nepueu, ie n'ay iamais douté de
vostre affection, au contraire i'ay
toufiours creu fermement que
vous n'auriez point d'autre vo-
lonté que la mienne; aussi ne de-
sireray-je iamais rien qui ne soit
pour vostre bien & l'aduancemēt
de vostre fortune, dont i'ay plus

de soin que de la mienne. Prenez
donques la peine d'escrire ce que
vous dira Archipercas, qui sçait
combien ie vous ayme, & ce que
ie voudrois faire pour vous. En
finissant ces paroles, il recom-
mença encores à le baïser, & à
pleurer comme s'il eust eu le bon
naturel dont il faisoit paroistre
les effets & la tendresse. Mais il
estoit de l'humeur des femmes,
*qui sçauent si bien imiter les passions
qu'elles veulent feindre, qu'elles croyēt
elles-mesmes en estre viuement at-
teintes en les feignant; & c'est ce
qui remplit si aysemēt leurs yeux
de larmes, quand elles veulent
faire voir vne extreme affliction.*
Aussi Argentuarre sçauoit si bien
se déguiser en tout ce qu'il vou-
loit, & faire ressembler les choses
fausses aux veritables, que bien

souuent en trompant les autres, il se trompoit aussi luy-mesme, croyant estre veritablement celuy-là, dont il representoit seulement le personnage. C'est pourquoy quand il auoit bien pleuré, & dit avec ardeur plusieurs choses pour faire paroistre vn bon naturel, il s'imaginoit puis-apres qu'il n'y en auoit point au monde vn meilleur que le sien, quoy qu'on pust attendre d'vn Turc ou d'vn More plus d'equité, de Iustice & de grace que de luy. *Mais quoy, les personnes fardees se persuadent estre belles, & auoir vn veritable sujet de démentir ceux qui disent le contraire.*

Ennemidor qui poussé d'vne genereuse ambition, & detestant l'auarice a tousiours eu plus de desir d'acquérir de l'honneur, que

des richesses, fit vne declaration par laquelle il vendit à son oncle la terre de Remudaury pour la somme de deux cens mille liures, qu'il confessa auoir receu comptant, quoy qu'il n'en touchast pas vn sol. Il laissa sans faire paroistre aucun regret cette declaration entre les mains d'Archipercas qui la luy dicta mot à mot. Mais certes cette procedure le piqua si cruellement, & ietta en son esprit de si fortes semences de mescontentement, qu'il a du depuis esté impossible de les defraciner, & d'arrester les iustes plaintes qu'elles ont continuellement produites. Et quoy, disoit-il à ses amis, que dois-je attendre de Monsieur d'Argentuarre, puis qu'il me raut injustement ce qui m'appartient? Non, non, qu'on ne

m'en parle iamais, ie ne veux plus faire estat de son amitié, qui me defrobe les fruiçts de celle que sa femme m'a tesmoignée. Après qu'il eut donné à Archipercas ce que son oncle demandoit, Archipercas l'en voulut loüier; mais Ennemidor l'interrompāt aussi tost qu'il commença à parler, luy dit: Monsieur, ce n'est point à moy à qui il faut tenir ce discours; car si Monsieur d'Argentuarre eust eu besoin de ma vie, ie iure Dieu que ie l'eusse constamment perduë pour son seruice: mais ne me restant autre chose que cela, & preuoyant ne deuoir viure que pour estre miserable, ie n'estime pas luy pouuoir desormais estre beaucoup vtile. En acheuant de dire cela, il fit vne reuerence à Archipercas, & sans attendre ce qu'il

sefforçoit de luy respondre, s'en alla au logis du Duc de Cossentroc, qui l'attendoit pour le mener au palais de l'Empereur, où toute la Cour estoit desia assemblee, pour voir terminer la querelle du Duc de Meuridas & de Gardenfort, que sa Majesté vouloit mettre d'accord.

On s'estoit assemblé plusieurs fois sans conclure aucune chose, à cause des grâdes difficultez qui naissoient l'une apres l'autre, car il n'y auoit parole qui ne fust opiniastrement debatue. L'Empereur auoit commandé au Duc de Cossentroc de coucher par escrit ce qui luy en sembloit, n'y ayant personne en tout l'Empire de Galatie qui entédist si bien le poinct d'honneur que luy, & qui eust tant de bons expediens & de bõ-

nes ouuertures pour sortir d'une affaire. Son aduis fut treuvé excellent de tous ceux qui le leurét, fors de ceux-là seulement qui y ayans le principal interest, y treuuoient sans cesse quelque chose à redire, ou pour faire voir leur bel esprit, en contestant & raffinant toute sorte de raisons (c'est le terme des quereleux) ou pour témoigner leur courage en se rendans difficiles. Philastree qui dās les conseils de l'Empereur tenoit le premier rang, dit à sa Majesté, qu'il falloit d'autorité absolue les faire tous embrasser, & leur commander de ne renouereller iamais la memoire de ce qui estoit passé, sur peine de tumber en son indignation. Il adiousta encores, que si dès le commencement on se fust seruy de cette

voye, au lieu de leur communiquer, ainsi qu'on auoit fait les termes de leur accord, ils y auroient consenty sans aucune difficulté; & qu'en tout cas s'il s'en fust treuuvé quelqu'un qui n'y eust pas voulu satisfaire, l'autorité de l'Empereur estoit assez forte pour le faire obeïr. Et quoy, disoit-il, en quel pays est-ce que les Iuges rendēt raison aux parties de leurs iugements? Ne sçait-on pas qu'il y en a tousiours quelqu'une mal contente, & le plus souuent toutes deux, estant certain que si on se vouloit arrester à leurs preten-sions, on ne treuuerait iamais le moyen de terminer leurs differents? Pour moy, ie ne puis approuuer la coustume de Messieurs les Preteurs de Galatie, qui sont Iuges de l'honneur de la No-

blesse. Et quoy, ils ne vuident aucune querelle sans faire voir le project de leur iugement à ceux qui se pouruoyent deuant eux, comme s'ils craignoient de leur déplaire, ou qu'ils n'eussent pas le pouuoir de faire obseruer ce qu'ils ordonnent. Certes cela est honteux, & d'ailleurs quand ils enuoyent communiquer à quelque Gentil-homme ce qu'ils ont arresté entr'eux touchant sa querelle, il croit fermement qu'il y iroit de son honneur, s'il ne contestoit tout ce qui y est contenu: Aussi le plus souuent rapporte-t'on à Messieurs les Preteurs, qu'après auoir vû ce qu'ils ont delibéré, on ayme mieux mourir que d'y satisfaire. Le Duc de Cossantroc qui estoit le plus ancien de Messieurs les Preteurs de Galatie, ne pût

ne pût ouyr ce discours sans y répondre, qu'il y auoit vne grande difference entre la fonction de leurs charges, & les formes de la Iustice ordinaire, en laquelle par dilayements indeus, & par mille sorte de chiquaneries les pauures parties se consommoient. Mais nostre iurisdiction, disoit-il, est sommaire, & nous iugeons sur le champ apres auoir ouy toutes les raisons qu'on nous a voulu représenter. Il est vray que nous communiquons nos iugemens, parce que si les parties ne demeuroient d'accord de leurs faits, il faudroit faire de longues enquestes, ouyr des tesmoins, & obseruer vne infinité d'autres procedures odieuses aux Gentils-hommes, & fort incommodes à tous les autres. Apres que nous auons recueilly

les sentimens & les plaintes de l'agresseur, & de celuy qui se defend: Nous ordónons puis apres d'un commun consentement, s'il est possible, ce qui nous semble raisonnable, & s'il se treuve quelqu'un qui par opiniastrété ou autrement, ne vueille pas subir nostre ordónance, nous employons l'autorité de nos charges pour le faire obeir.

Cependant que le Duc de Cosfantroc parloit de la sorte, Philastree estoit fort attétif, & tesmoignoit par un doux soufrire, haussant & baissant un peu la teste, qu'il approuuoit une partie de ses raisons, puis quelquefois aussi en la remuant plus fort & fronçant le sourcil, faisoit paroistre qu'il n'estoit pas du tout de son aduis. Il luy respondit neantmoins avec

vne façon assez gracieuse, qu'il n'y auoit rien à redire en ce qu'il auoit représenté, sinon qu'au lieu de porter bien haut l'autorité de l'Empereur, Messieurs les Preteurs l'abaissoient bien souuent. Et en quoy pouuez-vous prendre sujet de parler ainsi de nous? repartit le Duc. En ce, respondit Philastree, que quand on vous donne aduis que deux Gentils-hommes ont quelque differend ensemble, vous leur enuoyez faire des deffences de se battre, & leur donnez des hommes pour les garder, comme si vos deffences deuoient estre plus fortes que les Edits de l'Empereur, qui sont si exprez sur ce sujet, qu'il ne s'y peut rien adiouster. Il est vray, repliqua Cossantroc, que prenant le plus grand soin qu'il nous est

possible de la conseruation de la Noblesse , nous enuoyons faire les deffences dont vous parlez, mais c'est de la part de l'Empereur. Et quoy, dit Philastree, n'est-ce pas faire voir la foiblesse des Edits de sa Majesté, puis qu'il est necessaire qu'on fasse de nouvelles deffences d'y cõtreuenir? Non, non, Monsieur, i'estime qu'elles sont prejudiciables à l'autorité de l'Empereur, & mesme à celle de vos charges; car bien souuent sans y auoir esgard, il y en a qui ne laissent pas de venir aux mains apres s'estre desrobé de leurs gardes. Le temps s'escoula insensiblement en ces discours, & en ces contestations du Duc de Meuridas & de Gardenfort, desquels l'opiniastreté fut si grande, qu'il n'y eut aucun moyen de les ac-

corder. C'est pourquoy l'Empe-
reur en estant ennuyé, dit qu'il
n'en vouloit plus auoir la teste
rompuë, & leur commanda de se
rassembler le lendemain au logis
du Duc de Cossantroc, avec les
autres Preteurs de Galatie pour
mettre fin à cette affaire. Le Duc
de Meuridas se retira mal cōtant
chez luy, & dit qu'il ne vouloit
iamais ouyr parler d'accommo-
dement: Toutefois sept ou huit
iours apres on luy proposa tant
d'expediens, qu'il se contenta des
satisfactions contenuës en cet ac-
cord, qui fut fait au logis du Duc
de Cossantroc, où il se treuua avec
tous les autres qui auoient inte-
rest en cette querelle.

*LES PRÉTEURS DE
Galatie assemblez par le comman-
dement de l'Empereur, pour ter-
miner la querelle qui est entre Mō-
sieur le Duc de Meuridas, d'une-
part : Et le Marquis de Garden-
fort, Boittantual son frere, & En-
nemidor, d'autre-part.*

Messieurs, l'Empereur ayant
entendu tout ce que vous
luy avez représenté, sa Majesté
nous a commandé de vous dire
que Mōsieur le Marquis de Gar-
denfort ne luy a jamais tenu au-
cun discours au desadvantage de
mōsieur le Duc de Meuridas. Mon-
sieur de Gardenfort nous a aussi
assuré qu'il croyoit que mōsieur
le Prince de Voltandon se rioit

quand il l'appella de la part de M^r de meuridas, ne croyant pas luy auoir donné sujet de se plaindre de luy. Il est tres-marry de ce qui s'est passé, & proteste qu'il voudroit auoir perdu vn bras, & que le malheur qui est arriué ne fust point aduenü. Il supplie tres-humblement monsieur de meuridas de le tenir, & Boittantual son frere pour ses tres-humbles seruiteurs, ainsi qu'ils ont tousiours esté, recognoist que sans Ennemidor qui suruint à son secours, il estoit en vn danger in-euitable de perdre la vie, n'ayant presque plus moyen de se deffendre, ny de resister à monsieur de meuridas. Quant aux discours qui se sont tenus depuis & auant le combat, l'Empereur a iugé *que quand il y a des coups, les paroles ne*

sont plus considerables, & qu'il n'y a deormais aucun sujet de querelle entre vous. Sa Majesté vous commande d'ôques à tous de demeurer dans les termes de ses Edits. Quât à Ennemidor, il supplie tres humblement monsieur de meuridas de luy pardonner, & croire que s'il eust eu l'honneur de le cognoistre, il eust aymé mieux mourir que de faire ce qu'il fit.

Après que le Duc de Cossantroc eut prononcé cet accord, le Duc de meuridas dit tout haut. Puisque l'Empereur me commande de recevoir cette satisfaction, ie m'en contente, mais sans cela i'eusse fait paroistre ce que peut mon ressentiment. L'on eut toutes les peines du monde à faire consentir Gardenfort, que monsieur de meuridas feroit cette res-

ponce ; car il demandoit instamment qu'après que l'accord seroit leu, on ne dit plus rien touchant leur dispute. Il faisoit aussi vne grande difficulté de recognoistre que sans Ennemidor il estoit en danger de perdre la vie. Neantmoins il fit ce qu'on voulut après qu'on luy eut représenté que Monsieur de Meuridas estant outré de douleur, à cause de la mort du Prince de Voltandon, & du desaduantage qu'il auoit receu dans le combat, ne pouuoit moins dire que cela ; & que d'ailleurs il estoit tousiours plus honorable de faire des satisfactions, que d'en recevoir, & que tant plus elles sont grandes, c'est vn tesmoignage que les offences l'ont aussi esté. Monsieur de Meuridas dit auparauant qu'on leust l'accord, qu'il ne vouloit embras-

ser ny Gardenfort, ny son frere, ny Ennemidor, aussi ne l'en pressa t'on pas, *n'estât raisonnable qu'un homme embrasse, quelque accommodement qu'il y ayt, celui qui a tué son frere, ny mesmement ceux qui en sont cause.* L'on ne parla point dans l'accord de ce qui s'estoit passé entre Ennemidor & Boittantual, parce que Gardenfort ne le voulut pas, mais aussi tost il les fit tous deux embrasser, & leur dit qu'il les prioit de s'aymer comme freres, ce qu'ils ne purent iamais faire, & y eut tousiours entr'eux vne hayne immortelle: *Aussi est-il impossible que ceux qui portent enuie se puissent vouloir du bien.* La Reyne de Regnaut-chamfort fut extremement aise quand elle sceut que cette broüillerie auoit esté terminée, quoy que

son frere eust assez tesmoigné qu'elle en estoit seule la cause, encores qu'il eust pris vn autre pretexte pour quereller Gardenfort. Elle vouloit auoir secretement vne coppie de l'accord que Boittantual luy enuoya, signee de tous les Preteurs de Galatie, & contre-signee du Secretaire du plus ancien, qui tient vn registre fidelle de tous les accords, & de toutes les ordonnances de Messieurs les Preteurs. Ils se chargent tellement de l'honneur de ceux qu'ils accordent, que si vn Gentilhomme ayant esté griefuement offensé, ne receuoit pas vne satisfaction assez grande, il seroit hors d'interest en faisant voir que Messieurs les Preteurs la luy auroient ordonnée. La Reyne se sentit grandement obligée à Ennemi-

dor, voyāt qu'il estoit dit en l'accord, que s'il eust eu l'honneur de cognoistre le Duc de Meuridas, il eust aymé mieux mourir que de faire ce qu'il fit. Elle croyoit qu'il eust dit cela pour l'amour d'elle, ne sçachant pas que c'estoit vne chose concertee. Brulant donques d'enuie de le voir, elle luy escriuit cette lettre.

LETTRE DE LA REYNE
de Regnaut-chanfort à En-
nemidor.

M On Page, i'aurois vne extreme ioye si le tour que mon frere m'a fait, reiettāt toute cette broüillerie sur moy & à ma honte, ne m'ostoit la force d'en ressentir de vostre reconciliation, qu'on m'a asseuree estre

si bien faite, que vous estes maintenāt fort bons amis. Je recognois en cette affaire-cy la verité de vos promesses, par le soin que pour l'amour de moy vous y avez apporté, & ne me puis empescher de vous dire, que si vous n'y eussiez point esté meslé, la chose ne se fust passée si honnorablemēt qu'elle a fait. Que j'ayme vostre esprit & vostre humeur ! mais il vaut mieux que ie finisse, car en laissant conduire ma main à la violence de ma passion, elle feroit voir ce que ie veux cacher à tout le monde. Adieu, croyez que ie vous ayme bien fort, & ne manquez pas à me venir voir aujourd'huy.

Après que la Reyne eut fermé sa lettre, elle ne sçauoit par quel moyen la faire tenir à Ennemidor; car d'en charger Rozane sur l'esperāce qu'elle pourroit la luy

faire tumber entre les mains, ainsi qu'elle fit l'autre au bal, il n'y auoit aucune apparence que cela pust reüssir. Comme elle se traualloit l'esprit sur ce sujet, Nerithuma entra en sa chambre, & luy dit: Vrayement, Madame, ie croy que vous voulez faire mourir toute la Cour d'ennuyés par vostre façon de viure. Representez-vous qu'elle est priuee de son lustre quand vous n'y estes point, ainsi que la terre l'est de la lumiere, quand le Soleil luy cache ses rayons. Ie ne rencontre personne qui ne soit si triste, que si vous ne vous laissez bien-tost voir, le palais de l'Empereur deuiendra vn desert. Vn chacun s'en plaint, & n'y a celuy qui ne die que quand vous n'y estes point, les graces & les merueilles du monde en sont

bannies. Tenez voyez en quels termes vostre solitude a reduit vne personne qui ne peut viure sans iouyr du bon-heur de vostre presence.

LETTRE DE FLAMIDOR
à la Reyne de Regnaut-
chanfort.

IE ne sçay si ie suis hors de vostre memoire, ou de l'honneur de vostre bonne grace, mais dans l'une de ses deux iniustices ie treuuerois le comble de tous mes malheurs. Cette apprehension me vient de ce qu'il m'a esté impossible de vous voir, quoy que i'aye pû faire, n'osant outrepasser les regles qu'il vous a pleu me prescrire pour les actions de ma vie. Je sçay bien que ie me plains d'estre priué d'une felicité

que ie ne merite point: Toutefois si par quelque grace, ou par quelque tesmoignage de vostre bon naturel, vous auez agreable de m'en faire iouyr, ie vous seray autant obligé que celuy à qui vous donneriez la vie, la luy pouvant oster. Aussi vous puis-ie bien assurer, que si vous ne m'aymez plus, vous manquez à vous mesmes, & vous faites grand tort: car ie ne veux viure que pour vous rendre le service que Flamidor doit à son Angelique.

La Reyne n'auoit pas encores acheué de lire ce billet, qu'un Page vint dire à la porte que quelqu'un demandoit à parler à Nerithuma. C'estoit l'un de ses gens qui luy apportoit vne lettre pour la presenter à Angelique, ainsi nommerons nous desormais quel-

quelque-fois la Reyne de Regnaut-chaufort. Nerithuma cognoissant de quelle part elle venoit, r'entra incontinent dans la chambre, & dit à Angelique. Tenez Madame, voyez cela, c'est encores pour confirmer mon dire. Angelique ayant ouuert la lettre cognut l'escriture, & dit: Helas! c'est du pauvre Boittantual. Puis se retirant auprès d'une fenestre leur tout bas ce qu'il luy madoit: mais à chaque ligne qu'elle lisoit, elle souspiroit si fort & versoit tant de larmes, qu'il estoit aysé de iuger la violéce de l'affliction dont son ame estoit atteinte. Nerithuma voyant cela, & qu'elle commençoit à replier le papier qui estoit cause de son ennuy s'approcha d'elle, & luy dit: Hé! Dieu, madame, que peut-il y auoir la

dedans qui vous donne tant de tristesse ? Tiens, respondit Angelique, regarde si ie puis estre ioyeuse, estant sur le poinct de perdre ce que i'ayme plus que ma vie. Nerithuma prit la lettre, & la lisant vn peu haut, Angelique dès les deux premieres lignes redoubla tellement ses larmes, ses plaintes & ses souspirs, que Nerithuma discontinua plusieurs fois à lire pour la consoler, recommençant puis-apres la mesme lecture, qui dura pres d'une heure auant qu'elle eust acheué de voir ce qui s'ensuit.

LETTRE DE BOITTAN-
tual à la plus inconstante
Reyne du monde.

IE ne veux plus viure puis que vous
ne m'aymez plus, & suis resolu de

chercher la mort par tant de voyes,
qu'il est impossible que ie ne la treuve,
afin de vous tesmoigner en mourant,
que ie n'ay plus voulu conseruer ma
vie dés que i'ay cognu que vous n'en
faisiez plus d'estat. Ah ! quand on me
dit, que me voyant estendu dans vn
ruisseau de sang, vous vous y laissastes
tumber éuanoüie, croyant que ie m'y
estois noyé, & qu'apres qu'on nous eut
mis tous deux comme morts en vostre
carrosse, i'estois ressuscité aussi tost que
ie fus aupres de vous. Je me persuaday
que cela n'estoit point arriué sans
quelque secrette ordonnance du Ciel,
& estimay qu'il y auoit esté arresté
par le destin, que nos ames ne s'y en
pourroient aller l'une sans l'autre.
Mais la vostre qui est pleine d'incon-
stance se desunissant de la mienne,
sans aucun sujet & sans aucune pitié,
pour s'engager à celuy qui nous a tant

donné d'ennuys, ne dois-je pas reconnoistre que le miracle que vous avez fait en ma resurrection, n'a esté que pour me faire souffrir vn double martyre en me faisant mourir deux fois? Vivez cependant heureuse, si toutefois vous le pouvez estre avec celuy qui vous comble de malheurs: Car quant à Boittantual, il ne peut plus demeurer au monde, puisque vous avez changé d'affection, & que vous estes inconstante, étant impossible que la fidelité puisse compatir avec l'infidelité.

Certes, dit Nerithuma, apres auoir leu cette lettre, cela est bien estrange. Et quel sujet peut auoir poussé Boittantual à prendre cette resolution? Je ne sçay, respondit Angelique en pleurant, si ce n'est pour luy auoir fait pa-

roistre trop d'amour ; car il est
vray que ie l'ay tousiours tendre-
ment aymé. Il escrit neantmoins,
repartit Nerithuma, comme vn
homme à qui vous auez donné
de la ialousie. C'est donques de
son ombre, dit la Reyne, car ie
t'asseure qu'il n'y a que toy & Ro-
zane qui ayez cognoissance de
mes affaires. Ne dites pas cela, s'il
vous plaist, madame, adiousta Ne-
rithuma ; *Car les hommes ont au-
iourd'huy tant de vanité, qu'il y en a
fort peu qui ne se vantent des faueurs
qu'ils reçoient des femmes, & pren-
nent plus de plaisir à cela, qu'à
posseder le bon-heur dont ils
iouissent ; & ce qui est encores
bien pis, c'est qu'il y en a remplis
de tant de malices, qu'ils ne font
point de difficulté de dire mille
menteries contre l'honneur de*

celles qui ne les ont peut-estre
iamais voulu regarder. Ainsi i'ap-
prehende qu'entre ceux que vous
auez obligez, il ne s'en soit treuue
quelqu'un qui en ayt abusé, &
n'ayt pas esté discret. Mais ie m'ar-
reste trop icy, ie m'en veux prom-
ptement aller au logis de Boit-
tantual, afin de l'emmener icy
pour estre chastié de sa rebellion.
Tu m'obligeras infiniment, dit la
Reyne: mais escoute Nerithuma,
il faut que ie te confesse que ie
suis tellement esprise de l'amour
d'Ennemidor, que i'en perds le
repos. Je luy ay escrit vne lettre
qu'il faut que tu luy donnes, &
cela suffira; car il sçait bien le che-
min de mon iardin, par où il m'est
desia venu voir. Tu le treuueras
chez l'Empereur à quelque heu-
re, il est nepueu du Marquis d'Ar-

gentuarre, & croy que tu le cognois, car il a desia bien fait parler de luy. Ouy asseurement ie le cognois, respondit Nerithuma, c'est le plus beau & le plus agreable homme que i'aye iamais vû, donnez-moy seulement la lettre, & ne vous en mettez point en peine, ie la luy rendray fidèlement : Mais ie ne veux point partir d'icy, que ie n'emporte la responce à Flamidor de celle qu'il vous a escrite. O Cieux! Nerithuma, dit la Reyne, on ne te peut rien refuser, aussi fais-tu de moy tout ce que tu veux, & en disant cela elle prit du papier & escriuit cette responce.

Q iiii

LETTRE D'ANGELIQUE
à son cher Flamidor.

IE suis arrestee au liét pour tout
aujourd'huy, dont ie vous aduertis,
afin que vous soyez certain de m'y
treuver lors que vous voudrez me ve-
nir voir. Le soin que vous avez de sui-
vre les regles que ie vous ay ordonnees,
me rend curieuse de vous faire sçauoir
mes deportemens, estimant que les oc-
casions que vous treuueriez de voir An-
gelique, seront les plus heureuses &
les plus agreables heures de vostre vie.
Adieu petite beste ne vous plaignez
plus.

Nerithuma prit cette lettre, &
la porta à Flamidor, qui ne man-
qua pas à l'assignation. Delà el-

le fut chez Boittantual ; mais on luy dit que le soir auparauant il s'estoit dérobé de tous les gens, & estoit party le lendemain de grand matin avec vn Gentilhomme tout seul, sans qu'on sceut où il estoit allé. Qu'on craignoit qu'Ennemidor & luy ne se fussent donné parole de sortir hors des terres de l'Empire pour aller battre. Nerithuma fut fort estonnée de cela, & courut aussitost au logis du Marquis d'Argentuarre pour en apprendre des nouuelles. On luy dit qu'Ennemidor ne faisoit que sortir à pied avec vn Page & deux laquais seulement, pour aller faire quelque sacrifice au temple de Minerue. Elle ne perdit point de temps, & s'y en alla le chercher. Il se promenoit dās le temple avec Port-

chanron. Nerithuma s'estant approchée d'eux tira Ennemidor à part, & luy dit. Monsieur, la Reyne de Regnaut- chanfort vous mande que vous ne manquiez pas de l'aller treuver demain au soir, car pour tout aujourd'huy elle est empeschée. Voila vne lettre qu'elle vous escrit. Ennemidor la prit & fit vne infinité de longs remercimens à Nerithuma, puis retourna où il auoit laissé Portchanron, qui luy dit. Sans doute, Monsieur, c'est quelque parole d'amour que ce Cauallier fendu vous a apportée. Et quoy, repartit Ennemidor, est-ce là vne femme? Et que croyez-vous que c'est? dit Portchanron. I'estime, repartit Ennemidor, que c'est vn Eunuque. Nullement, repliqua l'autre, c'est vne folle, mais qui ne

manque pas d'esprit. Elle va ainsi vestuë comme vous voyez, ayant toujours vn pannache à son chapeau. Mais que pensez-vous cōme elle est bien venuë chez toutes les Princesses & les grandes Dames de la Cour ? Certes elle entre plustost dans le cabinet de l'Imperatrice, qui n'a nulle cognoissance de sa mauuaise vie, que ne fait pas vne Duchesse : & outre cela elle a encores de fort bonnes pensions, dont elle est mieux payee que plusieurs grāds Capitaines qui sont couuerts de blessures, & qui ont vieilly dans le seruice de l'Empereur. Parmy cela (qui le croira ?) outre qu'elle entretient vn Ruffien à la honte & au grand scandale de la Cour, elle ne fait encores autre mestier que de porter des paroles & des

billets d'amour , ce qui me fait croire que c'est pour cela qu'elle vient maintenāt de parler à vous. Pardonnez-moy , respondit Ennemidor ; Mais comment l'Empereur luy permet-il d'entrer au Palais ? Parce qu'elle fait la bouffonne , repartit Portchanron , & que sa Majesté croit qu'elle ne se melle que de cela ; aussi à la verité ne s'employe-t'elle que pour deux ou trois des plus grāds Seigneurs & des plus grandes Dames de Galatie. Mais pour reuenir à ce que ie disois quand Nerithuina est venuë , assurez-vous, monsieur , que la Duchesse de Gonzanuert est tenuë pour la plus sage & la plus vertueuse princesse qui se puisse treuver , & à la verite elle le tesmoigna bien, quād le grād Bournouarre pere

de nostre Empereur en devint si passionnément amoureux, qu'il ne se peut rien imaginer qu'il ne fit pour en iouyr: Ce fut neantmoins tousiours en vain, car elle ne voulut iamais consentir à ses amoureuses poursuites. Si est-ce toutefois, respondit Ennemidor, que j'ay tousiours ouy dire, qu'il n'y a point de si sages femmes au monde, qui ne donnent contentement à ceux qui perseuerent à les prier plusieurs fois. J'ay aussi ouy dire cela, repartit Porthanron, & croy qu'il est vray, pourueu que toutes les conditions nécessaires pour gagner l'esprit & les bonnes graces d'une femme soient en celuy qui la recherche: Mais il est besoin de tant de choses, que difficilement peut-on estre pourueu de toutes. Il faut

estre ieune, beau, discret, riche, vaillant, liberal, diligent, patient, & auoir le lieu & la cōmodité; car si quelqu'un de tous ces poincts nous manque, il est capable de nous priuer du succez de nostre entreprise. Certes, Mōsieur, il y a des fēmes sages, ou parce qu'elles ne sont pas priees, ou parce qu'elles ne le sont pas bien, ou en fin parce qu'elles n'ont pas le moyen de faire du mal. Mais quand ceux qui les entreprennent leur sont agreables, & n'obmettent rien de ce qu'il conuient pour faire reüssir leur dessein; & que d'ailleurs elles ont vne entiere liberte de faire ce qu'il leur plaist, sans crainte & sans soupçō d'estre descouuertes; Ah! que c'est vn grand miracle si elles se contiennent dans leur deuoir, &

si elles n'outrepassent point les termes de l'honnesteté : Car la nature en naissant leur a donné comme aux hommes vn puissant instinct à l'amour, qui estant nay avec elles, croissant avec elles, & ne mourât qu'avec elles, ne peut estre surmonté sans faire violence à la nature, & sans vaincre ses propres sentiments. C'est pourquoy on estime *la chasteté vn particulier don du Ciel*, qui ne dépend point des forces humaines, n'y ayant aucune vertu si recōmandable qu'elle est, comme il n'y en a point aussi qui soit si difficile à conseruer. Il ne faut doncques pas treuuer estrange si les femmes la perdent qui demeurent dans le monde parmy les delices, les vanitez, les festins, les danſes, & vne infinité d'autres occasions, puisque les Vestales

ont tant de peine à viure chaste-
ment , encores qu'elles soient
renfermees dans des temples, pri-
uees de la veuë & de la conuersa-
tion des hommes, & qu'elles pas-
sent les iours & les nuicts en veil-
lant, en ieusnant, & en traueillant
leurs corps par vn nombre infiny
d'austeritez. Avec tout cela, neât-
moins il s'en treuve bien souuent
qui ne peuuent pas resister à la
puissance d'amour qui est pres-
que inuincible. Mais quoy que
s'en soit, & quelque foiblesse que
la nature ayt voulu laisser aux
femmes , ie vous assure que la
Duchesse de Gonzanuert est esti-
mee si sage & si vertueuse, que
quand toutes les perfections qui
sont separees entre tous les hom-
mes du monde, se treuueroyent
reünies en vn seul, il ne pourroit
iamais

jamais rien obtenir d'elle au prejudice de son honneur, dont elle est mille fois plus soigneuse que de la conservation de sa vie. Ennemidor estoit tout rayuy de ce que luy disoit Portchanron, & s'enflammoit en l'amour de la Duchesse d'autant plus qu'il admiroit sa vertu, & qu'il preuvoit de peines & de dangers avant que d'en pouvoir iouyr. *Aussi est-ce vn effet du naturel des hommes, d'aymer davantage ce qu'ils ne peuvent acheter qu'au prix de beaucoup de soins & de difficultez, que ce qu'ils peuvent aysément acquerir; & à la verité la gloire en est plus à estimer, car les grandes entreprises apportent les grands honneurs quand elles succedent heureusement.* Ennemidor ayant doncques pour Madame de Gonzan-

uert la plus violente passion dont vn Amant puisse estre atteint, résolut ou de mourir, ou de iouyr de la felicité pour laquelle il souffroit vn insupportable martyre. Il ne fit rien paroistre de son dessein à Portchanron, mais luy cachant l'alteration de son esprit luy dit, qu'il auoit ouy infinimēt loüer la Princesse dont ils parloient, & qu'il croyoit facilement tout ce qu'il luy en auoit raconté. Puis changeant de propos, l'estime, dit-il, qu'il est pres de midy, *les discours qui plaisēt font doucemēt couler le temps*, ie m'en vay treuuer mô oncle chez le Duc de Cossantroc où il disne aujourd'huy.

Ennemidor s'estant separé de la sorte d'avec Portchanron, s'en alla disner au logis du Marquis d'Argentuarre, & se retira incon-

rinent apres en la chambre, où il fit monter son Escuyer nommé Glacidas, qui auoit esté nourry avec luy dès l'aage de huit ans. Glacidas, luy dit-il, ie te prie fais tant avec Clorinde ta sœur, qu'elle te preste l'un de ses habits tout complet, car i'en ay necessairement affaire. Glacidas s'en alla promptement treuver Clorinde, & retourna incontinct apres avec l'un de ses habits. Mais quand Ennemidor voulut le vestir, il ne sceut par quel bout commencer; C'est pourquoy il dit à Glacidas, Mon cher amy, ie suis au desespoir de ne sçauoir pas comment il faut que ie m'accommode de cela: car ie suis resolu de m'habiller en fille, & de me mettre au seruice de la Duchesse de Gonzanuert, de qui ie suis si esperdue.

ment amoureux, qu'il m'est impossible de pouuoir viure sans estre aupres d'elle. Monsieur, repartit Glacidas, ie sçay vn bon moyen de remedier à cela; Et quoy, demáda Ennemidor: C'est, repartit Glacidas, que si vous plaist venir en ma chambre chez ma mere, ie feray en sorte que ma sœur vous habillera cinq ou six iours, & vous enseignera si biẽ les gestes & les actions des filles, que vous pourrez puis-apres les imiter si parfaitement, qu'il n'y a personne qui puisse douter que vous n'en foyez pas vne. Ah! mon frere, dit Ennemidor, que tu m'oblige de me donner cet aduis, aussi bien me seroit-il tres-difficile de sortir de ceans estant déguisé: & d'ailleurs ie preuoy que ie ne pourrois iamais me coif-

fer tout seul. Ne perdons point le temps ie te prie, allons-nous en promptemēt là où tu dis. Mais Monsieur, repliqua Glacidas, que dira vostre oncle quād il ne vous verra plus ? Ne craignez-vous point qu'il en soit en cōlere contre vous ? le ne me soucie pas de cela, respondit Ennemidor, car il m'a mis au desespoir, & sçay bien que ie ne dois iamais rien attendre de luy : C'est vn auaricieux, qui n'a autre pensee que d'amasser des tresors, dont il ne sçait pas se seruir. Mais n'en parlons plus ie te prie, demande à mon valet mon deshhabillé, & sauuons-nous en ta chambre le plustost que nous pourrons, sans que ta mere ny qui que ce soit nous voye que ta sœur. Glacidas ne resista pas dauantage à cela, mais le mena

où il desiroit, & si tost qu'ils y furent, pria Clorinde de luy mettre l'un de ses habits, ce qu'elle fit & le coiffa si gentiment, qu'il n'y a personne au monde qui n'y eust esté trompé. Tout ce qu'il y auoit à redire, c'est que l'habit luy estoit vn peu trop court & trop estroit, ce qui fut cause qu'il enuoya querir au mesme temps vn Tailleur pour femme qui prit sa mesure, & luy dépescha dans deux iours vne robe d'estamine, & deux iupes de peu de valeur, mais fort bien faites. Il se fit aussi faire quelques chemises d'assez belle toile, car il n'eust pû en porter d'autres, & donna les siennes à Glacidas, parce qu'elles n'estoient pas propres pour des femmes. Clorinde cependant qui luy seruoit tous les iours de fille de chambre,

luy apprit à s'habiller, à se coiffer, à faire la reuerence, & tout ce qui luy estoit necessaire pour empescher qu'on ne pust soupçonner qu'il fust homme. Il demeura dix ou douze iours en cette escolle, tant pour apprendre vn peu à coudre en linge, à trauailler en tapisserie, à se former aux mignardises, aux dédains, & aux autres mœurs des filles, qu'à chercher quelque vieille qui pust l'accompagner par la ville. En fin en ayant treuue vne telle qu'il la pouuoit desirer, & ne luy manquant rien de ce dont il auoit besoin, il sortit vn matin sur les dix heures, & s'en alla au temple de Diane, où il scauoit que la Duchesse de Gonzanuert alloit tous les iours pour assister aux sacrifices qui s'y font. O Amour, quelles inuentions, quel-

les ruses , & quelles subtilitez n'enseigne-tu point à ceux qui se rengent sous tes drapeaux ? A combien de soins , de travaux & de dâgers ne les exposes tu point à tous moments ? Y a t'il metamorphose qu'une personne amoureuse n'experimente pour contenter ses desirs ? Ah ! Jupiter tu le sçais, puisque prenant la forme d'une pluye d'or, d'un Cigne, & d'un Taureau, tu as esté cõtraint de chercher les remedes propres pour guarir les bleffeures que plusieurs innocentes beautez t'avoient faites. Tu le sçais encores, ô invincible Alcide , qui ne pouvant resister aux inevitables attraits d'un bel œil, quoy que par tout ailleurs tu fusses tousiours vainqueur, as neantmoins quitté ta superbe massuë pour prendre

vn fuzeau. Ennemidor estoit extremement parfait, mais il ne l'estoit pas plus que les Dieux qui n'ont pû surmonter la puissance d'amour. Ayant donques demeuré dans le temple environ demie-heure, il y vid entrer celle dont la beauté l'auoit tellement charmé qu'elle luy auoit fait de laisser les exercices d'un Cavalier pour imiter les delicateesses d'une fille. Et certes, il semble que lors qu'il en prit l'habit, il en prit aussi l'humeur & le naturel; car dès qu'il s'approcha de la Duchesse de Gózanuert, il se sentit saisi d'une aussi grande peur, que s'il se fust présenté, estant atteint de quelque crime deuant vn Iuge rigoureux de qui il n'eust deu attendre aucune sorte de grace. Il n'eut pas assez de resolution pour parler à

la Duchesse ; mais estant tout tréblant & confus il s'adressa à Callionne, de qui le regard & la façon sembloiét l'attirer, & luy faire plus esperer de faueur qu'aucune autre de ses compagnes. Mademoiselle, luy dit-il, baissant les yeux, ie vous supplie me vouloir tant obliger que de faire en sorte que Madame prenne pitié de moy, qui suis vne pauvre fille, & n'ay ny pere ny mere, ny aucune cognoissance en ceste ville. Comme il disoit cela, la Duchesse le consideroit fort attentiuemēt, & croyoit n'auoir iamais vû vne si parfaite beauté. Aussi demanda-t'elle incontinent à Callionne ce que c'estoit; C'est, respondit-elle, vne pauvre Damoiselle qui vous demande quelque charité. La Duchesse luy ayant commandé

de s'approcher d'elle, luy demanda d'où elle estoit, & comment elle s'appelloit. Ennemidor fut surpris d'une si extraordinaire crainte, & d'une émotion si étrange, qu'il en devint tout rouge, & se tenant vn peu esloigné n'eut pas la force de luy respondre. La Duchesse en eut compassion, iugeant que c'estoit vne fille pleine de pudeur, & qui n'auoit pas accoustumé de mendier sa vie. Cela fut cause qu'elle luy dit encores derechef qu'elle s'approchast, & luy redemanda d'où elle estoit. Ennemidor voyant que madame de Gonzanuert luy parloit avec tât de douceur, s'apperceut qu'elle auoit esté touchée de pitié, & reprenant ses esprits voulut encores la luy augmenter pour aduancer dauantage son dessein.

S'approchât donques d'elle pour luy respondre , il fit couler de ses yeux dès qu'il ouurit la bouche pour parler, de grosses larmes qui baignant ses ioües, que la honte auoit teintes de rouge, ressembloient à la rozée qu'on treuue au matin sur les rozes vermeilles. Puis prenant son mouchoir pour s'essuyer le visage, au lieu de continuer son discours, comme si la douleur luy eust empesché la parole par l'abondance de ses soupirs, il demeura quelque temps sans rien dire, n'osant regarder personne. La Duchesse & toutes ses Damoiselles en furent tellement émeuës, qu'elles ne se purent empeschier de pleurer. En ce mesme instant, Anthenor qui estoit grand Augure & frère de la Duchesse arriua, & voyant

qu'elles auoient les yeux mouïllez s'informa d'où cela procedoit. C'est, luy dit sa sœur, montrant Ennemidor, cette belle fille qui par ses larmes a attiré les nôtres ; Et qui est-elle , repartit Anthenor , en la regardant & luy prenant la main dont elle s'esfuyoit les yeux. Dites-nous, repliqua la Duchesse qui vous estes, & comment vous avez nom ? Je m'appelle Chrisolite , respondit Ennemidor, & suis de la Prouince de Pictaue. J'ay accompagné ma mere en cette Ville, qui y estoit venue pour auoir iustice de la mort de feu Belladon mô pere, que le Comte de Trauaugon a assassiné dans la ville de Sergadu. Et quoy, dit Anthenor, estes-vous fille de Belladon; Ouy Monsieur, respondit Chrisolite, il n'auoit

que moy d'enfans. Certes, ad-
iousta-il pour la gratifier, car il
en estoit desia amoureux, c'e-
stoit vn Gentil-homme que i'af-
fectionnois bien fort, & dont ie
faisois grand estat, à cause de son
courage & de sa valeur. Et pour-
quoy, demanda la Duchesse, le
Comte de Trauaugon l'a il tué?
Madame, respondit Chrisolite,
nous n'en auons iamais rien pû
sçauoir. Ma sœur, dit Anthenor,
i'en sçay bien la cause: Imaginez-
vous qu'il treuua vne lettre d'a-
mour que Belladon escriuoit à sa
femme; que vous sçauiez n'estre
pas inhumaine. Trauaugon tes-
moignoit estre particulièrement
amy de Belladon qui l'alloit voir
tous les iours, mangeant souuent
avec luy. Vne fois entr'autres a-
pres qu'ils eurent dîné, Trauaugon

gon luy dit, qu'il luy vouloit communiquer quelque affaire d'importance, & le mena dans vne galerie où il y auoit quatre Gentilshommes qui se promenoient. En entrant Trauaugon luy voulut tirer vn coup de pistolet qui manqua, ce qui fut cause qu'il cria à ses gens qu'ils le tuassent, ce qu'ils eurent plustost fait qu'il n'eust loisir de mettre l'espee à la main pour se deffendre. Vrayement, dit la Duchesse, voila vne tres-mauuaise action : Et bien quelle iustice en a eu vostre mere ? continua-t'elle, se tournant vers Chrisolite. Helas ! Madame, respondit-elle, il y a huiet iours qu'elle est morte d'ennuys & de regrets, voyant qu'au bout de quinze mois qu'elle a employez en la poursuite de cette affaire, elle n'en a

pû auoir aucune iorte de raison, quoy qu'elle y ayt dépenfé tout son bien. Depuis la mort i'ay esté contrainte de mettre en l'habit que ie porte tout ce qui me restoit de cōmoditez. Je suis maintenant esloignee de mon pays, & de toute sorte de secours, n'en pouuāt attendre que d'un Oncle qui ne me voudra iamais assister, estant gaigné de nostre aduerse partie à force d'argent il y a desia fort long-temps. C'est pourquoy Madame, ie vous supplie tres-humblement d'auoir pitié de moy, qui aymerois beaucoup plustost mourir de faim, que de demander publiquement l'aumosne, ou de chercher à viure par des voyes honteuses, qui me failant escarter de mon deuoir, me conduiroient au desespoir, apres

apres m'auoir conduit à la porte de mon hōneur. Anthenor estant rauy des discours, de la beauté, & de la bonne grace de Chrisolite, demanda à l'vn de ses sous-Sacrificateurs cinquante ou soixante pistolles qu'il luy presenta, croyant qu'il n'y a rien que l'argent n'obtienne d'une personne necessiteuse. La Duchesse s'apperceuant de son dessein, luy dit qu'elle ne vouloit pas qu'elle les prist, & qu'elle la retireroit chez elle pour s'en seruir, & luy feroit donner tout ce qui luy estoit necessaire. Anthenor pour couurir son intention, dont il esperoit venir à bout avec le temps, puisque Chrisolite alloit demeurer avec sa sœur, rendit les pistolles à celuy de qu'il les auoit prises, & changea de discours, disant. Certes c'est vne grāde honte

& vne chose déplorable de ce qu'aujourd'huy en Galatie il ne faut plus esperer de Iustice, qui ne se rend qu'à ceux qui sont puissants en biens & en alliances, car on n'escoute seulement presque pas les autres. Je vous assure ma sœur, que principalement dans le Conseil de l'Empereur, où celuy qui en est le chef attire toute sorte d'affaires, il se commet tant d'abus & de concussions, que i'y ay vû obtenir sur vn mesme sujet dix-huict Arrests, qui tous ont esté cassez puis-apres par autant d'autres; de sorte que ce qu'une partie obtenoit en trois mois, l'autre s'en faisoit aussi-tost releuer. Je ne vous diray rien des griuelles (c'est le mot qui court) ny des subtilitez dont vsent les Iuges pour s'enrichir en moins

de six ans, ce qui n'est presque pas croyable ; Car vn homme que ie cognois ayant achepté sa charge prés de quarâte mille escus, dont il en emprunta pour le moins quinze, s'est acquitté en huit ans, & en a donné trente mille en inariage à sa fille, sans auoir eu aucune succession, ny aucun don de l'Empereur. D'ailleurs, quelle cruauté est-ce d'y faire quelque-fois comparoistre pour peu de chose de pauvres gens qui sont de plus de trois cens lieuës, ainsi que ie cognois vn pauvre Laboureur que son Seigneur y fit assigner, pour auoir vn petit morceau de terre qu'il possedoit. Ce pauvre homme fit plus de deux cens cinquante lieuës demandant l'aumolne par les chemins, pour venir obeir aux commandemens

du Conseil, qu'il suiuit tout le long du voyage que nous fîmes l'annee passée, où nous demeurâmes près de six mois. Et ce pauvre homme neantmoins quoy qu'il eust tousiours incessamment poursuivy son affaire, fut cōtraint de s'en retourner sans la faire iuger; parce que la partie, qui estoit al'ice de plusieurs de ses iuges, le vouloit seulement consommer en fraiz, pour auoir puis apres sans peine ce qu'il demandoit. Il est vray qu'en cette compagnie il y a des gens de bien qui souffriroient plustost la mort, que de faire vne injustice: aussi ne sont-ils point coupables des fautes de leurs cōpagnons, non plus que si entre plusieurs seruiteurs il s'en treuue quelqu'un qui trahisse son maître, & le liure à ses ennemis pour

de l'argent, la fidelité des autres qui n'y ont point pris part, n'en est pas moins à estimer. Ainsi la mauuaise herbe croist souuent parmy le bon blé, & les mauuais espics qui d'ordinaire sont les plus grands & les plus releuez, ne gastent neantmoins pas les autres, & ne diminuent rien de leur prix. Ce n'est pas qu'il ne fust à desirer qu'il n'y en eust que de bons: Mais quoy, la nature semble auoir estably cette necessité parmy toutes les choses creées, n'y en ayant point de si parfaites, qu'il ne s'y treuve quelque defaut. L'or, l'argent & les pierres precieuses qu'on estime si fort, combien y a-il de peine auant qu'on les puisse mettre en leur perfection ? L'homme mesme-ment qui est son chef-d'œuvre,

avec tant de beautez dont elle l'a enrichy, à combien d'ordures, de maux, & de miseres est-il sujet? La Duchesse l'interrompant, luy dit. A la verité mô frere, i'ay bien ouy dire que le Conseil de l'Empereur est tenu pour vne cohue, qui est le terme des chiquaneurs. Mais que dit-on de cet autre Conseil de l'Empereur, où on ne parle que des affaires que les Sacrificateurs ont entr'eux? Ma sœur, respondit Anthenor, on y traite aujourd'huy de tout, & n'y a plus de Iurisdctions en Galatie qui n'entreprennent quelque chose les vnes sur les autres: Mais quant à cette-cy, la Deesse Astree n'y est pas mieux seruië qu'ailleurs; au contraire, il y a tant de ieunes Iuges qui y sont receus auât l'aage, falsifiants l'extraict du iour de

leur naissance, que c'est par miracle qu'ad'on obtient iustice d'eux, car ils ne se la sçauent pas faire à eux-mesmes. Et ces deux autres Cours, demanda la Duchesse, qui n'ont cognoissance que de l'administration des deniers de l'Empire, font-elles mieux leur de- uoir? O ma sœur, respondit An- thenor, elles font bien pis que les autres: aussi n'y parle-t'on que de voleries & de maluerfations, c'est le mot dont elles vsent, & auquel elles pechent le plus. Vrayement Monsieur, repliqua la Duchesse à son frere, vous estes beaucoup plus sçauant en toutes ces parti- cularitez que ie ne pensois pas: Mais dites moy comment viuent ces Arcopagites qu'on appelle Senateurs, & qui sont vestus de pourpre comme vous autres. Ma-

dame, respondit Anthenor à sa
sœur, encores qu'on m'accuse de
n'entendre pas le Latin, quoyque
ie sois grand Augure, si est-ce que
le grand Liure du monde où i'ay
fort estudié m'a appris vne infini-
té de secrets. Je vous diray don-
ques que les Areopagites sont ve-
ritablemēt les moins injustes Ju-
ges que nous ayons en Galatie, &
si vous en voulez sçauoir la rai-
son, c'est qu'ils sont vn si grand
nombre qui obseruent tous les
actions les vns des autres, qu'ils
ont honte de mal faire. Je ne voy
rien à redire en eux que trois cho-
ses. La premiere est, que les plus
anciens sont presque tous pen-
sionnaires de l'Empereur, & de
ses fauorits, ce qui leur est expres-
sément defendu par les Ordon-
nances : car quand il est question

d'autoriser par leurs suffrages quelque Edit qui est à la foule du peuple, non seulement ils n'y osent resister de peur de perdre leurs pensions, mais encores ils font aller de leur costé beaucoup des autres qui suivent leur opinion, sur l'esperance d'obtenir aussi vn iour comme eux quelque pension. Le second mal que ie remarque encores en ce grand corps, c'est qu'on y reçoit de ieunes hommes de vingt ans, quoy que leur institution porte qu'ils en doiuent au moins auoir vingt-cinq : Mais ils falsifient l'extraict du iour de leur naissance, & entrent ainsi avec cette tromperie en l'exercice de leurs charges, commençans par vne fausseté à rendre la Iustice. Le desordre qui en procede puis-apres n'est pas

petit ; car comme les ieunes gens se laissent emporter à leurs passions, n'ayants aucune experience, ils font mille fautes à la honte & au scandale de leurs confreres. Il y en a quelques-vns qui se marient avec des garces, d'autres qui iouient tout leur bien, & puis s'en veulent faire releuer comme mineurs, ce qui est ridicule. Quelquesfois les Sergens en treuuent en des lieux diffames, & les mènent en prison ne les cognoissans pas. J'en ay vû qui en ces mesmes lieux-là, ayant fait quelque insolence, & battu ceux qu'ils y auoient rencontrez, eurent le lendemain ce desclair de voir vne requeste qu'on vouloit presenter au Senat contr'eux. Je ne parle point des injustices qu'ils commettēt pour fauoriser leurs amis,

aussi dit-on qu'il y a deux excellents moyens pour les corrompre , & obtenir d'eux tout ce qu'on veut. Il ne faut que donner à leurs Clercs force argent, ou faire solliciter la cause par quelque belle femme. Le troisieme desordre qui est en cette celebre compagnie , c'est qu'au lieu qu'anciennement lors qu'on ne vendoit point les offices , & qu'on les donnoit à la vertu, on choisissoit de toutes les Prouinces de Galatie des hommes rares en science & en probité pour les en pourvoir ; Mais aujourd'huy toutes ces places sont presque remplies de Sirapisiens, qui sont enfans de Questeurs ou fils de Maîtres, les charges estans si cheres , qu'il n'y a presque maintenant que ceux-là qui en puis-

sent auoir. Ce desordre outre qu'il est fort prejudiciable à tous les Galatiens, qui sont presque exclus d'un si Auguste Senat, il est encores cause que difficilement y peut-on auoir iustice d'un procez si un Sirapisien sollicite au contraire, car ils s'obligent les vns les autres, & rendent leur brigue si puissante qu'il n'y a pas moyen d'y resister. Je ne croy pas, dit la Duchesse de Gonzanuert, qu'on fust bien receu d'eux si on leur tenoit ce langage. Et pourquoy, respondit Anthenor, sont-ils plus grands Seigneurs que les Princes du sang, voire mesme que l'Empereur de qui on ne craint point de parler, ny des affaires d'Estat dont on discourt sans cesse? D'ailleurs, ie ne dy pas qu'il n'y ayt de tres-gens de bien dans toutes ces

compagnies là, ie remarque seulement les defordres qui y sont, & qu'eux-mesmes cognoissent aussi bien que moy.

Il eust encores continué ce discours, sans que le sacrifice estant acheué tout le monde sortoit du Temple pour aller disner, ce qui fut cause que la Duchesse luy dit, Vrayement mon frere, ny vous, ny moy n'auons gueres prié la Deesse. C'est l'ordinaire, répondit Anthenor, que si l'on a quelque conte à faire, on le fait plus tost dans le Temple qu'ailleurs, & mesme à l'heure du sacrifice, en quoy on offense grandement les Dieux. Mais c'est vous qui m'avez diuertie, repartit la Duchesse, faites-en vne bonne penitence, cependant ie m'en retourne promptement chez moy, de

peur que Monsieur de Gonzan-
uert ne m'attende trop. En disant
cela elle sortit du Temple, & em-
mena avec elle Chrisolite que les
autres Damoiselles carressoient
desia à l'enuie les vnes des autres,
mais Callionne entre toutes s'en
tenoit infiniment pres.

La Duchesse s'en treuua si bien
seruie, qu'en moins de deux mois
elle en faisoit plus d'estat que de
toutes les autres : aussi Chrisolite
estoit si soigneuse & si humble, &
tesmoignoit tant d'affection au
seruice de sa maistresse, qu'elle en
demeura si contente, qu'elle luy
confioit toutes les plus importan-
tes affaires & les plus secretes
pensees. Le Duc de Gonzanuert
aymoit incroyablement Arfaynon
qui estoit son Escuyer, & luy don-
noit vne authorité absolue en sa

maison, comme il n'y a gueres de Princes ny de grands Seigneurs en Galatie qui n'ayent quelque fauory, auquel ils font plus de bien qu'à tous leurs autres seruiteurs. Arfaynon deuint si esperduëinēt amoureux de Chrisolite, qu'il luy parloit sans cesse d'amour, dont elle ne receuoit pas peu d'ennuy, & principalement quand il luy vouloit toucher le sein, ou luy porter la main par dessus ses robes, en cet endroit qui la pouuoit descouurir, & faire voir qu'elle n'estoit pas fille. Le bon-heur voulut pour elle que le Prince de Rontcandon ayāt receu quelque desplaisir de la Duchesse de Conforliche, se retira mal content de la Cour, & se rendit chef d'un party qui ruina presque l'Empire. Le Duc de Gonzanuert

suiuit Rontcandon, & ayant surpris en moins de huit iours cinq ou six des meilleures places de la Prouince de Rus, dont il estoit Gouverneur, commença le premier à battre la campagne. Cette guerre deliura Chrisolite des insupportables importunités d'Arfaynon, qui estoit tousiours auprès de son Maistre. Elle iouyssoit paisiblement de la présence de la Duchesse, qui redoubloit tous les iours en son endroit ses graces & ses faueurs, de sorte qu'elle auoit vne si extreme puissance en la maison, qu'elle dispoisoit de tout selon sa volonté. Mais, ô estrange merueille! tout cela luy augmentoit ses peines; car tant plus sa Maistresse luy faisoit paroistre de priuauté, & plus sa passion croissoit ainsi que le feu s'enflamme à mesure

mesure qu'on y iette du bois. Elle la deshabilloit tous les soirs, & luy donnoit tous les matins sa chemise, voyant bien souuent à descouuert les merueilles que les habits ont accoustumé de couvrir. Vne fois entr'autres la Duchesse resolut de se baigner trois iours durant, suiuant l'aduis des Medecins, qui croyoient que c'estoit le meilleur moyen dont elle püst se seruir pour auoir des enfans, parce que depuis cinq ans qu'elle estoit mariee, elle n'en auoit point encores eu. Elle fit donques preparer vn bain en sa chambre, où Chrisolite & Callionne la seruoient sans qu'aucune autre personne y entraist. O Cieux! le moyen d'exprimer les sentimens de Chrisolite, quand elle deshabilloit sa Maistresse

pour la voir toute nuë? Combien luy tarδοit-il en destachant vne espingle, que tout ne fust promptement osté de dessus elle? Hélas! deux iours auparauant que cela arriuaist, elle attendoit avec vne extreme impatience l'heure qui la deuoit rauir de ioye! Soit qu'elle beust ou qu'elle mägeast, soit qu'elle veillast ou qu'elle dormist, elle ne pensoit à autre chose qu'à cela; Mais que dis-je, elle ne pouuoit ny boire ny manger, ny dormir: car les pensees dont son esprit s'entretenoit luy faisoient mespriser toute autre sorte de plaisir. En fin la Duchesse estant aupres du feu osta elle-mesme sa chemise, Chrisolite & Callionne tenans deuant elle vne robe de chambre, afin qu'elle ne sentit point de froid. Ah! Enne-

midor, que devintes-vous alors? Certes estant changé d'homme en fille, peu s'en fallut que de fille, vous ne fussiez changé en statue, puisque vous demeurastes sans parole, sans force, & sans mouvement, & croy que si vous n'eussiez point esté auprès de tant de viues flamines qui embraseroient vostre ame de desirs, vne froide sueur qui vous glaça le cœur vous eust donné la mort. Mais quelles peines & quels tourmens ne souffristes-vous point, quand apres que la Duchesse sortit du baing, vous eustes charge de l'essuyer dans son liect, avec les linges que Callionne vous chaufait? L'ayant long-temps essuyée d'un costé, comme elle se tournoit de l'autre vous luy baistastes cinq ou six fois la plante des pieds, non tant

pour luy tesmoigner le grand respect que vous luy portiez , que pour auoir sujet de luy baiser autre chose puis apres : Mais, ô feinte Chrisolite , vous n'osastes toutefois iamais, craignant de paroistre trop libre & trop lasciue, baiser l'endroit que vous aymiez le plus , quoy que vous portassiez hardiment & amoureusement la bouche sur toutes les autres beautez de son corps. Le second iour qu'elle se baigna , comme vous la seruiez ainsi que le iour auparauant, & qu'elle & vous estiez desia accoustumees à cela, & moins honteuses l'vne & l'autre que la premiere fois, vous la touchiez beaucoup plus librement que vous n'auiez point encores fait. Aussi vites vous des choses dont la veuë vous cousta

puis-apres bien cher, & sentistes
vne émotion si extreme, que vo-
stre cœur ne la pouuant souffrir
vous tumbastes éuanouie, & vous
bleçastes bien fort la teste en
tumbant. La Duchesse s'esueilla
au bruit, & vous voyant en cet
estat avec beaucoup de sang que
vous perdiez, se ietta toute nuë
du liët en la place pour vous se-
courir. Callionne y accourut aussi-
tost, & vous tirant les cheueux fit
tant que vous reuintes à vous;
Aussi-tost que vous ouuristes les
yeux, & que vous vistes nuë la Du-
chesse qui vous tenoit embrassée,
vous vous pasmastes encores de
nouveau. La Duchesse qui creut
que la chaleur & l'estouffement
qui estoient en la chambre vous
auoient causé cet accident, prit
promptement sa chemise & cou-

rut ouvrir les fenestres, puis iet-
tant vne robe sur ses espauls ap-
pella du secours. Ses Damoiselles
estant venuës on deslaça vos ro-
bes, & vous donna t'on tant de
bons remedes, que vous repristes
encores vos esprits. Et quoy ma
chere amie, vous dit alors la Du-
chesse, vous voyāt vn peu mieux,
d'où procede vostre mal ? Vous
luy respondites en soupirant, &
en la regardant d'un œil qui sem-
bloit luy demander la vie. Helas!
Madame, ie croy que ie me por-
teroie bien, si ie pouuois vous di-
re ma maladie, *parce qu'un mal bien
cogneu est à demy guery.*

Chrisolite disant cela versa vne
si grande abondance de larmes,
& soupira si fort, que Madame
de Gonzanuert & toutes ses Da-
moiselles en eurent pitié, & ne

purent s'empescher de pleurer, croyant qu'elle souffroit de grandes douleurs. Cependant on la mena dans sa chambre, & luy ayant pensé sa blesseure & aydé à se deshabiller, elle se coucha dans son liét, & la Duchesse se remit dans le sien, estant fort affligee de ce que Chrisolite, qu'elle aymoit plus qu'aucune autre, fust devenue malade en la servant; parce qu'elle croyoit, ainsi qu'il estoit vray, que cela luy estoit arrivé pour s'estre trop tourmentee à l'essuyer, & pour avoir eu trop grand chaud. Le lendemain Callionne & vne autre de ses compagnes acheuerent de faire baigner la Duchesse, qui le soir alla voir Chrisolite, & luy dit: Et bien, ma grande fille, comment te treuves-tu? Madame, respon-

dit-elle , le plus grand mal que
j'ay maintenant , c'est de n'avoir
pas continué à vous servir en vo-
stre baing, & de ce qu'une autre a
eu ce bon-heur que ie tenois si
cher. Vrayement, luy repartit la
Duchesse, ie voudrois que tu te
fusses bien portée, tant parce que
ta santé m'est en grande recom-
mandation, que parce que j'ay
esté fort mal servie de Callionne,
qui ne sçauoit pas m'essuyer. La
Duchesse apres auoir esté là vn
peu de temps, s'en retourna en sa
chambre, & Callionne fit porter
en celle de Chrisolite, avec qui
elle couchoit, de quoy se baigner,
parce que les medecins luy auoiēt
dit, que le baing luy osteroit les
les rougeurs qui luy venoient au
visage. Apres qu'elle se fut bai-
gnée, elle se mit toute nuë aupres

de Chrisolite, qui l'essuyant aperceut qu'elle auoit sur l'une des fesses vne marque ronde grande comme vn sol, & rouge comme du feu. Elle luy demanda ce que c'estoit. C'est, respondit Callionne, vne marque que i'ay apportee du ventre de ma mere, qui m'a dit qu'estant grosse de moy, elle eut enuie de manger vne cerise, & que n'en ayant pû treuuer, parce que c'estoit en hyuer, elle porta sans y penser sa main sur elle, au mesme endroit que i'ay la marque que vous voyez, qui à cause de cela m'est venue au mesme lieu où elle se toucha. Vrayement, dit Chrisolite, voila qui est estrange, & n'auois iamais ouy dire que les meres ne pouuans contenter leurs appetits desordonnez, en laissassent les

marques à leurs enfans . Je voy bien que vous n'estes gueres sçauante, adioustâ Callionne, imaginez-vous que cela est fort ordinaire, & qu'il n'y a presque personne au monde qui n'ayt sur soy quelque marque naturelle, & m'asseure que vous-mesmes en auez quelqu'une, monstrez-moy que ie voye : Et en disant cela elle voulut leuer la chemise de Chrisolite, qui porta promptement la main au deuant, & luy dit. Non, ma chere compagne, ie sçay bien que ie n'en ay point. Callionne ne se contentant pas de cela, se ietta en mesme temps sur elle pour y regarder. Mais Chrisolite à qui cette curiosité ne plaisoit point, parce qu'elle craignoit qu'estât descouuerte, elle ne fust contrainte de s'elloigner d'au-

pres de la Duchesse, dont la presence luy estoit plus chere que sa propre vie, luy respondit en colere. Certes, ma sœur, vous estes importune, vous sçavez bien que ie me porte mal, obligez-moy tant que de me laisser en repos. Callionne qui brusloit d'enuie de la voir nuë, croyant qu'elle estoit la plus belle fille du monde, fut fort fâchée d'estre ainsi rebutee, & se tournant d'un autre costé pour prendre sa chemise, luy dit avec un grand dépit. En verité vous estes d'une mauuaise humeur, madame qui est bié aussi belle que vous, ne se cache point tant que vous faites. Chrisolite ne respondit rien à cela, mais prenant Callionne par la teste avec les deux mains, la baïsa & se mit à la flatter.

Le lendemain Callionne se-
stant leuee pour aller treuver la
Duchesse, Chrisolite fut tellemēt
abatuë d'ennuys & de tristesse,
qu'elle n'eut pas la force de se le-
uer. Elle auoit sans cesse deuant
les yeux l'idee de ce qu'elle auoit
vû, & ne sçauoit aucun moyen
d'en iouyr. Ah ! miserable Enne-
midor, disoit-il, en quel estat suis-
je reduit ? Helas ! ie suis dans l'eau
iusques aux levres, & il m'est im-
possible d'amortir l'ardeur de
la soif qui me brusle ! Si ie des-
couure mon tourment à celle qui
en est cause, ie suis assure que
cela ne seruira qu'à l'augmenter,
car elle ne me voudra plus voir :
De le souffrir aussi sans aucune
esperance de remede, ie dois me
resoudre aux plus violentes & aux
plus insupportables douleurs qui

se peuuent imaginer. Ah ! mort, que ne me tires-tu de ce monde, pour me dégager de tant de peines qui m'accablent ? Cruelle & cent fois cruelle loy qui nous contraints de viure. Ah ! qu'à bon droit ie me plains de ne m'oser plaindre, *puisque c'est vn soulagement de dire son ennuy, & que la rigueur est extreme qui punit les plaintes ainsi que des crimes !* Il se teut acheuant de dire cela, & se couchant le visage contre le cheuet, versa tant de larmes qu'elles estoient capables de le noyer, si elles n'eussent point passé au trauiers du linceul, & du trauersin qui en furent entieremēt mouïllez. Apres auoir long-téps pleuré de cette façon, il se remit en son seant, & soustenant sa teste de la main droite qu'il appuyoit sur

son genoüil, il fut vn peu sans rien dire , soupirant & sanglottant sans cesse, & ses yeux ressemblans à deux gouttieres d'où la pluye tombe à grosses gouttes. En fin croisant les bras sur son estomac, & regardant le Ciel par vne fenestre qui estoit vis à vis de son liect, il s'écria d'une voix languissante. Ah Soleil ! flambeau du iour, tu ne verras iamais personne si triste que ie suis, hélas ! tu ne luys plus pour moy, car ie suis mort pour toute sorte de ioyes, & vif seulement pour le desespoir. I'estois heureux & ioüissois avec contentement de ta belle lumiere, quád elle me fit voir le plus grand miracle de beauté que la nature a iamais fait. Mais ô Cieux ; continua-t'il, en estendant les bras & abaissant sa veüe, de quel horri-

ble blasphème ne me rends-je point coupable de parler ainsi? Pardonnez-moy, ô merueille du monde. Pardonnez moy, ô mes chers desirs, si l'extreme regret que j'ay de ne vous pouvoir entierement posseder, arrache de ma bouche des plaintes esloignées de la raison, & contraires aux sentiments de mon cœur. Je benis & beniray toute ma vie, ainsi que ie dois, l'heure à laquelle j'ay perdu ma liberté, puisque par cette perte j'ay eu le moyen de voir, de manier & de baiser ce qui est caché aux Dieux, qui acheteroient s'il leur estoit possible mon bon-heur au prix de leur divinité. Ah! quand ie me represente ce que mes yeux ont vû, & ce que ma bouche & mes mains ont touché, ie cheris les peines

qui m'ont donné tant de ioyes.
O ma Deesse, avec combien de franchise vous estes-vous abandonnée à moy? Vous vous laissiez tourner & manier par tout comme vn enfant plein de naïveté & d'innocence. Comme il disoit cela, Callionne entra dans sa chambre, & luy dit que la Duchesse le demandoit; Je m'en vay la trouver, respondit t'il, obligez-moy tant que d'attédre vn peu icy que j'aye pris ma iupe. Il faut, repliqua Callionne, que ie m'en retourne promptement, ie luy diray que vous venez: En disant cela elle sortit, & Chrisolite dit: Ah! Callionne, que j'apprehéde ton indiscrete curiosité! que ie crains que ta main ne te fasse cognoistre ce que tes yeux n'ont pû voir! A la verité elle auoit bien
raison

raison de craindre cela, car Callionne estoit tellement embrassée de son amour, quoy qu'elle l'estimast fille, qu'il ne se passoit point de nuict qu'elle ne la baisast & ne l'embrassast plusieurs fois, avec autant d'ardeur que si elle eust veritablement sceu que c'eust esté vn garçon. *Et qui doute que les femmes n'outragent aussi bien la nature entre elles, que les hommes font entre eux?*

Aussi-tost que la Duchesse de Gonzanuert vid Chrisolite, elle luy dit: Ah! ma chere amie, que ie suis en vne grande peine! Monsieur de Gonzanuert mon mary m'a mandé que i'aille à Gonzanuert le plustost qu'il me sera possible, afin de contenir les habitans en son obeïssance, & empescher qu'ils ne reçoivent aucune

garnison de la part de l'Empereur qui les en fait solliciter sans cesse. D'ailleurs le Duc de Meuridas & mes deux autres freres se sont cette nuit retirez de la Cour, & ont emmené avec eux la Reyne de Regnaut-chanfort ma sœur sans me donner aduis de leur dessein, sinon à ce matin qu'Hipophilon m'est venu dire qu'ils l'auoient laissé pour me conduire où ils sont. Considere si ie n'ay pas sujet d'estre grandement affligee, ne sçachant quelle resolution ie dois prendre. A peine auoit-elle acheué de dire cela, que l'Esbiliere qui depuis cinq ou six iours, sous pretexte de la visiter, ne bougeoit de son logis pour obseruer ses actions, entra en sa chambre & luy dit. Madame, l'Empereur m'a commandé

de demeurer auprès de vous, & de vous dire que vous ne partiez point de ceans iusques à ce que la Majesté en ayt autrement ordonné. Et quoy, respôdit la Duchesse toute en colere, me veut on tenir prisonniere? Est-ce ainsi qu'on traite les Princesses de ma sorte? Ah! ie voy bien, ce sont les conseils de Gardenfort, & de la Duchesse de Conforliche qui s'unissent ensemble pour nous perdre, mais ils prennēt mal leur temps. Ils ruineront l'Empire par leur violence, qui est arriuee iusques à vne telle extremité, qu'il n'y a aujourd'huy pas vn homme de bien en Galatie qui soit en seureté de sa vie, de sa fortune, & de son honneur s'ils n'ont leurs bonnes graces, & il est impossible de les acquerir qu'en se rendāt coul-

pable de mille sortes de crimes. Ah ! bon Prince , digne fils du grand Bournonuarre , & de la chaste Cimedede, quand est-ce que vous sortirez de Page, & que vous chastirez exemplairement ceux qui abusent de vostre autorité? Madame, luy dit l'Esbilliere, vous estes en colere pour moy, ie n'entends point tout ce que vous dites. Ah ! Monsieur de l'Esbiliere, luy dit la Duchesse , i'ay sujet d'y estre & de me plaindre de vous, qui sous couleur d'estre des amis de Monsieur mon mary me veniez tous les iours voir, pour prendre garde à moy & pour descouvrir mes intentions. L'on m'auoit assez aduertie que ie me deffiasse de vous, & que iour & nuict ma maison estoit environnee de vos soldats, pour voir qui y entroit &

qui en sortoit. Madame, respōdit l'Esbilliere, ie suis fort homme de bien, & n'ay iamais esté espiō: mais puisque vous vous plaignez de moy, ie vous laisseray icy mon Lieutenant. Ah! traistre, & le plus meschant homme qui soit dans l'Empire, repliqua la Duchesse; transportee de dēpit, as-tu bien l'effronterie de me parler de la sorte, & de me menasser de me faire garder par ton Lieutenant? Asseure-toy que si il entre dans ma chambre ie l'estrangleray. Sors-en promptemēt toy-mesme si tu ne veux qu'on te iette par les fenestres. Je n'ay point offensé l'Empereur, & ne crains rien. Si Gardenfort & sa bonne amie se plaignent de moy, ie suis autant qu'eux, & ne recognois point leurs cōmandemens. L'Esbilliere

ne fut iamais si estonné que d'oüir
ce langage, aussi ne se fit-il pas di-
re deux fois qu'il sortist. Il se re-
tira dans l'anti-chambre, & en-
uoya son Lieutenant faire à la
Duchesse de Conforliche vn fidel
rapport de ce qui s'estoit passé. Le
Lieutenant fit ce que son Capi-
taine luy auoit commandé: mais
du depuis voyant la persecution
qu'on faisoit au Duc de Gonzan-
uert, il en eut tant de regret qu'il
se passa son espee au trauers du
corps, & vomit son ame avec son
sang. La Duchesse de Conforli-
che manda à l'Esbiliere qu'il ne se
presentaist point deuant la Du-
chesse de Gonzanuert; mais qu'il
l'empeschast seulement de se sau-
uer & de parler à qui que ce fust,
sinon à ses domestiques. Cela fut
cause qu'il arresta prisonnier Hi-

pophilon qui venoit pour sçavoir quand elle vouloit partir pour aller treuver ses freres. En ayant eu incontinent aduis, cela la fit resoudre à se sauuer, craignant qu'on ne l'outrageast si son mary auoit de l'aduantage sur les troupes de l'Empereur. Elle cōmuniqua son intention à Chrisolite & à Callionne, qui luy conseillerēt de se déguiser & de se sauuer la mesme nuit. Madame vous pouuez, luy dit Chrisolite, enuoyer vn carrosse vous attendre à six lieues d'icy, & prendre des chevaux que vous ferez tenir à cent pas hors du faux-bourg pour vous porter iusques-là. Nous sortirons de ceans & de la Ville que personne ne nous cognoistra, car vous auez la commodité de vostre jardin, où l'on ne prend

point garde. Ce conseil pleut à la Duchesse, qui pour auoir moyen de l'executer dès qu'il feroit vn peu noir, se mit dans le liect feignant de se treuuer mal. Chrisolite ayant eu la charge de tout ce qu'il conuenoit, se fit apporter par Glacidas, sans que personne en vist rien, les habits d'hommes qui estoient necessaires pour leur entreprise, & enuoya à six lieües de Sirapis vn carrosse qui n'estoit point cognu. Il fit aussi tenir au bout du fauxbourg deux excellentes hacquenees pour sa Maistresse & pour Callionne, & vn fort bon barbe pour luy. La Duchesse ne vouloit pas se mettre en chemin qu'elle n'eust son Escuyer avec elle: Car, disoit-elle, comment nous pourrons-nous conduire si nous n'auons point

d'hommes? Madame ne craignez point, luy respondit Chrisolite, ie vous rendray Dieu aydant dans deux iours à Gonzanuert sans aucun peril. La Duchesse consentit à cela, & dés qu'elle eut vn peu soupé avec ses deux confidentes, elle fit sortir tout le monde de sa chambre, & commanda qu'vn chacun se retirast sans faire du bruit, parce qu'elle vouloit reposer. Apres cela Chrisolite & Callionne retournerent la treuuer, & s'estans toutes trois déguisees en hommes, descendirent par vn petit degré dans le jardin qui auoit vne sortie sur le rempart, où estât arriuees elles marcherent le long de la muraille iusques à la porte de la Ville, & se rendirent où estoient leurs cheuaux sans aucun empeschement. Ayants monté

dessus elles marcherent au pas toute la nuit , & arriuerent vn peu auant iour où leur carrosse les attendoit, dans lequel elles se mirent sans perdre temps , & y dormans vn peu firent encores six lieuës. Apres auoir disné & fait repaistre les cheuaux, Chrisolite remonta sur son barbe, disant à la Duchesse qu'elle y estoit desja toute accoustumee, & qu'il estoit necessaire que quelqu'un prist garde au chemin. Elles auoient encores deux lieuës iusques à la couchee quand le Soleil commençant à pallir & à se baisser, elles entrerent dans vne grande lande où elles virent trois hommes bien montez, qui emmenoit par force vn ieune garçon doüé d'une exquisite beauté, qui les voyant les supplia de le secou-

rir. La Duchesse & Callionne
tremblants de peur ne respondi-
rent rien, ce qu'apperceuant les
trois voleurs vinrent à elles, &
leur dirent leur portant le pisto-
let à la teste, qu'il se falloit rendre
& aller avec eux. Hé! Messieurs,
leur dit la Duchesse, nous ferons
tout ce qu'il vous plaira, il n'est
point besoin d'vser de violence
pour nous contraindre à vous sui-
vre. Ennemidor qui estoit vn peu
demeuré derriere pour acourcir
ses estriuières, voyant que le car-
rosse quittoit le grand chemin
pour aller apres ces trois hom-
mes, pensa mourir de dépit se
doutant bien de ce que c'estoit.
Il mit aussi-tost vn pistolet à la
main, & poussant son cheval iuf-
ques aux trois voleurs, leur de-
manda où ils vouloient mener sa

compagnie. En vn lieu où il faut que vous veniez vous-mesme, luy respondit l'un d'entr'eux: Mais à peine auoit-il acheué de dire cela, qu'Ennemidor luy donna du pistolet dans la teste, dont il luy fit voler la ceruelle en l'air: & au mesme temps reprenant vn autre pistolet, reuint contre les deux autres qui se preparoient à vanger la mort de leur compagnon: Toutefois leurs deux coups ne l'ayans blessé que legerement, le sien en porta encores vn mort par terre. Le cheual du dernier estant ombrageux s'aculla contre le carrosse, ce que voyant Ennemidor mit l'espee à la main, dont il luy donna si grand coup sur la teste, que l'ayant mise en deux le sang en rejallit iusques dans le carrosse sur la Duchesse, qui en

fut couuerte. Apres cela il s'ap-
procha d'elle, & luy dit. Mada-
me, nous pouuons maintenant
cōtinuer nostre chemin; car ceux
qui nous en vouloient faire pren-
dre vn autre, sont en estat de ne
nous nuire iamais. Certes, Chri-
solite, ie croy que ce que ie voy
est vn songe, ne me pouuant
imaginer qu'une fille puisse a-
uoir tant de valeur que vous en
auez fait paroistre. Madame, re-
partit Chrisolite, c'est vostre pre-
sence qui m'a donné le bon-heur
& la force de la seruir. Mais il est
tard, & nous ne pourrons aller
coucher où nous auions resolu; si
vous le treuuez bon, ie suis d'ad-
uis que nous nous arrestions au
premier village que nous treu-
uerons. I'en suis fort contente,
dit la Duchesse, cependant entrez

dans le carrosse, car i'ay peur que vous ne soyez fort blessée. Non, non, respondit Chrisolite, ce ne sera rien, il vaut mieux que ie demeure à cheual, de peur qu'il ne nous arriue encores quelque accident. En disant cela, elle commanda au Carrossier d'aller vn peu viste, neâtmoins ils n'auoient pas fait demy-lieuë, que la nuit deuint si obscure qu'ils ne voyoient point du tout, & ne sçauoient où aller. En fin ne cognoissans nullemēt où ils estoiet, le Carrossier vid vn peu de lumiere à main droite, dont il les aduertit, & leur demanda s'il tourneroit de ce costé-là. On luy dit qu'ouy, mais comme il voulut tourner pour y aller, il versa le carrosse sans toutefois que la Duchesse ny Callionne en receussent

aucun autre mal qu'une extreme peur. Chrisolite entendant leur cry y accourut incontinent, & mettant pied à terre fit si bien qu'elle les dégagea du carrosse, & les tira dehors, puis leur dit qu'elle alloit querir de la lumiere, mais la Duchesse l'en empescha, luy disant qu'elle ne vouloit pas qu'elle la laissast, & qu'il valloit mieux y enuoyer ce ieune garçon qu'elle auoit deliuré des mains des voleurs & qui tenoit son cheual. Chrisolite voyant cela, luy dit. Monsieur voulez-vous prendre la peine de donner au galop iusques où vous voyez du feu, afin de nous en apporter, & de nous faire venir quelqu'un pour nous secourir? Delphis, ainsi s'appelloit le ieune homme, laissant le cheual d'Ennemidor qu'il

tenoit par la bride, poussa le sien droit où il voyoit de la clarté, & estât arriué à vne fort belle maisō de Gentil-hōme frappa à la porte, mais personne ne luy respondit. Il redoubla ses coups, & cria plusieurs fois qu'on luy ouurist, ou qu'on parlast à luy. Pour tout cela il n'eut aucune responce, & n'oüit que des chiens qui iappoient. Ne pouuant donques rien faire là, il s'en retourna à Chrisolite, & luy dit qu'on n'auoit voulu ny luy ouurir, ny parler à luy, & qu'il n'auoit ouy que de gros mastins qui venoient iapper iusques deffous la porte, comme s'ils eussent voulu la deuorer. La Duchesse entendant cela se mit à pleurer, & sans Chrisolite qui la consola elle eust fait tant de plaintes, qu'il eust esté aisé au cocher & à son

valet,

valet, voire mesme à Delphis de la cognoistre. Comme elle se fut vn peu appaisée, Chrisolite monta sur son cheual pour aller voir si elle ne feroit point mieux que Delphis. Elle frappa vn quart-d'heure tout ainsi que si elle eust voulu rompre la porte, mais ce fut en vain, car personne ne vint à elle. On luy tira seulement deux coups d'arquebuse, dont les balles luy passerent fort pres des oreilles, ce qui la mit en vne telle colere qu'elle commença à iurer qu'elle s'en vengeroit, & feroit brusler la maison auât que huit iours fussent passez. A peine auoit-elle dit cela, qu'un homme mit la teste à la fenestre, & dit, Je n'y seray plus r'attrapé, ie mourray mille fois plustost que d'ouurir, & si vous ne vous retirez, vous

n'en serez pas quittes à si bon marché que ceux qui ont tué mes parents. Ah! Monsieur, respondit Ennemidor, nous ne sommes point voleurs ; C'est le neveu de Monsieur le Duc de Gonzanuert, qui s'en allant treuver son oncle a esté attaqué à vne lieuë d'icy par trois grands pendarts, qui l'eussent volé & peutestre tué s'il ne se fust deffendu. Il vous coniure de luy enuoyer vn peu de lumiere, & quelques vns de vos gens pour ayder à releuer son carrosse qui est versé à cent pas d'icy. Felissard, ainsi se nommoit celuy qui estoit à la fenestre, entendant parler du Duc de Gónzanuert, prit vne chandelle en la main, & regardant Ennemidor & Delphis, qui estoient en bas, iugea aussi-tost qu'ils n'e-

Estoient pas des voleurs, ce qui luy fit dire: Messieurs, ayez s'il vous plaist vn peu de patience, ie m'en vay vous faire entrer ceans. En disant cela, il appella deux hommes qui estoient avec luy, & leur dit qu'ils allassent recognoistre qui estoient ceux qui disoient appartenir au Duc de Gonzanuert. Ces deux hommes estans descendus en bas, & ayans abattu vn pont-leuis, allerent ouurir la porte de la basse court où Ennemidor & Delphis auoient frappé. Quand ils les virent si ieunes, si beaux, & si bien montez, ils ne leur demanderent rien, mais les firēt aussi-tost entrer, & l'vn d'eux retourna tousiours courant dire à Felissard qu'il ne les cognoissoit point, & que c'estoient deux hommes les plus beaux qu'il eust

iamais vûs , ayant chacun vn fort bon cheual. Felissart courut aussitost à eux , & leur dit : Messieurs, puisque vous appartenez à Monsieur le Duc mon bon maistre, vous pouuez disposer de moy , de cette maison, & de tout ce qui est dedans, allons nous en au lieu où est vostre carrosse. En disant cela, ils s'acheminèrent où il estoit, & firent marcher deuant eux les deux hommes avec des lanternes . La Duchesse estoit en vne extreme peine à cause des deux coups d'arquebuze qu'on auoit tirez, & ne sçauoit que penser; de sorte que quand elle vid Chrysolite, elle fut infiniment ayse. On releua le Carrosse où ils se mirent tous & s'en allerent chez Felissart, qui voyant ses hostes si ieunes & si beaux, ne pouuoit cognoistre

qui estoit le nepueu du Duc de Gonzanuert : Neantmoins parce qu'Ennemidor auoit meilleure mine de Cavalier que les autres, il creut que c'estoit luy, & aussi que la Duchesse luy auoit commandé, ayant sceu ce qui s'estoit passé, de le faire ainsi croire, afin qu'elle ne fust point obligee à parler beaucoup, de peur qu'on ne descouurist à sa parole que c'estoit vne femme. Felissart dit dōques à Ennemidor : Monsieur, ie vous supplie tres-humblement de me pardonner, si n'ayant pas le bon-heur de vous cognoistre ie vous ay si mal receu. Ie craignois que ce ne fussent encores les melmes voleurs qui vinrent voler feu mon frere ceans il y a quelques quatre mois. Et quoy, dit Ennemidor, emportèrent-ils.

beaucoup? Comment Monsieur, repartit Felissart, n'avez-vous point sceu ce qu'ils firent? Point du tout, respondit Ennemidor. Si vous avez agreable, adiousta Felissart, que ie vous en fasse le conte vous le treuuierez ie m'asseure plus estrange du monde. Mais approchons-nous vn peu du feu, car il fait encores froid.

En disant cela, il leur fait donner des sieges, & la Duchesse au lieu de s'asseoir, demanda à Ennemidor sil n'estoit point blessé. Certes, luy dit-elle, Monsieur, il me sēble que vous avez quelque blesseure, car ie vous voy tout couuert de sang. Felissart oyant cela, & voyant que la Duchesse disoit vray, se ietta de genoux aux pieds d'Ennemidor, & luy dit. Ah! Monsieur, prenez s'il vous

plaist pitié de moy, & me pardonnez l'outrage que ie vous ay fait ne vous cognoissant point. Ennemidor le regardant d'un œil riant le releua, & luy dit que ce n'estoit pas luy qui l'auoit blessé, que c'estoient trois voleurs qui l'auoiēt attaqué au commencement de la lande, luy racontant avec vne grande modestie, & avec la meilleure grace du monde tout ce qui s'estoit passé. Monsieur, luy dit Felissart, il faut que vous ayez receu quelque grande blesseure, car voila du sang iusques dans la place : Monstrez-moy s'il vous plaist ce que c'est, & ie vous penseray fort bien. Ennemidor ne vouloit point se deshabiller, mais il en fut tant pressé par la Duchesse, qui craignoit infiniment de le perdre, qu'il fut contraint

de luy obeïr. Ils monterent doncques tous dans vne chambre, où il y auoit deux liets & vn fort bon feu. Ennemidor ayant osté son pourpoint, treuua qu'il estoit blessé à l'espaule d'une balle qui luy auoit vn peu emporté de la chair. Felissart luy mit dessus vn linge trempé dans de l'huile & du vin, qu'il auoit long-temps battus ensemble. Apres cela, ils virent qu'il ne laissoit pas encores de saigner, comme à la verité il perdit tant de sang, que comme on cherchoit où estoit sa blesseure, le cœur luy faillit si tost qu'il eut senty la chaleur du feu. Il tumba presque entre les bras de la Duchesse, qui n'ayant pas la force de le soustenir, cheut par terre avec luy. Tous ceux qui y estoient s'écrierent pensant qu'il

fust mort, il n'y eut que Felissart qui ne s'estonnant point com-
mença à le releuer, & luy ietta
force eau au visage; mais c'estoit
en vain, car ses esprits estoient
tellement assoupis qu'on ne les
luy pût faire reuenir. La Duchesse
se desesperoit, & Callionne s'affli-
geoit comme si sa vie eust dépen-
du de la sienne, mais tout cela
n'estoit rien au prix des regrets
que faisoit Delphis. O Cieux, di-
soit-il, en s'arrachant les cheueux,
est-il possible qu'apres tant de
peines & de dangers, vous m'ayez
fait venir icy pour y souffrir le
plus grand tourment que ie pou-
uois iamais ressentir? Ah! que la
mort m'eust esté beaucoup plus
agreable, que de voir mourir ce-
luy qui m'a sauué la vie! Felissart
cependant ayant destaché le haut

de chauffe à Ennemidor , reconnu qu'il estoit blessé à la cuisse par où il perdoit beaucoup de sang. Il l'estuua bien avec du vin & de l'huile , puis y mit vne emplastre fort souveraine pour estacher le sang , & pour guarir les playes qui ne coupent ny veines, ny arteres. Ennemidor estat pensé, Felissart dit qu'il falloit le coucher, mais comme on acheuoit de le deshabiller , il ouurit les yeux & reprit ses esprits , dont toute la compagnie fut infinimēt ioyeuse , & encores plus quand il demanda avec vne voix fort bonne , ce qu'on luy vouloit faire. Il auoit honte de se voir en l'estat où il estoit deuant la Duchesse, quoy qu'on ne luy eust rien vû que l'estomac, l'espaule & les cuisses qui estoient si blanches , que

tous ceux qui les regarderent en furent estonnez. Non, non, dit-il, ie me porte fort bien, & ne me veux pas si tost coucher. Toute la compagnie neantmoins l'en pria fort instamment, & Felissart sur tous les autres à qui il dit en riât: Je croy, monsieur, que de peur de me dōner à souper vous me voulez enuoyer au liēt, ie me sens toutefois fort bien, & ne suis pas si mal que vous pensez. Il est vray, respondit Felissart, que vos bleffures ne sont pas dangereuses, & espere que demain vous vous porterez bien; Je n'apprehende qu'une chose, c'est que vous ne foyez si mal traittez ceans, que cela ne vous fasse malade; car depuis le malheur qui est arriué à mon frere, ie n'ay presque point demeuré icy, & n'y ay tenu que

fort peu de meubles. Mais Monsieur, dit Ennemidor, contez nous si il vous plaist ce qui est arriué ceans. Monsieur, répondit Felissart, ce sera dès que vous aurez soupé, car il est desia tard, c'est pourquoy ie m'enuoys promptement donner ordre qu'on vous serue ce qu'il y a.

Pendant qu'on soupoit, Delphis auoit presque tousiours les yeux sur Ennemidor, qui n'estoit pas aussi moins attentif à le considerer ; de sorte que leurs regards se rencontrants, ils eurent honte l'un de l'autre, dont la couleur leur en vint au visage. Cela fut cause que Delphis ne tourna pas si souuent sa veüe de ce costé-là, s'apperceuant qu'Ennemidor auoit presque tousiours la sienne arrestee

sur luy : Côme à la verité , depuis qu'il le vid rougir , il le regarda encores plus attentiuement qu'il n'auoit point fait. En fin apres qu'on eut déseruy , Felissart dit adressant sa parole à Ennemidor. Monsieur , i'ay vn extreme regret de vous auoir mal traitté , & vous supplie de m'excuser de ce que ie vous ay fait ieusner : mais à mon aduis vous en auez bien fait porter la penitence à ceux qui en sont cause ; Car i'estime que ceux que vous auez tuez , ainsi que m'a conté vostre Carrossier , sont ceux qui en me priuant de mon frere , m'ont priué de toute sorte de consolation. Monsieur , respondit Ennemidor , nous ne nous pouuons plaindre si ce n'est de l'excez de la bonne chere que vous nous auez faite : Mais obligez-

nous, s'il vous plaist, de nous dire le malheur qui est arriué à vostre frere. Ah ! Monsieur, repliqua Felissart, il y a environ quatre mois que deux heures apres auoir soupé, & comme il estoit prest à se mettre au liect. *O Cieux, qui s'osera assseurer en se leuant le matin de pouuoir viure tout le iour ?* Il ouyt fraper à la porte, & commanda à l'un de ses valets d'aller voir qui c'estoit. Ce valet qui ouurit la porte dès qu'on luy eut respondu, Amis, fust poignardé pour recompense de son imprudence. Ceux qui entrerent estans arriuez au pont-leuis, & treuuant la porte de la seconde court fermee y fraperent côme ils auoient fait à l'autre, ne s'aduisant pas que celuy qu'ils auoient tué en auoit la clef. Mon frere oyant ce bruit,

demanda si on n'auoit pas esté
sçauoir qui c'estoit: On luy dit
qu'ouy, mais que celuy qu'il y
auoit enuoyé n'estoit point reue-
nu. Cependant on continuoît à
fraper plus fort qu'auparauant,
c'est pourquoy il cōmanda qu'on
allast promptement à la porte.
Plusieurs partirent pour s'y en al-
ler, car il auoit grand nombre de
seruiteurs fort prompts à le ser-
uir, mais il n'y en eut qu'un qui y
courut, & qui estât mieux aduisé
que le premier ne voulut point
ouurir, quoy qu'on luy respondit
amis. Quels amis demãda-t'il? qui
estes-vous? Ouure, ouure, luy dit
l'un de ceux qui vouloient en-
trer, tu nous fais bien tarder. Je
ne vous ouuriray point, repartit
le valet, qui estoit habile hom-
me, si vous ne me dites vostre

nom, & ce que vous desirez. Certes, luy repliqua l'autre, ton compagnon qui m'a ouuert la premiere porte, & qui met mon cheual à l'Escurie ne m'a point tant fait de questions. Il n'en est pas plus sage, adiousta celuy-cy, & vous assure puis qu'il est si tard, & que ie ne vous cognois point, que ie ne vous ouuriray pas si vous ne me dites comment vous vous appelez, & ce que vous cherchez à l'heure qu'il est. Je m'appelle Turiuiere, luy dit le voleur, & viens de la part de Felissart pour dire à son frere quelque chose de grande importance. Et bien, repartit le valet, ayez vn peu de patience, ie m'enuois en aduertir mon Maistre. Le voleur se mettant en colere, iura & dit qu'on le faisoit trop tarder, & que

que cela me prejudicieroit grandement. Mais le valet sans auoir esgard à ce qu'on luy disoit, ne voulut point ouurir qu'il n'eust dit à mon frere que c'estoit vn homme de ma part nommé Turuiere, qui luy vouloit dire quelque chose de grande importance. Mon frere n'ayant aucun ennemy, & ne se doutant nullemēt de la trahison, commanda qu'on le fist entrer. Dés que la porte fut ouuerte, le pauvre valet fut au mesme temps poignardé par ces voleurs qui se ietterent sur luy. Apres cela ils monterent dans la chambre de mon frere, où l'ayans treuvé deuisant avec sa femme qui se deshabilloit pour se coucher, ils les tuerent tous deux & cinq petits enfans, dont il y en auoit vn dans le berceau. Ils tue-

rent encores tout ce qui restoit de seruiteurs & de seruantes, fors vne qui se cacha dans vne garde-robe sous vn lict, où elle fut presque noyee du sang qui estoit espandu dans la place, car ce fut en ce lieu-là que tous les enfans furent inhumainement massacrez. Ces Tigres là ayant commis tant de meurtres, & estans iusques à la moitié de la jambe dans le sang, prirent les clefs des coffres & des cabinets de ceans, & volerēt tout l'or, l'argent, les bagues, les pier-eries, la vaisselle d'argent, & ce qu'ils peurent emporter des autres precieux meubles qui y estoient. Ne se contentans pas de cela, ils mirent le feu dans la maison, & sans la vieille qui les voyāt dehors cōurut promptemēt sonner la cloche du Temple, au son

de laquelle les Païsans d'icy aupres accoururent, les flammes eussent acheué de consommer tout le logis, & ne pût-on encores si tost y donner remede, qu'il n'y en eust plus de la moitié de brulée. Je demeurois à vn quart de lieuë d'icy. De sorte qu'oyant sonner la cloche, & voyant les flammes qui montoient iusques au Ciel, i'accouru promptement avec tous mes gens. Iamais on n'a vû vn spectacie si lamantable que celuy que ie vy : Je treuuy dans la cour mon frere, ma sœur, leurs enfans & leurs seruiteurs, que les Païsans auoient iettez par les fenestres tous sanglants & à demy bruslez. Ils estoient vn peu à costé des liets, des tables, & des autres meubles qu'on auoit aussi iettez par les fenestres, dont

il y en auoit encores quelques pieces flamboyantes, qui en rum-
bant auoient sauté iusques des-
sus ces pauvres corps. Je les fis
tous oster de là & mettre dans la
chambre du Cócierge, qui estoit
hors du danger. Je montay puis-
apres en haut où tout estoit au
pillage, & où il y auoit vn si grand
bruit avec vne confusion si effro-
yable que personne ne s'enten-
doit. Quelques Gentils-hommes
voisins de mon frere se treuuerēt
là, & m'emmenèrent chez eux, où
ie passay le reste de la nuit avec
le desespoir que vous pouuez
vous imaginer. Le lendemain ils
m'accompagnerent iusques chez
moy, & m'assisterent à rendre les
derniers deuoirs à ceux qui e-
stoient morts. Voyez, Monsieur,
si i'ay eu sujet d'auoir peur quand

vous estes venu fraper à la porte de ceans, où ie ne suis venu que depuis quinze iours pour y donner vn peu l'ordre qu'il conuient. Vrayement, dit Ennemidor, voila bien le plus estrange accident, & la plus grande cruauté dont i'aye iamais ouy parler. La Duchesse, Callionne, & Delphis haussant les espauls & s'entre-regardans, tesmoignoient en estre infinimēt estonnees. Mais, adiousta Ennemidor, n'avez-vous point descouvert les auteurs de tant d'horribles crimes? Monsieur, respondit Felissart, la vicille qui se sauua nous a dit, qu'entre ceux qu'elle vid, il y en auoit vn qui auoit vne grande balaffre au visage, qui depuis cela a fait encores cinq ou six autres insignes voleries sans qu'on l'ayt pû prendre. Le Duc

des hautes montagnes qui est allié de nostre Empereur, & qui demeure à Thura, qui est sur les frontieres de cet Empire, en fit dernièrement executer vn qui s'appelloit Compitor, qui confessa à la mort auoir assisté à celle de mon frere. Mais quant au balaffré, ie n'en ay encores pû iusques icy auoir raison, quoy qu'il m'ayt cousté plus de mille escus à le faire chercher, estant resolu de le faire prendre quand i'y deurois employer le reste de mon bien. Delphis oyant parler d'une balaffre, faisoit paroistre esleuant les yeux au Ciel & s'approchant de Felissart, qu'il luy vouloit dire quelque chose; Néanmoins quoy qu'il eut deux ou trois fois ouuert la bouche pour parler, il ne pût se faire entendre, parce que

personne ne prenoit garde à luy. En fin tirant plusieurs fois Felissart par le bras, il luy dit: Monsieur, ie vous assure que vous estes deschargé de cette peine: car ce Gentil-homme que vous voyez (monstrant Ennemidor) a tué le voleur dont vous parlez, que i'ay fort bien remarqué lors qu'il me prit, tel que vous le dépeignez. Là dessus Ennemidor dit. Il est vray que celuy dont le cheual s'acula contre les roües du carrosse auoit vne grande cicatrice au visage. Certes Monsieur, repartit Felissart, ie m'en suis tousiours douté depuis que vostre Carrossier m'a conté ce qui vous est aduenü dans la lande. En verité vous auez deliuré tout ce pays-cy d'une grande crainte, & d'un execrable voleur. Mais il me

semble, adiousta-il, qu'il est tard, & qu'apres auoir tant trauaillé que vous auez fait, le repos vous est fort necessaire.

Felissart acheuant de dire cela, la Duchesse fit signe de l'œil à Ennemidor, qu'elle vouloit parler à luy, ce qui fut cause qu'il s'en approcha. Pour Dieu Chrisolite, luy dit-elle tout bas, demande vn peu à nostre hoste s'il ne sçait point où est Monsieur mon mary, & ce qu'on dit de la guerre. Ennemidor au lieu de luy respondre ne fit que baisser vn peu la teste, & dit à Felissart: Monsieur, que nous apprendrez-vous de nouueau? Ne sçavez-vous point où est Monsieur le Duc mon oncle? Monsieur, respondit Felissart, apres auoir pourueu à la seureté de Gonzanuert, où il a mis huiet

cens hommes en garnison, il est
allé au deuant de trois mille e-
strangers à pied, & de six cens à
cheual, qui viennent au seruice
du Prince de Rontcandon, & croy
qu'ils feront leurs corps d'armée
dans la prouince de Rus, aux en-
uiron de la ville de Trisbonne.
L'on estime qu'après auoir bien
muny de soldats toutes les places
que nous tenons, nous pourrons
auoir dix-huict à vingt mille ho-
mes de pié, trois mille cheuaux,
& six bastardes. Avec cela le
Prince est resolu d'aller porter
la guerre iusques dans les portes
de Sirapis, afin d'y ietter la fami-
ne & de faire mutiner les habi-
tans, qui commencent desia à
murmurer contre la tyrannie de
la Duchesse de Conforliche & de
Gardenfort. D'ailleurs on tient

pour tout asseuré que les Noua-
tes se joindront à nous , & que
mesmes ils se sont desia declarez
en nostre faueur, quoy que l'Em-
pereur leur ayt promis de leur
accorder toutes les demandes
qu'ils luy ont faites. Outre cela,
il y a encores plusieurs villes &
communautez qui n'attendent
que l'occasion de se reuolter &
d'embrasser nostre party, qui sera
le plus puissant qui se soit iamais
formé en Galatie. Nous serons
mesmement sous-main assistez
de la pluspart des Ministres du
Conseil de l'Empereur , qui ne
pouuans en sorte du monde ap-
prouuer l'ordre que Gardenfort
veut establir aux affaires, nous fa-
uoriseront couuertement en tout
ce qui leur sera possible. Voila
qui est fort bon, dit Ennemidor,

pourueu qu'il n'y ayt point de
faute; mais i'apprehende infini-
ment que quand nous serons au
fort de l'affaire, plusieurs de ceux
qui nous ont promis de courre
nostre fortune, ne se laissent gai-
gner par les offres qui leur seront
faites de la part de l'Empereur:
Car les Gentils-hômes Galatiens
ont cette bonne coustume d'em-
brasser, non la plus iuste & la plus
honnorable cause, mais celle-là
qui leur est la plus aduantageuse.
Et où est-ce, dit Felissart, qu'ils
peuent si bien faire leur fortune
que parmy nous autres, qui pour-
rons mille fois plus prendre de
bons prisonniers, que ne pour-
ront pas faire les gens de l'Empe-
reur? Et puis ne sçait-on pas bien
qu'à la Cour on n'effectuë iamais
rien de ce qu'on promet? On

donne assez de bonnes paroles, mais elles n'ont iamais de lieu; On fait esperer des charges, des honneurs, & de l'argent à ceux qu'on craint, & dont on a besoin; & puis apres qu'on a tiré d'eux ce qu'on desiroit, on s'en mocque, ce qui est vne tres-mauuaise maxime d'Estat. Car la parole des Roys & des Empereurs doit estre inuiolable, autrement quand on s'en est seruy pour tromper quelqu'un, personne puis-apres ne s'y ose plus fier. Vous auez raison, dit Ennemidor, mais il me semble que l'Empereur n'est que trop religieux en ce qu'il promet, parce qu'il n'y a presque iamais que ceux qui ont porté les armes contre luy, qui tirent du profit & de l'aduantage de la guerre; Les autres qui ont tousiours demeuré

dans leur deuoir, au lieu d'en recevoir quelque recompense, sont d'ordinaire les plus mal traittez; de sorte qu'il semble que pour auoir du bien, il faut faire du mal, ou tesmoigner qu'on est capable d'en faire. Ne m'aduouïerez-vous pas que les plus gens de bien ne sont pas les mieux à la Cour, qu'au contraire on les mesprise, & qu'il n'y a que ceux qu'on craint qui sont estimez, & qui reçoient des gratifications? C'est ce qui me fait apprehender, puis que la fidelité des hommes s'achepte, & que chacun a plus de soin de son interest particulier, que du general, que plusieurs ne nous abandonnent, se laissant aller aux aduantageuses propositions qui leur seront faites de la part de l'Empe-

reur, qui en fin est tousiours le Maistre. Monsieur, repliqua Felissart, vous parlez si pertinemment de ces affaires-cy, qu'il est aysé de iuger que vous en auez vne particuliere cognoissance, & que vous sçauiez fort bien comment on se gouuerne à la Cour. Vous m'aduouïerez neantmoins, s'il vous plaist, que si quelques-uns quittent nostre party pour suiure les grands aduantages que l'Empereur leur fera esperer, il se treuuera aussi tant de mal-contàs qui se rangeront de nostre costé, que nous en gagnerons bien autant que nous en perdrons. Quand vous serez aupres de Monsieur le Duc vostre oncle vous sçauerez plus particulièrement tout ce qui se passe, cependant il est temps que vous vous reposiez. En disant

cela, il les mena dans vne chambre où il y auoit seulement vn grand liēt avec vne petite couchette, & en entrant dans la chambre il dit à Ennemidor. Monsieur, ie suis au desespoir de n'auoir pas pour cette-heure le moyen de vous loger mieux que cela, le malheur qui m'est arriué en est cause, mais si quelqu'un de vos gens veut venir coucher avec moy il m'obligera bien fort; Ennemidor se treuuant surpris, ne voulut pas respondre sans sçauoir la volonté de la Duchesse, qui luy dit tout bas à l'oreille qu'il n'y auoit point d'apparence que Delphis couchast dans sa chambre. Pour vous Chrisolite, luy dit-elle, & pour Callionne, ie ne m'en mets point en peine, mais quant à ce ieune homme

qu'il cherche vn liēt si bon luy
semble. Chrisolite dōques oyant
cela, dit à Felissart: Mōsieur nous
serons fort bien icy nous trois,
pourueu que ce ieune Cauallier
s'accommode avec vous. Enne-
midor disant cela, monstra Del-
phis qui deuint rouge comme du
feu, estant en soy-mesme atteint
de honte, & enflammé d'une ex-
treme colere contre luy; neant-
moins se cōtraignant autant qu'il
pût, dit: Monsieur, ie seray touf-
iours fort bien quand vous serez
contant. Sur cela Felissart donna
le bon soir à Ennemidor, & em-
mena avec luy Delphis, qui luy
dit: Monsieur, vous m'obligerez
infiniment si vous me faites don-
ner vn peu de paille pour dormir
dessus; car outre que i'ay peur de
vous incommoder, ie n'ay iamais
pû

pû coucher avec personne. Felissart qui pour vne nuit ne craignoit point d'estre incommode, fit oster sans luy en dire rien la paillasse & le matelas de son lict, & les fit porter dans vne petite garde-robe qui estoit aupres de la chambre de la Duchesse. Elle de son costé se treuuoit en vne grande peine, tar depuis que Chrisolite eut tué les trois voleurs qui la vouloient emmener, elle creut qu'il estoit impossible qu'une fille pust auoir tant de valeur qu'elle en auoit fait paroistre. D'ailleurs, disoit-elle en elle-mesme, combien a-t'elle discouru à propos des affaires d'Estat avec Felissart? & puis quelle grace n'a-t'elle point à cheual? & de quelle resolution n'accompagne-t'elle point ses discours & ses

actions ? Certes tout cela ne se treuve point en vne ieune fille. Neantmoins , continuoit-t'elle, apres s'estre vn peu arrestee à resuer, ie l'ay plusieurs fois fait coucher avec moy, & elle m'a souvent veüe toute nuë , sans que i'aye iamais reconnu en elle aucune action qui me doiue tant soit peu confirmer ce soupçon. Apres qu'elle eut ainsi raisonné, elle l'appella & luy dit. Chrisolite tu coucheras avec moy, & cette couchette sera pour Callionne.

La nuit la Duchesse se resueillant & se souuenant de la doute qu'elle auoit eu, elle s'en voulut esclaircir : mais Chrisolite qui n'apprehédoit rien tant que cela, de peur d'estre bannie de sa compagnie, dont elle se resoluoit de iouyr tant que la nature ne luy

enuyeroit point ce bon-heur, se couchoit tousiours sur le ventre; de sorte que la Duchesse se tournant de son costé, & luy leuant la chemise, ne porta sa main que sur vn endroit où elle ne pût rien rencontrer de ce qu'elle cherchoit. Elle luy treuua la chair si ferme & la peau si douce, qu'elle creut que c'estoit vne fille; toutefois sa curiosité la poussant en vn lieu où elle eust infailliblement reconnu la verité, Ennemidor s'éueillla & se reserrant l'empescha de penetrer plus auant. La Duchesse pour retirer sa main la pinça vn peu, & luy dit en riant. Et quoy, Chrisolite, ie ne croyois pas que vous fussiez chatouilleuse? Aussi ne suis-je pas, Madame, respondit-elle, mais ie suis si fort sensible en cet endroit là, que ie

ne ſçauois ſouffrir qu'on m'y touche. La Duchefſe eſtant faſchee de n'auoir pû recognoître ce qu'elle deſiroit ſçauoir, & ayât honte de ce que Chriſolite l'auoit ſurpriſe en cette curioſité, luy dit ſe tournant d'un autre coſté. Dormons, dormons, car ie t'affeure que iuſques à cette-heure ie n'ay fait que reſuer. Chriſolite ne reſpondit rien à cela, mais ſ'eſloignant de ſa Maiſtreſſe de peur de l'incommoder, paſſa le reſte de la nuit avec tant d'inquietudes & de diuerſes penſees, qu'il luy fut impoſſible de fermer l'œil, ſinon vn peu ſur la pointe du iour. La Duchefſe ſ'éueillant en ce meſme temps-là, & l'oyant vn peu ſouffler creut qu'elle eſtoit aſſoupie d'un profond ſommeil: C'eſt pourquoy elle ſe leua

doucement de son liect, & s'en alla
tastonnât vers celuy où Callion-
ne estoit couchee. Comme elle
portoit les mains au deuant de
son visage de peur de se blesser,
elle rencontra sur la table vne
chandelle, qu'elle alla allumer à
la cheminee où il y auoit du feu
couuert de cendres. La chandelle
estant allumee, & oyant que Cal-
lionne dormoit aussi, elle s'en
vint à Chrisolite qui en dormant
se estoit tournée sur le dos. Elle la
regarda long-temps, puis leuant
peu à peu la couuerture descou-
urit son sein où il n'y auoit aucu-
ne apparence de tetons, ce qui
luy donna encores plus d'enuie
de voir le reste. Mais quand elle
eut entierement osté tout ce qui
l'en pouuoit empescher, & qu'elle
eut apperceu ce qui met la dif-

ference entre vn homme & vne fille, elle deuint froide comme vne statuë de marbre, ne sçachant à quoy se resoudre : Car voyant deuant elle nud & endormy le plus bel hōme du monde, qu'elle auoit tousiours tenu pour fille, elle se sentoit esprise d'un extreme desir d'en iouyr, ainsi qu'elle pouuoit faire sans aucun danger. Sa vertu luy deffendoit ce plaisir, qui est si charmant que peu d'autres femmes l'eussent rejetté. En fin apres auoir long temps considéré Ennemidor, ne se fiant pas à ses yeux de peur qu'ils la trompassent, elle y porta doucement la main pour sçauoir s'il n'estoit point Hermafrodite. Mais apres auoir tout à loisir manié ce qu'on n'ose nommer deuant les Dames, & n'ayant rien treuue de ce qu'on

cherit tant en elles, elle sentit vn si violent combat en son ame, que ne voulant pas suiure ses mouuemens, & ne pouuant pas aussi supporter l'ardeur qui la brusloit, elle tumba éuanoüie sur Ennemidor. Il s'éueilla aussi-tost, & releua la chádelle auant qu'elle se fust esteinte, & voyant sa maistresse en cet estar, se douta incontinent de la verité, & créut fermement estre descouuert. Il la prit entre ses bras & la recoucha en sa place, puis la voyant ainsi estenduë, vne soudaine fureur le saisit auec tant de violence, que n'y pouuant plus resister il se resolut de se seruir de l'occasion qui se presentoit. Toutefois apres auoir osté ce qui luy cachoit l'endroit où il pensoit se noyer dans les plaisirs d'amour, il

ne l'eust pas plustost touché que la Duchesse reuenant à elle, & cognoissant son dessein & l'estat où elle estoit, le repoussa si rudement, qu'estant sur les genoux & ne s'y pouuant tenir, apres auoir receu par le ventre vn coup si fort que celuy qu'elle luy donna, il fut contraint de se laisser cheoir sur le dos, monstrant à descouuert le ventre & les cuisses, parce que sa chemise estant desia leuee auoit coulé iusques sur sa teste. La Duchesse ne se pût empescher de voir ce qu'il monstroir, mais elle en retira aussi-tost ses yeux, & appella Callionne, luy disant qu'elle se vouloit promptement leuer pour monter en carrosse, afin d'arriuer de bonne heure à Gonzanuert.

Ennemidor estant au desespoir

de ce qui luy estoit arriué, se recouurit le plustost qu'il pût de sa chemise, & voyant que la Duchesse regardoit d'un autre costé, creut qu'elle n'auoit rien vû. Il s'approcha donques d'elle, & luy dit comme s'il ne se fust rien passé. Certes, Madame, i'auois vne extreme apprehension que vous ne vous treuassiez mal, mais à ce que ie voy. Elle l'interrompit là dessus, & ne le voulant pas ouyr dauantage parler, luy dit en le repoussant de la main sans le garder. Retirez-vous impudent que vous estes, si ie me laissois autant emporter à ma iuste colere que vous à vos sales desirs, ie vous ferois maintenant chastier comme vous le meritez. Acheuant de dire cela, elle se coucha le visage contre le liect pleurant &

souspirant si fort , que Callionne qui accourut à elle creut qu'elle estoit pressée de quelque extraordinaire ennuy. Elle luy dit sans leuer la teste, laisse-moy ie te prie, ie me treuve mal, va allumer du feu & t'habille. Callionne ne sçachant que respondre, regardoit Ennemidor qui luy fit signe de la main qu'elle s'éloignast de là. Après qu'elle s'en fut retiree, il pancha sa teste vers celle de la Duchesse, & luy dit tout bas de peur que Callionne l'entendist. Hé! Madame, faites-moy plustost mourir que de vous affliger ainsi, ie ne veux plus viure si ie vous ay dépleu. Il est vray que mon audace merite la mort : Mais, ô Cieux, Madame, si ie suis coupable, c'est de vous auoir plus aimée que ma propre vie, & de n'a-

voir pû résister aux charmes de
vostre beauté. Neantmoins ie
vous ay tousiours porté tant de
respect, que ie ne vous ay iamais
rien fait paroistre de ma passion,
quoy que i'aye continuellement
souffert des tourmēs, qui surpas-
sent par leur rigueur, le moyen
de vous les pouuoir représenter.
Vous le sçauēz, Madame, & si en-
cores que ie bruslasse d'amour
pour vous, ie ne me suis pas com-
porté avec tant de discretion,
qu'une fille n'en eust pas eu da-
uantage aupres de vous. Aussi
n'eussiez-vous iamais changé la
creance que vous auiez que i'en
fusse vne, si vous-mesme malgré
moy n'en eussiez voulu cognoi-
stre la verité. Madame, adiousta-
il en pleurant, il n'y a rien de mal
en tout ce qui est aduenu; au cō-

traire, ie croy que les Dieux qui ont soin de vostre personne, laquelle ils n'ont mise sur la terre que pour estre adoree, m'ont inspiré le dessein de me déguiser & d'entrer à vostre service, pour vous faire sortir du pouuoir de vos ennemis, & pour vous retirer d'entre les mains des voleurs. Maintenant ie suis disposé à tout ce qu'il vous plaira, & n'auray point d'autres pensees que celles que vous voudrez que j'aye. Ie suis prest de mourir, ou de m'en aller passer le reste de mes iours parmy les deserts d'Arabie si vous l'auez agreable, faites de moy selon vostre desir, car ie n'en ay point d'autre que de vous faire voir qu'il ne se peut rien imaginer que ie n'entreprenne pour vostre contentemēt. Ah! qui que

vous soyez, respondit la Duchesse, pour l'amour que vous dites que vous me portez, laissez moy vn peu en repos, & vous retirez d'aupres de moy, car ie me treuve si mal que ie n'en puis plus. Hé! Madame, repartit Ennemidor en la voulant doucemēt embrasser, ne vous laissez pas accabler à vne injuste douleur, dont la seule apprehension me creue le cœur, ayez pitié de vous, & ayez pitié de moy. Ah! luy repliqua-elle en se leuant, que vous estes cruel! Me voulez-vous doncques ainsi faire mourir de dépit? Hé! ie vous prie laissez-moy, ostez vous d'icy. En luy disant cela elle le repoussa, & fit couler de ses yeux vn ruisseau de larmes. Ennemidor qui auoit le visage couuert de celles qu'il verfoit, luy prenant la main & la

luy baissant, quelque resistance qu'elle y fist, sortit du liect & s'approchant du feu pour s'habiller, dit à Callionne pour couvrir son ennuy, que la Duchesse se treuvoit mal, & qu'elle ne vouloit pas qu'on parlât à elle. En fin ayant demeuré seule plus d'une heure dans le liect, & apres auoir employé tout ce temps-là à pleurer & à soupirer, elle se leua & s'estant habillée, commanda à Callionne de dire à Ennemidor qu'il prist congé de Felissart, & qu'elle vouloit partir. Felissart auoit fait accommoder le disner, mais personne ne voulut manger, & s'en allerent ainsi tous remplis d'ennuys & de tristesse à Gonzanuert où Delphis les suiuit.

Fin du second Livre du Roman Satyrique.



LE ROMANT SATYRIQUE.

LIVRE TROISIÈME.

Esbilliere ayant sceu que la Duchesse de Gonzanuert s'estoit sauuee, se resolut d'en donner promptement aduis à l'Empereur: Mais estant sorty de fort bon matin dans la ruë, il aperceut de grandes flammes qui s'esleuoient de dessus le temple d'Astree iusques dans le Ciel. Il courut incontinent de ce costé-là, & treuua en s'en approchant vne infinité de personnes qui

porroient de l'eau pour esteindre le feu, qui auoit desia consommé la grande salle du Temple où estoient les statuës des anciens Empereurs de Galatie. Côme il s'arrestoit à demander de quelle façon ce malheur estoit arriué, & n'en pouuant rien apprendre au vray; il vid plusieurs prisonniers qui se sauuoient pendant qu'un chacun estoit empesché à esteindre le feu. Reconnoissant entr'autres Hipophilon qu'il auoit enuoyé cette nuict-là mesme prisonnier dans les prisons de ce Temple, il se mit au deuant de luy pour l'arrester, & voyant qu'il s'en vouloit fuyr malgré luy le faisit au corps: Mais Hipophilon tirant vn petit poignard qu'il portoit en sa pochette, luy en donna deux ou trois coups dans le ventre, &

tre, & l'ayant laissé mort se sauua chez l'un de ses amis, où il demeura trois ou quatre iours caché. La ville de Sirapis est si grande & si peuplée, qu'un homme qui est en peine n'y sera pas si tost descouvert qu'à la campagne, & n'y a point de doute qu'on y est beaucoup plus seurement pour quelque temps, que si on en sortoit incontinct apres auoir commis quelque crime. En fin apres qu'Hipophilon s'y fut arresté quatre ou cinq iours, pour éviter d'estre pris par ceux qui le cherchoient, il sortit de la Ville vne nuit que le temps estoit vn peu obscur, & se mit dans le chemin de Gonzanuert, où il se rendit sans aucun empeschement. Il y treuva la Duchesse malade; car depuis qu'elle se fut apperceuë

qu'Ennemidor estoit vn homme vestu en fille , elle eut tant de regret & tant de honte de ce qu'il l'auoit veüe toute nuë, qu'elle ne pouuoit s'abstenir de pleurer , ce qui luy ruina entierement sa santé. Ah ! dit-elle vne fois entr'autres , combié il importe aux femmes de qualité & aux autres mesmement , de cognoistre les filles qu'elles reçoient à leur seruice ! Certes i'ay tousiours ouy dire, que pour ne prendre pas garde à cela on peut tumber en d'estranges accidents , & que les seruan-tes qui sont de mauuaise vie deshonorent puis apres leurs Maistresses , qu'on estime faire l'amour , puis qu'elles se seruent de celles qui n'ont point d'honneur. I'en ay desia eu vne qui estant amoureuse , & continuant ses sa-

les intelligences, ouuroit toutes les nuits la porte de mon logis à son amy, & le receuoit en son liect qui n'estoit gueres loing du mien. Ceux qui voyoient entrer cet homme chez moy à des heures indeuës, auoient sujet de faire vn tres-mauuais iugemēt de moy, quoy que ie fusse innocente, ainsi que ie le fis paroistre lors que ie chassé honteusement cette miserable creature, si tost que i'eue reconnu qu'elle estoit preste d'accoucher. I'en ay eu vne autre, qui ayāt le mal qui ne se guarist qu'en suant, le communiqua à la petite Helaine que ie nourrissois par charité, & luy apprit couchant avec elle vne infinité d'abominations. Ah ! fausse Chrilolite, si i'eusse fait mon profit des bons exemples que i'auois, ie ne t'eusse

iamais fait dormir auprès de moy, puisque ie sçauois bien qu'il y auoit vn extreme danger de faire cet honneur à vne fille que ie ne cognoissois point : Au moins si ie me fusse contentee de cela, & que ie ne t'eusse point admise à de plus grandes priuautez, ie viurois encores heureuse. Mais las! miserable que ie suis, ie t'ay laissé voir & manier ce qui doit estre caché à routes sortes de personnes, fors à celle qui est la moitié de moy-mesme! Ah ce souuenir me tuë! faut-il, ô Iupiter! que ie me sois tant oubliee? Chrisolite, Chrisolite, ie ne me plains point de toy : car c'est vn miracle qu'estant si ieune que tu es, tu ayes eu autant de discretiô que d'amour. Je me plains seulement de ma simplicité qui m'a rendue si peu

aduisee. Je me plains encores de
ma curiosité qui m'a poussee à
voir des choses où ie ne deuois
iamais penser, & dont ie ne puis
perdre le souuenir. O grād Dieu,
qui m'avez formee telle qu'il
vous a pleu, & qui avez infus en
mon ame les passions dont elle
est agitee, pourquoy m'avez vous
donné la cognoissance du mal,
sans me donner la force d'y resi-
ster? Je brusle d'amour, & neant-
moins ie ne puis sans perdre vo-
stre grace, & sans attirer sur moy
les effets de vostre iuste colere,
chercher la iouyssance de ce que
i'ayme, dont mesine le desir m'est
deffendu. Ah! Chrisolite, Chri-
solite, belle cause de mes peines,
ie meurs pour estre forcee à t'ay-
mer, & pour ne vouloir pas t'ay-
mer! Faut-il, ô Cieux, que ie pre-

uoye mes fatales destinees, & que ie ne les puisse éuiter? Mais quoy, il semble que ie vueille murmurer contre cette bonté diuine, qui a ordonné & compassé si sagement toutes choses pour mô bien, qu'il ne reste pour me rendre heureuse que de le vouloir estre. Non, non, ie n'attribueray point au destin, qui n'est qu'une vaine chimere, les effets de cette prouidence eternelle, qui n'agit iamais sans iustice & sans raison. Il vaut mieux mourir glorieusement, que de violer les saintes loix qu'elle nous a prescrites. Il faut tost ou tard se resoudre à la mort, qui est ineuitable, & qui vient par une infinité de differentes voyes, entre lesquelles il n'y en a point qui apporte tant d'honneur, que quand on prefere son deuoir à sa vie, &

sa reputatió aux plaisirs qui nous charment. En disant cela, elle remplit l'air de tant de souspirs, & son liét de tant de pleurs, que Callionne qui estoit en vn cabinet proche de sa chambre, & qui auoit ouy vne partie de ses plaintes, accourur promptement à elle, croyát qu'elle fust sur le poinct de mourir. Et quoy, Madame, où est certe constance avec laquelle vous auez si genereusement combattu les trauerses de la fortune? Ah! Callionne, luy respondit-elle, i'en ay assez pour souffrir la mort, mais non pas pour supporter les ennuyes qui m'accablent. Imagine-toy que la nuit que ie couchay chez Felissart, ie m'apperceu que Chrisolite est vn homme déguisé en fille. Considere si ayant vescu avec luy comme i'ay fait, ie

n'ay pas sujet d'estre infiniment affligée. O Cieux, Madame, adiousta Callionne, ie ne fus iamais si estonnée que ie suis ; car representez-vous, s'il vous plaist, que si Chrisolite qui est vn homme, est déguisé en fille, Delphis qui est vne fille, est déguisée en homme. Comment sçais-tu cela, demanda la Duchesse, par la bouche mesme, respondit Callionne, de Delphis, qui m'en a dit le sujet en me contant la plus estrange histoire du monde, dont ie vous feray le recit si vous l'auez agreable. La Duchesse luy ayant fait signe de la teste qu'elle le fist, son ennuy l'empeschant de parler. Callionne commença ainsi.

Madame, la mesme nuict que vous logeastes chez Felissart, incontinent apres que vous fustes

couchee avec Chrisolite. La Duchesse oyant cela leua les yeux au Ciel, & fit vn grand soufpir qui interrôpit Callionne, à qui neantmoins elle commanda auffi-tost de poursuiure son discours. Madame, continua Callionne, quand vous fustes dōques couchee i'ouy du bruit vis à vis de mon liēt dans vne garde-robe, qui estoit aupres de vostre chambre : Je sorty pour aller voir ce que c'estoit, & ne fus pas plustost hors de la porte, que i'apperceu de la lumiere qui passoit au trauers de celle de la garde-robe où i'auois ouy le bruit. Je m'en approchay doucement, & regarday par vne fente pour recognoistre qui estoit dedans. Vous sçauiez, Madame, combien les filles sont curieuses. Je vy que Delphis ayant osté son

pourpoint, fit paroistre vn sein de fille le plus blanc & le plus beau qu'il est possible de voir. Je la laissay entierement deshabler, & comme elle fut preste à se mettre dans le liect, ie heurtay à la porte, où elle vint me demander qui c'estoit. Je respondy que c'estoit celuy qui l'auoit tiree d'entre les mains des voleurs, ce qu'entendant elle m'ouurit aussitost la porte, tenant sa chemise avec vne main de peur que ie luy visse la gorge. Mais cognoissant que ie l'auois trompee, & que ie n'estois pas celuy que ie luy auois dit, elle rougit de honte sans neantmoins me faire paroistre estre marrie de m'auoir ouuert la porte que ie refermay aussitost. Apres cela ie la pris par le bras, & la menay vers son liect, luy

disant que i'auois quelque chose de grande importance à luy communiquer. Comme elle fut auprès du liect, elle me pria de l'excuser si elle se mettoit dedans ayant peur de se morfondre. Ah! Delphis, luy respondis-je, en me courbant sur elle & la voulant baiser, si vous n'avez pitié de moy ie suis mort. Dés la premiere fois que ie vous vy, ie me doutay bien que vous estiez vne fille déguisee en garçon, & dés cette-heure là ie deuins si esperduëment amoureux de vous, qu'il n'y a rien au monde que ie ne sois prest d'entreprendre, pour vous tesmoigner l'entiere puissance que vous auez sur moy. Je ne me suis point tropé au iugement que i'ay fait de vous; car cherchant sans cesse les moyës de cognoistre si l'opinion

que i'en auois estoit veritable, ie m'en suis venu à la porte de vostre chambre, au trauers de laquelle i'ay veu, apres que vous auez esté deshabillee, la plus belle gorge qui se puisse iamais voir. Ah ! Monsieur, me dit-elle, en me repoussant, si vous me decelez, les dieux vous puniront tost ou tard; neantmoins il n'y a rien à quoy ie ne me resolue, plustost que de consentir à aucune action deshonneste. Il est en vous d'obliger ou de desobliger vne ieune Damselle de bonne part, qui est accablee de tant d'ennuys, que si vous sçauiez son infortune vous en auriez indubitablement de la compassion. Moy qui n'auois autre dessein que de la cognoistre, luy reparty que si elle me vouloit tant fauoriser que de me faire co-

gnoistre la cause des ses ennuys; non seulement ie ne la reuelerois iamais , mais au contraire ie m'efforcerois de l'y seruir en tout ce qui me seroit possible. Si vous me voulez promettre cela, me re-
pliqua-t'elle, & iurer de n'entre-
prendre rien contre mon hon-
neur , ie vous raconteray la plus
estrange & la plus pitoyable hi-
stoire dont vous puissiez ouïr par-
ler. Il luy promis & luy iuray tout
ce qu'elle voulut, & apres cela el-
le me dit.

Monsieur, ie m'appelle Filatee,
& suis fille d'Esmiston , qui estoit
Gouuerneur de la ville de Dar-
deroy , & qui en biens, en hon-
neur , & en amis estoit l'un des
plus puissants Seigneurs de Gala-
tie. Il espousa Amazis de laquel-
le il n'eut qu'un fils qui s'appel-

loit Oristhene, & moy. Las! pleust à Dieu qu'il eust esté tout seul, & que ie n'eusse iamais esté née. Vous sçavez, Monsieur, qu'en nostre Ville il y a la meilleure Academie qui soit dans l'Empire, & que les enfans de tous les Princes & les grands Seigneurs y viennent apprendre les exercices qui sont de leur profession. Il y a environ vn an que mon frere Oristhene fit cognoissance avec vn ieune Gentil-homme qui y estoit venu pour le mesme sujet qui y amene tous les autres. Son humeur & sa bonne grace pleurent tant à mon frere, qu'il ne pouuoit viure sans luy. Ils estoient presque tousiours l'vn avec l'autre, & couchoient souuent ensemble au logis de mon pere, qui en estoit bien ayse, parce qu'il estimoit in-

finiment le merite & la vertu de ce Cauallier. Il ne m'eust pas pluſtoſt veüe qu'il deuint amoureux de moy, & ſ'eſſorça de me faire paroistre ſa paſſion par ſes regards, & par vne infinité d'actions pleines de courtoisie & de reſpects, mais ie n'y prenois nullement garde, ne ſçachant encores, à cauſe de ma grande ieuneſſe, ce que c'eſtoit d'amour. Je prenois neantmoins grand plaisir à tout ce qu'il diſoit, & à tout ce qu'il faiſoit, & ne voyois perſonne qui me pleuſt tant que luy, ſans touteſois me ſoucier en ſorte du mode qu'il m'aymaſt, ou qu'il ne m'aymaſt point. Mais ie changé bien-toſt d'humeur; car m'ayant vn iour treuuee ſeule dans la chambre de ma mere, qui eſtoit entree dans ſon cabinet pour

parler à l'une de nos parentes de quelque affaire d'importance; Il me dit, Ah! Mademoiselle, que vous me faites souffrir de cruels tourments! Moy, luy respondis-je, ne sçachant encores ce qu'il vouloit dire, ny à quel dessein il me parloit ainsi. Vous-mesme, me repliqua-t'il, ie luy reparty, la couleur m'estant venuë au visage, de crainte que i'auois de luy auoir fait sans y penser quelque déplaisir. Certes, Monsieur, si ie vous ay dépleu en quelque chose, ie vous en demande pardon, & vous asseure que ie n'en ay iamais eu l'intention. Ah! belle Filatee, me dit il, avec vn doux soufris, admirant ma naïueté, vous demandez pardon à celuy qui vous demande la vie. Helas! tant s'enfaut que vous m'ayez dépleu, qu'au

qu'au contraire vous me faites mourir pour me plaire plus que tout ce qui est au monde. Il est vray, ô merueille des beautez, vous me faites, quoy qu'innocemment, endurer vn martyre dont la rigueur ne se peut exprimer, & c'est vostre innocence qui augmente encores ma douleur; car si vous voyez les dangereuses blesseures que vos beaux yeux ont faites en mon cœur, vous en auriez infailliblement de la compassion. En disant cela, il se ietta de genoux à mes pieds, qu'il baïssa & arroûsa de ses larmes, quelque resistance que ie peusse faire, puis esleuant vers moy ses yeux tous rouges & tous noyez de pleurs, me dit en soupirant. Ma Deesse ayez pitié de moy, permettez que ie vous adore, & que

ie vous serue. Ne laissez pas cruellement mourir vne creature qui vous ayme plus que sa vie. Comme il acheuoit de dire cela, il ouït que ma mere ouuroit la porte de son cabinet pour r'entrer dans sa chambre: Cela fut cause qu'apres auoir baisé le bas de ma robe, il se leua promptement & courut à vne fenestre, feignant de regarder dans vn jardin, afin qu'on ne vist point l'estat où estoient ses yeux. Ma mere allant conduire celle avec qui elle estoit, i'entray dans son cabinet & fermay la porte sur moy, afin de n'estre point obligee de respondre à celuy qui m'auoit declaré sa passion. Comme il vid que ie m'enfermois, il se douta de mon dessein, & ne sceut de quelle sorte i'auois pris ce qu'il m'auoit dit. Il descendit

pour aller au deuant de ma mere
qu'il ramena dans sa chambre,
puis s'en retourna avec l'inqui-
tude que vous vous pouuez ima-
giner. Je fus deux iours sans le
voir, mais en fin mô frere l'ayant
amené disner avec mon pere, ie
le treuuyay si passe & si changé,
que certes il me fit pitié, quoy
que ie n'eusse aucune intention
de luy engager ma liberté; qui
estoit encores toute entiere. A-
pres que nous fusmes sortis de
table, il s'approcha plusieurs fois
de moy, & fit ce qu'il pût pour
m'entretenir, mais ie ne luy en
donnay point le moyen; car aussi-
tost que ie voyois qu'il venoit
vers moy, ie m'esloignois de luy,
& feignois d'auoir affaire ailleurs,
ce qui augmentoit tousiours da-
uantage son amour. *Car c'est vne*

chose certaine que nous aymons plus ce qui nous donne de la peine , que ce que nous pouvons acquérir sans difficulté. Il fut vne sepmaine toute entiere sans manquer vn iour à venir plusieurs fois à nostre logis, afin de me conter son tourment, mais ie ne luy en donnay point la commodité , de sorte qu'estant à demy desesperé, il me mit en la main vn billet que i'ay icy. En disant cela, elle chercha dans sa pochette, d'où elle tira vne lettre qu'elle me donna, dont i'ay pris la copie que vous pouuez lire , si vous plaist, Madame ; Non, non, lis-la toy-mesme , respondit la Duchesse. Callionne ouurât doncques vn papier qu'elle auoit en la main leut ce qui s'ensuit.

A *Vez-vous resolu de me faire mourir par vostre rigueur ? pou-*

uez-vous bien traiter si cruellement
une personne qui vous chérît plus que
sa vie? Ah! belle Filatee, s'il est vray
que vous desiriez ma mort, donnez-la
moy promptement sans me faire tant
languir. Cōmandez-moy que ie meu-
re, ou permettez-moy de parler à vous,
puisque sans cela & sans estre assuré
de ce qu'il vous plaist que ie fasse, la
vie m'est vn supplice insupportable, &
ne veux plus estre Ennemidor, si ie ne
suis vostre serviteur.

Callionne n'eut pas plustost
acheué de lire cette, que la Du-
chesse s'écria. O Cieux! ne seroit-
ce point ce malheureux homme
qui a tué le Prince de Voltandon
mon frere? En verité, Madame,
respondit Callionne, c'est luy-
mesme, à ce que m'a assuré Del-
phis. Mais ayez, s'il vous plaist,

agreable d'entendre le reste. Apres que Delphis eut leu cette lettre, elle m'a dit que veritablement elle eut peur qu'Ennemidor ne s'affligeast tant qu'il en fust malade, & que neantmoins elle se resolut de ne luy faire paroistre aucun signe d'en estre faschee, parce qu'en effet elle le tenoit encores alors en vne grande indifference. Comme cela se passoit, Coramir ayant receu quelque déplaisir de Mirigar, pria Ennemidor de luy aller dire qu'il desiroit le voir l'espee à la main, pour tirer raison de l'offense qu'il luy auoit faite. Mirigar prit Oristhene pour luy servir de second; de sorte qu'estans tous arriuez au lieu de l'assignation, Ennemidor fut extremement estonné de se voir contraint de se battre contre

le meilleur amy qu'il eust. Il luy en fit quelques excuses, mais Oristhene mettant l'espée à la main, luy dit: Mon frere, ils s'appelloiēt ainsi, nous ne sommes pas les deux premiers amis qui sont venus en cette extremité. Tu sçais que les loix de l'honneur, dont on vse en Galatie, sont si seueres, pour ne dire pas si cruelles; voire mesmes si brutalles, que biē souvent deux freres pour seruir leurs amis, sont contraints d'en venir aux mains l'un contre l'autre. En disant cela il attaqua Ennemi-dor, qui ne fit que parer les coups qu'il luy tiroit, sans essayer de luy en porter aucun, iusques à ce que se sentāt blessé en trois endroits, il passa sur luy, & apres auoir gagné la pointe de son espée, & ayāt moyen de le tuer s'il eust voulu,

luy dit : Mon cher frere, ie vous prie de vous contenter du sang que vous m'avez defia fait perdre, & que cela n'altere point l'amitié qui est entre nous deux. Oristhene estant au desespoir de se voir à la mercy d'Ennemidor, ne respondit rien, mais s'efforçoit de se dégager quand Coramir, qui auoit desarmé Mirigar, & luy auoit donné la vie, les vint separer, & les fit tous deux embrasser. Toutesfois le desauantage qu'Oristhene eut en ce combat luy remplit l'ame de tant d'ennuys, que dés l'heure il conceut vne excessiue hayne contre Ennemidor, qui remarquant en luy de la froideur en mourut presque de déplaisir, n'osant plus aller si librement qu'il auoit accoustumé chez Emiston. Leurs amis com-

inuns s'apperceuās de cela , firent ce qu'ils peurent pour les remettre bien ensemble, mais Oristhene n'y voulut iamaïs entendre. En fin la saison estant venuë des Mercurialles, Ennemidor se masqua avec huiet de ses amis, & alla danser vn balet chez Emiston, où il ne fut pas plustost entré qu'il y arriua vne autre compagnie de Masques. Ennemidor ayant dansé son balet, s'approcha de Filatee , & comme il l'entretenoit, l'un des autres Masques le choqua si rudement qu'il le renuersa presque par terre, dont il se sentit tellement offensé, que se tournant vers celuy qui l'auoit si mal traité, luy donna vn grand coup de pied par le ventre. Au mesme temps il se fit vne si grande rumeur , que peu s'en fallut

que tous ceux qui estoient là ne se coupassent la gorge. En fin Emiston qui n'en cognoissoit pas vn, fit tant qu'il appaisa ce bruit, de sorte que ceux qui estoient entrez les premiers se retirèrent avant les autres. Mais Ennemidor estoit au desespoir, croyant auoir receu vn affront en la presence de sa Maistresse, & resolut de sçauoir qui estoit celuy-là qui le luy auoit fait. Il attendit enuiron vn quart-d'heure dans la rue, & dès qu'il vid que ceux à qui il en vouloit fortoiet de chez Emiston, il mit l'espee à la main, & se meslant parmy eux attaqua celuy-là qui l'auoit choqué, qu'il reconnut aysement, parce qu'il estoit le plus grand de tous les autres. Apres qu'ils se furent tiré quelques coups, Ennemidor en

donna vn dans le cœur à son ennemy, & apres cela chargea si rudement les autres qu'ils prirent la fuite. Il fut tué cinq hommes en ce combat, deux du costé d'Ennemidor, & trois de l'autre, sans plusieurs qui y furent blesez, dont il y en eut quelques-vns qui moururent bien-tost apres. Ennemidor ne s'estoit presque pas retiré dans son logis avec ses amis, que trente ou quarante soldats bien armez l'y assiegerét, luy reprochans qu'il auoit tué le fils du gouuerneur de Darderoy. Ennemidor voyant cela, reconnut que celuy qui l'auoit choqué chez Emiston, & qu'il auoit tué, estoit Oristhene, dont il estoit tellement desesperé, que sans l'vn de ses amis il se fust passé son espee au trauers du corps, pour le

regret qu'il auoit d'auoir priué Filatee de son frere , & d'estre contraint de s'esloigner d'elle. Il se sauua par-dessus la couuerture de son logis, & partit cette nuit-là de Darderoy avec ceux qui estoient en la mesme peine que luy. Comme ils furent arriuez sur la pointe du iour à vn petit village qui est à quatre lieuës de Darderoy, ils se separent tous, & prirent chacun vn different chemin. Ennemidor changea son habit avec vn de burre que luy donna l'hoste où ils estoient logez , & auquel il laissa vn bon cheual qu'il auoit pour monter sur vn bidet qu'il emmena portant vne petite mallette en croupe. Apres cela vous sçauetz, Madame, ce qui luy arriua auant qu'il entraist dans Sirapis; Cependant Filatee ayant sceu

tout ce qui s'estoit passé, & qu'En-
 nemidor s'en estoit allé de peur
 qu'estant pris on ne le fist mou-
 rir, comminça à sentir en elle vn
 si extreme ennuy de son esloi-
 gnement, qu'elle en tumba ma-
 lade. Certes, Madame, *i'ay tous-*
iours remarqué qu'il n'y a rien qui af-
flige tant vne femme qui est infinimēt
aymee de quelque galant homme, que
quand par sa rigueur ou par quelque
autre accident, elle est contrainte de le
perdre, combien qu'elle n'eust aucun
dessein de soulager sa peine. Ah ! que
 d'ennuys nous receuons lors que
 nous voyons que celuy qui nous
 seruoit avec toute sorte d'hon-
 neurs, de soins & de soumissions
 recouure sa liberté qu'il nous a-
 uoit engagée, & consacre à vn au-
 tre les mesmes vœux qu'il auoit
 accoustumé de nous adresser ?

C'est vn regret qui ne se peut exprimer, & quoy que s'en soit, il n'y a ce me semble point de filles ny de femmes au mōde, quelque mine qu'elles fassent, qui ne soient extrêmement faschees de perdre la puissāce qu'elles auoient sur les volontez d'une personne, de qui elles pouuoient entierement disposer; & qui au lieu de les adorer ainsi qu'auparauant, tesmoigne les tenir indifferentes & n'en faire plus d'estat, voire mesmes ne s'en souuenir que pour les mespriser. Filatee estant donques asseuree qu'Ennemidor s'en estoit allé, & que peut-estre elle ne le verroit iamais, deuint beaucoup plus amoureuse de luy que quand elle le voyoit tous les iours. O estranges & admirables effets d'amour! On tient que cette passion ne se peut guarir que par l'absence; & neantmoins ce fut par ce

moyen que la belle Filatee perdit sa liberté, ne pouuant souffrir l'esloignement de celuy dont elle auoit quelquesfois euité la presence. Elle creut qu'encores qu'il eust tué son frere, & qu'il se fust retiré sans prendre congé d'elle; que toutefois il n'auoit point en changeant de lieu, changé l'affection qu'il luy auoit fait paroistre, & qu'il auroit infailliblement esté contraint de se resoudre aux extremitez où il s'estoit porté. Cette croyance luy fit prendre vne resolution autant pleine de dangers, que digne d'estre admirée : Car ne pouuant plus viure sans voir celuy qu'elle portoit dans son cœur & dans ses yeux, elle se déguisa en homme pour l'aller chercher. Ainsi apres s'estre desrobée de son pere & de sa

mere, & auoir souffert vne infinité de peines & d'ennuys, elle fut prise par les voleurs que tua Chrisolite, de sorte qu'en mesme temps elle treuua son amy, & fut vengée de ses ennemis.

Voila, Madame, continua Callionne, ce que m'a conté la belle Filatee qui est déguisée en Cauallier, & se fait appeller Delphis. O Cieux! s'écria la Duchesse de Gonzanuert, est-il possible que celuy dont se plaint Filatee, soit cet Ennemidor qui a réply nostre maison d'ennuys, & que ie dois autant hayr que la mort? Madame, c'est luy-mesme, respondit Callionne, & s'est déguisé en fille pour vous seruir, se faisant appeller Chrisolite, car Filatee qui l'a recognu m'en a ainsi asseurée: Et comment r'en a-t'elle asseurée? demanda

demanda la Duchesse. Madame, repartit Callionne, apres qu'elle m'eut raconté tout ce que vous auez entendu, elle me conjura de luy dire depuis quel temps ie cognoissois celuy qui l'auoit deliuree des mains des voleurs. Ie luy ay dit que ce n'estoit point vn homme, mais que c'estoit vne fille, luy confessant ingenuement la verité, & luy declarant de quelle sorte elle est entree à vostre seruice; car en luy disant ce secret, ie ne sçauois pas encores que ce fust Ennemidor, aussi n'ay-je fait cognoistre à Filatee aucune chose de ce que i'ay iugé n'estre pas à propos qu'elle sceust. Certes Callionne, repliqua la Duchesse, vous ne deuiez point dire qui ie suis, ny descouvrir cette affaire qui me déplaist tant, que ie crøy

que i'en mourray d'ennuys. Mais il n'y a desormais point de remede, faites-moy venir cet effronté trompeur, afin que ie parle à luy; car à quelque prix que ce soit, ie ne veux pas qu'il couche ceans, & vous deffens sur peine d'estre mal avec moy toute vostre vie, de parler de cecy à qui que ce soit.

Callionne estant en mesme temps sortie de la chambre de sa Maistresse, & ayant dit à Ennemidor que la Duchesse vouloit parler à luy, il s'en alla la treuver. Certes, luy dit-elle, aussi-tost qu'elle le vid, si ie n'estois retenüe par quelque particuliere cōsideration, ie ferois chastier vostre insolence comme il cōuient. Retirez-vous promptement, & que ie ne vous voye iamais: car si vous vous treuuez deuant moy,

ce sera le plus grand malheur qui vous puisse arriuer, & sur tout souuenez-vous d'estre discret. Quand on vient à oüir vn grand coup de tonnerre sans l'auoir preueu, on n'est pas plus surpris & plus estonné que le fut Ennemidor, voyant esclater la colere de celle dont il estoit accoustumé de voir le visage plein de douceur. Il se ietta de genoux à ses pieds, & luy dit. Ah! Madame, ie vous demande pardon, & vous supplie tres-humblemēt de souffrir que ie meure presentement deuant vous, si i'ay esté si malheureux que de vous déplaire en quelque chose, car vostre contentement m'est mille fois plus cher que la vie. En disant cela il tira son espee, & fit feinte de s'en vouloir donner au trauers du

corps. Mais la Duchesse se iettant sur luy, s'écria. O miserable, que voulez-vous faire? Voudriez-vous en vous tuant vous priver pour iamais de la compagnie des Dieux, qui bannissent de leur celeste séjour ceux que la rage a fait sortir de ce monde avant qu'ils l'eussent ordonné? Ne sçavez-vous pas *que de tous les crimes dont les mortels se puissent souïller, il n'y en a point vn si noir, ny que la diuine Iustice chastie si seuerement que le desespoir?* Leuez-vous donques & vous en allez en quelque lieu effacer par vos larmes les taches de vostre ame, si vous ne voulez estre reserué à des flammes qui sont insupportables aussi bien qu'éternelles. Madame, repliqua Ennemidor, pleurant comme s'il se fust voulu noyer, au lieu de se

releuer, ie ne me puis imaginer aucun supplice plus cruel que d'estre banny de vostre presence, & priué de vostre bonne grace. Vous pouuez me faire souffrir vne infinité de tourments, mais vous ne pouuez m'empescher de vous aymer: Car le feu qui en ce monde peut reduire mon corps en cendre, & les flammes qui apres ma mort peuuent deuorer mon ame, ne sont que des gouttes de rosee au prix de l'ardeur amoureuse qui me consume. Je brusle, Madame, croyez-le s'il vous plaist: mais au plus fort du martyre que i'endure, ie ne vous demande autre chose sinon d'auoir mes peines agreables. Que s'il m'arriue de sortir tant soit peu du respect que ie vous dois, ne permettez plus que ie vous res-

pecte du tout, qui est le plus extreme chastiment que vous me pouuez donner. Non, non, (ad-iousta la Duchesse, qui ne pou-uoit plus s'empescher de pleurer, voyāt Ennemidor se fondre tout en larmes) il n'est point besoin de tant de discours, si vous voulez me plaire, & si i'ay quelque pou-voir sur vous, ostez-vous d'icy sans tarder, & sortez de ceans. Elle ne luy peut rien dire dauantage, car l'eau dont ses yeux estoiet pleins ne pouuoit estre retenuë. Elle sortit donques promptement de la chambre, & en s'en allant elle dit avec vne voix entrecoupee de sanglots, sans tourner la teste vers Ennemidor. Sur tout soyez sage Ennemidor, & ayez autant de discretion que vous m'en promettez. Il estoit demeuré à ge-

noux, ne sçachant à quoy se résoudre; iusques à ce que voyant qu'elle ouuroit la porte il se leua pour courre apres: mais elle fust plustost dehors de la chambre, & entree dans vn petit cabinet qui estoit aupres, qu'il ne fut sur ses pieds. O Cieux! s'écria-t'il quand il l'eut perduë de veuë, vous fuyez, ô ma chere ame, & ie ne puis mourir. Vous me quittez, & au mesme instant ie suis abandonné de toute sorte de consolation. O merueille du monde, miracle de la nature, miroir de chasteté, & delices du Ciel, ie recognois bien maintenāt que les Dieux ne vous ont mise sur la terre qu'afin que vous en soyez la gloire. Il vouloit encores continuer ses plaintes, quand Callionne luy vint dire que la Duchesse luy mandoit

qu'il fist , sans plus differer , ce qu'elle luy auoit dit. Ah ! ma chere sœur , respondit-il , ie suis prest à partir , ie m'en vays , ie m'en vays. En disant cela , il se mit à pleurer plus fort qu'il n'auoit point encores fait , dont Callionne eut tant de pitié , qu'elle luy dit. Monsieur , ne vous affligez point , l'humeur de Madame se pourra changer avec le temps , ie vous promets d'y faire tout ce qui me sera possible , & de vous seruir où i'en auray le moyen. Je sçay toute vostre affaire qu'elle mesme m'a contee , & dont vous eussiez peut-estre eu plus de contentement si vous m'en eussiez parlé. Mais il n'y a rien de desesperé , car encores que vous sortiez de ceãs , i'espere que vous y pourrez retourner dans peu de temps , & ce-

pendant ie vous promets encores vne fois de vous assister en ce qui dépendra de moy, qui vous aduertiray soigneusement de tous les mouuements de son cœur. Acheuant de dire cela, elle ouït que la Duchesse l'appelloit, c'est pourquoy elle dit à Ennemidor: Monsieur, ie ne puis estre icy davantage avec vous, allez vous-en, obeïssez croyez-moy, & ne vous attristez point. Apres cela elle courut à sa maistresse, qui se treuuoit extremement pressée d'un violent mal de cœur.

Ennemidor se consola vn peu de ce que Callionne luy auoit dit, & se voyant seul essuya ses yeux pour sortir du logis: Mais quand il en fut dehors son esprit fut pressé de tant d'ennuys, qu'il eust voulu estre mort; parce

qu'outre la crainte qu'il auoit de ne pouuoir iamais parler à la Duchesse de Gonzanuert, il ne sçauoit encores où aller ne cognoissant personne dans la Ville, & n'ayant pas vn sol pour viure & se mettre en equipage. Estant donques presque reduit au desespoir, & se promenant dans la rue sans sçauoir où se retirer, il rencontra Delphis tout hors d'aleine qui le vint aussi-tost embrasser, & luy dit. Monsieur, ie m'en allois vous treuver en grâde diligence, pour vous dire qu'à demy-lieuë d'icy i'ay rencontré environ deux cens hommes à cheual armez de toutes pieces qui viennent deçà. Et parce que i'ay ouy dire que l'Empereur veut assieger Gonzanuert, i'ay peur que ces gens-là n'y ayent fait quelque

entreprise. Monsieur, respondit Ennemidor, ie ne fais que sortir de chez la Duchesse, & ne puis pas maintenant y retourner, prenez s'il vous plaist la peine d'y aller pour luy donner aduis de ce que vous me dites, vous me treuuez en ce lieu où ie vous attendray. Delphis estant à la porte du logis de Madame de Gonzanvert, en vid sortir vne infinité de Pages & de laquais pleurants & courants d'un costé & d'autre. Il demanda à vn vieillard vestu par bandes de drap & de taffetas de trois ou quatre couleurs, s'il estoit arriué quelque mauuaise nouvelle. Helas! Monsieur, respondit ce vieillard, c'est que Madame se treuve extrememēt mal, & l'on enuoye de tous costez chercher des Medecins, des Apo-

ticquaires , & des Chirurgiens. Delphis ayant ouy cela, passa plus outre pour parler à Callionne qu'elle cognoissoit de sia, & qu'elle rencontra par vne bonne fortune au haut du degré! Ah Delphis (ainsi vous appelleray-je tousjours tant que vous serez vestuë en homme, dit Callionne) nous auons presque perdu Madame, qui a eu depuis demie-heure vn si grãd mal de cœur, que peu s'en est fallu qu'elle ne soit morte entre mes bras, mais graces aux Dieux, elle se treuve maintenant mieux. Et où vous estes vous tant gardee? Mademoiselle, respôdit Delphis, le lendemain que nous fusmes arriuez icy, ie m'en allay iusques chez le Gentil-homme où nous auions couché le iour auparauāt, & où i'auois oublié soubz mon

cheuet de liēt ma bourse qu'il m'a luy-mesme renduë. A demie-lieuë d'icy i'ay rencontré vn gros de Caualerie, qui vient en fort bon ordre & fort bien armé, ie crains que ce ne soit quelque troupe d'ennemis qui ayt fait quelque entreprise sur cette place. C'est pourquoy ie m'en suis venuë à toute bride pour en aduertir madame. Nauez vous point vū Ennemidor ? demanda Callionne, ie l'ay rencontré dans la ruë à cinquante pas d'icy fort triste & melancolique. Il m'a dit qu'il ne faisoit que sortir de ceās, & qu'il n'y pouuoit retourner, me priant de venir rapporter à Madame ce que ie viens de vous dire. Callionne ayant ouy cela, courut en donner aduis à la Duchesse, & luy dit que si on venoit as-

sieger Gonzanuert, il seroit fort à propos d'y retenir Ennemidor, parce que tres-assuréement, disoit-elle, s'il est pour nous nostre party en sera bien plus fort, & s'il se iette du costé des ennemis, ainsi qu'il fera s'il se retire avec mescontentement, ie crains qu'il ne nous fasse beaucoup de mal. La Duchesse ne respondit rien à cela, & commanda seulement qu'on luy fit venir Hipophilon, à qui elle dit, qu'il courust en diligence aduertir le Gouverneur de Gonzanuert de ce qu'auoit rapporté Delphis. Oriston, ainsi s'appelloit le Gouverneur, r'enforça incontinent les Corps de garde, & apres auoir donné l'ordre qu'il conuenoit pour la seureté de la place, resolut d'aller luy-mesme recognoistre qui pouuoient estre

ceux que Delphis auoit rencontréz. Il ne faisoit estat de mener avec luy que quelques quarante ou cinquâte cheuaux au plus, n'ayant aucun dessein de combattre: Mais Entriual qui depuis deux iours auoit amené dans la Ville, par commandement de Monsieur de Gonzanuert, vne compagnie de gensdarmes, qui estoit de cent Maistres, pria Oriston de le mener avec luy & tous ses cōpagnons. Avec cela plus de trente Gentils-hommes de qualité qui estoient venus voir la Duchesse voulurent estre de la partie. Ennemidor se desesperoit de n'auoir point de cheual. Delphis faisoit difficulté de luy prester le sien, parce que l'amour qu'il luy portoit, ne pouuoit souffrir qu'il se mist en aucun danger. Cela fut

cause qu'il s'en alla à Callionne; la prier de faire en sorte avec la Duchesse qu'il pust auoir le barbe qu'il auoit amené de Sirapis. Callionne le luy fait donner sans en parler à sa Maistresse: Mais il ne fut pas plustost monté dessus, qu'Hipophilon le reconnut, & le voulut arrester, croyant qu'il se fust coulé dans la Ville pour y executer quelque entreprise. Il sçauoit bien qu'il auoit tué le Prince de Voltandon, frere de la Duchesse de Gonzanuert; & que d'ailleurs il estoit des amis du Marquis de Gardenfort, qui s'estoit vanté de faire razer Gonzanuert, & de ruiner le Duc de Meuridas, & toute sa maison. S'estant donques approché de luy, il luy dit: Monsieur, si ie ne me trompe, vous n'estes pas en cette

Ville

Ville pour la deffendre , puis que vous estes l'un des plus confidens amis de Gardenfort , qui y fait acheminer pour l'assiéger toutes les forces de l'Empire. Monsieur, respondit Ennemidor , me cognoissez-vous bien? Assurément, repartit Hipophilon, ie vous prés pour Ennemidor , & ne m'abuse point. Il est vray, dit Ennemidor, ie m'appelle ainsi, mais puisque vous me cognoissez, ie vous supplie avant que de dire à personne qui ie suis, vouloir prendre la peine de demander à madame la Duchesse de Gonzanuert, si elle ne m'a pas fait donner ce barbe que j'ay pour aller avec Oriston, & si elle a aucun soupçon de moy. Je recognois bien ce barbe, respondit Hipophilon, il s'appelle Voltandon, & feu Monsieur de Vol-

tandon le donna à Monsieur le Duc, de forte que depuis ce tēps-là il a tousiours esté ainsi appelé: Mais ie ne sçay point qui vous l'a donné, ny si Madame sçait que vous soyiez en cette Ville. C'est pourquoy vous ne treuueriez pas s'il vous plaist mauuais, veu ce qui s'est passé cy-deuant, si ie suis estonné de vous y voir, & si ie desire sçauoir ce que i'ay affaire. Ie m'en iray treuuer Madame, & attendant que i'aye receu ses commandements, ie prieray Oriston de vous tenir compagnie. Ennemidor enrageoit en son ame de cette rencontre, mais n'y pouuāt apporter de remede, dit qu'il treuuoit bon l'expedient d'Hipophilon. Ils s'approcherent doncques tous deux d'Oriston, à qui Hipophilon dit: Mōsieur, ie m'en

vay iusques au Chasteau parler à Madame de quelque chose d'importance ; dont il est nécessaire que nous ayons la resolution avant que nous sortiós de la Ville. Cependát ie vous supplie de vous tenir pres de Monsieur iusques à ce que ie soys de retour, parce qu'il ne cognoist icy personne. Je le cognois fort bien, respondit Oriston, & ne comprends point quelle affaire il y peut auoir. Il m'a dit, repartit Hipophilon, que Madame luy a fait donner Vol-tandon pour vous accompagner, & c'est pour cela que ie m'en retourne au Chasteau.

Comme Hipophilon acheuoit de dire cela, il entra dans la Ville vn Gentil-homme qui couroit à toute bride. Oriston qui le cognoissoit, luy dit, Où courez-vous

si viste Gandaron. Je viens promptement querir du secours, respondit-il, afin de tirer la Reyne de Regnaut-chanfort d'entre les mains de ceux qui l'emmenent prisonniere à Sirapis par le commandemét de l'Empereur. Sont-ils loing d'icy, demanda Oriston, ils n'en peuvent estre qu'à vn quart de lieuë au plus, repliqua Gandaron. Courez dóques promptement tous deux au Chasteau, dit Oriston, vous & Hipophiló, & ne tardez point, pource qu'il n'y a que sept lieuës d'icy à Agrigente, qui est leur retraite. Oriston n'eut pas plustost ouy cela qu'Hipophilon & Gandaron pousserent leurs cheuaux, & s'en allerent treuuer la Duchesse, à qui Gandaron ayant fait entendre le sujet de son voyage, elle com-

manda qu'on secourust promptement sa sœur, & que chacun montast à cheual pour la deliurer à quelque prix que ce fust. Madame, dit Hipophilon, Oriston s'y en-va avec près de deux cens cinquante cheuaux, mais ie suis accouru icy vous dire que i'ay treuvé Ennemidor qui veut l'accompagner. Il est monté sur le barbe que feu Monsieur le Prince de Voltandon a donné à Monsieur, & dit que vous le luy avez fait prester pour venir avec nous, ce que ie n'ay pû croire, ny que vous sceussiez mesmement qu'il fust en cette Ville. Je sçay bien qu'il y est, respondit la Duchesse, mais ie ne luy ay point fait prester ce barbe dont vous parlez. Madame, dit Callionne, qui estoit là, il me l'est venu demander à l'heure

que vostre mal de cœur vous a pris, & ie le luy ay fait donner, sçachant que c'estoit pour vostre seruice. Et bien, bien, repartit la Duchesse, parlant à Hipophilon, c'est assez, allez & ne perdez point de temps. Mais Madame, adiousta Hipophilon, vous plaist-il que nous laissions venir Ennemidor avec nous ? La Duchesse ne luy respondit rien, & fit semblant de ne prendre pas garde à ce qu'il luy disoit, ce que Callionne voyant, & se doutant de ce qui l'en auoit empeschée, dit, ouy, ouy, menez-le avec vous.

Après cela la Duchesse fit fermer la porte de sa chambre, & appellant Callionne, luy dit. Certes ma bonne amie, il me semble que vous n'avez gueres de discretion d'auoir fait donner à Enne-

midor le cheual qu'il a. Que pensez-vous qu'on die à la Cour, & par tout ailleurs quand on sçaura cela, & qu'il est le bien-venu ceans ? On parlera de moy aux plus mauuais termes qu'il est possible, & croira-t'on que cet homme là (veu le sujet que j'ay de le hayr) ne seroit point le bien venu icy, si ie ne l'aymois plus que mô honneur. Personne ne s'imagi- nera que ce soit pour l'ainour de vous, pource qu'on sçait bien que s'il n'y auoit que cela, ie ne souffrirois pas qu'il se presentast deuant moy. O Cieux, ie suis perdue ! mon innocence ne me garantira pas du blasme que mon malheur me prepare. *Ah ! qu'il est bien vray qu'on ne doit pas tousiours croire les bruits qui courent, & ne iuger pas temerairement des actions des*

femmes sans cognoistre le secret de leurs affaires, & estre bien asseuré de quelle sorte elles se gouvernent, pource que bien souuent on reuoque en doute l'honnesteté de celles qui seroient honnorees comme des exemples de vertu, si elles estoient bien cognuës. Madame, repondit Callionne, ce que vous dites doit tirer vostre esprit de l'apprehension que vous auez que le sejour d'Ennemidor en cette ville n'apporte quelque prejudice à vostre reputation, pource qu'outre qu'on vous a tousiours tenuë pour la plus sage Daine de la Cour, on sçait bien qu'en Galatie, encores que les Princes & les grands Seigneurs ayent toute sorte de suieût de se hayr, ils ont toute fois cette bonne coustume de s'accorder quand il est question de maintenir ou esleuer leur fortune, dont ils ont plus de soin que

de se vanger. Ainsi quand on sçaura qu'Ennemidor a embrassé vostre party, on croira que l'esperance d'y faire plustost les affaires qu'ailleurs, l'y a fait ietter, & que la necessité des vostres l'y a fait recevoir. Quoy que Callionne representast a sa Maistresse, elle ne pût toutefois la consoler; de sorte qu'après plusieurs discours qu'elles eurent ensemble, & qui durerent assez long-temps, la Duchesse pour chercher quelque allegement à ses ennuys s'efforça de dormir.

Trois heures s'estoient à grand peine escoulees depuis qu'Hippophilon estoit party de la chambre, quand on ouyt entrer dans la court du logis vn carrosse à six cheuaux, qui mena tant de bruit que la Duchesse s'éueilla, & de-

manda ce que c'estoit. On luy dit que c'estoit la Reine de Regnautchanfort qui arriuoit. Elle se leua pour aller au deuant d'elle, & la rencontra dans le degré, puis la mena dans sa chambre, où apres s'estre plusieurs fois embrassées, la Reyne dit. Assurément, ma sœur, i'estois perduë sans le secours que vous m'avez enuoyé, & sans l'assistance que i'ay receuë d'un homme de qui ie l'esperois le moins, & que vous ne soupçonerez ie m'assure iamais. Pardonnez-moy, respondit la Duchesse, ie sçay bien qui est celuy-là dont vous voulez parler, c'est à mon aduis Ennemidor. Et comment sçavez-vous cela? repartit la Reine. Pource qu'il est party d'icy avec Oriston, pour aller chercher ceux qui vous emmenotent, res-

pondit la Duchesse: Mais contez-moy vn peu, s'il vous plaist, ce qui vous est arriué, & puis ie vous diray tout à loisir comment Ennemidor s'est rendu icy.

Après que mes freres & moy nous fusmes sauuez de Sirapis, dit la Reine, & qu'eux se furét retirez à Meuridas, ie m'en allay chez moy à Regnaut-cháfort, où cinq iours après mon arriuee i'eu aduis certain de la vostre en ce lieu. Je me resolu à vous venir treuuer, tant pour m'esloigner de Meuridas, qu'on croit que l'Empereur va luy-mesme assieger, que pour me consoler avec vous. Je party doncques de chez moy avec mô train ordinaire, ne croyant pas qu'il y eust aucun danger sur le chemin: Mais côme ie fus à vn bon quart de lieüe d'icy, & que nous voyons

desia les tours de Gonzanuert, mes gens descouurirent vn gros de Caualerie qui venoit droit à nous, dont ils m'auertirent incontinent. Je ne m'en effrayé point du tout, pource que ie m'imaginay que c'estoit quelqu'une de vos troupes que vous enuoyez au secours de Meuridas, ne me pouuant persuader que des coureurs du costé des ennemis s'approchassent si pres de Gonzanuert, où ie sçauois bien qu'il y auoit vne forte garnison & de Caualerie & d'Infanterie. Neantmoins le Comte de Stratebout qui estoit avec moy dans mon carrosse, fut d'aduis de mettre pié à terre, & d'enuoyer sçauoir qui estoient ceux qui s'aduançoient tousiours en fort bon ordre. Il commâda au Lieutenant de mes

Gardes de prendre quinze ou vingt de ses compagnons, & de les aller recognoistre. Comme il fut à cent pas d'eux, & qu'il eut remarqué qu'ils auoient des escharpes jaunes, il voulut s'en reuenir au galop nous dire que c'estoient des ennemis, mais ils furent pourfuiuis de si pres par les autres, qu'ils n'eurent le loisir que de crier en s'approchant de mon carrosse, armes, armes, ce sont des ennemis. Representez-vous ce que ie deuins alors, parce qu'apres que mes Gardes eurent dit cela, il se fit vn cry si espouuentable parmy mes gens, que ie croy qu'il ne s'en est iamais ouy vn semblable. Incontinent apres i'ouy que les ennemis crioyent tous ensemble, tuë, tuë; O Cieux ie frissonne encores de peur qu'ad

ie me souuiens de cela ! Au mesme instant i'entendy tirer tant de coups de pistolets & de carrabines , que ie croyois fermement que tous ceux qui estoient venus avec moy auoient esté tuez. Je ne sçauois à quoy me resoudre , & n'osois pas mesmement regarder hors de mon carrosse, quand ie vy vn homme armé de toutes pieces , qui mettant la teste dans la portiere, & la tournant de tous costez pour voir où i'estois, me dit m'ayāt apperceuë; Madame, ie vous engage ma foy & mô honneur, qu'il ne sera fait aucun mal à vostre Majesté: Mais s'il ne vous plaist commander à vos gens de mettre les armes bas, & de se rendre, ie les feray tous passer au fil de l'espee, selō l'ordre que i'en ay de l'Empereur. Je luy demanday ce

qu'il falloit que ie fisse. Mettez pied à terre & les faites obeïr, me repliqua-t'il. Oyant cela, ie descendy promptement de carrosse. O ma sœur, l'horrible spectacle qui se presenta à mes yeux quand ie fus à terre ! Je voyois assommer mes gens sans aucune pitié : L'un tumboit mort de dessus son cheval, vn autre estant à pied estoit en vn moment mis en pieces à grands coups d'espees. I'en vy vn qui se voulant deffendre & resister à cinq ou six qui l'attaquoiēt par deuant, fut en fin miserablement tué par derriere par d'autres qu'il ne voyoit pas. Mais tout cela n'estoit que jeu au prix du carnage qui se faisoit au derriere de mon carrosse, où le Comte de Sstratebout s'estoit retiré avec douze ou quinze de mes Gentils-

hommes. Je m'y en allay pour voir ce que c'estoit, parce qu'il s'y faisoit vn plus grand bruit qu'en aucun autre endroit. M'en estant approchée, ie prié celuy qui se-
stoit adressé à moy de faire cesser le cōbat, & luy dis que les miens ne feroient aucune difficulté de se rendre. Il poussa son cheual dās la meslee, criant tant qu'il pou-
uoit, c'est assez, c'est assez; qu'on ne tuë plus personne. Mais quoy, ses gens estoient si eschauffez qu'ils ne l'entendoient point; de sorte qu'encores qu'il fist tout ce qui luy fut possible, & qu'il frapast mesmement les siens, il ne pût toutefois empescher que les pauvres gens-là ne fussent tous tuez, fors seulement le Comre de Stratebout, & cinq autres qui sont tellement couuerts de blef-
feures

seurs, que j'apprehende bien fort qu'il ne s'en sauue pas vn. La rumeur estant appaisée en cet endroit-là, le Chef des ennemis descendit de cheual, & ayant osté son habillement de teste s'approcha de moy, & me dit. Madame, Dieu sçait l'extreme regret que j'ay de ce qui s'est passé, ie iure que ie voudrois estre mort vne heure auant que l'empereur m'aye donné le commandement de vous venir arrester. Je luy demanday d'où l'Empereur auoit pû auoir aduis de mon voyage. Madame, me respondit-il, sa Majesté a de fort bons espions. Mais nous n'auons pas trop de temps pour aller à Agrigente, ayez s'il vous plaist agreable de monter en carrosse, de peur que la nuit nous surprenant vous ne soyez mala-

de. Auant que faire ce qu'il disoit, ie le priay d'enuoyer icy le Comte de Stratebout & les autres blesez, ce qu'il ne me voulut accorder, & les fit mettre sur le chariot de mon bagage apres l'auoir fait descharger. En fin ie fus pressee de monter dans mon carrosse, où ie ne fus pas plustost qu'il commanda à mon Carrossier de toucher, & d'aller au grãd trot, laissant enuiron vingt gensdarmes pour seruir d'escorte au chariot des prisonniers, à mes mulets de bagage, & à sept ou huit cheuaux sur lesquels on auoit mis ce qu'on auoit osté de dessus mon chariot, pource que Valdamont ne vouloit rien perdre, s'imaginant desia que tout mon equipage seroit pour luy. Quoy, dit la Duchesse, interrom-

pant sa sœur, c'est donques Valdamont qui vous emmenoit. C'est luy-mesme, repliqua la Reyne. O le traistre, adiousta la Duchesse! Hé ma sœur, respondit la Reyne, *il ne faut point treuuer estrange qu'un homme qui abandonne sa religion pour l'amour d'une femme, trahisse son Maistre pour faire sa fortune.* Mais escoutez le reste, à peine auions-nous fait vne demie lieuë, quoy que nous cheminassons fort viste, que i'entendy le bruit de plusieurs hommes à cheual, qui venoient au grand galop sur le paué. Je regarday & vy que c'estoient ceux que Valdamont auoit laissé pour conduire les prisonniers & le bagage. Valdamont qui se tenoit à la portiere de mon carrosse, leur demanda où ils s'en alloient ainsi tous en si grande

haste. Monsieur, repartit l'un d'entr'eux, nous auons veu à deux cens pas loing du lieu où vous nous auez laissez, ou enuiron, vn gros de Caualerie de plus de deux cens cheuaux, qui venoient droit à nous au meilleur ordre du monde, & m'asseure que s'ils ne se sont point arrestez à parler au Comte de Stratebout, qui est dans le chariot, vous les pourrez bien-tost voir. Valdamont au mesme tēps fait mettre mon carrosse de trauers dans le chemin, & commanda à vingt Carabins de descendre de cheual, puis en mit dix au derriere du carrosse, & dix au deuant qui se couuroient de leurs cheuaux; de forte que le carrosse estant au milieu de ces vingt Carabins seruoit de barricade. Aux deux costez du chemin à main

droite & à main gauche, il y auoit deux fossez & deux hayes qui pouuoient auoir sept ou huit cens pas de long. Valdamont fit abattre promptement vn peu de terre, & rompre des hayes par-delà la barricade pour faire vn passage dans les champs. Il y fit aduancer de chaque costé quelques vingt-cinq ou trente pas deuant le carrosse, douze Carabins qui estoient couuerts de hayes. Ils ne furent pas plustost en embuscade que Oriston arriua, qui ne les voyant pas voulut venir enfoncer ceux qui estoient aux deux bouts du carrosse, dans lequel i'estois demeuree. Mais ceux qui estoient dans les champs luy firent vne saluë si à propos, qu'ils ne tirerent presque coup qui ne portast, & qui n'abatist ou hom-

me ou cheual. Oriston neantmoins ne laissa pas de passer outre, quoy que les gens fussent infiniment estonnez de cette surprise. En approchant de mon carrosse, ils furent encores receus par vn autre saluë, qui ne les incommoda gueres moins que la premiere: de sorte que comme ils voulurent aller à Valdamont, ils se mirent tous en desordre, s'efforçant de passer aux deux bouts du chemin. A mesure qu'ils passoient, Valdamont qui estoit fort ferré avec tous ses compagnons les chargea furieusement, & manda aux Carabins qui estoient dans les champs de les attaquer par derriere, ce qu'ils firent avec tant d'ardeur, que vos gens se sentans battus de tous costez prirent l'espouuante. I'estois

au milieu de la meslee, parce que
deuant & derriere , à droit & à
gauche on estoit aux mains , &
vous iure que c'est vn miracle de
ce que toutes mes femmes &
moy n'auons point esté tuees.
Mon carrosse est tout percé de
coups de carabines & de pisto-
lets, toutefois il n'y a eu personne
de blessé que Rozane qui a vn
coup dans le bras. Quoy que ie
visse bien le danger où i'estois, ie
ne pû neantmoins m'empescher
d'auoir tousiours la teste à la por-
tiere pour regarder ce qui se pas-
soit. En fin nos gens estant en dé-
route, Valdamont s'approcha de
moy, & me dit : Madame, vous
voyez comme Dieu punit ceux
qui s'opposent aux volontez de
l'Empereur, qui n'a aucune mau-
uaise intention, & ne desire que

le repos de ses ſujets. l'eſtime que vous ne deuez plus differer à vous en venir avec nous, qui vous rendrons tout l'honneur & le reſpect que vous pouuez deſirer. Il luy reſpondy que i'eſtois preſte d'aller où il voudroit; mais comme il fut queſtion de tourner mô carroſſe du coſté d'Agrigente, on ne pût treuver mon Carroſſier; & d'ailleurs il ne me reſtoit plus que quatre cheuaux, pource que les deux autres auoient eſté tuez. Côme on trauailloit à y en mettre deux autres, & qu'un Carabin ſ'offroit pour mener le carroſſe, ie vy venir de ce coſté-cy vn gros de Caualerie qui ſ'aduançoit au grand trot. Valdamont ſe reſolut encores au combat, mais il ne luy reüſſit pas ſi bien qu'auparauant, parce que d'abord celuy qui me-

noit cette derniere troupe luy donna vn coup de pistolet dans la teste, dont il tumba mort. Ses compaignons voyans cela, & croyans que c'estoit tousiours à recommencer, se debanderent & s'enfuirent à toute bride. On les poursuiuit quelque temps, & croy qu'il s'en est peu sauué. Cependant qu'on couroit apres, ie fis tourner mon carrosse par mon Carrossier, qui se treuua aussi-tost qu'il vid la chance tournee. Je n'auois pas encores fait vingt pas que ie voys mon liberateur à la portiere, qui me dit: Madame le Ciel qui prend soin de vostre personne a combattu pour vostre majesté, & a chastié vos ennemis. Je recognu que celuy qui me disoit cela estoit Ennemidor, dont ie fus tant estant estonnee, que ie

ne l'ay iamais esté dauantage.
Certes Ennemidor, luy respondy-
je, vous faites bien voir que le
Ciel qui prend soin des gens de
bien, vous a donné tant de cou-
rage & de valeur, qu'il faut ad-
uoüer que les entreprises que
vous n'aurez pas executées, ne le
feront de personne du monde.
Vous m'avez tellement obligée,
que i'achepteroïs de fort bon
cœur l'occasion de vous tesmoi-
gner le ressentiment que i'en ay.
Après que i'eu ainsi parlé à luy, ie
le priay de me dire comment il
s'estoit treuvé là si à propos pour
me secourir. Il me respondit sui-
uant tousiours mon carrosse, &
s'appuyant sur la portiere, qu'il
estoit venu avec Oriston, & qu'a-
yant vû la déroute de ses gens qui
s'enfuyoient, il auoit couru apres

eux pour les rassurer, & que les ayant ralliez & encouragez, il estoit venu charger Valdamont, qui dès l'abord auoit esté chastié de sa temeraire entreprise. Voila ma sœur comme cette affaire s'est passée, dont ie suis infiniment obligee à Ennemidor qui m'a secourüe si à propos, qu'asseurement sans luy on m'eust conduite en triomphe à Sirapis, où ie ne doute point qu'on ne m'eust fait vn tres-mauuais party. En disant cela, la Reyne auoit ietté sa veüe sur Ennemidor qui estoit dans la chambre, & le regardoit avec vn petit soufrire plein d'amour. Mais, adiousta-t'elle tout bas, en s'approchant des oreilles de sa sœur, obligez-moy tant s'il vous plait, ma sœur, que de me dire par quel moyen cet homme s'est rendu de

nos amis , & quelle affaire le peut auoir amené en cette Ville . La Duchesse au lieu de luy répondre la prit par la main , & la luy ferra, puis se leuant dit tout haut, adressant sa parole à la compagnie. Messieurs il est tard , & ie croy qu'apres tant de fatigues & de maux que vous auez eus , il est maintenant bien à propos que vous alliez souper pour vous reposer puis apres. Faites donques bonne chere, & demain Dieu aydant nous aduiserons tous ensemble à ce qui sera necessaire pour resister aux entreprises de nos ennemis. Ayant dit cela, elle pria vn Gentil-homme de sa maison de faire seruir, & d'emmener souper la compagnie, qui au mesme temps se retira dás la salle , où la viande estoit desia sur la table.

Chacun en se retirant fit la reuerence aux deux Princesses , & Ennemidor demeura tout le dernier pour s'acquiter de ce deuoir, & se faire mieux remarquer par la Duchesse , qui toutefois luy fit vne mine assez froide. La Reyne luy dit avec vne façon riante, lors qu'il fut pres la porte pour sortir. Monsieur, ie vous suis redevable de ma liberté, & peut-estre de ma vie; mais i'auray asseurément plus de besoin de vostre secours que iamais , parce que ie ne doute point que nous n'ayons de grāds assauts à soustenir en cette place, qui ne craindra rien si vous luy voulez faire ressentir les effets ordinaires de vostre valeur. Madame, repartit Ennemidor, c'est le bon-heur qui accompagne sans cesse vostre Majesté, qui a com-

battu pour vous , & a chastié l'insupportable temerité de ceux qui vouloient violer le respect que tout le monde vous doit porter. Mais , continua-t'il en s'avançant deux ou trois pas vers la Reine, ie ne doute point si l'Empereur sçait que ie sois en cette Ville qu'il ne l'assiege pour m'auoir en la prenant , de sorte que si ie m'y arrestois dauantage, ie prejudicierois beaucoup plus à vostre seruice que ie n'y ferois vtile. Je vous supplie donc tres-humblement Madame , & Madame aussi, dit-il en regardant la Duchesse qui estoit excessiuement triste, de me donner congé, & d'auoir agreable que ie me retire cette nuit, afin que mon sejour en cette Ville ne vous donne aucun ennuy. Certes, respondit la

Reyne, puis que vous avez commencé à nous obliger, vous ne nous devez pas ainsi abandonner en vn temps où vous avez plus de moyen de nous faire plaisir. Nous vous prions ma sœur & moy de demeurer icy avec nous, & de ne nous delaisser pas au besoin. Nous vous promettons de suiure entierement vos aduis, & de vous faire obeir comme nous-mesmes. La Reyne en disant cela, regardoit la Duchesse de la mesme sorte dont on a accoustumé de regarder ceux de qui on veut attirer le consentement, quand on fait quelque proposition, & qu'on desire qu'elle leur soit agreable. Mais soit ou qu'elle ne voulust pas parler, de peur que la colere ne luy fist dire quelque chose contre le bien de ses affai-

res , & contre son propre contentement , ou qu'elle n'eust pas enuie qu'Ennemidor demeurait, ou que par respect elle ne creut pas qu'il fust necessaire d'ayder à sa sœur à obtenir quoy qu'elle pust desirer, estimant que ses prieres seroient inutiles si les siennes n'auoient point de lieu, ou qu'en fin son esprit fust consumé d'ennuys, non seulement elle ne luy respondit ny de la voix, ny du geste, mais elle resmoigna encores par sa froideur qu'elle n'auoit nullement pris garde à ce qu'on auoit dit. Cela fut cause que la Reyne s'approchant vn peu d'elle , luy demanda si elle se treuuoit mal. Ma sœur, respôdit-elle, ie ne puis rien vous dire tant que cet homme sera là, enuoyez-le souper, & quand nous serons seules ie vous

entre-

entretiendray de choses fort estranges. La Reyne ayant ouy cela se tourna vers Ennemidor, & le pria d'aller souper & de la reuenir treuuer le lendemain. Ennemidor se doutant bien que les deux Princesses se vouloient entretenir en particulier, & n'apprehendant rien tant que de leur estre importun, ne respondit rien. Il leur fit la reuerence, & passa puis-apres dans la salle. Il ne s'y vouloit pas arrester, quoy que tous ceux qui estoient à table l'en priaissent instamment; Neantmoins ayant apperceu Delphis entre les autres, il s'assist auprès de luy. Apres souper chacun se retira chez soy, & Ennemidor ne sçachant où aller, fut emmené par Delphis en vne chābre qu'on luy auoit marquee. Lors qu'ils

furent seuls ensemble, & que sans cesse ils se regardoient tous deux. Je me trompe, dit Ennemidor, si ie n'ay eu le bien de vous cognoistre autrefois. Monsieur, repartit Delphis, la couleur luy estant montee au visage, ie ne croy pas auoir eu cet honneur auant le iour que vous me tirastes d'entre les mains des voleurs, qui m'emmenoiēt prisonnier. Certes, repliqua Ennemidor, les traits de vostre visage me representent si naïvement vne beauté dont i'ay esté esperduëment amoureux, qu'il me semble que ie la voy quand ie vous regarde. Monsieur, respondit Delphis, ou vous me voulez trop obliger, ou vous n'estimez pas beaucoup celle pour qui vous auez de l'amour, parce qu'il est certain que ie n'ay rien d'ayma-

ble que le desir de vous honno-
rer, & de vous servir toute ma vie.
Je vous suis desia infiniment o-
bligé, & outre cela ie desire avec
tant de passion l'honneur de vo-
stre bonne grace, qu'il n'y a point
de danger qui me puisse destour-
ner de courre vostre fortune. Je
vous suiuray par tout le monde,
& ne vous abandonneray iamais,
pourueu que ma compagnie ne
vous soit point importune. Enne-
midor remercia Delphis de tant
d'honnestes offres, & luy dit en
l'embrassant, qu'il tenoit son ami-
tié extremement chere, & qu'il se
confieroit desormais en luy com-
me en soy-mesme. Apres plu-
sieurs compliments, ils se cou-
cherent ensemble, n'y ayāt qu'un
lict dans la chambre. La belle Fi-
latee ne passa iamais vne si mau-

uaise nuit que celle-là, parce que ne s'estant point encores treuuee entre deux linceuls avec aucun homme, & se voyant seule avec celuy pour l'amour de qui elle auoit quitté son pere & sa mere, & couru vne infinité de dangers, il luy fut impossible de dormir. L'amour & la jalousie qui ne sont presque iamais l'une sans l'autre; ainsi que le Soleil ne marche point sans lumiere, remplirent son esprit de tant d'importunes pensees qui troublerent son repos, que le sommeil avec ses doux charmes ne luy pût siller les yeux. Encores qu'on tienne que deux contraires ne peuuent subsister en vn mesme sujet: Neantmoins ces deux differentes passions s'estans vnies ensemble, firent souffrir à cette Amante les plus insup-

portables inquietudes qu'elle eust iamaïs reſſenty. Ah ! diſoit-elle en elle-mefme, ainſi qu'elle m'a raconté, infidelle que tu es: Tu n'as point eu de honte de te déguifer en fille, pour iouyr d'une Dame qui ne t'ayme point, & tu ne voys pas que ie ſuis déguifée en garçon bruſſant de ton amour. Combien de fois m'as-tu iuré que tu ne voyois que par mes yeux, & neantmoins tu ne les recognois pas à cette-heure. Inſenſé que tu es, ne fais-tu pas bien paroître ton aueuglement, quãd tu cheris vne perſonne qui ne te veut pas voir, & que tu ne voys pas celle qui t'adore?

Au lieu de dormir, Delphis ſe plaignoit ainſi d'Ennemidor, qui de ſon coſté n'auoit pas plus de repos, & ne ſ'affligeoit pas moins

qu'elle. Les priuautez qu'il auoit euës avec la Duchesse de Gonzanuert , qu'il auoit veüe toute nuë , remplissoient son esprit de desirs qui le deuoroiët sans cesse. *A la verité il n'y a rien qui nous embraze d'auantage en l'amour d'une femme , qui est doüee d'une exquisite beauté , que quand nos yeux ont veu, & nos mains ont touché à loisir toutes les merueilles que les habits ont accoustumé de couvrir. L'imagination continuelle qui nous en reste asservit nostre liberté avec des charmes si puissants, qu'il n'y a que la mort, ou la iouyssance qui nous en puissent affranchir. Ah ! fascheux & agreable souuenir tout ensemble , disoit souuent Ennemidor, occuperas-tu sans cesse mes pensees toutes entieres ? N'auray-je iamais d'autre idee que celle qui tient*

incessamment mon cœur enuironné des flammes dont il est consummé ? Ah ! mes yeux qui estes cause de mon bon-heur, vous l'estes encores de mon martyre ! Vous avez si viuement empraint en mon ame l'objet qui vous a rauy, que mesmes au milieu des tenebres le feu qui me brusle m'en fait contempler l'image. Mes mains qui avez tenu tant de secrets trefors, pourquoy les avez-vous laissez ? Apres auoir aydé à me blesser, me ferez vous inutiles ? ou reprenez encores vne fois ce que j'ayme plus que ma vie, ou donnez-moy la mort !

Ennemidor eust passé toute la nuict en cet entretien, si Delphis qui l'entendit soupirer & se tourner d'un costé & d'autre, n'eust point eu peur qu'il se treuuaist

mal. Et quoy, Monsieur, luy dit-elle, sentez-vous quelque douleur, ou si c'est moy qui vous incommode & vous empesche de dormir? Ah! mon cher amy, respondit Ennemidor, vous ne m'incommodez nullement, au contraire ie crains plustost de vous donner de l'ennuy. Point du tout, repliqua Delphis; mais obligez-moy tant, s'il vous plaist, de me dire le sujet de vostre peine, & peut-estre que ie seray si heureux que de vous y pouuoir servir. Ah! Delphis, adiousta Ennemidor, i'ay vne si forte inclination à vous aimer, qu'il m'est impossible de vous pouuoir rien cacher de mes affaires, m'assurant que vous ne me décelerez iamais. Il faut que ie vous die que ie suis amoureux. Il est vray Delphis, ie brusle d'a-

mour, & souffre vn tourment indicible pour la plus belle & la plus cruelle Dame qui soit au mode. C'est la Duchesse de Gonzanuert qui me fait languir, sans me laisser aucune esperance d'avoir pitié de moy. Apres cela Ennemidor fit le discours à Delphis de tout ce qui s'estoit passé entre luy & la Duchesse, dont Callionne l'auoit desia entretenüe. Certes, Monsieur, dit Delphis, vous vous mocquiez bien de moy, quand vous disiez que ie ressemblois parfaitement à vostre Maistresse; car ie tiens Madame de Gonzanuert & la Reyne sa sœur les deux plus belles femmes qui se puissent iamais voir; & croy que si vous auiez les bonnes graces de l'une des deux, vous vous pourriez estimer le plus heureux

homme de la terre, & feriez sans doute les plus beaux enfâs qu'on se puisse imaginer. Mais en tout cela ie ne voy rien d'impossible, *puis qu'en amour il n'y a point de si grandes difficultez qu'on ne rende faciles par la perseuerance.* Ah ! mon frere, dit Ennemidor en embrassant Delphis, que tu parles à ton ayse ayant l'esprit libre & constant, mais souuiens-toy que mon mal est sans remede. Au reste, ie te puis bien asseurer que celle qu'il me semble voir quand ie te regarde, est encores doüce d'une beauté plus parfaite & plus accomplie que la Duchesse. Vrayement, repartit Delphis, vous ne l'aymez donques gueres, puisque vous luy faites ce tort que d'engager sans son consentement vostre liberté à une autre. Ie ne me

porte à ce changement que par force, repliqua Ennemidor, parce que ie n'espère iamais aucune sorte de faueur de celle que ie prise en mon ame plus que tout ce qui est au monde, & vous sçavez que l'amour ne peut subsister sans l'esperance. Car qui est l'homme qui se voudra rendre amoureux d'une Dame, s'il est tres-assuré de n'en recevoir iamais que du mespris? On croit tousiours quand on s'embarque au seruice de quelqu'une, qu'avec le temps on la pourra conuertir, & qu'en fin de cruelle elle deuiendra pitoyable. Mais quant à Filatee, qui est celle pour qui mille fois i'ay pensé mourir, ie suis bien certain qu'elle ne me voudra iamais voir. Delphis s'oyant nommer changea de couleur, & sentit vne si extraordinai-

re émotion, que peu s'en fallut qu'elle ne s'évanouïst. Ennemidor s'apperceut du trouble où elle estoit, sans toutefois se douter aucunement d'estre deuant celle dont il parloit. Et quoy Delphis, luy dit-il en l'embrassant, ne sçachant point que ce fust Filatee, vous treuvez vous mal, ou si c'est que ie vous aye dit quelque chose qui vous ayt dépleu? Ah! Monsieur, respondit Delphis, vous ne m'auez secourüe que pour me faire souffrir la plus cruelle mort que ie pouuois attendre, laissez-moy si vous m'aymez, c'est fait de moy, ie ne veux plus viure. Ces paroles estonnerent extrememēt Ennemidor, ne pouuant comprendre pour quel sujet Delphis parloit ainsi. Il la laissa, parce qu'elle l'en pressoit, mais en s'é-

loignant tant soit peu, il luy redit encores, qu'il estoit bien marry de luy auoir tenu des discours qui luy estoient desagreables. Delphis ayant vn peu alenty sa colere que la jalousie auoit enflammee, & ayant regret d'auoir parlé comme vne fille, son dessein estant de faire croire à Ennemidor qu'elle estoit vn garçon, dit. Monsieur, si c'est assez pour mourir que de perdre entierement l'esperance de posseder ce qu'on aime plus que sa vie, i'ay sujet de desirer la mort, puis que ie reconnois que vous estes amoureux d'un sujet pour qui ie souspire iour & nuict. Car quelle part puis-je pretendre en Filatee, si vous luy auez adressé vos vœux? Outre que ie prefereray tousiours vostre contentement au mien, ie

sçay bien encores que quãd i'em-
ployerois tout ce qui se peut ima-
giner pour vous en frustrer, mes
efforts seroiẽt vains, parce qu'elle
vous ayme esperduẽment. Enne-
midor treuua ce discours si estrã-
ge, qu'il demeura long-temps
sans y pouuoir respondre. En fin
apres y auoir vn peu pensẽ, il de-
manda à Delphis, comment il
sçauoit que Filatee luy vouloit
du bien, & d'oũ il la cognoissoit.
Ie l'ay cognũe, respondit-il, à Dar-
deroy, & luy ay ouy dire vne fois
entr'autres que ie la pressois d'a-
uoir pitié de moy, qu'elle estoit
bien marrie de ne pouuoir soula-
ger mon mal. Assẽurez-vous, me
dit-elle, que si cela dépendoit de
moy vous n'aũriez point sujet de
vous en plaindre; mais ma liber-
té est desia tellement engagee,

qu'il m'est impossible de recompiler autrement que d'ingratitude l'affection que vous me faites paroistre. Je luy dis, qu'il n'y auoit personne au monde qui l'honnorast tant que ie faisois, ny qui fust plus capable de la seruir que moy. A la verité, me respondit-elle, ie suis si malheureuse que celuy à qui i'ay cōsacré mon cœur, ne me donnera iamais aucune place dans le sien, parce qu'il m'a rendu vn si insigne déplaisir, qu'il ne se pourra en sorte du monde fier en moy, & croira tousiours que ie luy porte vne hayne immortelle, quoy qu'en effect ie luy vueille tant de bien pour son merite, & pour sa vertu, que de ma vie ie n'aymeray rien que luy. C'est, m'adiousta-elle, le plus genereux & le plus accōply

Cauallier qui soit au monde, & qui a eu pour moy vne passion incroyable : Mais son courage & samauuaise fortune s'estans vnies ensemble pour le desesperer le forcerent à me faire, quoy qu'innocemment, la plus irremissible offense qu'il pouuoit commettre en mon endroit ; *Et vous sçauiez que ceux qui nous ont fait vne iniure irreparable ne veulēt plus nous aymer, & se défient sans cesse de nous.* Voila, Monsieur, adioustâ Delphis, ce que me disoit Filatee, & depuis i'ay appris que c'est vous qui auez tué son frere Oristene : de sorte que conserant ensemble ce que ie luy ay ouy dire, & ce que vous m'auez representé, ie ne puis plus douter que ce ne soit vous qui possédez son ame. Cela estant, comme il est tres-certain, dois-je
rien

rien moins attendre que la mort, puis qu'il m'est impossible de vivre sans estre aymé de Filatee, & qu'elle ne peut m'aymer tant que vous serez en vie ? O Cieux ! s'écria Ennemidor, apres que Delphis eut finy son discours, seroit-il possible que Filatee me voulust pardonner ? Monsieur, ie ne vous puis nier que ie n'en sois amoureux, & regrette infinimét qu'elle soit le sujet de vos peines ; mais puisque ie luy ay le premier adressé mes vœux, & que vous aduoüez vous-mesme qu'ils luy sont si agreables, qu'elle est resoluë de n'en recevoir point d'autres, ie vous supplie de ne treuver point mauuais si ie ne vous puis ceder ce bon-heur. Il n'y a rien excepté cela que ie ne fasse pour vostre seruice, car ie cheris vostre amitié

de tout mon cœur, tant pour vostre merite particulier, que parce que vous ressemblez si parfaitement à ma Maistresse, qu'il me semble estre avec elle quand i'ay le bien d'estre avec vous. Monsieur, respondit Delphis, les Dieux me sont tesmoins si depuis que ie vous ay veu, ie n'ay pas fait plus d'estat de l'honneur de vostre bonne grace, que de ma propre vie, que ie seray tousiours prest d'employer pour vostre contentement particulier. Sur cela ils s'embrasserēt tous deux plusieurs fois, & se iurerent l'un à l'autre vne eternelle amitié.

Le iour commençoit à paroistre quand ils s'endormirent, ce qui fut cause qu'ils ne se leuerent point qu'il ne fust pres de dix heures. Ils furent ensemble au

Chasteau, où ils treuverent tout le monde en pleurs & en larmes, à cause que la Duchesse estoit tumbee en de si grandes foiblef-
ses, qu'on croyoit qu'elle en deust mourir. Comme ils montoient dans la salle, ils rencontrèrent Callionne, qui leur dit les voyant ensemble, & soupçonnant beaucoup de choses qui n'estoient pas vrayes. Voila bien le plus beau couple d'Amās qui se puisse treuver. Delphis devint rouge l'oyāt ainsi parler, & pour empescher qu'elle ne passast outre, luy dit: Ne parlós point de cela: mais dites nous, s'il vous plaist, ce qui est arriué à Madame. Callionne s'approcha de l'oreille de Delphis, & luy dit si bas qu'Ennemidor ne la pouuoit entédre. Depuis qu'elle a eu cognoissance de ce qu'estoit

Chrisolite , elle a esté si sujette au mal de mere, que ie crains qu'elle n'en meure. Callionne n'eut pas plustost dit cela qu'elle s'esloigna de Delphis, sans attendre ce qu'il luy vouloit dire. Delphis la poursuivit & l'appella plusieurs fois, mais elle ne voulut point reuenir courât comme vne personne qui a grand haste. Delphis raconta à Ennemidor ce que Callionne luy auoit dit, & le pria de demeurer là pendant qu'il iroit querir en sa chambre quelque recepte excellente pour guarir le mal dont madame de Gonzanuert estoit trauaillee. Ennemidor ayant promis de l'arrester au Chasteau, Delphis courut prendre en sa chambre ce qu'il auoit dit, & l'ayant apporté demanda à parler à Callionne, qui ne manqua pas à le venir

treuver. Mademoiselle, luy dit Delphis, ma mere m'a appris vn secret admirable pour le mal de mere. Tenez voila vn emplastre, chauffez-la vn peu & la mettez sur le nombril de Madame, en vn instant elle sentira de l'alegemēt. Vrayement, dit Callionne, voila qui est bien souuerain. Ne faut-il rien faire autre chose? Non, respondit Delphis, sinon qu'il faut laisser l'emplastre iusques à ce qu'elle tombe d'elle-mesme. Callionne sans perdre dauantage de temps courut promptement l'appliquer à la Duchesse, qui en receut vn si grand allegemēt, qu'en moins de demie-heure elle ne sentit plus de douleur, & fut entierement guarie. La Reyne en fut incontinent aduertie, & vint visiter Madame sa sœur, qui luy

auoit conté la ruze de Chrisolite, & tout ce qui s'estoit passé, dont elle n'eut pas moins d'estonnement que de jalousie. Mais quád on luy eut dit que Delphis auoit guarý la Duchesse, & que c'estoit vne fille vestuë en garçon, elle la voulut voir & l'enuoya querir. Certes quand elle l'eust veüe, elle demeura aussi rauie que si c'eust esté vn Ange, n'ayant iamais veu vne si parfaite beauté. Je vous assure, Monsieur, dit-elle, que si vous auez rendu la santé à vne Dame malade, vous l'auiez ostee à plusieurs qui se portoient bien. Car il n'est pas possible de vous regarder sans receuoir dans l'esprit quelque blesseure beaucoup plus dangereuse que celles qui affligent le corps. Mais dites-moy qui vous a appris ce beau secret?

Il n'est pas du mestier des hommes , aussi auez-vous trop de beauré pour me faire croire que vous en foyez vn . Sans doute vos yeux, vostre port & vostre grace, me font croire que vous estes quelque Nymphé bocagere , qui cognoissant parfaitemēt la vertu des simples , auez pris l'habit que vous auez pour venir secourir ma sœur. La Reyne acheuant de dire cela , prit Delphis par la main & l'emmena aupres d'une fenestre, où elle la considera encores plus attentiuemēt qu'auparauāt. Certes , luy dit-elle , voyant qu'elle rougissoit , cette couleur vermeille qui vous monte au visage suffiroit pour me faire cognoistre ce que vous estes , quand ie ne l'aurois point appris de ceux à qui vous l'aez dit. Et quel iugement

estimez-vous qu'on puisse faire de vostre honnesteté, puisque sous de faux habits vous vous estes dérobée de vostre pere & de vostre mere, pour suiure vn homme, qui a la mine de n'estre pas moins leger & inconstant, que vous estes amoureuse & inconsiderée? Que ferez-vous si vos parents descouurent vostre ruse, & s'ils ont aduis que vous couchiez avec celuy qui les a infiniment offencez? Vous pourrez-vous iustifier de la mort de vostre frere, puisque vous estes venu treuuer celuy qui l'a tué, & que vous luy avez abandonné vostre honneur? *Ne sçavez-vous pas que la reputation d'une fille luy doit estre mille fois plus chere que la vie? Car apres auoir perdu cette fleur qui ne reuiert iamais, pouuez-vous*

estre en bonne odeur parmy les bonnes compagnies? D'ailleurs estes-vous bien asseuree de la foy de celuy en qui vous vous estes tant confiee, que de vous ietter entre ses bras? Sçauiez-vous bien qu'il ne vous abandonnera iamais? Et quād cela arriuera, penserez-vous estre la premiere dont il se fera moqué? Non, non, croyez-moy, les hommes se sentent importunez d'une femme apres qu'ils en ont receu tout ce qu'ils en vouloient auoir. Ils disent qu'il n'y a rien de si leger & de si volage que nous autres, & nous pouuós maintenir qu'il n'y a rien dont on se doie tant deffier que d'eux, parce qu'ils font gloire d'estre parjures & trompeurs. Il est vray que les femmes ont de la legereté, lors qu'elles se laissent feschir par leurs plaintes & leurs

larmes : Mais apres qu'elles ont commencé à nouïer vne amoureuse intelligēce avec quelqu'un, ne sont-elles pas tousiours les dernieres à la rompre? & les hommes au contraire ne sont ils pas tousiours les premiers à se porter au changement? de sorte que si on doit blasmer les femmes à cause de leur legereté, c'est parce qu'elles engagent trop facilement leurs affections, car puis-apres elles n'aymēt que trop constamment. Mais les hommes sont toute leur vie volages, tenans aujourd'huy pour indifferent ce qu'ils adoroient hier. Ennemidor est de cette humeur autant & plus que pas vn autre, ainsi que i'ay appris. Cela vous doit rendre sage, & faire penser de bonne heure aux moyens de remedier à la

faute que vous avez commise. Elle n'est point encores irreparable. Si vous voulez ie vous retireray aupres de moy, & manderay à vostre pere que ie vous ay fait enleuer de sa maison, pour vous marier à Dorontart qui est mon frere naturel. Vous avez tellement obligé ma sœur par le secours que vous luy avez donné en sa maladie, & i'ay vne si particuliere inclination à vous aymer, que ie feray de bon-cœur cette affaire pour vous.

Delphis se treuua en vne si grande peine, qu'elle demeura quelque temps sans pouuoir respondre. Elle estoit tellement au desespoir d'estre descouuerte, & d'estre soupçonnée d'auoir preferé son plaisir à son hôneur, que la colere l'empescha quelque peu

de temps de parler. D'ailleurs elle preuoyoit qu'elle ne pourroit plus gueres demeurer avec son amy, & ce qui la tourmentoit encores plus que toute autre chose, c'est qu'elle craignoit qu'il ne fust inconstant & perfide, ainsi que la Reyne asseuroit: Elle apprehendoit outre cela que sa Majesté ne fust aussi quelque repri-mende à Ennemidor, & que par ce moyen il n'apprist ce qu'elle ne vouloit pas qu'il sceut encores si tost. En fin apres auoir esté plusieurs fois pressée par la Reyne de luy dire sa resolution. Madame, respondit-elle, vous me faites trop d'honneur de prendre tant de soin de moy, qui suis prest de vous obeir en tout ce qu'il vous plaira me commander. A la verité ie suis sortie de la maison de

mon pere & de ma mere avec d'autres habits que ceux qui sont de la bien-seance d'une fille, n'ayant point d'autre moyen de me garantir d'espouser vn homme que i'abhorre plus que la mort, tant pour ses mauuaises & insupportables habitudes, que parce qu'il fait profession de la religion des Nouates. Si ie me suis déguisée de la sorte, & si ie me suis ainsi esloignée de mes parents, c'est plustost pour n'en auoir pas bien considéré l'euenement, que pour aucun dessein que i'eusse de mal faire. Il est vray que ie voy Ennemidor, mais c'est ainsi que si i'estois son frere, vous protestant, Madame, qu'il ne me cognoist pas, & qu'il croit que ie suis ce que mes habits me font paroistre. Je ne cherchois rien moins

que luy quand ie le rencontray, ainsi que vous a pû dire Madame la Duchesse, à qui la valeur de ce Gentil-hôme ne seruit pas moins qu'à moy, contre la violence de quelques voleurs, qui vouloient nous outrager. Et bien, dit la Reyne, adioustant aucunement foy à cela, nous verrons bien ce qui en est; car s'il n'y a point de mal, vous ne ferez point de difficulté de venir demeurer avec moy. Delphis ayant dit qu'elle en estoit ayse, mais qu'elle supplioit tres-humblement la Reyne de luy donner trois ou quatre iours pour se faire habiller, sa Majesté les luy accorda. Delphis auoit pris ce temps-là pour prendre vne resolution de ce qu'elle auoit à faire; mais auant que ce terme fust expiré elle reconnut

que tout ce que la Reyne luy auoit dit, la jalousie le luy auoit fait dire : car Ennemidor ayant vn iour oublié vn papier sur sa table, elle y lût ce qui s'ensuit.

LETTRE DE LA REYNE
de Regnaut-chanfort à En-
nemidor.

TRaistre, tu faisois donques des serments pour me tromper, & tu me promettois beaucoup pour ne rien tenir. Il est aysé d'abuser vne femme qui ne iuroit que par les asseurances de ta fidelité, & qui croyoit que toutes choses se changeroient, auant que ton desir se refroidit aussitost qu'il a fait. Il faudra que ton cœur soit vn rocher aux atteintes de ta conscience, comme insensible aux

traits de la pitié, si au moins tu ne confesse que tu as tort de me mespriser. Lors que tu estois languissant à ma porte, couuert de blesseures & transy de froid, ie t'ay secouru de tout ce qui t'estoit necessaire, & ne me suis pas contentee de te départir ces faueurs, ie t'ay encores aymé & recueillie mille fois entre mes bras pour mourir entre les tiens. Ainsi pour t'auoir honoré, tu me mesprise, & pour t'auoir donné la vie, tu me veux precipiter à la mort. Est-ce pour te descharger de la recompense que tu me dois, ou pour tesmoigner que tu es le plus ingrat homme qu'on puisse treuuer? Mais pourquoy respands-ie tant de larmes? & à quel dessein allegue-ie tant de raisons à celuy qui n'est pas raisonnable? Si tu l'estois tant soit peu, me traitterois-tu avec tant de rigueur? Si celle que tu possedes auoit quelque partie qui

tie qui la rendist plus aymable que moy, & que sa beauté eust plus de charmes que la mienne, ma peine seroit de beaucoup allegee. Mais preferer la terre au Ciel, & receuoir l'ombre pour la verité, cela donne de nouvelles forces à mon affliction, & fait que ie blasme esgalement ton imprudence & mon malheur, ma prison & ta liberté. Il faut que ie me sauue par quelque moyen que ce soit, ie ne veux plus aymier ce qui me hayst, ny rendre des seruices pour des tourments. Mon affection tiendroit plustost de l'opiniastreté que de la constance, & seroit plustost vne fureur qu'une honneste passion. Mais ie delibere beaucoup, & ne resouds rien. Je forme mille entreprises, & n'en effectue pas vne. Qui pourroit aussi resoudre quelque chose parmy tant de diuerses pensées dõt i'ay l'esprit tourmēté ? Amour

veut que ie t'ayme encores, & ma douleur me presse de te porter vne hayne irreconciliable. Je cognois bien ce qui m'est le plus salutaire : & toutefois cette cognoissance m'est inutile, pour ce que mon dédain est trop foible pour resister à la violence de mon affection. Mon Page viens me voir, ou me remets entre les mains de ceux qui m'emmenoiert prisonniere ; car il n'y a point de prison qui ne me soit plus douce que le traitement que tu me fais. M'aurois-tu bien deliuree du pouuoir de mes ennemis pour me faire mourir ? Qui a iamais ouy dire qu'un Page exerce toute sorte de cruauté à l'endroit de sa Maistresse, & qu'un esclau tienne son Seigneur captif ? Petit rebelle, obeïsses à vostre Reyne, ou elle vous fera chastier comme criminel de leze-Majesté.

Delphis ayant leu cette lettre

la ferra , & aussi-tost qu'elle eut
rencontré Ennemidor. Tenez,
Monsieur, luy dit-elle, voila vne
lettre que i'ay treuuee qui s'a-
dresse à vous. Ennemidor la prit,
& la cognoissant, regarda Delphis
en riant, sans luy dire quoy que ce
fust. Dequoy riez-vous ? luy dit
Delphis, de ce que à mon aduis,
respondit-il, vous aurez leu tout
ce qui est là dedás, où on se plaint
fort de moy. A la verité, repartit
la belle Amante déguisee, on vous
accuse d'estre grandemét ingrat.
Que puis-je faire, repliqua Enne-
midor, iamais homme ne fut si
malheureux en amour que moy.
Je suis tout plein de feu pour Ma-
dame de Gonzanuert, qui ne me
veut point voir, & tout plein de
glace pour la Reyne sa sœur, qui
m'importune sans cesse de sa pas-

sion. Vous estes toutefois bien-
heureux, adiousta Delphis, de ce
que Filatee n'est point icy pour
augmenter vostre tourmēt; pour-
ce que si elle y estoit, elle descou-
uriroit bien-tost le tort que vous
luy faites d'en aymer vne autre.
*Car que peut-on treuver de plus soup-
çonneux & de plus clair-voyāt qu'une
femme qui ayme ?* Il est vray ce
que vous dites, respondit Enne-
midor, mais nous sommes si es-
loignez l'un de l'autre, que ie n'ay
pas peur qu'elle me fasse aucune
plainte, & pleust aux Dieux qu'el-
le m'en pust faire, & estre deuant
elle. Je souffrirois patiemment tout
ce qu'elle me diroit, & n'y a rien
de si difficile à quoy ie ne me por-
tasse pour la contenter. Non pas
iusques à aymer plus Madame de
Gonzanuert, dit Delphis. A la ve-

rité, repartit Ennemidor, i'y aurois bien de la peine: Toutefois ie veux que Iupiter m'escraze la teste de son foudre, si ie ne me priuois de cette felicité, & de toute autre plustost que de déplaire à Filatee, que i'ayme plus que tout ce qui se peut imaginer. Croyez-moy, mon cher Delphis, il n'y a iamais eu au monde vne beauté si religieusement adoree, que cette fille l'est de moy. O Cieux! continua-t'il, leuant les yeux en haut, que ne ferois-je point pour luy rendre quelque seruice agreable? Si cela est vray, dit Delphis, comme ie croy que tout ce que vous dites est tres-veritable, pourquoy ne l'allez-vous pas treuuer plustost que de vous arrester icy à faire l'amour à vne autre? ou pour le moins

pourquoy ne luy faites-vous pas entendre vostre passion ? Je n'ose, repliqua Ennemidor, aller où elle est, de crainte d'estre pris, & d'estre en peine à cause de la mort de son frere Oristene. Je ne luy ose aussi escrire, ne sçachant pas comme quoy elle receuroit mes lettres. Certes vous estes au moins obligé, adiousta Delphis, à luy conseruer toute entiere l'affection que vous luy auez promise, dont vous ne pouuez sans l'offenser faire part à vne autre. Elle n'en sçaura rien, respondit Ennemidor, & puis ie vous confesseray bien que la beauté de Madame de Gonzanuert n'a du pouuoir sur mon ame, que pource que ie suis esloigné des beaux yeux de Filatee. Monsieur, repliqua Delphis, asseurez-vous qu'il est tres-

difficile de dérober à Filatee la
cognoissance de vos déportemēs;
*Car vn Amant s'informe avec tant de
curiosité des nouvelles de ce qu'il ay-
me, que tost ou tard il apprend ce
qu'on s'efforce de luy cacher. Et d'ail-
leurs, ne sçavez-vous pas que celuy-là
est indigne de toute sorte d'amitié, qui
ne craint point de faire de l'iniure à
ses amis, quād il croit qu'ils n'en sçau-
ront riē? Et ne sçavez-vous pas en-
cores, qu'aymer n'est autre chose
que vouloir du bien à quelqu'un,
non pour nostre interest particu-
lier, mais pour l'amour de luy-
mesme, en luy procurāt de toute
nostre puissance ce que nous cro-
yōs luy deuoir estre vrayemēt vti-
le, ou luy pouuoir dōner du con-
tentement. Certes si l'amour vnit
parfaitement les volontez, & s'il
n'est qu'une ame en deux corps,*

nous deuons defirer à nos amis les mefmes contentements que nous fouhaittons pour nous-mefmes, & nous affliger quand il leur arriue quelque mal-heur, tout ainfi que s'il nous eftoit aduenu. Et quoy, voudriez-vous bien que Filatee vous traittast de la sorte que vous la traittez ? Car d'alleguer que l'amour que vous auez pour madame de Gonzanuert, ne diminüe point vofre affection en fon endroit ; c'eft vouloir maintenir que celuy-là n'a qu'une bleffure à qui on en void deux.

Comme Delphis difputoit ainfi fa propre caufe avec Ennemidor, feignant de n'efre pas celle en faueur de qui elle parloit ; Elle ouït vn coup de canon qui la fit fremir de peur, pource qu'il n'y

auoit pas loing de là où il fut tiré,
& qu'elle n'estoit pas accoustu-
mee à ouïr l'harmonie de sembla-
bles instruments. Ennemidor à
qui ce bruit plaisoit extrememēt,
voulut s'en aprocher plus pres, &
oyant encores six autres coups de
canon tirez presque en mesme
temps, dit à Delphis. Monsieur,
voulez-vous venir voir ce que
c'est ? Mais à peine auoit-il dit ce-
la, que Hipophilon luy vint dire,
Messieurs, les ennemis paroissent,
ne voulez-vous pas monter à che-
ual pour aller au deuant d'eux ?
Ennemidor ayant respondu qu'il
ne pouuoit monter à cheual, si on
ne luy en prestoit vn; Hipophilon
luy dit qu'il luy feroit donner le
barbe qui luy auoit desia seruy.
Après cela ils s'en allerent tous
trois au Chasteau, où en entrant

vn Page de la Reyne vint demander à Hipophilon s'il ne cognoissoit point vn Gentil-homme qui s'appelloit Delphis: Le voila, respondit Ennemidor en le montrant. Monsieur, dit le Page, en s'adressant à Delphis, la Reyne vous demande. Delphis demeura estonnée & comme confuse oyant cela, ce que remarquant Ennemidor, luy dit. Monsieur, allez vous-en treuver sa Majesté puis qu'elle vous enuoye querir, ie croy qu'elle vous veut commander quelque chose d'importance. Quant à nous autres nous nous en allons receuoir ceux qui nous viennent visiter. Delphis ne scauoit ny quelle responce faire, ny quelle resolution prendre; Car elle craignoit de se rencontrer aux occasions de combattre, &

n'apprehendoit rien tant que la
presence de la Reyne. En fin a-
pres auoir vn peu resvé, ie m'en
vays donques, dit-elle, voir ce que
la Reyne me veut commander,
puis ie me rédray auprès de vous
le plustost que ie pourray. Enne-
midor & Hipophilon au lieu de
luy respondre quelque chose, luy
firent seulement la reuerence, &
ayant monté à cheual s'en alle-
rent au logis d'Oriston, qui en
estoit desia party. Ils poussèrent
leurs cheuaux pour l'attraper a-
uant qu'il fust sorty de la Ville:
Mais à peine auoient-ils fait deux
cens pas, qu'ils le rencontrèrent
dans la place d'armes, où toute
la Noblesse s'estoit assemblee.
Comme il eut recognu Ennemi-
dor, il vint au deuant de luy, &
luy dit. Monsieur, ie demandois

de vos nouvelles, car ie vous assure que i'ay vne ferme croyance, que par tout où vous serez, il est impossible d'estre vaincu. Certes, Monsieur, respondit-il, ie le suis neantmoins desia de vostre courtoisie, puisque vous me faites mille fois plus d'honneur que ie ne vaut. Monsieur, repliqua Oriston, ie suis bien marry de ne vous pouuoir entierement rendre celuy que ie vous dois : Mais l'occasion ne s'offrira point de m'en acquitter, que ie ne fasse paroistre qu'il n'y a personne au monde qui vous estime plus que moy. Cependant ie vous supplie de nous vouloir dire ce que vous estes d'aduis que nous fassions. Les ennemis paroissent, & croy qu'ils viennent recognoistre cette place. Monsieur, respondit

Ennemidor, quand vous prendrez conseil de vous-mesme vous ne pourrez faillir : Toutefois puisque vous me faites l'honneur de me demander mon aduis, j'estime que vous pouuez sortir avec ce que vous avez icy de Cavalerie pour les empescher d'approcher, & pour remarquer leur contenance. Allons donques, adjousta Oriston, & en disant cela ils marcherent tous fort ferrez & en bon ordre. Ils pouvoient estre quelques deux cens Maistres, d'ot il y en avoit bien prés de cent cinquante armez de toutes pieces. Oriston avoit fait faire quelques dehors qu'il gardoit, & entre autres avoit mis deux cens soldats dans le temple de Bacchus, esloigné du fossé d'une portee de canon. Le respect qu'il portoit à ce

Dieu l'auoit empesché de ruyner son temple, quoy qu'il en preuist bien la consequence. Emiston, car c'estoit luy qui commandoit l'armee de l'Empereur, enuoya sommer ceux qui estoient dans le temple de se rendre, sur peine d'estre passez au fil de l'espee. Mais apres qu'ils luy eurent mandé, que puis qu'ils auoient pour protecteur le Dieu dont ils conseruoient la maison, ils n'apprehendoient rien sinon qu'il changeast le dessein qu'il auoit de les visiter. Il resolut de les emporter de force, afin d'attaquer puis apres Gonzalez par ce costé-là. Mais il treuua tant de resistance, qu'il fut contraint de se retirer. On luy tira plusieurs coups de canon qui firent peu d'effet. Environ mille oudouze cens pas du temple de

Batchus à main gauche, il y auoit vn Moulin assez fort, dans lequel Oriston auoit ietté vingt hommes pour le deffendre. Emiston y enuoya trois cens soldats pour s'y loger. Oriston voyant qu'ils s'en approchoient resolut de les aller charger; Car encores qu'ils fussent sur vn haut, on pouuoit neantmoins aysément aller à eux par deux ou trois endroits. Monsieur, luy dit Ennemidor, ces gens là que nous voyons sur cette butte, & qui font mine d'aller à ce Moulin, ne se font à mon aduis voir que pour nous attirer en quelque embuscade, qui peut estre, comme ie croy, dans la vallee entr'eux & le moulin. l'entends en cet endroit là, ou ie suis bien trompé, force cheuaux qui hannissent, & d'ailleurs ie voy

que nos gens qui sont dans le Moulin tirent incessammēt. Vous iugez bien, Monsieur, qu'ils ne tirēt pas à cette Infanterie que vous voyez sur cette butte, parce qu'elle est trop esloignee. Il seroit à propos, si vous le treuuez bon, d'enuoyer cinq ou six hommes bien montez cent pas deuant nous, pour descouurir ce qu'il y a dans ce vallon, & selon ce qu'ils nous rapporteront, & que nous verrons aussi, nous pourrons ou charger, ou nous retirer. Mais outre tout cela, ie crains que ce gros de Caualerie, qui est du costé du temple, ne vienne fondre sur nous dès que nous nous serons esloignez de nos dehors. Oriston qui ne vouloit rien hazarder, & qui n'estoit forté que pour recognoistre le nombre des ennemis,

treuua

reueua le conseil d'Ennemidor fort bon. Il enuoya doncques six coureurs pour voir qui estoit dás le vallon, où ils aperceurēt quelques deux cents cuirasses qui y estoient en embuscade. Emiston y auoit mis ces gens-là afin qu'ils enuelopassent Oriston s'il alloit attaquer ceux qui estoient sur la butte, & l'empeschassent de se sauuer dans la ville quand il le poursuuiroit. Ennemidor ayant preueu ce danger, le fit connoistre à Oriston, qui se retira dans sa place, résolu de ne perdre aucune occasion de signaler son courage en la defendant. Emiston voyāt qu'Oriston ne s'estoit pas voulu ietter dans les filets qu'il luy auoit tendus, & qu'il se retiroit, entreprit de forcer le moulin, esperant l'emporter plus

facilement que le temple qu'il reserua pour vne autre fois. Il fait donques marcher de ce costé là trois Regimens en bataille, qui pouuoient estre effectiuement de huiët cents hommes chacun. Ceux qui gardoient le moulin resolurent d'y tenir bon le plus long-temps qu'ils pourroient, & pour cet effet rompirët à la veuë de leurs ennemis, vn pôt de bois, qui estoit la seule auenuë par laquelle ils pouuoient aller à eux. Cela fut cause qu'Oriston ne pût faire autre chose pour ce iour-là, que se loger sur le bord de la riuiera, & dès la nuict mesme fit trauailler aux tranches, & à dresser vne batterie. Le lendemain ses Maistres de camp luy remonstrent qu'il estoit plus à propos d'attaquer le temple de

Bacchus, que de s'opiniastrer à ce moulin qui ne leur pouuoit plus nuire, puis que le pont estoit rompu, par lequel ceux la ville eussent pû faire des sorties sur eux. D'ailleurs, luy disoit-on, quand nous aurons pris ce moulin, de quoy nous seruira-t'il, & peut-estre qu'auant que nous nous en puissions rendre maistres, il coustera la vie à plusieurs gens de bien. Mais si nous pouuons vne fois nous loger dans le temple de Bacchus, qui certes nous incommodera tousiours grandement iusques à ce que nous l'ayons pris, nous gagnerons aisément puis apres le fossé. Emistó creut cet aduis, & apres auoir fait entrer en garde dans les tranches du costé du moulin, quelques cent hommes seulement,

pource qu'il ne croyoit pas que par là on peust faire de sortie le pont estant rompu, il alla encore recognoistre le temple de Bacchus. Oriston y auoit fait faire du costé des champs deux petits bastions de terre, sur chacun desquels il y auoit fait mettre trois pieces, qui incommodoient infiniment les gens de l'Empereur. Emiston entreprit d'emporter pied à pied ces deux bastions, & de les faire miner. Il trauailla huit iours à cela avec peu d'auancement, pource que Ennemidor par de continuelles sorties, & par vne infinité d'allarmes luy empeschoit son trauail. Cependant on luy vint dire que les Princes s'acheminoient avec dix mille hommes de pied, & douze cens cheuaux pour faire leuer le

siège. Cela le mit en vne grande peine, & fut cause que d'as ses tranchées il fit faire force bonnes redoutes, & mit plusieurs sentinelles sur toutes les aduenues du camp. C'estoit vn faux aduis que Oriston luy fit donner afin de le faire retirer de deuant Gonzanvert, ou pour le moins afin qu'il ne le pressast pas tant, lors qu'il seroit attentif à se deffendre contre vn si puissant secours. Cela fut cause qu'Emiston enuoya quatre compagnies de gens-d'armes à la guerre du costé de Meuridas, pour apprendre quelque chose: Mais elles donnerent iusques dans les portes sans aucun empeschement, & amenerent dix ou douze prisonniers, entre lesquels il y auoit deux Fauconniers du Duc de Meuridas, qui estant

interrogez par Emiston, luy dirent, que les Princes n'auoient pas trois mille hommes ensemble. Qu'à la verité ils en leuoient de toutes parts, & attendoient de grandes forces estrangeres. Comme Emiston parloit à ses prisonniers, il y eut vne grande allarime dans son cãp, & crioit-on que tout estoit perdu. Oriston auoit enuoyé sur les onze heures du matin à vn quart de lieuë au dessus du moulin deux cens bons hommes, qui passerent la riuiera en des batteaux, dõt ils auoient grande prouision, pource qu'ils auoient reserrez tous ceux qui estoient deux ou trois lieuës au dessus & au dessous de Gonzanuert. Ils donnerent si courageusement dans les tranches, qu'ils les emporterent & tuerent tout

ce qui estoit dedans. Au mesme temps que cela s'exécutoit, Ennemidor fit vne sortie sur le Regiment d'Emiston, qui estoit en garde dans les tranches du temple. Il en tua plus de quatre cens, prit six drapeaux, emmena soixante & quinze prisonniers, encloua six canons, mit le feu aux poudres, & donna vn tel effroy dans le quartier d'Emiston, que plusieurs soldats abandonnerēt leurs corps de garde. Apres ce genereux exploit, Ennemidor se retira dans la ville couuert de poussiere & de sang, n'ayant seulement perdu que huit soldats, & deux Gentils hommes des domestiques de la Duchesse. La Reyne eust incontinent aduis de ce qui s'estoit passé, dont elle voulut aller se resioür avec

la Duchesse qu'elle trouua à table. En entrant dans sa chambre elle cominanda à Hippophilon qui estoit avec elle, d'aller prier Ennemidor de venir au conseil de guerre qui se deuoit tenir sur les trois heures. Hippophilon le trouua qu'il faisoit penser quelques legeres bleffes qu'il auoit receuës, ce qui fut cause qu'il ne le peust emmener au Chasteau avec luy. Dés que Hippophilon s'y en fut retourné, & de tāt loing que la Reyne le vid, elle luy demanda pourquoy Ennemidor n'estoit pas venu avec luy? Madame, respondit-il, il fera icy dans vn quart-d'heure, & seroit venu avec moy n'eust esté qu'il a voulu se faire penser auparavant. Et quoy, repliqua la Reyne, est-il bleffé? Madame, ref-

pondit Hypophilon , c'est fort peu de chose. Il a receu vn coup de picque qui ne luy a fait qu'éfleurer vn peu l'espaule , & vn coup de mousquet dans le gras de la iambe, d'où on luy a arraché la balle qui entroit fort peu auant. Il faut confesser la verité, adiousta la Reyne, qu'Ennemidor est l'vn des plus vaillans , & des plus heureux hommes du monde. La Duchesse ne respondit rien à ces paroles, quoy qu'elles luy touchassent viuement l'esprit. Ennemidor arriua comme les Princesses sortoient de table. Elles entrèrent dans vn grand cabinet pour aduiser à ce qu'il falloit faire. Tous leurs chefs de guerre furent appelez au Conseil, où il fut resolu qu'on desarmeroit les habitans de Gonzan-

uert, pource qu'il y en auoit qui fauorisoient le party de l'Empe-
reur. On arresta aussi que ceste
nuict là mesme on deuescherait
vn homme à Meuridas pour don-
ner aduis aux Princes de ce qui
f'estoit passé, & de l'estat de la
place. Ennemidor dit qu'il estoit
à propos de les prier de faire vn
effort de mettre vn camp volant
à la campagne attendant qu'ils
pussent former vn corps d'ar-
mee.

Il n'y a point de doute, disoit-
il, que s'ils peuuent seulement
mettre sept ou huit cents che-
uaux ensemble, ils seront les mai-
stres de la campagne, encores
qu'ils ayent peu ou point d'In-
fanterie. Cela estant ils ietteront
la famine dans l'armee d'Emi-
ston, qui ne pourra auoir de vi-

ures qu'à coups d'espee. Ils le harasseront sans cesse , & le tiendront en ceruelle par de continuelles courses qu'ils feront iusques dans son quartier. D'ailleurs ils maintiendront la reputation de leurs armes & de leurs forces , ce qui n'est pas peu , & leurs troupes se grossiront tous les iours à veüe d'œil. Outre cela ils augmenteront leur credit parmy les Gallois & parmy les Estrangers, qui sont aux escoutes attendant l'issuë de ce siege. Que si au contraire Messieurs les Princes se renferment dans leurs places & quittent la campagne à leurs ennemis, l'Empereur armera puissamment & sans peine, pource que plusieurs braues hommes se rangeront de son costé, qui seroient du nostre si on les

employoit , & plusieurs autres qui sont avec nous s'en retire-
ront voyant nostre foiblesse &
nostre impuissance. Enfin i'esti-
me qu'il n'y a rien de meilleur
que d'estre le premier à la cam-
pagne. Que si Messieurs les Prin-
ces peuuent seulement mettre
dans dix iours huit mille hom-
mes de pied ensemble bien ar-
mez, & huit cens cheuaux avec
quelques pieces de campagne,
cela suffit pour forcer I'miston à
leuer le siege, pource que les pri-
sonniers que i'ay pris m'assurēt
presque tous qu'il n'a pas treize
mil hommes en tout. Si M^{rs} les
Princes ayment mieux avec leur
armee s'approcher de Sirapis, ils
le peuuent faire , & surprendre
ou forcer les places qui sont sur
la riuiera. Ils peuuent encore fai-

rerous les iours des courses iusques dās les portes de cette grande ville, afin d'incommoder les habitans & les ietter dans la reuolte, à quoy ils sont de leur naturel assez enclins. Avec tout cela qui à mon aduis est suffisant pour diuertir les forces que l'Empereur a deuant Gonzanuert, & pour le porter à faire la paix, il seroit encores à propos de rechercher les Nouates de se joindre avec nous, de les conuier à se declarer en nostre faueur, & à faire la guerre aux lieux où ils en ont le moyen. Quād mesmes ils nous refuseroient d'embrasser nostre party, il ne faut pas laisser neantmoins de faire courre le bruit qu'ils se sont engagez à nous, & d'enuoyer souuent vers eux afin de donner de la jalousie à l'Em-

pereur. Il est mesmement à propos de planter quelquesfois des eschelles sur les murailles des villes, qui sont proches des places qu'ils tiennent, afin que nos ennemis les accusent d'y auoir fait des entreprises, & qu'ils ne se puissent fier en eux. Il faut faire la mesme chose à l'endroit des Nouates, planter des eschelles sur leurs murailles, laisser quelque petart à leur porte, & leur donner des allarmes, afin de les resveiller & les ietter en ombrage de nos aduersaires. Il est bon encores d'enuoyer dans les Provinces faire quelques remuëmens, rechercher les Gouverneurs des places, les Officiers, les Maires & Escheuins des Villes, & enfin n'obmettre aucune chose de ce qui nous peut seruir. Ce seroit

faire vne grande faute que de ne solliciter pas les Estrangers, qui sont ennemis iurez de cette Couronne. Je m'asseure que si on despesche vers les Princes Hyperephaniens, qu'ils ne nous abandonneront pas. Je ne doute point aussi que la Ligue des pais reuoltez, que le Roy des Lupercains & la Reyne des Isles maritimes ne nous enuoyent vn puissant secours. Encores que le Roy des Morisques tesmoigne estre ennemy mortel de la Religion des Nouates, & de tous ceux qui se liguent avec eux, neantmoins il est si desireux d'estendre sa Monarchie, & tire vn si grand aduantage de nos diuisions, qu'indubitablement il nous assistera sous main en tout ce qu'il pourra, puis qu'il n'a point d'autre Religion

que de s'agrandir. mesdames, l'affection que j'ay à vostre seruice & le desir dont ie suis enflammé de voir prosperer vos affaires, me poussent à vous représenter toutes ces choses.

Cependant qu'Ennemidor parloit, les Princesses & tous ceux du Conseil estoient ravis de reconnoistre vne si grande experience en vne si tendre ieunesse. Ils l'escouterent avec vne extreme attention, admirant son esprit & la grace dont il accompagnoit son discours. Son aduis fut treuvé fort bon, & suiuy de poinct en poinct. Dés la nuit mesme on enuoya au Duc de Meuridas vn homme fidelle chargé des memoires & des instructions qu'Ennemidor auoit proposees. On fut fort en peine de sçauoir où il les porteroit,

porteroit , pource qu'on crai-
gnoit qu'il ne fust pris par les en-
nemis, & qu'ils ne l'en treuuas-
sent saisy. Il se leua vn Ayde de
Mareschal de camp, qui dit qu'il
les escriroit dans vne chemise
blanche, où il ne paroistroit au-
cune escriture, & que celle qu'il
y escriroit ne se pouuoit lire
qu'en mouillant la chemise avec
vne eau qu'il donneroit. Il fit voir
son artifice, qui fut admiré de
tous ceux qui le virent: mais on
ne jugea pas qu'il fust à propos
de s'en seruir en ceste occasion,
pource que, disoit-on, que si ce
messager est pris par quelques
soldats, ils luy osteront la chemi-
se. Et d'ailleurs s'il perd l'eau
dont il se faut seruir pour lire l'es-
criture, ou qu'il la respande, son
voyage sera inutile. Le mesme

ayde de Marefchal de camp dit que fi on ne fe vouloit feruir de ce moyen pour efcire aux Princes, il fçauoit faire vne efcriture fur du papier où il efcriroit tout ce qu'on voudroit, qu'au deflus il feroit vne autre couche d'efcriture, où il n'y auroit que des chansons, & que cette derniere efcriture avec vne eau qu'il donneroit s'effaceroit aysément, & qu'il ne resteroit que celle qui deuroit estre leuë. On treuua encores ce fecret admirable, mais pource qu'il falloit auffi porter de l'eau, qui ne fe pouuant pas cacher pouuoit estre ou prise par les ennemis, ou oubliee en quelque hostellerie, ou respādue: on dit qu'il falloit treuuer quelque autre expedient plus certain que cela pour efcire aux Princes.

Ennemidor voyant les difficultez qui se rencontroient de leur faire tenir des lettres, & ayant sceu de la Reyne que le Duc de Meuridas auoit l'alphabet d'un chiffre qu'elle luy auoit donné, luy en demanda la copie, & dit que si sa Majesté & la Duchesse auoient agreable, il luy escriroit en ce caractere là tout ce qui seroit resolu d'as le Cōseil, & que puis apres il feroit coudre deuant luy ses lettres dans la doubleure d'un mauuais haut de chauffe tout déchiré, dont seroit vestu celuy qui les porteroit. Si les ennemis le prennent, disoit-il, le voyant mal habillé, ils se contenteront de le fouiller, sans decoudre son habit, tant pource qu'il y faudroit employer trop de temps, que pource qu'ils auroient aussi horreur

de manier & remanier de vilains haillons. Cette proposition fut fuiuie comme la meilleure , & Ennemidor eut ordre de faire cette depesche. Cela estant ainsi resolu , & les Princesses voulans sortir du Conseil , Oriston leur dit, que les soldats se plaignoient de ce qu'ils n'estoiët point payez de leur solde , & qu'il apprehendoit qu'ils ne se mutinassent. Cela affligea infiniment la Reyne & la Duchesse , qui n'auoient plus d'argent que pour leur dépense ordinaire. Elles en firët chercher sur leurs pierreries par toute la ville de Gonzanuert , mais il ne se treuua pas vn sol : *Car c'est vne maxime qu'en temps de guerre on ne preste pas volōtiers son bien de crainte d'en auoir affairc.* Cela fut cause qu'elles se resolurent à faire fon-

dre leur vaisselle d'argent, dont elles firét payer vne monstre aux soldats. Ennemidor eut charge de faire paroistre en sa depefche l'extreme necessité où elles estoient reduites, quoy qu'il ne s'en estónait pas beaucoup. *Parce que, disoit-il, dans vne ville qui est assiegee, encores que les soldats ne soient point payez, pourueu qu'ils ne manquent pas de munitions de guerre ny de quoy viure, ils ne se doiuent iamais plaindre, puis que bien souuent ceux qui s'enferment dans vne place pour la defendre n'en sortent qu'avec vne baguette à la main. Lors qu'on les paya, il leur fit vne remonstrance qui les toucha si viuement qu'ils rapporterent toute leur solde aux pieds de la Duchesse, & iurerent qu'ils perdroient cōstamment leur vie pour son seruice.*

Ha que l'eloquence est necessaire à vn grand Capitaine ! Car que ne peut point vn discours graue & bien poly sur l'esprit des soldats, aussi bien que sur tout le reste des hommes ? Il encourage les plus craintifs, il apaise la rage des seditieux, & bien souvent avec de belles paroles on a reduit à la raison des legions toutes entieres, qui par la force des armes n'auoient pû estre remises en leur deuoir. Ennemidor estoit vaillant tout ce qu'un homme le peut estre, & il n'estoit pas moins éloquent : de sorte qu'Emiston qui estoit aduerty presque de tout ce qui se passoit dans Gonzanuert, l'apprehendoit plus que tout ce qui estoit dedans. Aussi n'y en auoit-il point qui empeschast ses progrès, & qui l'incommodaist tant que luy. Toutes les nuits il for-

roit sur ceux qui trauailloient aux tranches , lesquels se sentans surpris , & ne sçachans où se retirer , estoient le plus souuent taillez en pieces. Cela fut cause qu'Emilston ordonna aupres de chaque trauail vn corps de garde extremement fort , où les pionniers & les soldats se retiroient aussi-tost qu'ils estoient attaquez. Il enuoyoit aussi pendant l'obscurité de la nuit des sentinelles perduës iusques sur la contrescarpe , & mesmes iusques à la porte de la ville , où elles se trainoient sur le ventre. Comme elles voyoient que les ennemis sortoient , elles s'en couroient dans le trauail , & dans le corps de garde donner l'alarme. Cela estoit cause qu'Ennemidor estoit

surpris pensant surprendre ses ennemis, qui venoient au deuant de luy bien armez & en bon ordre, & le chargeoient si furieusement qu'ils le menoient battant iusques dans la porte, & peu s'en fallut qu'une fois entre autres il n'y fut attrapé.

Voyant doncques que ses ennemis depuis quelque temps ne manquoient pas de venir à la charge dès qu'il sortoit sur eux, il leur dressa vn iour du costé du temple de Bacchus vne embuscade, dans laquelle il mit cinq cens bons soldats. Apres cela sur la minuiet il fit donner vers la porte de Meuridas la plus grande allarme qu'il pût, & en mesme temps sortit du costé où estoit son embuscade. Lors qu'il la dressa, il est vray que la sentinel-

le ſ'en alla dans ſon corps de garde donner l'alarme : mais ceux qui eſtoient dedans voyās qu'Ennemidor ne ſe preſentoit point aux tranches, creurent que l'ardeur de ſon courage ſ'eſtoit alentie , ne preuoyans pas qu'il n'auoit fait mine de ſortir que pour auoir moyen de mettre ſes gens en embuſcade. Doncques comme ils voulurent renuoyer leurs ſentinelles perduës , elles furent tuees par les ſoldats d'Ennemidor, qui en meſme inſtant donna iuſques dans les tranches pour attirer ceux du corps de garde dans ſon piege. Son deſſein reüſſit ainſi qu'il l'auoit projeté, car tous ceux qui eſtoient dans le corps de garde ſortirent ſur luy, & le pourſuiuirent iuſques à l'ambuſcade qu'il leur auoit dref-

see. Il s'y fit alors vn tel carnage des gens d'Emiston, qui se mirēt en desordre dès qu'ils treuuerent vne si grande resistance, qu'ils furent presque tous tuez sur le champ. Ennemidor poursuivit sa poincte, gaigna les tranches de ce costé là, brusta le corps de garde, encloüa six canons, & de là donna iusques dans le quartier de Ctesiphon, qu'il prit prisonnier, & cinquāte autres hommes de qualité. Emiston ne s'estoit efforcé de pouruoir qu'à l'alarme du costé de la porte de Meuridas, estimant que celle du temple de Bacchus estoit appaisée. Cela fut cause que le lendemain ayant vne particuliere connoissance de ce qui s'estoit passé, & de la perte qu'il auoit faite, il se fust tué de rage & de dépit,

n'eust esté que ses amis l'en empêcherent.

Cependant la renommée des genereux exploits d'Ennemidor s'épandit par tout l'Empire de Galatie, avec tant d'honneur pour luy, qu'en toute sorte de compagnies on ne s'entretenoit que de sa valeur. Le Marquis de Gardenfort en estoit au desespoir, & fit tant que l'Empereur commanda au Marquis d'Argentuarre de luy escrire pour le faire reuenir au service de sa majesté: Mais Ennemidor ne voulut abandonner celuy de la Duchesse de Gonzanuert, pour quelque raison qu'Argentuarre luy representast par sa lettre. Il luy fit response en vn mot, qu'il le prioit de ne se mesler iamais de ses affaires, & de ne se souuenir non

plus de luy que du plus estrange
hóme qui fust au monde. Argen-
tuarre fut infinimét piqué de ce-
ste respóce, qu'il ne fit voir à per-
sonne de crainte qu'on cónust le
peu de puissáce qu'il auoit sur son
Nepueu, par le moyen de qui il
esperoit bien se rendre necessai-
re à la Cour. *Car c'est vne maxime
en Galatie, que quand quelqu'un a
des enfans, des freres ou des nepueux,
qui peuvent remuer ou faire du mal
dans l'Estat, ils sont infiniment re-
cherchez, s'ils ont de l'autorité sur
eux. C'est pourquoy d'ordinaire quãd
vn party se forme, les vieillards bien
ruséz font mine de se tenir fermes en
leur deyoir aupres de l'Empereur, &
enuoient sous main leurs enfans par-
my les ennemis, disant qu'ils n'en
peuvent estre obeis. Ils vsent de cet
artifice afin d'obtenir quelque*

charge, quelque gouvernement, ou quelque notable somme d'argent, pour eux ou pour leurs enfans en les retirant du party contraire. L'Empereur ne pouuant doncques gagner Ennemidor par aucune sorte de voye, & estât d'ailleurs aduerty qu'il n'y auoit aucune apparence de prendre Gonzauert de l'annee où ils estoient, parce que l'Hyuer s'approchoit, resolut de faire la paix. Il enuoya des deputez vers le Prince de Roncandon & ses associez, qui estans asseurez d'un puissant secours de la part des Hyperphaniens, des Liges des païs reuoltez, du Roy des Lupercains, de la Reyne des Isles maritimes, & du Roy des Morisques, firēt de si hautes propositiōs, que la conference fut inutile. Le Prince de

Roncandon voyant que les Députez de l'Empereur s'en estoient retournés sans rien conclure, fit vn manifeste, dont la copie s'ensuit.

MANIFESTE DV PRINCE DE RONCANDON.

Hercules de Bournouarre Prince de Roncandon premier Prince du Sang, assisté de plusieurs autres Princes, Ducs, Officiers de la Couronne, Gouverneurs de Prouinces, Seigneurs, Cheualiers, Gentils-hommes, Prouinces, Villes, Communautéz, tant de la Religion des Prisques, que de celles des Nouates, faisans tous ensemble la meilleure & la plus entiere partie de l'Empire, associez ensemble pour sa conseruation. Declarons & protestons deuant les Dieux &

les hommes, que nous ne consentons
Et ne participons nullement aux per-
nicieux conseils dont on use pour le
gouvernement Et l'administration
de cet Estat. Que nous detestons tou-
te sorte de factions, d'entreprises, Et
d'intelligences contre l'autorité de
l'Empereur. Que nostre dessein n'est
Et n'a iamaïs esté autre que de ren-
dre à sa tres-Auguste, Et tres-sacree
Maïesté l'obeissance que nous luy de-
uons. Mais voyans qu'on preuient son
esprit par de tres-mauuaises persua-
sions. Qu'on abuse de son nom, de sa
ieunesse, de sa bonté Et de sa trop
grande facilité: Que ses volontez ne
sont point libres, Et que par la crain-
te des forces de ceux qui l'environnēt,
sans promettre aucun accez, sinon à
ceux qui sont de leur faction, elle est
contrainte d'autoriser leurs passions:
Que l'on machine la ruine des bons

Galatiens, qui sousspirent comme nous
apres la reformatiõ de l' Estat : Nous
nous sentons obligez de nous opposer
à ces violences, & d'exposer tout ce
que Dieu nous a donné pour tirer
l'Empereur de l'opression où il est, &
le garantir des malheurs qui luy pan-
chent sur la teste. Nous sommes en-
cores resolu de faire entretenir les
Edicts de pacification, procurer le
soulagement du peuple, faire regner
la Iustice, defendre les gens de bien,
faire punir les meschans, restablir
tous les ordres de l' Estat en leur splē-
deur & en leur dignité par vne vtile
reformation & par le chastiment
exemplaire de ceux qui sont auteurs
du desordre. Nous protestons en ou-
tre, que c'est à eux à qui il faut im-
puter tous les accidens qui pourront
arriuer à la suite de nostre iuste de-
fense, puis qu'au lieu d'arrester le
mal,

mal, ils le font précipitamment naistre par leurs damnables conseils. Nous déclarons aussi que les armes que nous sommes contraints de prendre, ne sont que pour le service de l'Empereur & pour conserver sa sacrée personne, sa liberté, sa Couronne, & les loix fondamentales de son Empire. Nous protestons encore, que nous ne les poserons que quand sa très-sacrée & très-Auguste Majesté estant plus libre & mieux conseillée qu'elle n'est, aura pourveu à ce qui est cy dessus représenté, & à ce qui sera plus particulièrement déclaré par les remonstrances de Messieurs les très-sages Areopagites, & par les cahiers des Estats. Et iusques à ce qu'elle y ait par sa prudence & par sa bonté apporté les remèdes qu'il conuient, nous la supplions très-humblement de faire lever le siege de la ville de Gonzan-

uert, qui n'est assiegee que pour vanger la passion particuliere des ennemis du Duc de Gonzauert. Que si au preiudice de nos tres-humbles supplications & remonstrances on continuë le siege, & à molester quelqu'un de ceux qui se sont associez avec nous, on ne doit treuuer mauuais si nous nous opposons à cette violence par vne iuste & legitime defense. La nature & la necessité permettent à tous les hommes de defendre leur vie, & de repousser la force par la force. Il ne nous reste plus pour éuiter le mal sinon de recourir aux remedes extremes qui sont iustes, puis qu'ils sont necessaires. Nous prions & exhortons tous les Princes, Ducs, Officiers de la Couronne, Seigneurs, Cheualiers, Gouverneurs, Capitaines, Gentils-hommes, & autres de quelque qualité & conditiō qu'ils soient, tous Messieurs

les sages Areopagites, tous les Ordres
& les Estats de cet Empire: & ge-
neralement tous ceux qui veulent estre
estimez bons Galatiens, & qui ne se
sont point encores ioints à nous, de
nous secourir & assister en vne occa-
sion si iuste. Nous requerons aussi &
adiurōs tous les Princes & les Estats
estrangers, tous les anciens allies &
confederez de cet Empire de nous y
prester ayde & assistance, & ne per-
mettre que de si bons & loyaux sub-
iets & Princes du Sang, & autres
Princes & principaux Cfficiers de la
Couronne, soient opprimez par vne
damnable coniuration, pour la conse-
quence qu'elle aporteroit à tous les
Estats du monde. Fait à Meuridas.
Signe Hercules de Roncandon.

L'Empereur ayant veu ce Ma-
nifeste, qui fut publié par tout
l'Empire de Galatie, & les Estats

circonuoifins, la Majesté de peur d'estre surprise, fit leuer des gens de guerre de toutes parts, & resolut de faire presser la ville de Gonzanuert le plus qu'il pourroit afin de s'en rendre maistre auant que les princes la pussent secourir, ou que l'Hyuer fist leuer le siege. En moins de quinze iours l'armee d'Emiston se grossit de la moitié, quoy qu'Ennemidor luy donnast sans cesse quelque furieux eschec. Tous ceux ou qui desiroient s'aduancer & acquerir de l'honneur, ou qui aimoient le seruice de l'Empereur, ou qui haïssoient Ennemidor, ou qui portoient enuie à sa gloire, s'en alloient treuuer Emiston. Sa Majesté mesmement se rendit au camp, quoy que Gardenfort eust fait tout ce qui luy fut possible pour l'en diuertir, luy represen-

tant les maladies qui y estoient frequentes & mortelles, & vne infinité d'accidens qui luy pouuoient arriuer. Asseurez-vous s'il vous plaist, Sire, luy disoit-il, que quand le Prince de Roncandon & ses partisans sçauront que vostre Majesté est allée en personne au siege de Gonzanuert, ils feront toute sorte d'efforts pour secourir la place & pour vous surprendre. D'ailleurs, si les pluyes, la gelee, les maladies, ou nos ennemis nous cōtraignent de nous retirer, *la honte, la perte, & la consequence en seront bien plus grandes, vostre Maieſte y estant, que s'il n'y auoit qu'Emiston.* Si vous m'objectez, Sire, qu'il ne vous sert pas bien, & que iusques icy il ne s'est gueres aduancé, quoy qu'il ayt perdu beaucoup de gens, vostre

maiesté considerera s'il luy plaist, que les fautes qu'il a faites, outre qu'elles le rendront plus expert à l'aduenir qu'un autre que vous enuoyriez en sa place, qui peut estre feroit encores pis que luy auant qu'il connuist vos gens de guerre, & ceux qu'il auroit en teste, ses fautes dy-ie, outre qu'elles le rendront plus prudent & plus vigilant, elles luy seruiron t encores d'un perpetuel aiguillon pour contenter vostre Maiesté. I adiousteray à cela, Sire, qu'il est à craindre que les Sirapisiens ne se souleuent dès que vous vous serez esloigné de leur ville : car le Duc de meuridas a parmy eux un grand nombre d'amis, de seruiteurs, & de creatures. Et puis doutez-vous que le Roy des Morisques, qui abbaye

continuellement apres cet Empire, que les Hypercephaniens, la Reyne des Isles maritimes, & quelques autres encores, qui ne cherchent que les moyens de susciter du trouble en vostre Estat, pour asseurer le leur, perdēt l'occasion de surprendre des places & d'enuahir des Prouinces, quand ils verront vostre Maiesté arrestee à poursuiure opiniastrement vn siege ? Tant que vous vous tiendrez dans Sirapis, ils ne croiront iamais que vos armes soient si occupees ailleurs que vous n'ayez moyen de les employer contre leur effort : & puis c'est le lieu le plus cōmode pour remedier aux desordres qui peuvent suruenir. Enfin, Sire, selon les temps, les lieux & les affaires, les grands Monarques se doiuent gou-

uerner : Car quelquesfois ils doiuent
enuoyer leurs Lieutenans à la guer-
re , & y aller aussi quelquesfois
eux mesmes en personne. Mais
certes quand ils peuuent s'ab-
stenir d'y aller , c'est tousiours
le plus seur d'y enuoyer leurs
Lieutenans ; & puis les enne-
mis deuiennent plus forts & plus
courageux, ayans à combattre vn
grand Monarque, qu'ils ne se-
roient s'ils n'auoient en teste que
l'vn de ses Generaux d'armee,
parce que l'esperance du butin
& de l'honneur y est beaucoup
plus grãde. Je sçay bien qu'il y en
a qui ne sont pas de cet aduis, &
qui disent que les Roys ne sont
iamais bien seruis dans leurs ar-
mees s'ils n'y sont eux mesmes, &
que les soldats deuiennent plus
courageux quand ils voyent leur

Prince, & qu'ils sont asseurez que leur Prince les voit. Mais souvenez-vous s'il vous plaist, Sire, de quoy seruit vostre presence l'annee passée aux sieges que vostre Majesté entreprit? En fustes vous mieux seruy? en fustes vous moins trahy? les rebelles vous en obeirent-ils plustost? Au contraire ils en furent plus temeraires, & confesserent que l'honneur qu'ils croyoient acquerir de resister à vn grand Roy les auoit rendus opiniastrés. Avec tout cela il faut encores considerer, que les pertes & les infortunes qui arriuent aux Lieutenans, sont beaucoup plus aysees à reparer, que si elles estoient aduenues à leurs Maistres.

L'Empereur qui auoit accoustumé de suiure entierement les

aduis de Gardenfort, n'eut toutefois aucun égard aux raisons qu'il luy representa pour le retenir dans Sirapis, & l'empescher d'aller au siege de Gonzanuert. Sa Majesté s'y achemina doncques avec le plus de forces qu'elle pût, esperant l'emporter dès qu'elle y arrieroit, & la ruiner auant que les Princes eussent le moyen de la secourir. *Mais entre ce que nous nous promettons, & ce qui nous arriue, il y a quelquesfois bien loing, & souuent les affaires succedent tout autrement que les hommes n'esperent, ainsi que l'Empereur experimenta. O que l'esperance des hommes est trompeuse! que la fortune est inconstante & fragile! & que nos efforts sont vains! puis qu'ils s'affoiblissent & se rompent dès le milieu de nos entreprises, & que nous voyons bien*

*souuent nostre naufrage avant que nous puissions voir le port! L'Empe-
reur arriuant au camp, ceux de
Gonzanuert tirerent toute leur
artillerie, & firent vne sortie où
ils furent assez rudement repous-
sez. Comme ils se retiroient, vn
Cauallier armé de toutes pieces
vint iusques auprès de la porte
criant tant qu'il pouuoit. Enne-
midor, Ennemidor, si tu as du
courage, tu viendras rompre vne
lance contre moy. Ceux de la pla-
ce le vouloiét aller charger, mais
Ennemidor les en empelcha, & dit
à celuy qui le deffioit. Cauallier, la
partie n'est pas bien faite, vous
estes sur vn bon cheual, & ie suis
à pied. D'ailleurs, ie ne puis vous
donner le contêtement que vous
desirez sans la permissiõ de ceux
à qui ie dois obeir, & puis ie ne*

vous cognois point. Je suis Gentil-homme ; repartit le gendarme , & il y a autant d'honneur à acquérir avec moy qu'avec qui que ce soit. Il ne tiendra donques qu'à vousque nous n'esprouuions nos forces l'un contre l'autre ; & pour vous y obliger , voilà mon gage que ie vous laisse. En disant cela il ietta vn gand le plus loing qu'il put vers Ennemidor , puis se retira au petit pas faisant faire cent passades à son cheual de la meilleure grace qu'il est possible. On luy tira de dessus les murailles cinq ou six mousqueta-des , dont Ennemidor fut en vne extreme colere. Il amassa le gád , & considera le plus long-temps qu'il put celuy qui le luy auoit ietté , & qui se retiroit lentement , quoy que les balles de mous-

quets luy soufflasēt aux oreilles.
Ennemidor estant rentré dans la
ville s'en alla treuver la Duches-
se, & la supplia tres-humblement
de luy permettre de combattre
celuy qui l'auoit attaqué. Mon-
sieur, repartit la Duchesse, com-
me ie ne vous retiens pas en
ceste ville, aussi ne veux-ie
point vous empescher de faire ce
qu'il vous plaira. Vous estes li-
bre, & il n'est nullement besoin
que vous recherchiez mon con-
sentement, qui vous doit estre
fort indiferent. Je n'entrepren-
dray toutesfois iamais rien sans
cela, Madame, repliqua Ennemi-
dor, & prefereray tousiours de
bon cœur à ma vie ce que ie co-
gnoistray estre de vostre inten-
tion. Monsieur Monsieur, reprit
la Duchesse, vous n'en deuez

point auoir qui ne soit iuste, & si vous en auez d'autre, vous la devez changer, afin que les Dieux vous soient fauorables. Madame, adiousta Ennemidor, ie n'en ay iamais eu qui ne tendist à vous seruir, voire mesme à vous adorer. Monsieur, respondit la Duchesse, laissons là toutes ces adorations, vous ne pouuez dauantage me desobliger, que de me parler en ces termes. Vous pouuez combattre ceux qu'il vous plaira, mais ie ne desire plus que vous me teniez de sēblables discours. En disant cela elle se retira dans son cabinet sans qu'ennemidor luy pust rien dire dauantage. Il s'en alla au logis d'Oriston, & luy ayant raconté comme il auoit esté appellé par vn homme armé de toutes pieces qu'il ne connois-

soit point, le supplia de luy donner son aduis touchant ce qu'il deuoit faire. Puis que la chose s'est passée ainsi que vous me l'avez représentée, luy dit Oriston, & que Madame la Duchesse remet en vous d'en vser comme il vous plaira, i'estime que vous devez enuoyer vn trompette dans le camp de l'Empereur pour lier la partie avec celuy qui vous a laissé son gand, & pour arrester avec luy le lieu & l'heure du combat, ensemble pour prendre & donner les seuretez qui sont nécessaires de part & d'autre. Ennemidor prit ce conseil, & dès l'heure mesme depescha vn trompette, lequel estant arriué dans le camp de sa Majesté, demanda à parler à Emiston. Aussi tost qu'on sceut sa venue, on en iugea fort

diuerſement. Qui croyoit vne
choſe, qui ſ'en imaginoit vne au-
tre, mais la plus-part des princi-
paux de l'armee eſtimoient que
les aſſiegez n'en pouuant plus
enuoyoient ſupplier l'Empereur
de les receuoir à compoſition.
Emiſton ayant fait venir deuant
luy le trompette, luy demanda
quelle charge il auoit. Je viens,
reſpondit-il, de la part d'Ennemi-
dor chercher vn Cauallier qui l'a
deſſié, & luy a ietté ce gand pour
gage. Tu l'as treuue icy, repartit
l'un de ceux qui eſtoit aupres d'E-
miſton, c'eſt moy, que me veux
tu dire? Ennemidor vous enuoye
ce Carrel, dit le trompette. Alors
ce Cauallier le prit, où il leut ce
qui ſ'enſuit.

CARTEL

CARTE L.

P Vis que la gloire que les plus genereux hommes du monde acquerient en mourant de ma main, vous pousse à en rechercher l'occasion, ie suis content de satisfaire à vostre desir, pourueu que vous me fassiez sçauoir le lieu & l'heure qui vous sont les plus agreables pour receuoir cet honneur. En cela vous pouuez connoistre que ma courtoisie n'est pas moins extreme que ma valeur est infinie.

Le Cartel ne fut pas plustost leu qu'un Gentil-homme vint dire à Emiston que l'Empereur luy mandoit qu'il l'allast promptement reuuer, & qu'il luy menast le trompette qui venoit de Gonzanuert. Emiston sans tarder dauantage obeit à ce com-

mandement estant fuiuy de celuy qui desiroit se battre contre Ennemidor. L'Empereur ayant appris ce qui se passoit, son Conseil fut d'aduis de faire pendre le trompette, parce qu'il venoit seulement de la part de l'un de ses sujets qui estoit criminel de leze Majesté, & qu'il ne falloit pas traiter ceux qui venoient d'avec des rebelles, comme s'ils estoient enuoyez par des ennemis estrangers, qui dépendissent de quelque puissant Roy. Neantmoins les raisons qu'on allegua au contraire, & la grande autorité de celuy qui se vouloit battre contre Ennemidor, à quelque prix que ce fust, empêcherent que cet aduis ne fust fuiuy. Le combat fut doncques resolu pour le lendemain à neuf heures du matin. Et afin qu'il n'y

eust point de supercherie d'une part ny d'autre, on choisit pour le lieu du combat un assez grand pré esloigné de la ville de quelques deux cens pas. On l'environna promptement de barrières, & n'y laissa-t'on que deux advenuës aux deux bouts, afin que personne n'y entraist que les deux combatans. Outre leurs parains, ils eurent encores dix iuges en tout, dont ils demeurèrent d'accord par des billets qu'ils s'écrivirent tous deux. On avoit au commencement proposé de leur donner à chacun cent hommes bien armez & bien montez, afin qu'il n'y eut aucune trahison, mais ils n'en voulurent point, & se contenterent de ceux qui devoient estre iuges de leur combat. Il fut cōvenu entre eux qu'ils

romproient vne lance, & puis selon ce qui reüssiroit, qu'ils se seruiroient puis apres de leurs espees. Il fut aussi arresté que le vainqueur pourroit, si bon luy sembloit, enmener avec luy le vaincu, & en faire à sa volonté. Les choses estans ainsi resoluës, le trompette fut renuoyé avec les seuretez requises du costé de l'Empereur, ayât laissé les autres. Celuy qui se deuoit battre luy dit le voyant partir. Trompette, fais moy ce plaisir de dire à celuy qui t'a enuoyé icy, que son Cartel qui est autant hors de propos & autant inutile, que remply de folie & de vanité, ne merite pas que i'y responde. Dy luy seulement que demain ie le feray plus sage qu'il n'est, ou que ie luy abattray la teste de dessus les espau-

les pour abaisser son orgueil. Monsieur, repliqua le trompette en se retirant, *on ne fait iamais vn bon coup quand on vize trop haut.* Au reste, ie ne suis point homme à faire le raport d'une chose si esloignée de toute apparence que ce que vous m'avez dit; cherchez donc s'il vous plaît vn autre Ambassadeur que moy. En disant cela il sortit de la chambre où il estoit, & se retira à Gonzanvert, laissant tous ceux qui l'ouïrent pleins d'estónement & d'admiration à cause de sa resolution & de sa repartie. Nostre abateur de testes, quoy qu'il fust en vne extreme colere, n'en fit neantmoins aucun compte, tournant tout en risée. Cependant le bruit de l'apel d'Ennemidor s'estoit espandu par toute la ville de Gon-

zanuert, & attendoit-on avec vne
extreme impatience le retour du
trompette, qui en entrant sur les
neuf heures du soir dans la ville,
fut mené au logis de la Reyne
de Regnautchanfort par l'un de
ses gardes qui l'attendoit à la
porte. Apres que sa Majesté luy
eut fait raconter tout ce qui s'e-
stoit passé dans le camp de l'Em-
pereur, sur le sujet de son voyage,
& voyant que le combat estoit
resolu, elle tira Ennemidor à part
& luy dit. Je n'espere plus desor-
mais que vous changiez de des-
sein, puisque vous y estes si fort
engagé, mais souuenez vous que
c'est contre mon consentement
que vous vous portez en ce dan-
ger, où mille mauuais presages
me font craindre que vous ne
demeuriez. Madame, respondit

Ennemidor, les Dieux sont protecteurs des gens de bien, & fauorisent tousiours ceux qui ont le bon droit. Je suis attaqué par vn hōme à qui ie n'ay iamais, que ie sçache, fait de desplaisir. Le Ciel fera pour moy, qui ne puis sans renoncer à mon honneur, dont ie fais mille fois plus d'estat que de ma vie, manquer à luy faire voir que ie suis fort homme de bien. Hé bien, adiousta la Reyne, puis que vous estes si fort resolu à cela, tenez voila vne escharpe que ie vous donne, portez-la demain sur vos armes pour l'amour de moy. Madame, respondit Ennemidor, puis qu'il vous plaist m'obliger tant que cela, ie m'estime plus inuincible que si i'auois des armes enchantees, aussi fais-je bien estat de vous rendre de-

main, Madame, fort bon conte de mon homme, au moins suis-je bien assuré que s'il a l'habillement de teste qu'il auoit aujourd'huy, ie luy donneray dans la vi-
siere. Comme il acheuoit de dire cela, la Duchesse de Gonzanuert entra dans la chambre de sa Majesté, & reconnut l'escharpe qu'Ennemidor auoit entre ses mains, parce qu'il n'y auoit que trois mois qu'elle l'auoit donnée à la Reyne sa sœur. Combien que ceste Princesse fust resoluë de mourir plustost que de tesmoigner aucune sorte d'affection à Ennemidor, elle l'aymoit toutefois en son ame, & eust esté bien aise qu'il n'eust iamais engagé sa liberté à vne autre qu'à elle. *Certes c'est vne chose estrange qu'il n'y a point de femme, quelque sage qu'elle*

soit, qui se fasche d'estre aymee, servie & respectee. La Duchesse de Gonzanuert estant de cette humeur comme toutes les autres, mais toutefois autant honnestes qu'aucune qui se peust treuver, suportoit impatiemment les faueurs qu'Ennemidor receuoit de la Reyne, dont elle estoit infiniment ialouse, ayant desia remarqué qu'elle prenoit plus de soin de luy que sa dignité & son honneur ne permettoient. C'est pourquoy s'aprochant d'elle, elle luy dit tout bas. Je vous assure ma sœur, qu'il m'est impossible de souffrir cet homme là deuant moy, qui croy incessamment quand ie le regarde, qu'il me doit estre cause de quelque grand malheur, outre ceux dont il a desja affligé nostre maison. Si vous

voulez me faire plaisir, donnez luy le bon-soir, & luy dites qu'il se retire chez luy, il est aussi bien tard, & il aura demain de grandes affaires sur les bras. Ma sœur, respondit la Reyne, ie n'en fais estat que pour la necessité que nous en auons, sans laquelle ie serois bien d'aduis de luy faire dire qu'il se retirast: Mais vous voyez combien il nous est vtile, & croy que sans luy ceste place & nos personnes seroient desia en la puissance de nos ennemis. Outre ceste obligation, vous sçauiez encores celle que ie luy ay. *Il ne faut pas escrire sur le sable les plaisirs qu'on nous fait, & grauer sur le marbre les iniures que nous receuons, & puis estans mortelles comme nous sommes, il n'est pas raisonnable que nos inimitiez soient immortelles.*

Puis que vous craignez de luy déplaire en luy donnant le bonsoir, repartit la Duchesse, laissez-le luy doncques prendre de luy mesme, & entrons dans vostre cabinet. I'estime que cela est plus à propos qu'autrement, repliqua la Reyne, & en mesme temps tenant sa sœur par la main passa dans son cabinet, où elle ne fut pas plustost entree, qu'elle enuoya vn Huissier dire qu'elle ne vouloit plus estre veüe de personne ce soir là. Monsieur l'Huissier, dit Ennemidor, obligez moy tant que de sçauoir de la Reyne, si ie m'en iray, & si sa Majesté ne me veut plus rien commander. Monsieur, respódit l'Huissier, ie n'oserois parler à elle, parce qu'elle est empeschée. Monsieur l'Huissier, repliqua Ennemidor, sa Majesté

ne treuuera pas mauuais que vous luy demandiez cela. Ie n'en feray autre chose, repartit-il, en rentrāt dans le cabinet. Ennemidor se retira à son logis tout en colere contre ce galand qui luy auoit respondu si rudement. A la verité c'estoit le plus insolent coquin qui fust à la Cour de la Reyne; qui l'ayant pris en vne particuliere affection, luy auoit fait beaucoup de biens. Il auoit esté trois ans laquais de la Duchesse de Gonzanuert, qui luy donna vne charge de Valet de pied chez la Reyne sa sœur, qu'il trahit neantmoins apres y auoir fait sa fortune. Mais quoy, d'ordinaire ces gens là ont l'ame ingrata, & deuiennent tousiours inlupportables, quand de la vie du peuple ils sont esleuez à de grands biens & à de

grands honneurs, parce que n'est à pas accoustumez de les posseder, ils n'en sçauent pas le vray vsage. Aussi dit on cōmunément qu'il vaudroit mieux voir perir vne Cité que de voir enrichir vn pauvre.

Quand Ennemidor s'en fut retourné au logis de Delphis, il treuua qu'elle pleuroit, & s'aperceut bien qu'elle estoit fort fâchée d'auoir esté surprise en cet estat. I'ay eu, dit elle pour s'excuser, vne si grâde apprehensiō qu'il ne vous soit fait demain quelque supercherie, que ie voudrois de bon cœur perdre vn doigt de la main, & que vostre cōbat fust remis en vn autre temps. Parce que cette apres disnee apres auoir fait ma priere aux Dieux pour vostre conseruation, qui m'est chere (*car c'est tousiours à eux à qui i'ay recours en mes afflictions*) i'ay tellement

esté abatuë du sommeil , qu'il m'a esté impossible de luy resister, quoy que i'aye pû faire. En dormant il m'a semblé aduis que Filatee s'est apparue à moy, & m'a dit. Et quoy, Delphis, tu dis que tu m'aymes plus qu'à ta vie, si cela estoit, souffrirois tu qu'Ennemidor, qui est mon cœur & mon ame, & sans lequel ie ne puis vivre, s'exposast au danger où il se precipite, & où ie le perdray assurément ? Si tu me veux encore quelque bien, & si tu m'ayme, retiens-le ie te prie, autrement tiens pour certain qu'il sera ietté dans vne prison chargé de fers, & qu'on attentera puis apres à sa vie. Ha Delphis ! pour l'amour que tu m'as autrefois portée, ne m'abandonne pas en ce besoin, secoure moy ie te coniure, & fais

tant qu'Ennemidor ne me soit point rauy. Voila, Monsieur, ce qui m'est arriué, croyez moy, exemptez vous de ce combat duquel ie n'attends qu'un tres-malheureux succez. Si ie ne vous portois vne parfaite amitié, ie ne vous tiendrois pas ce discours, & ne vous reuelerois pas l'aduis que les Dieux m'ont donné en dormant, parce qu'il n'y a point de doute que vostre mort ne me fust aduantageuse, & qu'indubitablement ie ne gagnasse le cœur de Filatee, quand elle vous auroit perdu. Mais ie prie les memes Dieux qui m'ont aduerty, qu'ils lancent leur foudre sur moy, si ie ne vous prefere pas à toutes les felicitez de ce monde. Ce discours accompagné d'un ruisseau de larmes, estonnerent

extremement Ennemidor , qui ne sçauoit presque à quoy se résoudre. Neantmoins faisant plus d'estat de son honneur que de sa vie, & ne preuoyant les dangers que pour les mépriser, il remercia Delphis du soin qu'il prenoit de luy, & de l'affection qu'il luy faisoit paroistre. Mais que voulez-vous que ie fasse, luy dit-il, ie suis deormais si engagé à me battre, que quand ie serois asseuré de souffrir les plus cruels tourmens que la rage de mes ennemis sçauroit inuenter, ie ne manquerois pas à faire ce que doit vn homme de bien. Non non, Delphis, vous estes trop de mes amis pour me conseiller vne lascheté. Hé quelle opinion auriez de moy? quel iugement en feroient rous mes amis? quel aduantage en

en

en retireroient mes ennemis? qui se fieroit plus en moy? qui me voudroit suiure à l'aduenir? & quels soldats treuuerois-je plus qui me voulussent obeir? Non non, Delphis, si vous voulez que ie croye que vous m'aymez, ne me dōnez plus vn conseil si contraire à mon honneur, car mes ennemis ne m'en sçauroiēt donner vn si mauuais, & qui me soit si preiudiciable. Cependant ie suis d'aduis que nous nous couchiōs, car il est desia tard: Neantmoins ie vous veux faire voir auparauant vne escharpe que la Reyne de Regnautchanfort m'a fait l'honneur de me dōner pour porter sur mes armes. Certes elle est fort belle, dit Delphis, toutesfois ie vous en veux faire voir vne qui ne l'est pas moins. Et en disāt

cela elle en tira vne de sa male & la mit entre les mains d'Ennemidor. O Cieux ! s'escria t'il, dès ce qu'il eut ietté les yeux dessus, c'est asseurement là l'escharpe que ie perdis à Sirapis, lors que l'hoste, chez qui ie logeay, en y arriuant, fouïlla dans ma mallette, & m'y prit vne petite cassette, où estoit cette escharpe avec quelques autres choses que ie tenois aussi cheres que ma vie. Vous oserois-je demander ce que c'est, dit Delphis. Mon cher amy, respondit Ennemidor, ce sont quatre tableaux vn peu plus grands que toute la main, enchassez en deux boëtes d'or, dont il y en a vne couuerte de diamants. Et de qui sont ces tableaux ? repliqua Delphis. Dans la boëte qui est couuerte de diamants, le portrait

de mon ayeul, & celuy de mon ayeule y sont, & en l'autre il y a ma peinture & celle de ma sœur. Certes, reprit Delphis, monsieur, vostre ayeul estoit doncques de Sang Royal, à ce que ie puis iuger par ses habits & par ses armes. Monsieur, repliqua Ennemidor, ne voulant pas respondre à cela, obligez moy tant, s'il vous plaist, que de me dire qui vous a donné cette escharpe, & si vous ne sçauiez point où sont les tableaux dont ie vous ay parlé. Monsieur, repartit Delphis, ie satisferay plus volontiers à vostre demande que vous n'auez voulu contenter ma curiosité. Representez-vous qu'apres que vous eustes tué les voleurs qui m'emmenoient, ie pris vne petite mallette que le balafre gardoit soi-

gneusemēt, & dont il faisoit plus d'estat que de tout ce qu'il auoit. Depuis ayant regardé dedans, i'y ay trouué la piece qui vous tient en vne si grande admiration, ie parle de cette escharpe que vous confiderez ainsi attentiuement, & que vous ne pouuez vous lasser de baiser. Car quāt aux tableaux ie ne les ay point veus, vous asseurant que si ie les auois, ie vous en ferois aussi bien present, que ie vous donne de bon cœur cette escharpe, puis qu'elle vous plaist tant. Elle me plaist, il est vray, Delphis, ie ne vous le puis celer, dit Ennemidor, parce qu'elle a esté faite des mains de la plus belle creature qui se puisse imaginer. Je parle de Filatee, qui la donna au pauvre Oristene, qui m'en gratifia puis apres. Oeuure

admirable ! continua-t'il, en baisant l'escharpe & l'arroufant de ses larmes , ne te dois-je pas adorer comme vne Relique precieuse , puis que tu as si souuent & si long - temps touché les belles mains de l'incomparable Filatee ? O ma Deesse ! faut-il que ie sois priué du moyen de contempler tant de merueilles qui vous rendent plus diuine qu'humaine ? Helas ! le Ciel me fera-t'il si rigoureux, que de me condamner à ne vous voir iamais ? O Iupiter ! ne soyez pas si il vous plaist si inexorable à mes vœux. Au moins apres tant de maux que vous m'auez fait souffrir, permettez moy de luy dire que ie meurs de son amour. O Filatee, Filatee, si tu voyois l'estat miserable de ma vie , ou que tu sceusse le cruel

tourment que i'endure, tu aurois compassion de moy. Il disoit cela d'une voix si lamentable, & versoit une si grande abondance de larmes, que Filatee ne peut en sorte quelcôque retenir les siennes. Elle se ietta sur un liêt soupirant & sanglotant, comme si elle eust esté sur le poinct de perdre la vie. Ennemidor courut promptement à elle, & luy demanda si elle se treuvoit mal. O mon ame ! ie n'en puis plus, luy dit-elle, vous me faites mourir. O amour ! parle pour moy, continua t'elle, estant en son seant & leuant les yeux en haut. Puis en mesme instant se laissant choir le visage sur le cheuet du liêt, elle soupira plus fort qu'auparauât. Ennemidor ne sçauoit que faire ny mesme que penser. Il la tira

souuent à luy , la coniurant de luy dire ce qu'elle auoit, mais voyāt qu'elle ne luy respōdoit rien, & qu'elle souspiroit sans cesse, il luy dit, feignāt d'estre en colere. Et quoy, Delphis, est-ce ainsi que vous vivez avec moy? Certes ie ne croy nullement que vous m'aymiez, puis que vous vous comportez ainsi en mō endroit. Delphis craignant de luy déplaire, & sa douleur estant vn peu apaisée, se leua ayāt les yeux tous rouges & noyez de larmes, puis l'embrassant & le baisant tendrement, luy dit. Monsieur, l'estat où ie vous ay veu presentement, m'a tellement touché de pitié, que ie n'ay pū m'empescher de pleurer. *Vous sçauiez que des larmes attirent les larmes.* Et d'ailleurs me souuenant auoir ouy dire à

Filatee (que vous auez plusieurs fois nommee, & dont ie suis encores amoureux) qu'elle n'aymeroit iamais que vous, ie confesse que i'ay eu le cœur tellement serré de douleur, qu'il y a longtemps que ie n'ay senty vn si violent tourment que celuy que i'ay enduré depuis vn quart-d'heure. Ainsi, Monsieur, vous & moy auons soupiré pour vn mesme suiet. *Les Dieux, qui sçauent mieux que nous-mesmes ce qui nous est necessaire*, nous deliureront s'il leur plaist quelque iour de nos afflictions. Il est tard, couchons-nous, & demain apres que vous aurez mis vostre homme à la raison, vous me ferez l'honneur de me dire de quelle maison estoit Monsieur vostre ayeul, & ie vous diray des nouuelles de vos ra-

bleaux & quelqu'autre chose dont vous serez encores plus ioyeux. Ennemidor la coniura de luy declarer ce que c'estoit, & où estoient ses tableaux, mais elle luy protesta de ne luy en dire rien qu'apres qu'il seroit de retour de son combat. Ennemidor ne pouuant doncques rien apprendre de ce qu'il desiroit sçauoir, il appella les gens de Delphis & les siens, & se coucherent tous deux en vn mesme liēt, ainsi qu'ils auoient accoustumé de faire toutes les nuits depuis qu'ils estoient à Gonzanuert.

Fin du troisieme liure du Romant Satyrique.



LE ROMANT SATYRIQUE.

LIVRE QUATRIESME.



DESIA le Soleil com-
mençoit à dorer le
sommet des monta-
gnes, & à réjouïr tout
le monde avec ses beaux rayons,
lors que Oriston vint fraper à la
porte d'Ennemidor, qui dormoit
encores d'un profond sommeil.
Il auoit eu toute la nuict l'esprit
agité de tant de diuerses pensees
qu'il ne put s'endormir que sur
la poincte du iour. Enuiron cette







